




ধোঁকার ভাতি



প্রকাশক :—
শ্রীকালীকিঙ্কর মিত্র
ইণ্ডিয়ান প্রেস লিমিটেড
এলাহাবাদ

STATE
ACCE
DATE



প্রিটার :—
শ্রীঅপূর্বকৃষ্ণ বসু
ইণ্ডিয়ান প্রেস লিমিটেড
বেনারস-ব্র্যাঞ্চ

ধোঁকান্ন টাতি

(উপন্যাস)

GB12482

শ্রীচান্ধুচন্দ্র বন্দ্যোপাধ্যায়

STATE C.

ACCE.

DATE

৫১-১২৪৮-২

১৪.২.৫৭

প্রাপ্তিস্থান

ইণ্ডিয়ান পাবলিশিং হাউস,
২২/১ কর্ণওয়ালিস্ স্ট্রীট, কলিকাতা।

১৯২৯

সর্ব-স্বত্ব-রক্ষিত]

[মূল্য দুই টাকা

উৎসর্গ

শ্রীযুক্ত পরেশচন্দ্র মুখোপাধ্যায় মহাশয়
বন্ধুবর,


ধোঁকার টাটি যখন ভারতবর্ষে ধারাবাহিক প্রকাশিত হচ্ছিল' তখন আপনি নিয়মিত ভাবে সেটি পড়েছিলেন ও আমাকে প্রশংসা ক'রে উৎসাহিত করেছিলেন। আপনি নির্ভীক স্পষ্টবাদী; আপনি বহু রামযাতুর মুখোস খুলে তাদের স্বরূপ প্রকাশ ক'রেছেন দেখে আমি আপনাকে গভীর শ্রদ্ধা করি, মনে মনে প্রশংসা করি। রামযাতুর অপকর্মের শাস্তি দেখাই নি ব'লে পুস্তকের সমাপ্তি আপনার মনঃপূত হয় নি। তার দুষ্ট চরিত্রের প্রতি পাঠকের মনে যে দিক্কার জন্মে, তাই কি তার ষথেষ্ট শাস্তি নয়? তার জীবনের শেষ তো হয় নি, কোনো দিন যে ঞ্চায়াদীশ বিধাতা তার দণ্ডবিধান করবেন না, তাই বা কে বলবে? আমার রামযাতুকে আপনার হাতে সমর্পণ করলাম; আপনিই তার বিচার ক'রে দণ্ডের ব্যবস্থা করবেন।

প্রীতিকামী

শ্রাবণ, ১৩৫৬

চারু বন্দ্যোপাধ্যায়

রমণা, ঢাকা।



ধোঁকার টাতি

“এ সংসার ধোঁকার টাটি !”—কথিরঞ্জন রামপ্রসাদ সেন ।

কলিকাতায় কলেজ-স্ট্রীট ও হারিসন রোডের মোড়ে খবরের-কাগজ-ফেরিওয়ালারা ফুটপাথের উপর উবু হয়ে বসে’ প্রেস থেকে সজ-আনা খোলা-ছড়ানো কাগজের তা ভাঁজতে ভাঁজতে বিকট কণ্ঠে চোঁচাচ্ছিলো—আই-এ পাশের খবর বেরোয়লো বাবু, আই-এ পাশের খবর বেরোয়লো……

তাদের চারিদিক থেকে ঘিরে উৎসুক উৎকণ্ঠিত ছাত্রবৃন্দ ভিড় করে’ ঠেলাঠেলি করছিলো এবং বুঁকে পড়ে’ একখানা কাগজ অপর সকলের পূর্বে হস্তগত করবার চেষ্টা করছিলো । কাগজওয়ালা একখানা কাগজ তুলে একজন ক্রেতাকে দেবার চেষ্টা করছে, আর তার হাত থেকে ছোঁ মেরে আর-একজন সেখানা নিয়ে নিচ্ছে । সুতরাং ঠেলাঠেলির অন্ত নেই—যে-লোক কাগজ পেয়েছে সে ভিড় ঠেলে বাইরে বেরিয়ে যাবার চেষ্টা

করছে, আর যে তখনো কাগজ পায় নি সে ভিড় ঠেলে ব্যূহের ভিতরে ঢোকবার চেষ্টা করছে,—ফলে, বাইরে বেরোনো ও ভিতরে ঢোকা দুই-ই সহজে হচ্ছে না।

দুটি ছেলে একখানা খবরের কাগজ কিনে নিয়ে কোনোমতে ব্যূহ ভেদ করে' বাইরে বেরিয়ে এলো, কিন্তু কাগজখানাকে তা'রা অঞ্চল বা'র করে' আন্তে পারলে না; কাগজের একটা কোণ অঙ্গুর একজনের আগ্রহান্বিত মুঠার মধ্যেই র'য়ে গেলো। তা'রা বাইরে বেরিয়েই সেই কোণ-ছেঁড়া কাগজখানা দুজনে দুদিকে ধরে' মেলে ফেললে, এবং চলতে চলতেই ভাগ্যবানদের নামের ভিড়ের মধ্যে নিজেদের নাম তল্লাস করবার জন্ত উৎসুক নেত্রের ব্যাকুল দৃষ্টি নামিয়ে নিবিষ্ট হ'য়ে গেলো।

একটি ছেলে ভিড়ের বাইরে এক পাশে দাড়িয়ে ব্যাকুল দৃষ্টিতে কাগজ-ক্রেতাদের দিকে তাকিয়ে ছিলো; সে এবার পরীক্ষা দিয়েছে, নিজের ভাগ্যফল জানবার জন্ত উৎসুক হ'য়ে আছে, কিন্তু তার এমন সঙ্গতি নেই যে, চার পয়সা খরচ করে' একখানা কাগজ কেনে। সে কোনো কাগজ-ক্রেতা ছাত্রের অনুগ্রহ লাভের আশায় উৎসুক হ'য়ে অপেক্ষা করছিলো। সে ঐ ছেলে দুটিকে তার পাশ দিয়ে নিবিষ্ট দৃষ্টিতে কাগজ দেখতে দেখতে যেতে দেখে' কাতর বিনতির স্বরে বললে—মশায়, দয়া করে' একটু দেখুন না থাকোহরি জানার নামটা.....

ছেলে দুটি কাগজ থেকে মুখ তুলে' থাকোহরির মুখের দিকে তাকালে; তার পর কাগজখানা মুড়তে মুড়তে

একজন বললে—মাপ করবেন, এখন আমাদের নাম খোজবার সময় নেই।

তারা দুই বন্ধুই পাশ করেছে; সাফল্যের আনন্দ তাদের মুখে-চোখে বলমল করছিলো, তাদের বাড়ীতে, আর বন্ধুহলে খবর দেবার জন্য ত্বরান্বিত ছিলো। তারা থাকোহরির ম্লান ও ব্যাকুল মুখের দিকে লক্ষ্য না করে' হাসিমুখে গল্প করতে করতে চলে' গেলো।

তখন থাকোহরি আবার উৎসুক আকুল দৃষ্টিতে চারিদিকে চাইতে লাগলো, অপর কোন্ কাগজ-ক্রেতার অগ্রহ সে প্রার্থনা করবে।

থাকোহরির পাশেই দাঁড়িয়ে ছিলো একজন লোক; থাকোহরির ব্যগ্র ব্যাকুলতা দেখে' তার মনোযোগ থাকোহরি-আকৃষ্ট হলো; সে দেখলে, থাকোহরির পরিচ্ছদ প তার মুখ গৌরবর্ণ ও স্ত্রী হ'লেও সেখা-অপরাধী ভাব মুদ্রিত হ'য়ে আছে, তা হ'লেও শঙ্কা-চকিত। সেই লোক করলে—তুমি কি এবার এগজার্ট

থাকোহরি তার ব্যস্ত-দিকে ফিরিয়ে বললে—আ

সেই লোকটি তখন
আমি কাগজ কিনছি,
থাকোহরির মুখ

সেই লোকটি একখানা কাগজ কিনে নিজে না দেখেই থাকোহরির হাতে দিলে।

থাকোহরি আবেগ-কম্পিত হাতে কাগজের পাট খুলে নিবিষ্ট একাগ্রতায় নিজের নাম খুঁজতে প্রবৃত্ত হলো। থাকোহরির অনুসন্ধিৎসু দৃষ্টি প্রথম বিভাগ থেকে দ্বিতীয় বিভাগে এবং ক্রমে দ্বিতীয় বিভাগ থেকে তৃতীয় বিভাগে নেমে গেলো ; যতোই তার দৃষ্টি নেমে চ'লেছিলো ততোই তার চাহনি হতাশ হয়ে উঠছিলো ; তৃতীয় বিভাগে চোখ বুলোতে বুলোতে তার চোখ সজল হয়ে উঠলো—কোথাও তার নাম তার দৃষ্টিতে ঠেকলো না। সে তার অশ্রুতে-ঝাপসা চোখকে পুরো বিশ্বাস করতে পারলে না, পর একবার প্রত্যেক বিভাগে নিজের নামের সন্ধান করলে।

'এ কাগজখানি সম্বন্ধে ভাজ করে' তার-প্রতি-অনুকম্পা-
 'ব হাতে যখন ফিরিয়ে দিলে তখন তার দুই
 'র্থতার বেদনা গলে' গড়িয়ে পড়ছে।

থাকোহরির বিগলিত অশ্রুধারা দেখে'
 'ম দেখতে পেলেন না ? তোমার
 খুঁজে দেখি.....
 ন উচ্ছ্বসিত কান্না দমন করে'

। চোখ বুলিয়ে যখন
 খন তারও চোখে জল
 'জ হয় তো ছাপার

ভুল হয়ে থাকতে পারে ; দাঁড়াও, আমি অন্য কাগজ কিনে দেখছি...

থাকোহরির মন আশার ক্ষীণ আভাসে আবার উৎসুক হয়ে উঠলো ।

সেই লোকটি অন্য একখানা খবরের কাগজ কিনে খুঁজে দেখলে, তাতেও থাকোহরির নাম নেই । সে ব্যথিত দৃষ্টি তুলে থাকোহরির মুখের দিকে তাকালে ।

একজন অচেনা লোকের সহানুভূতি দেখে' থাকোহরি আর আপনাকে সম্বরণ করে' রাখতে পারলে না, সে ফুঁপিয়ে কেঁদে উল্লো—আমার মা পরের বাড়ীতে রাঁধুনির কাজ করে' আমাকে পড়াচ্ছিলেন ; আমি মাকে কেমন করে' মুখ দেখাবো ?.....

এই কথা শুনে ও থাকোহরির কান্না দেখে' সেই অপরিচিত লোকটিরও চোখের ছলছল জল উছলে গড়িয়ে পড়লো । তার মনে হলো—এই ছেলেটির নাম যখন থাকোহরি, তখন নিশ্চয়ই এর মা অনেক ছেলে হারিয়ে হরিকে মিনতি করে' এই একটি ছেলেকে নিজের বারংবার শূন্য কোলে থাকিয়েছে ; সেই মরুক্ষেপে পোয়াতি যমের উচ্ছিষ্ট এই ছেলেটিকে মানুষ করে' তুলে স্থখী দেগবার জন্তে কঠোর তপস্যা করছেন ; মায়ের প্রতি ছেলেরও শ্রদ্ধা ও মমতার পরিচয় তার একটি কথা থেকে যা পাওয়া গেলো, তাতে মনে হয়, ছেলেটিও লেখাপড়ায় অবহেলা করে নি, পাস করবার জন্তে চেষ্টার ক্রটি করে নি । চেষ্টার নিফলতা যে আরো কষ্টকর ! এই কথা ভেবে নিয়ে সেই লোকটি

থাকোহরিকে সাঙ্ঘনা দেবার জগ্গে বল্লে—চেষ্টায় নিফল হ'লেই কি অমন হতাশ হ'তে আছে ? আবার চেষ্টা করো, আস্ছে বছর পাস হ'য়ে যাবে ।

থাকোহরি চোখ মুচ্তে মুচ্তে হতাশা-শিথিল স্বরে বল্লে—আমার আর পড়া হবে না ; কোথাও যা-হোক-কিছু কাজ করে' উপার্জন করতে হবে ; মাকে আর দাসীর কাজ করতে দিতে আমি পারবো না ।

থাকোহরি এই কথা কয়টি এমন করুণ স্বরে বল্লে যে, তার সহানুভূতিতে সেই অচেনা লোকটিও ঘন ঘন চোখ মুচ্তে লাগলো ।

রাস্তার মাঝে এই রকম কান্নাকাটি দেখে' ওদের দুজনকে ঘিরে কল্কাতার হুজুগ-প্রিয় বহু লোক জমা হ'য়ে গিয়েছিলো । সেই জনতার ভিতর থেকে একজন লোক থাকোহরির দুঃখে ব্যথিত ব্যক্তিকে জিজ্ঞাসা কর্লে—ছেলেটি আপনার কে হয় মশায় ?

সেই লোকটি সজল চোখের দৃষ্টি প্রশ্নকারীর দিকে ফিরিয়ে বল্লে—দুজনেই মানুষ, এই হিসেবে ভাই হয় বলতে পারেন ; নইলে ও জাতে জানা, আর আমি মুখুজ্জ,.....

আবার একজন প্রশ্ন কর্লে—অনেক দিনের আলাপ-পরিচয় আছে বুঝি ?

উত্তর হলো—না, এই মাত্র হলো.....

আবার প্রশ্ন হলো—তবে যে আপনি কাঁদছেন ?

ধোঁকার টাটি

মুখুজ্জের লোকটি বিরক্ত হ'য়ে ঘাড় ব্যাকসিয়ে বললে—কাদবো না? মানুষ হয়ে মানুষের দুঃখে কাদবো না?—অবে মানুষ হ'য়ে জন্মেছি কেনো?

প্রশ্নকারীরা পরাস্ত হ'য়ে নিরস্ত হলো। সমস্ত জনতা মুখুজ্জের প্রতি শ্রদ্ধান্বিত হ'য়ে সপ্রশংস দৃষ্টিতে তার মুখের দিকে তাকাতে লাগলো, চারিদিকে সকলে জনান্তিকে তার মহাপ্রাণতার প্রশংসা করতে লাগলো।

এই-সব দেখে-শুনে মুখুজ্জের একটু অপ্রস্তুত হলো, এবং সেখান থেকে প্রস্থানোত্ত হ'য়ে দেখলে যে, থাকোহরি সেখানে নেই। তখন সে একটি দীর্ঘনিশ্বাস চেপে জনতার ব্যুহ ভেদ করে' বাইরে বেরিয়ে পড়লো।

একজন ভদ্রলোক ঘরের গাড়ীতে যেতে যেতে গাড়ী থামিয়ে কাগজ কিনছিলেন। তিনি গাড়ীতে বসে' থেকেই থাকোহরি ও মুখুজ্জের কথাবার্তা সব শুনছিলেন। মুখুজ্জের ভিড় ঠেলে বাইরে বেরিয়ে আসতেই সেই ভদ্রলোক গাড়ী থেকে নেমে এলেন এবং মুখুজ্জের সামনে দাঁড়িয়ে নত হ'য়ে নমস্কার করে' জিজ্ঞাসা করলেন—মুখুজ্জের মশায়ের নামটি কি জানতে পারি?

মুখুজ্জের বিরক্ত ভাবে একবার মাত্র প্রশ্নকারীর মুখের দিকে দেখে' পাশ কাটিয়ে চলে' যেতে যেতে বললে—নাম জেনে আর কী হবে?.....আমার নাম শ্রীরামযাছু মুখোপাধ্যায়.....

সেই ভদ্রলোক বিনীত স্বরে বললেন—আমি মশায়কে

বলতে তো পারি নে, তবে মুখুজে মশায় যদি দয়া করে' এক দিন আমার বাড়ীতে পায়ের ধুলো দেন তো কৃতার্থ হই.....

রামযাছু কার বাড়ীতে, কোথায়, কেনো যেতে হবে, না জেনেই বিরক্ত স্বরে বললে—আচ্ছা, সে একদিন দেখা যাবে!.....

সেই ভদ্রলোক বললেন—আজ্ঞে, আমার নাম শ্রীপরাণচন্দ্র বিশ্বাস, ৩৩ নম্বর হলধর বিশ্বাসের ষ্ট্রীট.....

রামযাছু এইটুকু শুনেই মুখ ফিরিয়ে পরাণ-বাবুর দিকে চেয়ে অগ্রাহের ভাবে বললে—আচ্ছা, তা যাবো একদিন.....

পরাণ-বাবুর বয়স পঞ্চাশ-ছাশ্বান্ন হবে ; তিনি খুব মোটা, আর খুব কালো ; তাঁর মাথাটা হাতীর মাথার মতন, চুল ব্রহ্মতালুর উপর পাতলা হ'য়ে গেছে ও সেখানে টাকের আসর পাতা হচ্ছে ; কিন্তু তাঁর গোপ প্রকাণ্ড, মুখবিবরের উপর ঝাঁপের মতন ঝুলে পড়েছে, কুলোর মতন কান-ছুটোও চুলে আচ্ছন্ন ; তাঁর দাড়ি কামানো । এই কদম্বা চেহারার লোকটির বাড়ীতে পায়ের ধুলো দিবার কিছুমাত্র আগ্রহ অনুভব না করে' রামযাছু পাশ কাটিয়ে দ্রুতপদে প্রস্থান করলে ।

পরাণ-বাবু বাড়ীতে ফিরে গিয়ে পত্নীকে উদ্দেশ্য করে' গম্ভীর স্বরে ডাকলেন—কোথায় গো ?

পাশের ঘর থেকে তেমনি মোটা গলায় জবাব এলো—এই যে, কেনো ?

এই কথা সেই ঘর থেকে বেরিয়ে আসার সঙ্গে-সঙ্গে সেই ঘর থেকে ভোম্বার মতো মিশ-কালো বছর ছয়েকের একটি মেয়ে ছিটকে বেরিয়ে এলো এবং ছুটে পরাণ-বাবুর কাছে এসে তাঁর হাঁটুর কাছটা তুই হাতে জড়িয়ে ধরে' আনন্দিত স্বরে ডাকলো—বাবা !

পরাণ-বাবু বাংসলা-মুখের হাসিতে মুখ ভরে' তুলে' মেয়ের উঁচু দিকে চাইতে গিয়ে পিছন-দিকে-হেলে-পড়া হাসিমুখখানির দিকে নত দৃষ্টিতে চেয়ে কণ্ঠস্বরে আদর ঢেলে বললেন—কেনো মা !

পরাণ-বাবুর এই মেয়েটির নাম কৃষ্ণকলি । ঐ নামের কালো ফুলের সঙ্গে সাদৃশ্য অনুভব করে' পরাণ-বাবু মেয়ের নাম রেখে-ছিলেন, সঙ্গে সঙ্গে মেয়ের নাম ডাকার সময় ঠাকুর-দেবতার নামটা উচ্চারণ করবার লোভটাও তার মনে একটু ছিলো । কৃষ্ণকলির গায়ের রংটি বেশ কালো, চেহারাতেও শ্রী-ছাঁদের নিতাস্তই অভাব—ঠোঁট দুটো পুরু উন্টানো, নাকটা নেই বললেই হয়, কপালটা টিপি-পানা, কান দুটো কুলোর মতন,—এক কথায় সে অতিশয় কুৎসিত । অনেক সন্তানের জনক-জননীর এক মাত্র অবশিষ্ট কোলের ধন এই মেয়ে কালো-কুৎসিত হ'লেও বাপমায়ের বড়ো আদরের,—তাই তাঁরা কালো-কুৎসিত মেয়েরও ফুলের সঙ্গে সাদৃশ্য দেখে' নাম রেখেছেন কৃষ্ণকলি । এই কৃষ্ণকলি নাম অতি আদরে সঞ্চিত হ'য়ে কখনো হয় কেটে, আর কখনো হয় কলি ।

পরাণ-বাবু কৃষ্ণকলিকে কোলে তুলে নিয়ে যে-ঘর থেকে পত্নীর সাড়া এসেছিলো সেই-ঘরে ঢুকলেন। সেখানে তাঁর স্ত্রী ফল ছাড়িয়ে স্বামীর বৈকালী জলখাবার সাজাচ্ছিলেন। পরাণ-বাবুর পত্নীর নাম মাতঙ্গিনী। তাঁর বিপুলায়তন কৃষ্ণবর্ণ কুৎসিত দেহ তাঁর নাম সার্থক করে' তুলেছে!—তিনি যেনো তাঁর কণ্ঠা কৃষ্ণকলিরই শতগুণ পরিবদ্ধিত রাজসংস্করণ! তিনি যেমন মোটা, তেমনি লম্বা—একেবারে যাকে বলে দশাসই! চুয়াল্লিশ ইঞ্চি বহরের কাপড়ে তাঁর পায়ের গোছ ঢাকে না; দশহাতি কাপড় তাঁর বিপুল দেহের পরিধি বেষ্টন করে' আস্তেই ফুরিয়ে যায়, মাথায় ঘোমটা দিতে কুলোয় এমন একটু আঁচল অবশিষ্ট থাকে না। স্বামীকে ঘরে আসতে দেখে' তিনি কাপড়ের আঁচলটা টানাটানি করে' মাথায় তোলবার বৃথা চেষ্টা বার কতক করলেন; অবশেষে হাল ছেড়ে দিয়ে হেসে বললেন—এমন অসময়ে বাড়ীর ভেতর যে?

পরাণ-বাবু হেসে বললেন—অপ্রস্তুত রূপসীর অসম্মত রূপ অতিকিতে দেখে' নিতে এলাম!—

ইয়ম্ অধিক-মনোজ্ঞা বন্ধলেনাপি তন্বী,
কিম্ ইব হি মধুরাণাং মগুনং নাক্লতীনাম্!

মাতঙ্গিনী স্বামীর রসিকতায় সুখী ও লজ্জিতা হয়ে হেসে বললেন—রূপসী তন্বীই বটে! দশ হাত কাপড়ের বেড়ে কুলোচ্ছে না, ইঁপিয়েই সারা হচ্ছি! তোমার বুড়ো বয়সে আর রঙ্গ করতে

হবে না। বাইরে যাও তুমি। এখনো কি পঙ্কপাল এসে জোটে নি ?

পরান-বাবু হাসি মুখে অথচ ক্ষুণ্ণ স্বরে বললেন—এ-রকম কথা তোমার বলা উচিত নয় গিন্নি। আমাদের স্বেযোগ হয়েছে, তাই কতকগুলো টাকা হাতে এসে পড়েছে, আর দশজনের সে স্বেযোগ হয়নি, তাই তারা আমার কাছে আসে। টাকার মূল্য হয় খরচেই তো ? নইলে পুঁজি করে' রেখে দিলে টাকাও যা, ঢেলাও তাই—দুইয়েরই দাম সমান।

মাতঙ্গিনী প্রকাণ্ড নথ নেড়ে বললেন—তা তো যেনো বুঝলাম। কিন্তু তা বলে' তো আমরা হরিশ্চন্দ্র রাজার মতন সর্বস্ব দান করে' আমাদের কলিকে পথে বসাতে পারবো না।

কৃষ্ণকলি বলে' উঠলো—ফুটপাতের উপর বসলে গাড়ী-চাপা পড়বার ভয় নেই মা।

পরান-বাবু হাসিমুখে কলির মুখচুম্বন করে' পত্নীকে বললেন—কলির জন্তে ভেবো না গিন্নি। কলির জন্তে দেশ-জোড়া যে আশীর্বাদ ভগবানের ব্যাঙ্কে জমা হচ্ছে, তাতেই আমার কলির সকল অভাব মোচন হবে—সে ব্যাঙ্ক কখনও ফেল হয় না।

মাতঙ্গিনী মনে খুশী হ'য়েও মুখে বিরক্তি দেখিয়ে বললেন—শুধু ভূয়ো আশীর্বাদ কুড়িয়ে ধুয়ে খেলে তো পেট ভরবে না ! কলিকালে আশীর্বাদ আবার ফলে না কি ? তা হ'লে অমন হাতী হাতী ছেলেগুলো মরতো না।

পরান-বাবুর মুখ বিষণ্ণ হ'য়ে উঠলো ; তিনি স্নিগ্ধস্বরে বললেন

—ভগবান্ দুঃখ দেন পরের দুঃখ অনুভব করতে শেখবার জগ্গে । ভগবানের সেই শিক্ষা কি তুমি ব্যর্থ করবে মনকে সকলের দিক থেকে বিমুখ করে' রেখে ? শুধু কি আমার নিজেরটুকু নিয়েই জগৎ, গিন্নি ? প্রসন্ন মনে দিয়ে চলো যতদূর দিছে পারো ; তা হ'লে পেতেও আর কিছু বাকী থাকবে না ।

মাতঙ্গিনী অন্তরে স্বামীর মহত্ত্ব অনুভব করতেন ; কিন্তু পাছে দানের নেশাতে স্বামী সব খুইয়ে ফতুর হ'য়ে পড়েন এই আশঙ্কায় তিনি মাঝে মাঝে স্বামীর দানের ঝোকটাকে একটু পিছনে টেনে' রেখে' তাঁকে সচেতন ও সাবধান করতে চেষ্টা করতেন । মাতঙ্গিনী স্বামীর কথায় খুশী হ'য়ে হেসে' বললেন—আচ্ছা গো কথার ভট্‌চাজ্জি, আচ্ছা ! একা রামে রক্ষে নেই আবার স্ত্রীবি দোসর হ'লেই তো হয়েছে ! তোমার সঙ্গে সঙ্গে আমিও দিতে থাকলেই তো চিত্তির ! আমি রূপণ মানুষ, আমার হাত দিয়ে জল গলে না, টাকা কড়ি তো অনেক স্কুল জিনিস্ !

পরাণ-বাব হেসে বললেন—তুমি যে কেমন রূপণ তা আমার জানতে বাকী নেই গো, বাকী নেই । বেজা নাপ্তের বৌ, জগা ছুতোরের ছেলে, মধু হাল্দারের নাতনী.....

নিজের গোপন দানের পাত্রদের নামের ফর্দ শুনে' লজ্জিত মুখে হেসে' মাতঙ্গিনী বললেন—আচ্ছা গো আচ্ছা, তোমার অতো পরচচ্চায় মন কেনো বলো তো ? কে কোথায় কি করছে আড়ি পেতে লুকিয়ে লুকিয়ে সব খবর নেওয়া হয় !

পরাণ-বাবু হেসে বললেন—পরচর্চা তোমার কাছেই শিক্ষে
—তুমি তো আমাকে ছেড়ে কথা কও না !

মাতঙ্গিনী নথ তুলিয়ে বললেন—তুমি কি আমার পর ?

পরাণ-বাবু হেসে বললেন—আর তুমি কি আমার পর ?

মাতঙ্গিনী কথা কইতে কইতেই জলখাবারের জো শেষ করে’
ফেলেছিলেন ; তিনি একখানা আসন পেতে তার সামনে জল-
খাবারের রেকাবি রাখতে রাখতে বললেন—বেশ গো বেশ,
এখন জল খাও তো, মুখ একটু বন্ধ থাকুক । এখনি আবার
কে এসে পড়বে ; খাওয়া হবে না, নিজের খাবারটি তার মুখের
কাছে ধরে’ দেবে !

পরাণ-বাবু একটু কাচুমাচু ভাবে বললেন—দেখো গিন্নি,
আবশ্যকের অতিরিক্ত গিলে গিলে ফল হচ্ছে তো এই প্রকাণ্ড
দেহ নিয়ে সদাই অসাব্যস্ত থেকে ঠাঁপিয়ে মরা ! খিদে কা’কে
বলে, তা তো একদিনের তরেও জানতে পারলাম না । তার
চেয়ে খিদে’র অন্ন যারা পায় না, তাদের খেতে দেওয়ায় কি বেশী
স্বখ নয় ?

মাতঙ্গিনী হেসে জিজ্ঞাসা করলেন—বাইরে কেউ এসেছে
বুঝি ?

পরাণ-বাবু কুণ্ঠিত-স্বরে বললেন—হ্যাঁ । একটি ছেলেকে
তার মা পরের বাড়ীতে রাধুণীর কাজ করে’ পড়াতো ; সে
এগজামিনে ফেল করেছে বলে’ রাস্তায় দাঁড়িয়ে কাঁদছিলো...

মাতঙ্গিনী মুখ ঘুরিয়ে নথ নেড়ে বললেন—আর তুমি তাকে

রাস্তা থেকে কুড়িয়ে নিয়ে এসেছো ! নিজে হ'তেই বাড়ীতে এসে যা জোটে তারই ঠেলা সামূলানো দায়, তার উপর আবার পথ কুড়োতে আরম্ভ করলেই তো চিত্তির !

পরাণ-বাবু কুণ্ঠিত স্বরে বললেন—না, না, তা কেনো ? কলির জগ্রে তো একজন মাষ্টার রাখতে হবেই ; ছেলেটি দেখতে শুন্তে বেশ ভালো, তাই নিয়ে এসেছি—বাড়ীতে থাকবে, আর.....

মাতঙ্গিনী ব্যস্ত হ'য়ে বলে' উঠলেন—না না, ও-সব উপদ্রব বাড়ীতে ঢুকিয়ে না । নিজেদেরই দেখবার শোন্বার লোক নেই, তার উপর আবার পরের ছেলের ঝঙ্কি কে সামলাবে ?

পরাণ-বাবু স্ত্রীর স্বভাব জান্তেন—স্বামীর কথায় আপত্তি করে' শেষে তা আপনা হ'তে পালন করা ছিলো তাঁর রীতি । তাই পরাণ-বাবু হেসে বললেন—আচ্ছা আচ্ছা, তোমার যখন মত নেই, তখন তাকে গোটা কতক পয়সা দিয়ে বিদায় করে' দিই গে, দোকান থেকে কিছু কিনে খাবে—কচি ছেলে, খিদেয় দুঃখে একেবারে মুষ্ড়ে পড়েছে ।

মাতঙ্গিনীর মন অম্নি স্নেহর্দ্র হ'য়ে উঠলো ; তিনি বলে' উঠলেন—আহা ! কতো বড়ো ছেলেটি ? তাকে বাড়ীর ভিতরেই ডেকে আনাও না, আমি একবার দেখি ।

স্ত্রীর কোমলহৃদয়ের আর-একটি পরিচয় পেয়ে পরাণ-বাবু সুখী হ'য়ে বললেন—আচ্ছা, তুমি আনা দুচ্চার পয়সা বা'র করো, আমি তাকে ডেকে আনছি ।

পরাণ-বাবু কৃষ্ণকলিকে কোলে ক'রেই বা'র হ'য়ে গেলেন। মাতঙ্গিনী ক্ষুধিত অতিথির জন্তে পয়সা বা'র না করে' খাবারের ঠাই করতে লাগলেন।

পরাণ-বাবুর আছ্রানে থাকোহরি পরাণ-বাবুর পিছনে পিছনে বা'র-বাড়ীর ও ভিতর-বাড়ীর মাঝখানে একটা দালানে এসে দেখলে, একটা পুরু গালিচার আসনের সামনে এক রেকাবি জলখাবার ও সর্বপোশ-ঢাকা এক গেলাস জল রয়েছে; তারই সামনে নর্দামার কাছে একঘটা জল আর একখানা ধোয়া তোয়ালে রয়েছে, আর তার কাছে একজন চাকর দাঁড়িয়ে আছে। পরাণ-বাবু অতিথি-সংকারের এই আয়োজন দেখে' খুশী হ'য়ে থেমে' ঘুরে দাঁড়িয়ে থাকোহরিকে বললেন—ব'সো বাবা, একটু জল খাও।

থাকোহরির বিলক্ষণ খিদে পেয়েছিলো ব'লেও বটে এবং অপরিচিত স্থানে ওজর-আপত্তির কোনো কথা বলতে লজ্জা অনুভব ক'রেও বটে, সে কোনো কথা না বলে' কুণ্ঠিত ভাবে এই রাজভোগ খেতে বসলো।

তার সামনে পরাণ বাবু মেয়েকে কোল থেকে নামিয়ে তার হাত ধরে' দাঁড়িয়ে আছেন; মাতঙ্গিনী কপাটের আড়ালে দাঁড়িয়ে দারিদ্র্যমূর্তি বালকটির প্রতি করুণায় কাতর হ'য়ে তার খাওয়া দেখছেন; এমন সময় একজন চাকর এসে পরাণ-বাবুকে বললে—বাইরে একজন বাবু এসেছেন।

পরাণ-বাবু জিজ্ঞাসা করলেন—কোন্ বাবু?

চাকর বললে—এ বাবু নতুন—খুব রোগা, ফর্সা মতন...

এই শুনেই পরাণ-বাবু বলে' উঠলেন—ও! রামযাদু-বাবু এসেছেন। তাঁকে আমি আমার বাড়ীতে পায়ের ধুলো দিতে নিমন্ত্রণ করেছিলাম। পরের দুঃখে ঝাঁর চোখের জল পড়ে, তিনি মহাপুরুষ!

থাকোহরি এতক্ষণ মাথা হেঁট করে' খাবার খাচ্ছিলো; পরাণ-বাবুর কথা শুনে সে মুখ তুলে পরাণ-বাবুর দিকে চাইতেই পরাণ-বাবু তাকে বললেন—সেই যে-বাবুটি কাগজ কিনে তোমায় দেখতে দিয়েছিলেন.....

থাকোহরির মন সেই অচেনা দরদীর নাম শুনেই রুতজ্জতায় ভরে' উঠলো, তার চোখ ছল্ছল আর মুখ জল্জল করতে লাগলো।

থাকহরির মুখের ভাব দেখে খুশী হ'য়ে পরাণ-বাবু বললেন—তুমি বসে' বসে' খাও, তাড়াতাড়ি কিংবা লজ্জা ক'রো না, আমি রামযাদু-বাবুর সঙ্গে আলাপ করিগে।...ওগো, তুমি বেরিয়ে এসো না, একরত্তি ছেলেমানুষকে দেখে' আবার লজ্জা!

স্বামীর ডাকে লজ্জিত হাসিমুখে মাতঙ্গিনী কপাটের আড়াল থেকে একটু একটু করে' সরে' এসে থাকোহরির পিছনে দাঁড়ালেন। পরাণ-বাবু বললেন—তুমি থাকোহরিকে খাওয়াও, আমি বাইরে রামযাদু-বাবুর কাছে যাই।

মাতঙ্গিনী চাপা গলায় ফিস্ফিস্ করে' জিজ্ঞাসা করলেন—
তাঁর জলখাবার বাইরে পাঠাবো কি?

পরাণ-বাবু বাইরে যেতে যেতে বললেন—তিনি ব্রাহ্মণ ।
আমার বাড়ীতে থাকেন বুঝলে বলে' পাঠাবো ।

কৃষ্ণকলি বাবার হাত ছেড়ে দিয়ে এসে মার হাত ধরে' কৌতূহল-ভরা দৃষ্টিতে থাকোহরির যাওয়া দেখতে লাগলো ।

থাকোহরি অপরিচিত লোকের বাড়ীতে প্রথম দিন এসেই খেতে লজ্জা বোধ করছিলো ; তা'তে আবার এখন অন্তঃপুরের সীমানায় বসে' একজন স্ত্রীলোকের সামনে তাঁরই তদারকে খেতে তার অত্যন্ত লজ্জা করতে লাগলো ।

সে আড়ষ্ট হ'য়ে অল্প খেয়েই পরাণ-বাবুর যাওয়ার সঙ্গে সঙ্গেই হাত গুটিয়ে বসলো ।

তা দেখে' মাতঙ্গিনী থাকোহরির সামনে একটু এগিয়ে এসে বললেন—এখনি হাত গুটুলে তো চলবে না বাবা—বেশী তো কিছু দিইনি—ও-সব তোমায় খেতে হবে.....

থাকোহরি অপ্রতিভ মুখ না তুলে' এবং কিছু না বলেই আবার খেতে প্রবৃত্ত হলো । বাইরের অনুরোধের চেয়ে তার আভ্যন্তরিক অনুরোধ তখনো প্রবল ছিলো । সে পাত্রের সমস্ত খাদ্য নিঃশেষ করে' হাত গুটিয়ে বসলো ।

তখন মাতঙ্গিনী বললেন—উঠে হাত ধোও বাবা । ও ভুখন, বাবুর হাতে জল দে ।

দালানের একপাশে—যেখানে ভুখন কাঁধে ধোয়া নূতন তোয়ালে আর হাতে জলের ঘটা নিয়ে দাঁড়িয়ে অপেক্ষা করছিলো;

থাকোহরি সেখানে গিয়ে কুণ্ঠিত হ'য়ে বললে—ঘটাটা আমায় দাও, আমিই জল নিচ্ছি.....

থাকোহরির কথা শুনেই মাতঙ্গিনী ব্যস্ত হ'য়ে ব'লে উঠলেন—
না, না, ও ঘটা তুমি ছুঁয়ো না, তোমার ছোঁয়া জল আবার
কোথায় পড়বে টডবে আর আমরা মাড়াবো.....

থাকোহরি মনে করলে সে ছোটো জাত বলে' মাতঙ্গিনী
তাকে ঘটা ছুঁতে নিষেধ করছেন। থাকোহরি সঙ্কচিত হ'য়ে
অপ্রতিভ মুখে চাকরের দিকে হাত বাড়িয়ে নত হলো ; চাকরের
হাতের ঘটা থেকে 'ঢালা জলে হাত মুখ ধুয়ে সে ফিরে দাঁড়িয়ে
নিজের কোঁচার কাপড়ে হাত মুখ মুছতে লাগলো ; চাকর
তোয়ালে এগিয়ে দিলে অত্যন্ত কুণ্ঠিত হ'য়ে থাকোহরি বললে—
থাক্.....

মাতঙ্গিনী তখন কণ্ঠার হাতে পানের ডিবে দিয়ে বললেন—
কলি, যাও, তোমার মাষ্টার-মশায়কে পান দাওগে।

থাকোহরি লজ্জিত মৃদুস্বরে বললে—আমি পান খাইনে।
মাতঙ্গিনী তাড়াতাড়ি ঘরে যেতে যেতে বললেন—তবে
দাঁড়াও বাবা, মসলা এনে দিচ্ছি।

মাতঙ্গিনী চলে' গেলে কৃষ্ণকলি আশ্রয়হীনা ক্ষুদ্র লতার মতন
অপরিচিতের সামনে দাঁড়িয়ে কোতুক ও কোতুহলের সঙ্গে তাকে
দেখছিলো, এবং মা'র কাছে পালাবে কি মা'র আগমনের অপেক্ষায়
দাঁড়াবে এই দ্বিধা মীমাংসা করবার চেষ্টা করছিলো। তার
অতিস্থির হবার আগেই থাকোহরি হঠাৎ এগিয়ে গিয়ে টপ করে'

কৃষ্ণকলিকে কোলে তুলে নিলে এবং তার মুখের দিকে মুখ ফিরিয়ে হেসে জিজ্ঞাসা করলে—তোমার নাম কি খুকুমণি ?

কৃষ্ণকলি থাকোহরির প্রশ্নের উত্তর না দিয়ে লজ্জার সঙ্কোচে মুখ ফিরিয়ে তার কোল থেকে নেমে পড়বার জ্ঞতা ছটফট করতে লাগলো, কিন্তু থাকোহরির বাহবেষ্টন থেকে নিজেকে কিছুতেই মুক্ত করতে পারছিলো না।

মাতঙ্গিনী একটা ডিবের খোলে করে' মসলা নিয়ে ঘরের দরজার কাছে এসেই মেয়েকে থাকোহরির কোলে দেখে' আতঙ্কিত হ'য়ে বলে' উঠলেন—ও কি সর্বনাশ করছে বাবা ! ওর পা যে তোমার গায়ে ঠেকেছে—শিগ্গির নাবিয়ে দাও গুকে, শিগ্গির নাবিয়ে দাও । এতে আমাদের অপরাধ হবে যে, পাপ হবে যে !

কৃষ্ণকলি থাকোহরির কোল থেকে নাম্বার জ্ঞতা চেপ্টা করছিলোই, তার উপর মাতঙ্গিনীর হঠাৎ ব্যস্ততায় অপ্রস্তুত হ'য়ে থাকোহরি কৃষ্ণকলিকে কোল থেকে নামিয়ে দিলে ।

মাতঙ্গিনী অমনি মেয়েকে বললেন—মাষ্টার-মশায়কে পেন্নাম করো কেট্টো—মাষ্টার মশাই বামুন, তাঁর গায়ে পা ঠেকেছে.....

কৃষ্ণকলি সার্কাসের সায়েস্তা জানোয়ারের মতন ব্রাহ্মণ শব্দের সঙ্কেতেই থাকোহরির সামনে গড় হ'য়ে প্রণাম করতে যাচ্ছিলো, থাকোহরি থপ্ করে' তাকে ধরে' আবার কোলে তুলে নিলে এবং লজ্জিত মুখে মাতঙ্গিনীকে বললে—আমরা বামুন নই মা, আমরা জাতে মাহিষ্য ।

মাতঙ্গিনী আশ্চর্য হ'য়ে বলে' উঠলেন—বামুন নও! কৈবর্ত? তবে যে কত্তা বলছিলেন তোমার মা কাদের বাড়ী রাঁধুনির কাজ করেন।

থাকোহরি অপ্রস্তুত কুণ্ঠিতভাবে বললে—দাসীর কাজের চেয়ে রাঁধুনির কাজে একটু সম্মান খাতির বেশী পাওয়া যায় আর মাইনেও বেশী মেলে, তাই মা রাঁধুনির কাজ করেন।

মাতঙ্গিনী শিউরে উঠে মুখ একেবারে অন্ধকার করে' বলে' উঠলেন—সর্বনাশ! সে কি গো! লোকের জাত মারা! সে যে বিষম পাপ!

থাকোহরি অপ্রতিভভাবে বললে—মা ব্রাহ্মবাড়ী রাঁধেন। ব্রাহ্মরা তো জাত মানে না।

থাকোহরির এ উত্তরে মাতঙ্গিনী কিছুমাত্র আশ্বস্ত না হ'য়ে বললেন—বেশজ্ঞানী? তারা তো খিষ্টান। ওমা, খিষ্টানের বাড়ী রান্না খাওয়া! তা হ'লে তোমাদেরও জাত নেই—তোমরাও খিষ্টান নাকি?

থাকোহরি অত্যন্ত অপ্রস্তুতভাবে বললে—আজ্ঞে না। সেখানে হাঁড়ি হেঁসেল আর কেউ ছোঁয় না, আমরা সেখানে স্বপাক খাই।

মাতঙ্গিনী এই কথায় একটু আশ্বস্ত হ'য়ে বললেন—তা হোক বাছা! কিন্তু খিষ্টানের বাড়ী তো। সেখানে তোমরা আর থাকো না। তোমরা যখন আমাদের স্বজাত, তোমরা আমাদের বাড়ীতে এসেই থাকো। এখানে কলিরও কেউ খেলবার সঙ্গী

নেই, আমিও একলাটি আর পেয়ে উঠিনে। অপরাধের ভয়ে বামুন তো রাখতে পারিনে; আমাদেরই স্বজাতের একটি মেয়ে ছিলো এতোদিন, ঘর-সংসার দেখতো শুনতো; তার মেয়ে-জামাই-এর আবস্থা হচ্ছে বলে' সে চলে' গেছে। এখন তোমার মা এলে আমিও একজন কথা কইবার লোক পেয়ে বাঁচি।

থাকোহরি এই অপরিচিত দম্পতীর মহৎ উদার সদয় হৃদয়ের পরিচয় পেয়ে কৃতজ্ঞ দৃষ্টিতে একবার মাতঙ্গিনীর মুখের দিকে তাকিয়ে হঠাৎ তাঁর পায়ের কাছে মাটিতে মাথা ঠেকিয়ে প্রণাম করলে।

থাকোহরি প্রণাম করে' উঠে দাঁড়াতেই মাতঙ্গিনী বললেন—তা হ'লে এই ঠিক হলো তো বাবা? মাকে নিয়ে এসে এই বাড়ীতেই থাকবে তো?

পিছন থেকে পরাণ-বাবু তাঁর প্রাণখোলা সাদা সরল হাসি হেসে বলে' উঠলেন—আমাকেও তুমি জিতে গেলে গিন্নি! আমি কেবল থাকোহরিকেই নিমন্ত্রণ করেছিলাম, তুমি থাকোহরির মা-ঠাকরুণকেও নিমন্ত্রণ করলে। আমরা যখন স্বজাত, পরিচয় হ'লে একটা সম্পর্কও বেরিয়ে যেতে পারে চায় কি। আত্মীয়ের সঙ্গে থাকতে আর বাধা কি? কি রলো বাবা?

থাকোহরি মুখে কিছু বলতে না পেয়ে পরাণ-বাবুকেও প্রণাম করে' পূর্ণ প্রাণের কৃতজ্ঞতা নিবেদন করলে।

পরাণ-বাবু বললেন—তবে তোমার মাকে নিয়ে আসো, কেমন?

থাকোহরি বিনীত মৃদুস্বরে বললে—মা যাদের বাড়ী কাজ করেন, তাঁরা একজন লোক না পাওয়া পর্যন্ত চ'লে আসা কি ঠিক হবে ?

পরান-বাবু খুশী হ'য়ে বলে' উঠলেন—ঠিক বাবা ঠিক ! তবে যতো শিগগির পারো—এসো ।

থাকোহরি নতমুখে বললে—আচ্ছা ।

পরান-বাবু বললেন—রামঘাট-বাবুর মতন ক'রো না যেনো । আসবো বলে' আর দেখা নেই । তিনিই দয়া করে' পায়ে ধুলো দিতে এসেছেন মনে করে' তাড়াতাড়ি বাইরে গেলাম ; গিয়ে দেখি সে রামঘাট-বাবু নয়, সে বামাচরণ । রামঘাট-বাবু অতি চমৎকার মহাশয় লোক— নয় ?

থাকোহরি মৃদুস্বরে বললে—আজ্ঞে ।

পরান-বাবু বলে' উঠলেন—একটা বড়ো ভুল হ'য়ে গেছে—তাঁর ঠিকানাটা ছেনে রাখা হয়নি । তিনি দয়া করে' নিজের নামে এলে অমন মহৎ লোকের দর্শন আর পাওয়া যাবে না । তোমার ঠিকানাটা বলো তো—তুমি আপনি না এলে আমি যেনো ধরে' আনতে পারি ।

থাকোহরি কৃতজ্ঞ আনন্দে লজ্জিত স্মিতমুখে বললে—আমরা থাকি ৬৭।১।১এ অচিন্ত্য দত্তর গলিতে নীলাক্ষর বন্দ্যোপাধ্যায় ডাক্তারের বাড়ী ।

পরান-বাবু হেসে বললেন—অতো কথা বড়ো মাসুকের মনে থাকবে না—বাইরে চলো একটু লিখে দেবে ।

থাকোহরি পরাণ-বাবুর পিছনে পিছনে বাহির-বাড়ীতে চলে' গেলো ।

থাকোহরি চলে' যেতেই কৃষ্ণকলি মার মুখের দিকে মুখ তুলে বলে' উঠলো—ও কে মা ? ও বেশ ভালো—না ? কেমন ফস্মা শাদা ! কেমন কোঁকড়া কোঁকড়া চুল মা ! দাঁতগুলো চক্চক করছে—পান খায় না কি না ! খুব ভালো—না মা ?

মাতঙ্গিনী হেসে ঘাড় কাত করে' মেয়ের কথায় সায় দিলেন । কৃষ্ণকলি আবার বলতে লাগলো—কিন্তু ও অতো রোগা কেনো মা ?

মাতঙ্গিনী ব্যথিত হ'য়ে করুণার্দ্র স্বরে বলে' উঠলেন—আহা গরিব, ভালো করে' খেতে পরতে পায় না.....

কৃষ্ণকলি বলে' উঠলো—তুমি তো ওকে খেতে দিলে মা, কৈ মোটা তো হ'লো না ?

মাতঙ্গিনী হেসে বললেন—একদিন খেলেই কি মোটা হয় রে পাগলী ? রোজ রোজ খুব পেট ভরে' খেলে তবে মোটা হয় ।

কৃষ্ণকলি বললে—ও তো এখানে এসে থাকবে, ওকে রোজ রোজ খেতে তো দেবে, তা হ'লেই ও তোমার মতন আর বাবার মতন মোটা হ'য়ে যাবে ?

মাতঙ্গিনী হেসে বললেন—ই্যা ।

কৃষ্ণকলি গাল ফুলিয়ে বলে' উঠলো—না মা, অতো মোটা বুঝি ভালো ? মোটা হ'লে আবার কালো কিষ্টিও হ'য়ে যাবে তো ? ওকে তা হ'লে বেশী বেশী খেতে দিয়ো না মা ।

মাতঙ্গিনী হেসে উঠে বললেন—আচ্ছা রে আচ্ছা, ওকে তোর মনের মতন করে'ই গড়ে' তুলবো।

এই কথা বলতেই মাতঙ্গিনীর মনে থাকোহরিকে ঘর-জামাই করবার ভবিষ্যৎ সম্ভাবনাটা বিদূৎ-চমকুর মতন উকি মেয়ে চলে' গেলো।

*

*

*

পরান-বাবু তাঁর বাড়ীতে পায়ের ধূলা দিবার যে নিমন্ত্রণ ক'রেছিলেন, তা রামযাদু প্রথমতঃ ততো গ্রাহ্য করেনি। রামযাদু বুঝতে পারেনি যে সেই নিমন্ত্রণ রক্ষা করলে তার কিছু স্বার্থ-সিদ্ধির সম্ভাবনা থাকতে পারে; বিনা স্বার্থে কোনো কাজ করবার মতন স্বভাব রামযাদুর ছিলো না।

রামযাদুর চেহারা তার স্বার্থপর স্বভাবকে ছেলেবেলা থেকে সাহায্য করে' করে' তার স্বভাবকে একেবারে পাকা করে' গড়ে' তুলেছিলো। তার চেহারাটাই ছিলো এমন যে তাকে দেখলেই লোকের মনে করণার উদ্রেক হতো, আহা বলে' মমতা দেখাতে ইচ্ছা করতো। তার রংটা ছিলো ক্যাকাশে, শরীরটা ভয়ানক ক্লশ, নাকটা দস্ত্য-স উন্টে ধরলে যেমন দেখায় তেমনি ঝড়শীর মতন বাঁকা আর ছুঁচোলো, চোখ দুটো ছিলো ছল্ছলে—যেনো একটা কিছুর দুঃখ-ব্যথা তার অন্তরে গোপন থেকে চোখের আয়নায় আপনার ছায়া ফেলেছে; তার মুখের মোট ভাবটা ছিলো নিরীহ; মনটা ছিলো সাবধানী, স্বভাবটা ছিলো সংসারী—

যেখানে যেমনটি হ'লে সুবিধা হ'তে পারে সেখানে ঠিক তেমনটি হুঁসিয়ার হ'য়ে চারিদিকের তাল সামলে সে চলতে পারতো,—এ ছিলো তার সহজাত বুদ্ধি, স্ব-ভাব, ইংরেজিতে যাকে বলে ইন্স্টিংক্ট। সে যার কাছে যে কাজের জন্তে হাজির হতো, তারই এমন করুণা আকর্ষণ করতো, যে কেউ তাকে একেবারে অগ্রাহ্য বা উপেক্ষা করে' ছেঁটে ফেলতে পারতো না। তার এই ঈশ্বর-দত্ত সুবিধা তার কাছে ধরা প'ড়েছিলো তার ছেলেবেলাতেই—যখন তার বয়স সবে ষোলো বছর।

রামযাহুর বাড়ী ছিলো যশোর জেলায় চিত্রা নদীর তীরে একটা ছোটো গাঁয়ে। তাদের সাংসারিক অবস্থা ভালো না হ'লেও মন্দ বলা যায় না; তাদের ছিলো চার ভিটায় চারখানা চালা ঘর, গোয়ালে দুখোলো দুটি গাই, কয়েক বিঘা লাখেরাজ ব্রহ্মত্র জমিতে সস্বৎসরের ধানের সংস্থান, খেজুর-গাছে গুড়, আর সুপারি ও নারিকেল-গাছের একটা বাগান,—যার ফলকর বেচে তেল তুন কাপড়ের পয়সা জোগাড় হ'তে পারতো; এর উপরে রামযাহুর বাবা নড়ালের বাবুদের জমিদারীতে দূর মফঃস্বলে গোমস্তার কাজ করতো—সেই কাজের মাইনে সামান্য হ'লেও রামযাহুর মা বেশ ভারী ভারী খানকতক সোনারূপার গহনা গায়ে প'রে আপন এয়োতের পর আর জোর জানাতো। রামযাহুর বাবা মারা গেলে আয় অনেকটা কমে' গিয়েছিলো বটে, কিন্তু তবু তাদের কষ্টে পড়তে হয়নি—পরিবারে তো তারা মাত্র দুজন—মা আর

ছেলে; রামযাদুর এক বড়ো বোন ছিলো, কিন্তু তার বাবা থাকতেই তার বিয়ে হ'য়ে গিয়েছিলো।

রামযাদুর দিদির শশুরবাড়ীর অবস্থা ভালো ছিলো না মোটেই। তার ভগ্নীপতি ছিলো যশোরের এক উকিলের মুহুরী—এই চাকুরীটুকু ছাড়া তার আর কোনো সম্বলই ছিলো না। তাই বোন যখন বিধবা হ'লো তখন ভাইএর আশ্রয় ছাড়া তার আর কোনো গতি রইলো না।

এই পরিবার-বৃদ্ধির সম্ভাবনাতে বালক রামযাদু একটু ক্ষুণ্ণ ও চিন্তিত হ'য়ে উঠলেও মার আদেশে দিদিকে নিজেদের বাড়ীতে আন্বার জন্ত তাকেই যশোরে যেতে হয়েছিলো। বিধাতা একএকজনের উপর অকারণেই প্রসন্ন থাকেন; রামযাদুর অদৃষ্টটাও ছিলো তেমনি; সে ক্ষুণ্ণ মনে যশোরে গিয়ে খুশী হ'য়েই ঘরে ফিরেছিলো।

যশোরে গিয়ে যখন সে পৌঁছালো, তখন রাত প্রায় দশটা। পথ অন্ধকার, নির্জন; ষ্টেশন থেকে তার দিদির বাসা পর্যন্ত অনেকখানি পথ। রামযাদুর একলা যেতে ভয় করতে লাগলো, অথচ এইটুকু পথের জন্তে গাড়ী ভাড়া করতেও তার ইচ্ছে হচ্ছিল না—সেই ছেলেবেলাতেই সে দস্তুরমতো হিসাবী সংসারী, এই গুণটি সে উত্তরাধিকারসূত্রে পিতৃ পিতামহের কাছ থেকে নিজের শোণিত-মজ্জার মধ্যে বিনা চেষ্টাতে, কেবল জন্মাধিকারেই পেয়েছিলো। রামযাদু ভয়ে ভয়ে এদিক ওদিক চাইতে চাইতে হনহন করে' পথ চলছে, তার গাটা ছম্ছম্ করছে, কিন্তু সে

মনের মধ্যে কোনো ভয়ের চিন্তাকেই আকার ধরে' স্পষ্ট হ'য়ে উঠতে দিচ্ছে না। হঠাৎ তার কানে আওয়াজ এলো,—
 “মাণিকপীর মুস্কিল আসান!” মুস্কিল আসান ফকিরদের মোটা চড়া গলার চীংকার রামযাদুর মনে ছেলেবেলা থেকেই আতঙ্ক উৎপন্ন করতো; এই ফকিরেরা ভিক্ষায় বাহির হয় তখন, যখন রাত্রে অন্ধকার ছেলের জুজুর ভয় দেখিয়ে জড়োসড়ো করে' ঘুম পাড়াবার জোগাড় করে, যখন শিশু-কল্পনার আড়াল আব ডাল থেকে আলো-আঁধারের মধ্যে উঁকি মেরে ভূত পেত্নী শাঁকচিনি ভয় দেখাতে থাকে। রামযাদুর বয়স এখন শৈশব পেরিয়ে যৌবনের দিকে পা বাড়ালেও, এই নিশুভ নিঝুম রাতে নির্জন পথে একলা চলতে চলতে মুস্কিল আসানের রব শুনেই শৈশব-সংস্কারের বশে তার মনটা ছাঁত করে' উঠলো। সে চকিত দৃষ্টিতে চারিদিকে একবার তাকিয়ে একটু এগিয়ে যেতেই দেখলে মুস্কিল-আসান ফকির তার চারমুখো চেরাগ হাতে ধরে' ভিক্ষা সেরে বাড়ী ফিরছে—চারমুখো চেরাগের আলোতে ফকিরের প্রকাণ্ড চওড়া মুখের এক-বোঝা কাঁচা-পাকা দাড়ি আর তার লম্বা কল্কলে আলখাল্লার সামনেটা উজ্জল হ'য়ে উঠেছে। রামযাদু বাল্য-সংস্কারের ভয়টা চট করে' দমন করে' হনহন করে' ফকিরের কাছে এগিয়ে গিয়েই বলে' উঠলো—এই যে মুস্কিল-আসান ফকির! তোমাদেরই একজনকে আমি সন্ধ্য থেকে খুঁজে বেড়াচ্ছি।

ফকির উৎসুক হ'য়ে জিজ্ঞাসা করলে—কেনো বাবা কেনো ?
 কিসের জ্ঞি ?

রামযাছু একটুও না ভেবে তৎক্ষণাৎ বললে—আমার মা আমার কল্যাণে সওয়া পাঁচ আনার সিনি মানসিক করেছিলো, তাই দেবার জন্টি।

সওয়া পাঁচ আনা! পীরের দোয়ায় দম্কা লাভের আশায় উৎসাহিত হ'য়ে ফকির বললে—দাও বাবা দাও, বাবা মাণিকপীর তোমাদের সকল মুস্কিল আশান করবেন—“মাণিকপীর মুস্কিল আশান!”—ফকির উল্লাসে আজান দিয়ে উঠলো।

রামযাছু পয়সা বাহির করবার জন্ট কোর্টের ডান দিকের পকেটে হাত ভরলো, তার পর যেনো সেই পকেটে পয়সা না পেয়ে বাঁ দিকের পকেটে হাত দিলে; তার পর সেখানেও যেনো পয়সা না পেয়ে বুক-পকেটে খুঁজলে; অবশেষে কোথাও যেনো পয়সা না পেয়ে আবার বাস্তু হ'য়ে এ পকেট সে-পকেট হাঁটকে দেখতে দেখতে মুখ কাচুমাচু করে' বললে—পয়সাগুলো বাড়ীতেই ফেলে এসেছি দেখছি। যাকগে, কাল আর কাউকে ডেকে দিয়ে দেবো।

সওয়া পাঁ—চ আনা পয়সা। কাল কোন্ ফকিরকে ডেকে দিয়ে দেবে তার তো ঠিক নেই। ফকির চিন্তান্বিত হ'য়ে কেমন একরকম বিমানো স্বরে বললে—তা চলো বাবা তোমার বাড়ীতেই যাই, মানসিকের পয়সা ফেলে রাখতি নেই।

রামযাছু বললে—কিন্তু আমাদের বাড়ী যে এখান থেকে অনেক দূর—সেই কাছারীর কাছে। এত রাতে তুমি আবার অত দূর যাবা?

রামঘাটুর ছল্‌ছলে চোখ আর হাব্‌লাটে মুখ দেখে ফকির ভুলে গিয়েছিলো ; সে বললে—তা হোক বাবা । লোকের মানসিকের ধার শোধ করিয়ে মাণিকপীরকে খুশী করে' দেওয়াই তো আমাদের কাজ । মাণিকপীর খুশী হলি কারো কোনো মুস্কিল থাকে না—“বাবা মাণিকপীর মুস্কিল আসান !” ফকির সওয়া পাঁচ আনা পয়সা পাবার লোভের আনন্দে আবার ডাক ছেড়ে হেঁকে উঠলো ।

রামঘাটু আর দ্বিরুক্তি মাত্র না করে' ফকিরের চারমুখো চেরাগের জোর আলোতে পথ দেখে দেখে একজন আগল্দার সঙ্গী পেয়ে নির্ভয় খুশী মনেই দিদির বাড়ীর দিকে চললো ।

দিদির বাড়ীর কাছাকাছি গিয়ে রামঘাটু ফকিরকে বললে—এখানটা বড়ো গলি ঘুঁজি ; আমার গাড়া ছম্‌ছম্‌ কর্তি লেগেছে, তুমি আমার আগে আগে কাছে কাছে চলো ফকির ।

ফকির সাহস দিয়ে বললে—ভয় কি বাবা, মুস্কিল-আসানের চেরাগের রোশনী যতদূর যায় তার চৌহদ্দীর মধ্য জিন দানা ভূত পেরেত কেউ আস্তি পারে না । আগি আগে আগে যাচ্ছি—তোমার কিচ্ছু ডর নেই ।

ফকির রামঘাটুর আগে গিয়ে কিছুদূর যেতেই রামঘাটু নিঃশব্দে ও সত্বর পদে স্ফুট করে' পাশের এক গুঁড়ি গলির অন্ধকারের ভিতর সরে' পড়লো । ফকির খানিক দূর গিয়ে পিছনে রামঘাটুর পায়ের শব্দ না শুন্‌তে পেয়ে পিছন ফিরে দেখলে রামঘাটু নেই । প্রথমে সে মনে করলে রামঘাটু বোধ হয়

একটু পিছিয়ে পড়েছে। তাই সে ফিরে দাঁড়িয়ে চেরাগটা একটু উল্লেখ্যদিলে, এবং আলো-আধারের মধ্যে দৃষ্টি পাঠাবার চেষ্টা করে' রামযাতুর তল্লাস করতে করতে ঝিমামো মোটা স্বরে বললে—কৈ বাবা, আস্তিছো ?

শ্রীবৎস রাজার বনবাসে রাণী চিন্তাদেবীর হাত থেকে পোড়া শোল-মাছ জলে পালিয়ে গেলে তাঁর মনের অবস্থা যেমন হয়েছিলো, রামযাতুর কোনো সাড়াশব্দ না পেয়ে মুস্কিল-আসান ফকিরের মনের অবস্থা ততোহধিক শোচনীয় হ'য়ে পড়লো। পরের মুস্কিল আসান করতে এসে সে-ই পড়লো মুস্কিলে ! ফকির হতাশার ক্ষোভে কাতর হ'য়ে আর্তনাদ করে' ডাকতে লাগলো—
ও মানসিকওয়ালা বাবা ! কনে গেলে বাবা ? ও মানসা-করা বাবা ! জ্বানে কবুল-করা মানসিক দাও বাবা !

আর বাবা ! বাবা তখন এ-গলি থেকে ও-গলির বাক ফিরে সে গলি দিয়ে ছুটে চলেছে। এক-একবার ফকিরের আর্তনাদ তার কানে এসে পড়ে, আর তার গতি দ্রুততর হ'য়ে উঠে।

ফকিরের আওয়াজ চার-পাঁচ বারের পর রামযাতু আর শব্দে পেলো না। তখন সে নিশ্চিন্ত খুশী মনে দিদির বাড়ীর দরজায় গিয়ে ডাকাডাকি করতে লাগলো।

ফকিরের ব্যাকুল চীৎকারে পাড়ার লোকেদের নিরুপদ্রব নিদ্রার ব্যাঘাত ঘটতে পাঁচ সাত দিক থেকে পাঁচ-সাত জনে একসঙ্গে সম্মুখে এমন ধমক দিয়ে উঠলো যে, ফকির বেচারী

দ্বিতীয় নূতন মুষ্কিলের ভয়ে হঠাৎ চূপ করে' গেলো। কিন্তু সে অস্পষ্ট স্বরে গজগজ করতে করতে মানসিক-ওয়ালো ছোঁড়ার চৌদ্দ পুরুষের সঙ্গে নানাবিধ সামাজিক অসামাজিক ঘনিষ্ঠ সম্পর্ক পাতাতে পাতাতে তাদের জন্তু বিবিধ অখাণ্ড খাণ্ডরূপে বরাদ্দ করতে করতে সেই দীর্ঘ পথ উজান বেয়ে আবার ফিরতে লাগলো। নিরুপায় ক্ষুণ্ণ মনকে সে এই বলে' মাস্তানা দিতে লাগলো যে বাবা মাণিকপীরের নাম নিয়ে ঠকামি—তিন রোজের মধ্যে এর সাজা হাতে হাতে পেতে হবে না !

কিন্তু বুদ্ধিমান লোককে বিধাতাও এঁটে উঠতে পারেন না— সে বুদ্ধির জোরে সবাইকে ঠকিয়ে নিজের স্বেযোগ আবিষ্কার করে' নেয়। মাণিকপীর তাঁর ভক্ত-ফকিরের আর্জি সত্ত্বেও রামঘাতুকে মুষ্কিলে না ফেলে তাঁর বিশেষ আসানই করবার সূত্রপাত করে' দিলেন।

রামঘাতুর ভগ্নীপতি ছিলো যশোরের উকিল কিরণ-বাবুর মুহুরী। কিরণ-বাবুর মনটা ছিলো এমন বড়ো যে তিনি বাড়ীর চাকরকেও নিজের আত্মীয়ের মতন দেখতেন। তাঁর মুহুরীর অসুখের সেবা থেকে মৃত্যুর পর সংকার পর্যন্ত তিনি নিজের হাতে ও নিজের খরচে করেছেন; মুহুরীর মৃত্যুতে কেঁদে আঁকুল হয়েছেন।

রামঘাতুর দিদি ভাইএর সঙ্গে বাপের বাড়ী বাবার উদ্যোগ করে' ভাইকে বললে—যা, একবার বাবুকে বলে' আয়, তিনি আমাদের অনেক করেছেন।

রামঘাটু কিরণ-বাবুর কাছে গিয়ে দাঁড়িয়ে নিজের পরিচয় দিতেই কিরণ-বাবুর চোখ জলে ভরে উঠলো। তিনি রামঘাটুর পিঠে হাত বুলিয়ে দিতে লাগলেন, কিছু বলতে পারলেন না।

কিরণ-বাবুর চোখের জল গড়িয়ে না পড়লেও তাঁর চোখের ছলছলে ভাব রামঘাটুর চোখ এড়ালো না। সে বললে—দিদিকে আমি নিয়ে যাযো, তাই আপনার অনুমতি নিতে এসেছি।

কিরণ-বাবু জিজ্ঞাসা করলেন—তোমার দিদি এখন কোথায় যাবেন? শশুরবাড়ী, না তোমাদের বাড়ী?

রামঘাটু বললে—দিদির শশুরবাড়ীতে কেউ নেই; আর ওখানকার অবস্থাও তো ভালো নয়। দিদিকে আমাদের কাছেই থাকতে হবে। আমাদেরও অবস্থা ভালো নয়। কিন্তু এক মায়ের পেটের বোন, তাকে তো আমি ফেলতে পারবো না—এক মুঠো ভাত জুটলে তাই দুভাগ করে খেতে হবে।

ছেলেমানুষের মুখে জ্যাঠামির কথা শুনেও কিরণবাবু খুশী হলে বললেন—এই তো চাই বাবা! যার এমন মন তার কখনো কোনো কঠাব ভগবান রাখেন না। তোমার বাবা কি করেন?

রামঘাটু মুখ মলিন করে বললে—বাবার দু বছর হলো কাল হুঁচু। তিনি নড়ালের বাবুদের জমীদারীতে গোমস্তার কাজ করতেন। বাবার কাল হওয়ার পর মা ধান ভেনে কষ্ট ক'রেও আমায় পড়াচ্ছিলেন। এখন দিদিকে নিয়ে যাচ্ছি; আমায় এখন পড়া ছেড়ে একটা কাজকর্মের জোগাড় করতে হবে।

রামঘাটুর চোখের জল ছিলো হাতধরা; তার চোখের

স্বাভাবিক ছলছলে' ভাবটা ইচ্ছা করলে একটুতেই জলধারীয় পরিণত হ'য়ে গড়িয়ে ঝরে' পড়তে পারতো। এখানে সে সেই দুর্লভ অসাধারণ ক্ষমতার পরিচয় দিয়ে কিরণ-বাবুর কোমল করুণাপ্রবণ মনে অমোঘ অস্ত্র আঘাত করলে। কিরণ-বাবু জানতেন, তাঁর মুহুরীর অবস্থা কি-রকম বিষম দরিদ্র ছিল; তার হাতে যারা মেয়ে সম্প্রদান করেছিলো তাদের অবস্থাও যে ভালো নয়, এ-কথা বিশ্বাস করতে তাঁর একটুও দ্বিধা বোধ হ'লো না। তিনি ব্যথিত হ'য়ে বললেন—না না বাবা, এই বয়সে তুমি লেখা-পড়া ছেড়ে না। তুমি যদি বরাবর পাস্ করে' যেতে পারো, আমি মাসে মাসে তোমায় দশ টাকা করে' দেবো।

রামযাদুর মুখে-চোখে হর্ষগদগদ কৃতার্থতার ভাব ফুটে উঠলো। রামযাদু বিনীতভাবে বললে—আপনার দয়ার কথা দিদির কাছে শুনেছি। আপনি দিদিকে দেখবেন—আপনিই এখন তার অভিভাবক।

কিরণ-বাবু এ-কথার কোনো জবাব দিলেন না, একটু অশ্রুমনস্ক হ'য়ে কি যেনো চিন্তা করতে লাগলেন।

কিরণ-বাবুকে অশ্রুমনা দেখে' রামযাদু বললে—আজ্ঞে, এখন তবে আসি।

কিরণ-বাবু একটা টিনের হাত-বাক্স খুলতে খুলতে বললেন—দাঁড়াও ঠাকুর, পায়ের ধুলো না দিয়ে যাবে কোথায় ?

কিরণ-বাবু কায়স্থ; ব্রাহ্মণের উপর তাঁর গভীর ভক্তি। তিনি বাক্স থেকে তিন-খানি দশ-টাকার নোট বা'র করে'

বাঁ-হাতে রাখলেন এবং ডান-হাতে রামঘাটুর পায়ের ধূলো মাথায় দিলেন ; তার পর রামঘাটুর হাতে একে একে গুণে গুণে তিনখানা নোট দিতে দিতে বললেন—এই নাও ঠাকুর, তোমার পায়ের ধূলোর দক্ষিণা। এই তোমাদের পথ-খরচ। আর তোমার দিদিকে বোলো, বদ্দিনাথ আমার কাছে যা মাইনে পেতো, তার অর্ধেক আমি তোমার দিদিকে মাসে মাসে পাঠিয়ে দিতে থাকুবো। তোমাদের বাড়ীর ঠিকানাটা কি বোলো তো, লিখে রাখি।

রামঘাটু অপ্রত্যাশিতভাবে তিন-দশে ত্রিশ টাকা পেয়ে পরম উৎফুল্ল হ'য়ে উঠলো। তার চেয়ে সকল রকমে বড়ো কিরণ-বাবুকে অসঙ্কোচে পায়ের ধূলো দিয়ে ঠকিয়ে সে চলে' এলো। পথ-খরচের টাকা পাওয়া ও ভবিষ্যতে তার পড়ার সাহায্য ও দিদির মাসহারা পাবার বন্দোবস্তের কোনো খবরই সে তার দিদি বা মাকে জানানো আবশ্যিক মনে করলে না। সে বাড়ীতে ফিরে গিয়েই পোষ্ট-অফিসের সেভিংস্ ব্যাঙ্কে নিজের নামে একটা হিসাব খুললে।

রামঘাটু ক্রমে ক্রমে বি-এ পাস করেছে এবং কিরণ-বাবুর কাছ থেকে বরাবর মাসে মাসে টাকা আদায় করে' এসেছে, অথচ এই টাকা পাওয়ার কথা সে আর দ্বিতীয় ব্যক্তির কাছে ব্যক্ত করে নি—এমনি তার মন্ত্রগুপ্তির সাবধানতা।

এটাস পাস ক'রেই রামযাছু বিয়ে করেছিলো। তার শ্বশুর বেচারি কণ্ঠার পিতা হওয়ার দণ্ড-স্বরূপ জামাইকে পড়ার খরচ বলে' মাসে মাসে দশ টাকা ঘুষ জুগিয়ে এসেছে।

এই রকম দু-তরুফা সাহায্য পেয়ে রামযাছু বেশ নির্ভাবনাম্ব লেখাপড়া করে' চলেছিলো। বাল্যে তার চরিত্রে যে-সব গুণ অক্ষুট ইঙ্গিত মাত্র ছিলো, বয়স জ্ঞান ও বিদ্যা বুদ্ধির সঙ্গে সঙ্গে সেই-সব গুণ অনুশীলন ও অভ্যাসের দ্বারা তার চরিত্রগত হ'য়ে দাঁড়িয়েছে। এখন সে মহা লোভী ও ধনবানের প্রতি অতি ভক্তিমান হ'য়ে পড়েছে। আবার দরিদ্র যারা, যাদের কাছ থেকে তার কোনো লাভের সম্ভাবনা নেই, তাদের কাছে সে নিজের ধনশালিতার বড়াই করতে ছাড়ে না। সে মাসে মাসে তিন বার টাকা পায়—কিরণ-বাবুর কাছ থেকে, শ্বশুরের কাছ থেকে, এবং নিজের মা'য়ের কাছ থেকে। এই ব্যাপারটার ব্যাখ্যা সে ধনী ও দরিদ্র ভেদে দু'রকম করতো। সে ধনীদের বলতো যে, সে এমন গরিব যে তাকে পরের কাছ হাত পেতে তবে লেখাপড়া করতে হচ্ছে। আর গরিবদের কাছে পাকে-প্রকারে জানাতো যে, তার বাড়ী থেকে তো খরচ আসেই, তা ছাড়া তার শ্বশুর বিয়ের পণ একেবারে দিতে না পেরে কিস্তিবন্দী করে' মাসে মাসে দেনা শোধ করছে, এবং সে এমনি মহানুভব যে, পণের টাকা থেকে না নিয়ে শ্বশুরকে কণ্ঠাদায়মুক্ত করেছে; আর কিরণ-বাবুকে রামযাচুর বাবা সাহায্য করে' লেখাপড়া শিখিয়েছিলেন, সেই ঋণই কিরণ-বাবু মাসে মাসে শোধ করছেন

—কিরণ-বাবুকে বেশ ক্লতজ্ঞ ভদ্রলোক স্বীকার করতেই হবে, কারণ, রামঘাটুদের কতো টাকা কতো লোকে কতো দিকে যে বে-ওজর মেরে খেয়েছে তার তো ইয়ত্তাই নেই ।।

কোনো মাসে কোনো জায়গা থেকে টাকা আসতে কিছু দেবী হ'য়ে গেলে অথবা বরাদ্দর অতিরিক্ত কিছু খরচ হ'য়ে গেলে রামঘাটু ধার করে—পোষ্ট-অফিসের সেভিংস্-ব্যাঙ্কে সে এ পর্যন্ত কেবল টাকা জমাই রেখে এসেছে, একদিনের তরেও একটি পয়সা সেখান থেকে তুলে নেয়নি । যাদের সঙ্গে সামান্য পরিচয় আছে, অথচ হামেশা দেখাসাক্ষাৎ হয় না, এমন লোক বেছে বেছে সে ধার চাইতে যায় । ধনীর কাছে ধার চাইবার বেলা সে ধোপার বাড়ী কাপড় ধুতে দেবার দিন নিজের ময়লা কাপড় পরে' যায় ; ধার করতে যাবার দিন যদি নিজের কাপড় নেহাৎ ফর্সা থাকে, তবে অপরের কাপড় ময়লা দেখে ধার করে' পরে' ধনীর কাছে ধার করতে যায় ; আর গরিব সাধারণ গৃহস্থদের কাছে যেদিন ধার নিতে যায় সেদিন তার মেসের প্রতিবাসীদের প্রত্যেকের যে জিনিসটি সব চেয়ে ভালো তাই বেছে বেছে নিয়ে দামী জামা কাপড় জুতো আংটি শাল ছড়ি ঘড়ী চেন এসেঙ্গ প্রভৃতিতে সজ্জিত হয়ে বড়মানুষী ঢঙে আমিরী চালে যায় । মেসের প্রতিবাসীদের কাছে সজ্জা ধার নেবার বেলা সে বলে—সে শ্বশুরবাড়ীর সম্পর্কের কারো না কারো সঙ্গে সাক্ষাৎ করতে চলেছে, তাই তার এই বিলাসবেশ, এই বরসজ্জা । রামঘাটুর আর-একটি গুণ ছিলো—সে ধার নিয়ে অতি সহজে ও সহর সে-

কথাটা ভুলে যেতে পারতো, অনেক গরিব রামযাদুর মতন একজন ধনীকে গোটা-কতক টাকা ধার দিয়ে সেটা ফেরত চাইতে লজ্জা বোধ করতো, মনে করতো, তার মতন একজন বড়লোককে কি আর গরিবের টাকা মারবে?—মনে হ'লেই দিয়ে দেবে; আর তাদেরও তো অদিন অসময় আছে, একজন বড়লোককে হাতে রাখা ভালো। আর যারা বড়লোক তারাও রামযাদুকে ধার দিয়ে উত্তুলের জন্তে তাগাদা করতে চাইতো না—একজন গরিব বড়লোককে ধারের নামে যে সাহায্য করবার সুযোগ পাওয়া গেছে এতেই তারা সন্তুষ্ট হ'য়ে পাওনার কথা মুখে আনে না। আর রামযাদুও ঐ-সব দেনাপাওনার তুচ্ছ ব্যাপার নিয়ে পড়ার চাপে পাছু স্মৃতিকে একটুও ব্যস্ত-বিত্রত হ'তে দেয় না। তবে যারা চক্ষু লজ্জা ভুলে বার বার তিন বার তাগাদা করে তাদের ঋণ রামযাদু আর একদিনও রাখে না, নিজের হাতে টাকা থাকলে তাই থেকে ধার শোধ করে, আর নিজের হাতে না থাকলে ধার করে' ধার শোধ করে। সুতরাং খাঁটি খাড়া লোক বলে' তার একটা খ্যাতিও হ'য়ে গিয়েছে, এবং তার জন্তে তার ধার পেতেও অসুবিধা হয় না।

বিধাতা রামযাদুকে যে স্বার্থসিদ্ধির বুদ্ধি দিয়েছিলেন, তা অভাবের অভাবে চর্চা করবার অবকাশ সে পাচ্ছিলো না, অব্যবহারে তা প্রায় ভোঁতা হ'য়ে আস্ছিলো। নিজের দান নিঃফল হ'য়ে যায় দেখেই যেনো বিধাতা তাড়াতাড়ি কিরণ-বাবু আর রামযাদুর শ্বশুরকে পরলোকে ডেকে নিলেন।

রামঘাট ইতিমধ্যে ওকালতী পাস করেছিলো এবং যশোরের উকিল কিরণ-বাবুর আশ্রয়ে থেকেই পসার জমাবার ব্যর্থ চেষ্টা করছিলো। কিরণ-বাবু বর্তমানে তাঁর সুপারিশে সে যাও-বা ছু-একটা মোকদ্দমা পেতো, কিরণ-বাবুর মৃত্যুতে তাও পাওয়া তার বন্ধ হ'য়ে গেলো। এদিকে মা-ষষ্ঠীর রূপাদৃষ্টিতে তার ঘরে আহারের অংশীদারের সংখ্যা বছর-বছরই বেড়ে চ'লেছিলো। তখন সে ওকালতী ব্যবসাতে পসারের অনিশ্চিত প্রতীক্ষায় আর থাকতে পারছিলো না; সে চাকরীর সন্ধানে বেশ একটু ব্যস্ত হ'য়েই উঠেছিলো—মুন্সেফী জোটে তো ভালোই, নয় তো জমিদারের ম্যানেজারি বা আপিসের কেরাণীগিরি—যা জোটে তাই এখন স্বাগত।

মধ্যে মধ্যে সে চাকরীর চেষ্টায় চাকরীর আড়ত কল্‌কাতায় আসে। কল্‌কাতায় এসে সে তার পরিচিত কারো মেসে ওঠে এবং দুচারদিন চাকরীর বাজারের হাল-চাল একটু যাচাই করে' সরে' পড়ে—সুযোগ করতে পারলে মেসের দেনা প্রায়ই শোধ করে না এবং যে-মেসকে একবার ঠকিয়ে যায় তার ত্রিসীমানায় আর পা দেয় না।

এমনি একটা চাকরীর খোঁজে কল্‌কাতায় এসে হারিসন-রোডের মোড়ে থাকোহরি আর পরাগ-বাবুর সঙ্গে রামঘাটের আলাপ হবার সুযোগ হয়।

পরাগ-বাবু যে রামঘাটকে তাঁর বাড়ীতে পায়ের ধূলা দিতে নিমন্ত্রণ ক'রেছিলেন রামঘাট সে নিমন্ত্রণ গ্রাহ্যই করেনি। সেই

মুদির মতন চেহারার লোকের বাড়ীতে পায়ের ধূলা দিতে গেলে যে কিছু স্বার্থসিদ্ধির সম্ভাবনা আছে এমন আন্দাজ করতে সে পারেনি এবং বিনা স্বার্থে কোনো কাজ করার মতন স্বভাব রামঘাতুর ছিলো না। পরাণ-বাবুর নাম ঠিকানাটা থিয়েটারের বিজ্ঞাপনের উল্টা পিঠে তবু সে লিখে রেখে দিয়েছিলো, অবসর হ'লে সেখানকার অবস্থাটা একবার যাচাই করে' আসবে, কারণ তার মূলমন্ত্র ছিলো—

“যেখানে দেখিবে ছাই উড়াইয়া দেখো তাই,

মিলিলে মিলিতে পারে অমূল্য রতন !”

কিন্তু সে পরাণ-বাবুর বাড়ীর সন্ধানে যাবার অবসর করবার আগেই কল্কাতা ছেড়ে পালানো তার দরকার হ'য়ে পড়লো। সে তার এক সহপাঠীর মেসে এসে ফ্রেণ্ড্ হ'য়ে ছিলো—রোজ তার পাঁচ আনা করে' ফ্রেণ্ড্‌চার্জ্ দেবার কথা। রামঘাতুর মনে একটু ক্ষীণ আশা ছিলো যে, তার সহাধ্যায়ী চক্ষুলজ্জার খাতিরে তার কাছ থেকে পয়সা নাও নিতে পারে, হয়তো। কিন্তু তার বন্ধুর মেসের ম্যানেজার যেদিন তার কাছে এসে বললে—রামঘাতু-বাবু, ফ্রেণ্ড্‌চার্জ্‌টা রোজ রোজ মিটিয়ে দেওয়াই আমাদের মেসের নিয়ম, আপনার আজ সাতদিন থাকা হলো।—তখন রামঘাতু ভীষ্মের মতন বুঝেছিলো এই বাক্যবাণ অর্জুন বন্ধুরই, শিখণ্ডী ম্যানেজার কেবল তাকে যুদ্ধে নিরস্ত ও পরাস্ত করার উপলক্ষ্য মাত্র। পাঁচ-সাতে পঁয়ত্রিশ আনা—তু টাকা তিন আনা!—তাকে দিতে হ'লেই তো দরকনাশ! লোকের দ্বারে দ্বারে টহল

দিয়ে আর ধন্য পেড়ে চাকরী তো একটা মিললো না—উপরন্তু লাভ হবে গায়ের রক্তের চেয়েও প্রিয় গাঁটের পয়সা নষ্ট! রামযাছু মেসের ম্যানেজারকে বললে—আজকেই আমি বাড়ী যাবো; আপনাদের পাওনা মিটিয়ে দিয়েই যাবো। মা মরণাপন্ন—আমি খবর পেয়েছি।

রামযাছু একটা ঝাঁকা-মুটে ডেকে তার ঝাঁকায় আপনার ব্যাগ আর বিছানা চাপিয়ে ট্যাঁক থেকে কতকগুলো টাকা পয়সা বার করে' গুণতে গুণতে তার বন্ধুর দিকে ফিরে বললে—তোমাকে এই টাকাটা বাড়ী গিয়ে পাঠিয়ে দিলে হবে না, ভাই? আমাদের পাড়াগাঁয়ে তো ওষুধ পথ্য কিছুই পাওয়া যায় না, মার জন্মে মকরধ্বজ আর কিছু বেদানা আঙুর কিনে নিয়ে যেতাম। মা মৃত্যুর আগে বেদানা আঙুর খেতে চেয়েছেন—আমি গিয়ে মাকে দেখতে পেলো হয়!

রামযাচুর ছলছল চোখের হাতধরা জল টলটল করে' উঠলো, সে ঘনঘন দুচারবার চোখের পাতা বুজে খুলে চোখ মিটমিট করে' চোখের জল গড়িয়ে ফেললে; তার পর সেই সজল চোখে তার বন্ধুর দিকে একবার চেয়ে ম্যানেজারের দিকে দুটাকা তিন আনা বাড়িয়ে ধরে' ধরা গলায় বললে—এই নিন্ ম্যানেজার-বাবু।

এমন কে কশাই আছে যে মুমূর্ষু রোগীর পথ্যের সম্বল নিজেদের সামান্য ঋণের জন্ম কেড়ে নিতে পারে? রামযাচুর সহপাঠী বন্ধু বলে' উঠলো—থাক, দুটাকা থেকে তোমার এখন দিতে হবে না; বাড়ী গিয়ে যখন সুবিধা হবে পাঠিয়ে দিয়ে।

রামযাদুকে আর দ্বিতীয়বার অনুরোধ করতে হলো না। সে টাকা দেবার জন্ত প্রসারিত হাত অমনি তৎক্ষণাৎ খোঁচা-খাওয়া কচ্ছপের মাথার মতন গুটিয়ে নিয়ে হাতের টাকা পকেটে ফেললে। মনের মুখ যদি দেখা যেতো, তা হলে দেখা যেতো যে, বন্ধুর কথায় রামযাদুর মনের মুখ এক গাল হাসিতে ভরে' উঠেছে। কিন্তু রামযাদুর যে-মুখ দেখতে পাওয়া যাচ্ছিলো সে-মুখের বিষণ্ণ ভাবের একটুও পরিবর্তন কেউ ধরতে পারলে না, তার মুখের পেশীবিগ্নাস যেমন হওয়াতে তাকে বিষণ্ণ দেখাচ্ছিলো তার একচুলও পরিবর্তন কারো চোখে পড়লো না। রামযাদু মুটের মাথায় ঝাঁকাটা তুলে দিয়ে যাবার জন্তে পা বাড়াতে বাড়াতে তার বন্ধুকে বললে—আমি বাড়ী গিয়ে মাকে একটু ভালো দেখলেই তোমার টাকাটা পাঠিয়ে দেবো ভাই।

এই ব'লেই সে তাড়াতাড়ি বাড়ী থেকে বেরিয়ে পড়লো— তার নিজের উপস্থিত বুদ্ধির তারিফ তার নিজের মনে যে রকম উথলে উঠছিলো তাতে সে সফলতার সন্তোষের ও আত্মপ্রসাদের হাসি আর সামলে রাখতে পারছিলো না। রামযাদু রাস্তায় পৌঁছতেই তার মুখ চাপা হাসির আভায় উজ্জ্বল হ'য়ে উঠলো।

রামযাদু মুটের দিকে নজর রেখে হন্থন্থ করে' শিয়ালদহের দিকে চ'লেছিলো, হঠাৎ পথের মাঝে তার সামনে কে একজন গড় হ'য়ে প্রণাম করলে। চলার বেগ হঠাৎ বাধা পাওয়ায় রামযাদু সামনে ঝুঁকে ছম্ড়ি খেয়ে পড়া সামলে নিয়ে থ'ম্কে দাঁড়ালো। প্রণাম করে' উঠে দাঁড়ালো থাকোহরি।—রামযাদু

অবাক্ বিশ্বয়ে তার দিকে চেয়ে রইলো ; সে এমন বিশ্বয়ে অভিভূত হ'য়ে প'ড়েছিলো যে, তার মুটে যে তার মোট নিয়ে এগিয়ে চলেছে তার দিকে তার খেয়াল রইলো না ।

থাকোহরি রামঘাতুর অবাক্ বিশ্বয় দেখে' হেসে বললে—
আমাকে চিন্তে পারছেন না ? আমার নাম শ্রীথাকোহরি জানা । হারিসন রোডের মোড়ে আপনি আমায় খবরের কাগজ কিনে পাসের খবর দেখতে দিয়েছিলেন

রামঘাতুর সঙ্গে কোনো লোকের একদিন আলাপ হ'লে সে তাকে ভোলে না ; সে থাকোহরিকে দেখবামাত্রই চিন্তে পেরেছিলো । কিন্তু বিশ্বয় তার চোখ মুখ থেকে ঠিকরে বের হচ্ছিল এই সাত দিনের ভিতর থাকোহরির চেহারার ভোল ফেরা দেখে' । থাকোহরির সেই ময়লা ছেঁড়া অত্যন্ত পরিচ্ছদ, ক্লশ মলিন হুঃখাচ্ছন্ন মুখ, আর দারিদ্র্যজন্ম শঙ্কিত সঙ্কুচিত ভাব একেবারে বদল হ'য়ে গেছে !—তার গায়ে তসরের পাঞ্জাবী, গরদের চাদর ; পরণে জরি-রেশমে-মিশিয়ে-বোনা ফুল-পাড় দেশী ধুতি ; পায়ে নতুন বাদামী রঙের সেলিমশাহী জুতো, রোজ পালিশে আয়নার মতন চক্চকে ; মাথার কোঁকড়ানো চুলে টেড়ীর বাহার না থাকলেও বেশ পরিপাটী করে' আঁচড়ানো ; তার তোবড়ানো গাল ভরাট, ঝুলেপড়া নাক তীক্ষ্ণ, সঙ্কুচিত চোখ উজ্জ্বল, কুণ্ঠিত মুখ সপ্রতিভ—মেঘমুক্ত চন্দ্রের গায় সুন্দর ; তার নিশ্চিন্ততা ও অভাবমোচনের সুখ ও আনন্দ তার মুখের দর্পণে আপনাদের ছায়াপাত করেছে । ভালো খোলস ও খোলসা পথপেয়ে ঘোবনের

শ্রী ও লাভণ্য যেনো থাকোহরির অঙ্গে অঙ্গে বাসা বেঁধেছে !
 রামযাদু অবাক্ হ'য়ে কেবল ভাব্ছিলো এই থাকোহরি ছোঁড়া
 এমন ভোল বদলালো কেমন করে' ! সে যে টাকা যাদুকরীর
 মোহন স্পর্শ পেয়েছে তাতে কোনো সন্দেহই নেই । কিন্তু
 কেমন করে' পেলো সেই হাঁতহাসটা জান্বার কোতূহল রামযাদুর
 মনে প্রবল হ'য়ে উঠ্ছিলো । যে লোক মাত্র সাত দিন আগে
 দু-আনা দিয়ে একখানা কাগজ কিনে পাশ-ফেলের খবর দেখতে
 পারেনি, আজ তার এই রাজবেশ কোন্ আলাদীনের প্রদীপের
 দান, তার সন্ধান জান্বার আগ্রহে রামযাদু তার প্রবল বিস্ময়কে
 হাসির আড়ালে ঠেলে ফেলে থাকোহরির কাঁধের উপর হাত রেখে
 বললে—একদিন একটুক্কণের তরে দেখা-সাক্ষাৎ, তার পর আবার
 তোমার বিলক্ষণ পরিবর্তন হয়েছে, হঠাৎ চিন্তে না পার্‌বারই
 কথা । বেশ ভালোই আছে বোধ হচ্ছে । কোথায় থাকা হয়
 এখন ভায়ার ?

থাকোহরির মুখে তার হঠাৎ অবস্থা-পরিবর্তনের লজ্জার সঙ্গে
 কৃতজ্ঞতার প্রফুল্লতা ফুটে উঠ্‌লো, সে বললে—আজ্ঞে, আপনারই
 আশীর্ব্বাদে আমি মহতের আশ্রয় পেয়েছি । মারিস্ এণ্ড
 কাট্‌থোন্ট কোম্পানির হেড্-আপিসের বড়োবাবু পরাণচন্দ্র
 বিশ্বাস—অতি মহাশয় লোক তিনি—তাঁর বাড়ীতে আমি আছি
 এখন । সেদিন হারিসন রোডে আপনি আমাকে কাগজ কিনে
 দিয়ে আমার অবস্থা সম্বন্ধে যে-সব কথা জিজ্ঞাসা করেছিলেন
 সেইসব কথা পরাণ-বাবু শুনে নিজে আমাকে ডেকে বাড়ীতে

নিয়ে গিয়ে আশ্রয় দিয়েছেন। আমাব মতন অসংখ্য লোককে তিনি কতো রকমে সাহায্য করে' থাকেন। মারিস কাট্থোটে'র আপিসের চাকরী তো তাঁর হাতে দানছত্তর!

এই কথা শুনে রামঘাটুর মনটা ছাঁৎ করে' উঠলো। তার মনে পড়লো এই পরাণ তাকেও তার বাড়ীতে পায়ের ধূলা দিতে আপনি সেধে এসে নিমন্ত্রণ করেছিলো; মূর্খ সে এতোদিন অবহেলা করে' তার বাড়ীতে যায়নি—যার হাতে মারিস কাট্থোটে'র আপিসের চাকরী দানছত্তর! সে একটা চাকরীর জন্তে কতো লোকের দ্বারে দ্বারে ফ্যা ফ্যা করে' ফিরেছে, অথচ যে ব্যক্তি রাস্তার অচেনা লোককে ডেকে চাকরী ছায়, তার যেচে-নিমন্ত্রণ সে অবহেলা করেছে! এতো বড়ো বিশ্রী ভুল সে জীবনে এই প্রথম করলে ও দিক্কারে তার অন্তর ভরে' উঠলো। সে কি জানতো ছাই যে, ঐ মোষের মতন কালো মোটা লোকটার এতো মহিমা! এই ভুল করার অপরাধের প্রায়শ্চিত্ত সে যে কি করবে তা মনের মধ্যে চকিতে ঠিক করে' নিয়ে রামঘাটু থাকোহরির কথার শেষে বলে' উঠলো—ও! তা বেশ ভাই বেশ! তোমার যে কষ্ট ঘুচেছে এতেই আমি খুশী!

থাকোহরি বললে—কর্তা আপনার কথা প্রায়ই বলেন যে—মুখুজ্জ মশায় পায়ের ধূলা দিতে এলেন না একদিনও; মহৎ ব্যক্তির সাক্ষাৎলাভ পরম সৌভাগ্য না থাকলে ঘটে না। তিনি সেদিন আপনার ঠিকানা জেনে নেন্নি বলে' কতো আপশোষ

করেন—বলেন, মুখুজে মশায় নিজে দয়া করে' না এলে আর
আসি তাঁর পায়ের ধূলো পাবো না।

পরান এখনো তার পায়ের ধুলার আকাজক্ষা ছাড়ে নি এই শুভ
সংবাদে হর্ষগদগদ হ'য়েও রামযাদু সে-ভাব তার স্বভাবসিদ্ধ
ক্ষমতায় দমন ও গোপন করে' বললে—আর ভাই, নিজের
দুঃখধান্দাতেই ব্যস্ত থাকি, সময় পেয়ে উঠি না। আর সত্যি
কথা বলতে কি, পথের মাঝের সেই একটা কথা অতো মনেও
ছিলো না, আর তার জন্তে একজনের বাড়ীতে যাবার কোনো
আবশ্যকও বোধ করি নি।

থাকোহরি বললে—না না, আপনি যাবেন একদিন, কর্ত্তা
ভারী খুশী হবেন, আপনিও খুশী হবেন কর্ত্তার সঙ্গে পরিচয় হ'লে,
—আপনি যেমন মহৎ, তিনিও তেমনি.....

এমন সময় মুটে তর্জ্জন করে' উঠলো—আরে চলো না বাবু,
রাস্তা পর খাড়া হো কর গপ্ লাগায়া, হাম মাথা পর মোট লে-
কর কেৎনা ঘড়ী খাড়া রহেগা। টিরেন্ নেহি মিলেগা
ফিন্।

রামযাদু ও থাকোহরি দুজনেই মুটের বিরক্ত মুখের দিকে
ফিরে দেখলে।—রামযাদু থাকোহরিকে বললে—তবে এখন
আসি ভাই। পরান-বাবুকে বোলো, ফুরুসৎ মতন একদিন দেখা
করবো।

থাকোহরি জিজ্ঞাসা করলে—আপনি এখন কোথায়
যাচ্ছেন ?

রামযাছু চল্‌বার উপক্রম করে' বললে—যাচ্ছি ভাই একটু
বাড়ী ।

থাকোহরি রামযাছুর সঙ্গে সঙ্গে চলতে চলতে বললে—
আপনার বাড়ীর ঠিকানাটা বলুন, আমি কর্তাকে বলবো ।

রামযাছু হেসে বললে—আমার বাড়ী যশোর জেলায় নড়ালের
কাছে সীমাখালি গ্রামে । আমি দু-চার দিনের মধ্যেই ফিরে
আসছি, তার পর পরাগ-বাবুর সঙ্গে দেখা করবো একদিন ।

থাকোহরি জিজ্ঞাসা করলে—আপনার এখানকার ঠিকানা
কি ?

রামযাছু বললে—এখানে এসে বন্ধুবান্ধবদের বাড়ীতে কি-
মেসে দু-চারদিন থাকি—কবে কোথায় থাকি তার তো ঠিক
নেই ।

তার পর একটু ভেবে রামযাছু বললে—আমি এবার এসে
কাঙালী সরকারের গলিতে ১৭ নম্বর বাড়ীতে আমার এক বন্ধুর
মেসে থাকবো ।

থাকোহরি রামযাছুকে আবার প্রণাম করে' বললে—আচ্ছা
আমি কর্তাকে বলবো ।

রামযাছু হন্ হন্ করে' চলতে আরম্ভ করলো । তাকে চলতে
দেখে মুটেও ছুটে চললো ।

কিছুদূর এগিয়ে পথের একটা মোড় ফিরেই রামযাছু একবার
পিছন ফিরে তাকিয়ে নিয়েই মুটেকে ডেকে বললে—এই মুটিয়া,
ঘুমকে চলো, হাম অউর নেহি যায়েগা ।

মুটে আশ্চর্য্য হ'য়ে থম্কে দাঁড়িয়ে রামযাছুর দিকে ফিরে
বললে—আরে বাবু, ফিন্ কি ভেলো ?

রামযাছু মুটেকে মুখ ভেঙে চে বললে—ভেলো ভালো, তুই
এখন ফিরে চ তো ।

মুটে রামযাছুর সঙ্গ সঙ্গ ফিরে চললো ।

রামযাছু মেসে ফিরে আসতেই সকলে আশ্চর্য্য হ'য়ে ও ভীত
স্বরে জিজ্ঞাসা করলে—কি রাম-বাবু ফিরে এলেন যে ?

রামযাছু মুটের ঝাঁকা ধরে' নামিয়ে ঝাঁকা থেকে ব্যাগ
বিছানা তুলে নিতে নিতে বললে—রাস্তায় আমাদের গাঁয়ের
একজন লোকের সঙ্গ দেখা হ'য়ে গেলো, সে আজই এসেছে বাড়ী
থেকে, সে বললে মা ভালো আছেন । তাই আর গেলাম না ।

রামযাছু মেসের ম্যানেজারের সামনে তিনটে টাকা ধরে'
বললে—এই নিন্ ম্যানেজার-বাবু আপনার মেসের দেনা । বাকী
পয়সাও আপনার কাছে অ্যাডভান্স জমা থাক ।

মেসের যে-সব লোকের ধারণা হয়েছিলো রামযাছু মেসের
দেনা মেরে পালাচ্ছে, তারা নিজেদের সন্দেহ মিথ্যা হ'তে দেখে
লজ্জিত হ'লো, তাদের কাছে রামযাছু বেশ বিশ্বাসযোগ্য ভদ্রলোক
ব'লেই প্রতিপন্ন হ'য়ে গেলো ।

রামযাছু তার পর মুটের হাতে দশটা পয়সা গুণে গুণে দিলে ।

মুটে দশ পয়সা পেয়ে রামযাছুর সামনে পয়সা স্কন্ধ হাত ও
রামযাছুর মুখের দিকে বিস্ময়-বিস্ফারিত চোখ মেলে বললে—এ
ক্যা বাবু ?

রামঘাট্ট মিষ্ট ভৎসনার স্বরে বললে—কেনো বাপধন,
তোমার সঙ্গে দশ পয়সাই তো ফুরান্ হয়েছিলো ।

মুটে একটু কড়া কর্কশ স্বরে বললে—সো ত সহি ! লেকিন্
ওতো দূর গেলো, ফিন্ আইলো...

রামঘাট্ট মুটেকে ভেঙিয়ে বললে—মাঝপথ থেকে তো ফিরে
আইলে চাঁদ । যাও সরে' পড়ো ।

রামঘাট্ট চলে' যায় দেখে মুটে কাকুতি করে' বললে—আচ্ছা
আউর একঠো পয়সা দেও বাবু-সাহেব—আপলোক বড়া আদমী,
ভদর লোক, হামলোগ নোকর চাকর, একঠো পয়সা জল খানেকে
লিয়ে হামি মেঙে লিস্‌সে আপ্‌সে ।

রামঘাট্ট পিছন ফিরে চলে' যেতে যেতে বলে' গেলো—ঐ
দশ পয়সা দিয়েই জল খেয়ো, আর পয়সা পাবে না ।

'আরে বাবু !' বলে' হতাশায়-অসন্তুষ্ট মুটে ঝাঁকি তুলে
নিয়ে চলে' গেলো ।

এর দুদিন পরে তেসরা দিনের সকাল বেলা রামঘাট্ট ময়লা
জামা কাপড় পরে' পরাণ-বাবুর বাড়ীতে যাবে বলে' রওনা
হ'লো । গত দুদিন সে তেল মাখে নি, মাথার চুল রুক্ষ
উকোখুকো ; তাতে তার চেহারাটা হয়েছিলো অনাহারক্লিষ্ট
রুগ্নের মতন ।

রামযাছ হালধর হালদারের ষ্ট্রীট খুঁজে বার ক'রে ৩২ নম্বর বাড়ীর সামনে এসেই দেখলে মস্ত বড়ো বাড়ী। বাড়ীর দরজা পার হ'য়ে দেউড়িতে ঢুকেই রামযাছ দেখলে, দেয়ালের গায়ে একটা কাঠের পাটায় সাদা রং দিয়ে ইংরেজী ও বাংলায় লেখা আছে—

Paranchandra Biswas.

In

Please come in.

শ্রীপরামচন্দ্র বিশ্বাস
বাড়ীতে আছেন,
আসিতে আঞ্জা হউক।

ইংরেজদের ও ইংরেজী কায়দার দেশী বড়োলোকদের বাড়ীর সামনে গৃহকর্তা বাড়ীতে আছেন কি না জানাবার জন্তে in বা out লেখা থাকে রামযাছ দেখেছে; কিন্তু গৃহকর্তা বাড়ীতে আছেন এই সংবাদ দেওয়ার সঙ্গে সঙ্গে আগন্তুক অনুসন্ধানীকে গৃহে অভ্যর্থনা করবার ব্যবস্থা এই নতুন দেখে রামযাছর মন অত্যন্ত খুশী হ'লো। গৃহকর্তা বাড়ীতে না থাকলে কি জানানো হয় জানবার কৌতূহলে রামযাছ একবার পথের এদিক ওদিক দেখে নিয়ে চট করে কাঠের টানা চাকনাটা এপাশে টেনে দিলে;—“in আছেন” ঢেকে গিয়ে বা'র হলো—Out, please call at another time; বাড়ীতে নাই, অনুগ্রহ করিয়া অল্প সময় আসিবেন। এই লেখার পাশেই চিলতে কাগজের খাতা একখানা, শক্ত রেশমী সূতোর বাঁধা বোলানো আছে, আর খাতার প্রত্যেক পাতার উপর লেখা আছে—Please leave your name and address—অনুগ্রহ করিয়া আপনার নাম

ঠিকানা রাখিয়া যাইবেন। সেই খাতার পাশে একটা রূপালী সরু শিকলে বাঁধা একটা পেন্সিল্ বুলছে।

রামযাহু এই-সব দেখতে দেখতে এক মুহূর্ত্ত ভেবে নিয়ে ঠিক করলে—সে যে পরাণ-বাবুর নামের পাটার ঢাকনি সরিয়ে তিনি বাড়ীতে না থাকার সংবাদ প্রকাশ ক'রেছে, সেটা আর বদল ক'রবে না ; তা হ'লে তার পরে আর কোনো লোক পরাণ-বাবুর কাছে গিয়ে ভিড় বাড়াবে না ; এর পরে যারা আসবে তারা দেউড়ি থেকেই ফিরবে ; এখনো বেশী বেলা হয়নি, এখনো বেশী লোক এসে জোটেনি নিশ্চয় ; যারা এসেছে তারা চলে' গেলে সে একলাই পরাণ-বাবুর সঙ্গে নিরিবিলি কথা বলবার সুযোগ পাবে।

রামযাহু মিনিট পাঁচ সাত দেউড়িতে দাঁড়িয়ে থেকেও কোনো লোকের সাক্ষাৎ বা সাড়া পেলেন না। দেউড়িতে দারোয়ানের উপদ্রব নেই—এ কী-রকম বড়োলোক !

রামযাহু ইতস্ততঃ করতে করতে একটু এগিয়ে গেলো—দেখলে দেউড়ির দুপাশে দুটো দালান উঠে গেছে এবং দালানের কোলে দুটো বড়ো বড়ো ঘর, কিন্তু সেখান থেকে জনমানবের সাড়া পাওয়া যায় না। দেউড়ির গলিটার পরেই প্রকাণ্ড উঠান, তার এক ধারে একটা ঠাকুর-দালান ; উঠানের অন্ত দুই পাশের ঘরগুলো বোধ হয় অন্তরমহলের সামিল। কতকগুলো শাদা পায়রা উঠানের মাঝখানে গলা ফুলিয়ে লেজ ছড়িয়ে চরে' বেড়াচ্ছে, আর দুটো শাদা খরুগোশ লম্বা লম্বা কান আর বেঁড়ে

লেজ নেড়ে লাফিয়ে বেড়াচ্ছে ;—এছাড়া কোথাও আর জন-প্রাণীর চিহ্নমাত্রও নেই, সাড়াশব্দও নেই—সমস্ত বাড়ীটা যেনো জনশূন্য ; অথচ এটা যে পোড়ো বাড়ী নয়, তা এর পরিষ্কার-পরিচ্ছন্ন ঝকঝকে অবস্থা দেখলেই জানা যায় ।

রামযাছু এদিক্ ওদিক্ তাকাতে তাকাতে একদিকের দালানের উপর উঠে দাঁড়ালো । রামযাছু মনে মনে অত্যন্ত বিরক্ত হ'য়ে উঠছিলো । নিজে সেধে ভদ্রলোককে ডেকে বাড়ীতে নিয়ে আসে, অথচ তার যে দেখা পাওয়া যাবে কেমন করে', তার কোনো বিলি-ব্যবস্থাই নেই !...ন চাষা সজ্জনায়তে !

রামযাছু দারোয়ান না বেয়ারা কি বলে' চীৎকার করবে ঠিক করতে না পেরে ভাবছে, এমন সময় বাড়ীর ভিতর থেকে একজন চাকর বেরিয়ে এসে তার সামনে দিয়ে চলে' গেলো ; একজন ভদ্রলোক যে বাড়ীতে এসে দাঁড়িয়ে আছে সেদিকে সে লক্ষ্যই করলে না, আগন্তুককে একটা প্রশ্ন করে' জানলেও না, যে তার কি দরকার ।

রামযাছু চাকরটার এই আচরণ বড়োমানুষের চাকরের দেমাকভরা উপেক্ষা মনে করে' অসহিষ্ণু ও উষ্ণ হ'য়ে উঠছিলো, কিন্তু পরাণের কাছে স্বার্থসিদ্ধির সম্ভাবনার আভাস থাকোহরির চেহারার ও পোশাকের বিলক্ষণ ভোল ফেরার মধ্যে পেয়ে সে বিরক্তি ও অর্ধৈর্ষ্য দমন করে' আত্মসম্বরণ করবার চেষ্টা ক'রতে লাগলো ।

চাকরটা রামযাচুর সামনে দিয়ে পরাণ-বাবুর নামের পাটার

সামনে গিয়েই সেইদিকে অধাক দৃষ্টিতে তাকিয়ে থমকে দাঁড়ালো।
এবং তৎক্ষণাৎ নাম-পাটার টানা-ঢাকনিকা সরিয়ে দিয়ে পরাণ-
বাবু বাড়ীতে আছেন জানিয়ে সেখান থেকে চলে গেলো !
রামযাদু তাকে কিছু জিজ্ঞাসা করবার আর অবসরও পেলো না ।

তখনই একজন ভদ্রলোক বাইরে থেকে বাড়ীতে এসে
চুকলো ; সে একবার পরাণ-বাবুর নামের পাটাটার উপর চোখ
ফেলে দেখে নিলে পরাণ-বাবু বাড়ীতে আছেন কি না ; তার
পর রামযাদুর সামনে দিয়ে হনহন করে' যেতে যেতে তার মুখের
দিকে একবার তাকিয়ে দালানের শেষের দিকের একটা দরজার
মধ্যে ঢুকে অদৃশ্য হ'য়ে গেলো । রামযাদু সেই লোকটির পায়ের
শব্দ শুনে সেখান থেকেই বুঝতে পারলে সে সিঁড়ি দিয়ে উপরে
উঠে যাচ্ছে । উপরে ওঠবার সিঁড়ি তা হলে ঐ দরজার ওপারে
আছে । তবে সেও কি সটান উপরে উঠে যাবে না কি ?
রামযাদুর রাগ হ'তে লাগলো থাকোহরির উপর—সে ছোঁড়াটারও
তো কোথাও টিকি দেখবার জো নেই, সেটাকে পেলেও তো
তাকে কাণ্ডারী করে' পরাণের কাছে পৌঁছানো যেতো ।

রামযাদু ইতস্ততঃ করতে করতে দালান থেকে আবার
দুইডির গলিতে নেমে আসছিলো ; সিঁড়ির শেষ ধাপে পা
দিতেই সে দেখলে একটি স্ত্রীলোক আপাদমস্তক কাপড় মুড়ি দিয়ে
বাইরে থেকে সেই দিকে আসছে । রামযাদু আবার সিঁড়ির
ধাপ বেয়ে দালানে উঠে দাঁড়ালো, আর সেই স্ত্রীলোকটি তার
সামনে দিয়ে হনহন করে' বাড়ীর ভিতর চলে' গেলো ।

রামযাছু আবার দালান থেকে নীচে নামলো—আরো অপেক্ষা করবে, না চলেই যাবে, ঠিক ক'রতে না পেরে ভাবছে ; দেখলে একটি ছোটো ছেলে বাহির থেকে বাড়ীর ভিতর আসছে। ছেলেটি রামযাচুর বিরক্ত মুখের দিকে তাকিয়ে একটু খতোমতো খেয়ে আস্তে আস্তে অন্তরের দিকেই চলতে লাগলো।

ছেলেটিও চ'লে যায় দেখে রামযাছু হাতছানি দিয়ে ছেলেটিকে ইসারা করে' ডাকলে—এই ছোকরা, শোনো।

সেই ছেলেটি ফিরে এসে রামযাচুর মুখের দিকে চেয়ে আড়ষ্ট হ'য়ে দাঁড়ালো। ছেলেটির দৃষ্টিতে ভয় ও বিস্ময় ফুটেবা'র হচ্ছিলো।

রামযাছু ছেলেটিকে জিজ্ঞাসা ক'রলে—বাবু কোথায় বসেন, ব'লতে পারো ?

ছেলেটি রামযাচুর মুখের দিকে উর্দ্ধদৃষ্টিতে চেয়ে নীরবে ঘাড় নেড়ে জানালে যে, সে বাবুর কোনো খোঁজখবর রাখে না।

রামযাছু ছেলেটির কাছে এসে তার মুখের সামনে মুখ আনবার জগ্ন সামনে একটু ঝুঁকে জিজ্ঞাসা করলে—তুমি কি এ বাড়ীর ছেলে নও ?

ছেলেটি ভয়ে সঙ্কুচিত গুঁফমুখে অস্ফুট মৃদুস্বরে বললে—না।

রামযাছু নাছোড়বান্দা, সে ছেলেটিকে আবার প্রশ্ন করলে—তবে তুমি কোথায় যাচ্ছ ?

ছেলেটি সব কথা একেবারে চট করে' বলে' ফেলবার চেষ্টায়

থেমে থেমে হাঁপিয়ে হাঁপিয়ে অসংলগ্ন কথা যা বলতে পারলে, সে-সব জুড়ে-তেড়ে রামযাদু এই বুঝলে যে, ছেলেটির বাবার পক্ষাঘাত হয়েছে অনেক দিন, তার মা রোজ রোজ এসে কর্তামার কাছে থেকে ওষুধ-পথ্যের সাহায্য নিয়ে যেতো, কাল থেকে তার মারও খুব জ্বর হয়েছে, তাই আজ বালককে পিতামাতার সেবা-শুশ্রূষার আয়োজনের সাহায্য ভিক্ষা করতে আসতে হয়েছে। তাই কচি ছেলের প্রথম ভিক্ষার সঙ্কোচ তার সর্বাঙ্গে, দীনতার ভয় তার দৃষ্টিতে, এবং অপরিচয়ের কুণ্ঠা তার কণ্ঠে স্পষ্ট হ'য়ে উঠেছে। রামযাদুর মনটা কেমন করুণার্দ্ৰ হ'য়ে উঠলো, সে পকেট থেকে একটা টাকা বা'র করে' সামনে ঝুঁকে সেই ছেলেটির হাতে দিয়ে বললে—যাও বাবা, যাও।

ছেলেটি টাকাটি পেয়ে তার ভয়চকিত দৃষ্টিতে কুণ্ঠিত মুখে কৃতজ্ঞতার একটু সঙ্কুচিত আনন্দ প্রকাশ করে' বাড়ী ফিরে চললো।

রামযাদু তাড়াতাড়ি তাকে ধরে' ফিরিয়ে বললে—তুমি কর্তামার কাছে যাবে না? ও তো আমি দিলাম। তুমি কর্তামাকে কি বলতে এসেছো তা বলোগে।

বালক রামযাদুর এই সদয় স্নেহ ব্যবহারে সাহস পেয়ে, শৈশবের অস্বাভাবিক সঙ্কোচ অনেকখানি ঝেড়ে ফেলে প্রফুল্ল মুখে অন্দের দিকে চলে' গেলো। রামযাদু আবার একলা দাঁড়িয়ে রইলো। সে ভাবতে লাগলো—আহা! ঐ ছেলেটির মা যদি মরে' যায় তা হ'লে তার পক্ষাঘাতগ্রস্ত বাবার ও তার নিজের কি গতি হবে!

একটু পরেই অস্তঃপুর থেকে একজন উড়ে বাহির হ'য়ে এলো। তার মাথায় মস্ত বড়ো একটা ঝুঁটি ; গলায় কাঠের মালার মাঝে মাঝে ছোট ছোট সোনার মাদুলি গাঁথা ; সে কাপড় উরুতের উপর গুটিয়ে প'রেছে, তার উপর একখানা লাল ডুরে অতি ময়লা গাম্ছা জড়ানো ; তার হাতে একগাছা মোটা ময়লা গোবর-মাথা দড়ি—দড়ির দুমুখে দুটো মোটা মোটা গেরো বাঁধা। রামঘাট্ তাকে দেখেই বুঝতে পারলে এ এ-বাড়ীর কেউ নয়, এ গয়লা, গাই দুয়ে দিয়ে যাচ্ছে ; অতএব একে কিছু জিজ্ঞাসা করা রুখা।

উড়ে গোয়লা বাড়ী থেকে বাহির হ'য়ে যেতে না যেতে একটা বাছুর তিড়িং তিড়িং করে' লাফিয়ে লাফিয়ে বাহিরের বিস্তীর্ণ উঠানে বেরিয়ে এলো এবং এনেই সেখানে রামঘাট্কে দাঁড়িয়ে থাকতে দেখতে পেয়েই উর্দ্ধশ্বাসে ছুটে ছিটকে যে পথে এসেছিলো সেই পথে অদৃশ হ'য়ে গেলো।

রামঘাট্ স্থিত-প্রফুল্ল মুখে বাছুরের প্রাণচঞ্চল লীলা দেখছিলো, হঠাৎ তার পিছন দিকে কার জুতোর খটখট শব্দ শুনতে পেয়েই সে মুখ ফেরালে ; কিন্তু সেই আগন্তকের কেবল পিঠের দিকটাই সে দেখতে পেলো এবং তাকে দেখতে না দেখতে সে ব্যক্তি সেই পূর্বাগত ভদ্রলোকটির পদাঙ্ক অনুসরণ করে' পাশের একটা খোলা দরজার জঠরে অদৃশ হ'য়ে গেলো আর তার পায়ের শব্দে রামঘাট্ জানতে পারলে যে সেও সিঁড়ি বেয়ে উপরে উঠে যাচ্ছে।

রামযাছু সেই সিঁড়ির দরজার দিকে মুখ ফিরিয়ে দাঁড়িয়ে ভাবছে কি করবে, আবার তার পিছন দিকে কার পায়ে শব্দ সে শুনতে পেলো। চট করে পিছন ফিরেই রামযাছু দেখলে একটি ছোটো মেয়ে আসছে—সে ভয়ানক কালো ও আশ্চর্য্য কুৎসিত—তার কপালটা বিষম উচু, নাকটা নিতান্তই খাঁদা, চোখ দুটো গোল গোল, ঠোঁট দুটো পুরু ও উন্টানো, কান দুটো খুব বড় ও সামনের দিকে ফেরানো—এমন কুৎসিত চেহারা সে জন্মে কখনো দেখেনি! এই মেয়েটিকে দেখেই রামযাচুর মনটা কুরূপ মেয়েটির উপর এমন বিরূপ হ'য়ে উঠলো যে, সে হঠাৎ দাঁতমুখ খিঁচিয়ে জিব বা'র করে' বিকট মুখভঙ্গী করে' উঠলো ও সঙ্গে সঙ্গে দু পা ফাঁক করে' ও দু হাত ছড়িয়ে জগন্নাথমূর্তির অনুকরণে থ্যা'বড়া হ'য়ে দাঁড়ালো। হঠাৎ রামযাচুকে এই উৎকট ভঙ্গী করতে দেখে মেয়েটি ভয় পেয়ে তাড়াতাড়ি বাড়ীর মধ্যে পালিয়ে গেলো। মেয়েটি পরাগবাবুরই আদরের ছলানী কন্যা কৃষ্ণকলি!

'কৃষ্ণকলি চলে' যেতেই রামযাছু সোজা হ'য়ে দাঁড়িয়ে আপন মনেই বলে' উঠলো—রক্ষাকালীর বাচ্চা! বাপ্‌সু!

রামযাছু এক মুহূর্ত চুপ করে' দাঁড়িয়ে থেকে মনে মনে বললে—যে দুর্লক্ষণ দেখা হ'লো, আজ আর কোনো সফলতার আশা নেই। যাত্রা পাল্টে আসা যাবে। "প্রাতরেবানিষ্টদর্শনং জাতং, ন জানে কিম্ অনভিমতং দর্শয়িষ্যতি!"

তার পর একবার এদিক ওদিক তাকিয়ে দেখে সে বাড়ী

থেকে বাহির হ'য়ে চললো। দেউড়ির দরজার চৌকাঠে পা দিয়েই সে দেখলে সামনের বাড়ীর ছাদের উপর একটি তরুণী স্নান করে' এসে ভিজা কাপড় শুকাতে দিচ্ছে; রামযাদু থমকে দাঁড়িয়ে গেলো। একটা মিন্‌সে হাঁ করে' দাঁড়িয়ে তাকে দেখছে দেখে তরুণীটি ঘোমটা টেনে ভিজা কাপড়খানা তাড়াতাড়ি ছাদের আলসের গায়ে মেলে দিয়ে নীচে নেমে গেলো। রামযাদু কিন্তু রমণীর রূপ-মুগ্ধ হ'য়ে দাঁড়ায় নি, সে পরাণবাবুর সঙ্গে সাক্ষাতের সুযোগ পাবার জন্য বিলম্ব করবার যে-কোনো একটা উপলক্ষ্য খুঁজছিলো মাত্র।

রামযাদু আবার যাবে বলে' ছু-পা এগিয়েছে, এমন সময় সেই যে ছেলেটি পীড়িত মা-বাপের জন্তে সাহায্যপ্রার্থী হ'য়ে এসেছিলো ও রামযাদু যাকে একটা টাকা দিয়েছিলো সে তার খাটো কাপড়ের খুঁটটিকে একটা প্রকাণ্ড পোর্টলায় পরিণত করে' প্রফুল্ল মুখে বাড়ীর ভিতর থেকে বাহির হ'য়ে এলো, এবং যেতে যেতে বার বার প্রসন্ন মুখের হাসিমাখা দৃষ্টি ফিরিয়ে ফিরিয়ে রামযাদুকে নিজের সফলতার আনন্দ জানিয়ে দিতে চাইছিলো। রামযাদু তার ভাব দেখে কোমল স্বরে বললে— “কর্তামার কাছে পেয়েছো বাবা?” ছেলেটি স্মিতমুখে নীরবে, ঘাড় নেড়ে সন্মতি জানিয়ে চলে' গেলো। রামযাদুর আর চলে' যাওয়া হ'লো না,—কল্পতরুর তলায় এসে সেই কি কেবল রিক্তহস্তে ফিরে যাবে? সে থমকে ফিরে দাঁড়ালো।

এবার সিঁড়িতে লোক নামার পায়ের শব্দ শোনা গেলো।

রামঘাট্ট উৎসুক হ'য়ে একটু এগিয়ে এলো। যে লোকটি রামঘাট্টর সামনে দিয়ে প্রথম উপরে উঠে গিয়েছিলো সে-ই ফিরে যাচ্ছে— চোখে মুখে তার সফলতার সন্তোষ যেনো ফুটে বেরুচ্ছে!

রামঘাট্ট তাকে জিজ্ঞাসা করলে—মশায়, পরাণ-বাবু...?

সে লোকটি একবার রামঘাট্টর শীর্ণ মূর্তি ও মলিন বেশের দিকে কটাক্ষপাত করে' তাকে তার জিজ্ঞাসা শেষ করতে না দিয়েই তাকে অতিক্রম করে' যেতে যেতেই বলে' গেলো—ওপরে আছেন...

রামঘাট্ট আবার তার দিকে ফিরে তার পিছনে মুখ খিঁচিয়ে জিভ ভেঙিয়ে অক্ষুট স্বরে বলে' উঠলো—ওপরে আছেন তো নেহাল ক'রেছেন!

তখনই একজন চাকর সেইদিকে আসছিলো। তার আসার পায়ের শব্দ পেয়েই রামঘাট্ট সম্বৃত হ'য়ে ফিরে দাঁড়ালো। সেই লোকটি কাছে এলেই তাকে সে বাবুর সঙ্গে সাক্ষাতের উপায় ও সম্ভাবনার তত্ত্ব জিজ্ঞাসা ক'রবে বলে' উদ্বৃত হয়েছে, কিন্তু তার উদ্বৃত দমিয়ে দিয়ে তখনই দোতলার এক জান্না থেকে সেই কুৎসিত কালো মেয়েটার মিষ্ট কোমল কণ্ঠ ডেকে উঠলো—ও বোঁচা দাদা, তোমাকে মা ডাকছেন।

বোঁচা চাকর তৎক্ষণাৎ “আজ্ঞে যাই” বলে'ই চোঁ-চা অন্তরমুখো দৌড় দিলো।

রামঘাট্ট বিরক্ত হ'য়ে মনে মনে বলে' উঠলো—“ধুষ্টোর! সব শালা বড়োলোকই সমান, আর তাদের বাড়ীর চাকরগুলো!

পর্যন্ত সমান পাজি—সমস্ত দুনিয়াকেই তাদের অগ্রাহ। সেই থাকোহরি ছোকরাই বা গেলো কোথায়? সেও যে দুদিন বড়োমানুষের ছোঁয়াচ লাগিয়ে লাট হ'য়ে উঠেছে দেখছি! দূর হোকগে, মরুকগে, আর তীর্থের কাগের মতন হাপিত্যে দাঁড়িয়ে থাকা যায় না।

রামযাদু যদিও বললে যে, আর দাঁড়িয়ে থাকা যায় না, তবু সে দরোজার কাছে দাঁড়িয়ে যাই-কি-না-যাই ভাবতে লাগলো। সে দেখছিলো—পরাণ-বাবুর সদর দরোজার ধারে একটা বড় বাঁপালো কামিনী-গাছের ঝাড় ফুলে ফুলে একেবারে শাদা হ'য়ে উঠেছে আর তার গন্ধে সেখানকার বাতাস যেনো ভারাক্রান্ত হ'য়ে উঠেছে; গোটা দুই মৌমাছি, একটা প্রজাপতি আর একটা সরু লম্বা ঠোঁটওয়ালা সবুজ রঙের অতি ছোটো পাখী কল্কাতার এই গলির মধ্যে থেকেও ফুলের সন্ধান খুঁজে বার করে' উড়ে উড়ে মধু খেয়ে বেড়াচ্ছে—কোথাও কিছু পাবার সম্ভাবনা থাকলে এমনি একান্ত তপস্বাই করতে হয়! রামযাদুর আর যাওয়া হ'লো না, সে দৃঢ়সঙ্কল্প করলে যে যেমন করে' হোক আজ পরাণ-বাবুর সঙ্গে দেখা সে করবেই। কিন্তু এতো বড়ো লোক, দেউড়িতে একটা দারোয়ানও নেই, যে, তাকে দিয়ে এত্তেলা পাঠাবে। এমন কিপটে মানুষের সঙ্গে দেখা করে' কিছু লাভ হবে? কিন্তু থাকোহরি? তবে কি সে বেয়ারা দারোয়ান বলে' চোঁচামেচি করবে? কিন্তু সমস্ত বাড়ীটা এমন নিস্তর শান্ত যে তার সেই ছন্দ ভঙ্গ করা রামযাদুর কাছে কেমন অশোভন বেখাপা বোধ

হ'লো। সে চুপ করে' দাঁড়িয়েই রইলো। তার অন্তঃমনস্ক দৃষ্টির সাম্মে পাড়ার কতো বাড়ীর উঁচু নীচু বাঁকা-চোরা কম বেশী অংশ উদাস ভাবে দাঁড়িয়ে আছে; একটা বাড়ীর এক কোণ থেকে একটা নারিকেল-গাছের ঝাঁকড়া মাথা উঁকি মার্ছে, তার ডালে বসে' একটা চিল আর্ন্তনাদ করছে, একখানা ঘুড়ি সেই ডালে আর্টকে ঘুরপাক খেয়ে খেয়ে বুলছে।...

হঠাৎ পিছন দিকে লোক ছুটে আসার শব্দ শুনে রামঘাট মুখ ফিরিয়ে দেখলে সেই বোঁচা। বোঁচাকে আসতে দেখেই রামঘাট বলে' উঠলো—“ওহে বাপু বোঁখচন্দর!...

বোঁচা রামঘাটর কথা শেষ হবার অপেক্ষা না করে'ই জিজ্ঞাসা করলে—আপনি কি কত্তার সঙ্গে দেখা করবেন?

রামঘাট বিরক্ত স্বরে বললে—ইচ্ছে তো ছিলো বাপধন! কিন্তু কত্তা তো দেখা দেবার কোনো উপায়ই রাখেন নি। তোমরা তো দেখে গেলে যে একটা ভদ্রলোক ঠায় দাঁড়িয়ে রয়েছে...

বোঁচা কোঁতুকের হাসি ঠোঁটের কোণে চেপে বললে—রোজ পঞ্চাশ ষাট জন বাবু কত্তার কাছে আসেন, কাউকে কিছু জিজ্ঞাসা করতে কত্তার বারণ আছে; যিনি আসেন তিনি সর্টান উপরে বাবুর বৈঠকখানায় চলে' যান। পাছে কেউ বাধা বোধ করেন বলে' বাবু দারোয়ান রাখেন না...

রামঘাট প্রীত ও আশ্চর্য হ'য়ে জিজ্ঞাসা করলে—তবে তুমি যে এখন জিজ্ঞাসা করতে এলে?

বোঁচা বললে—গিন্নি-মার হুকুমে। আপনি অনেকক্ষণ দাঁড়িয়ে
আছেন দেখে তিনি খুকীকে আপনার কাছে পাঠিয়েছিলেন.....

রামযাদু ব্যস্ত হ'য়ে জিজ্ঞাসা করলে—ঐটি কি কর্তার মেয়ে ?

বোঁচা বললে—ই্যা, ঐ এক মেয়ে, আর ছেলেপিলে নেই।

রামযাদুর মনটা অনুশোচনায় শিউরে উঠলো—ইস্! ক'রেছি
কি ! সৰ্বনাশ ! সে যদি গিয়ে মাকে ব'লে দিয়ে থাকে যে আমি
মুখ ভেংচেছি !

রামযাদু আপনার কৃতকর্মের জন্ত ভয়ানক পস্তাতে লাগলো,
তার মনটা অত্যন্ত খিচড়ে মুষ্ড়ে গেলো ! সে নিজেকে এই
বলে' একটু সাহসনা ও আশ্বাস দেবার চেষ্টা করলে যে—যে
চেহারা মেয়েটার ! আঁকে না উঠে উপায় ছিলো কি ?—কিন্তু
এতেও সে স্বাচ্ছন্দ্য ও স্বস্তি বোধ করতে পারলে না।

রামযাদুকে নীরব অশ্রুমনস্ক দেখে বোঁচা বললে—এই সিঁড়ি
দিয়ে উপরে উঠে গেলেই বাবুর দেখা পাবেন।

রামযাদু যার প্রসাদপ্রার্থী তার একমাত্র সন্তানকে মুখ
ভেংচে যে অগ্নায় অপকর্ম করে' ফেলেছে তার জন্তে তার মনে
অনুশোচনা ও অস্বস্তির অন্ত ছিলো না। এতে কিন্তু তার
অনিচ্ছায় ও অজ্ঞাতসারে সুবিধাই হ'য়ে উঠলো, তার কক্ষ শীর্ণ শুষ্ক
মূর্ত্তি অত্যন্ত উদ্বিগ্ন বিমর্ষ দেখাতে লাগলো।

রামযাদু বোঁচার নির্দেশ অনুসারে সিঁড়ি দিয়ে উপরে উঠতে

উঠতেই সিঁড়ির পাশের খোলা জানালা দিয়ে দেখতে পেল যে-ঘরে পরাণ-বাবু বসে' আছেন সেটি বেশ বড়ো দৌড়-ঘর ; ঘরে দেশী বিলাতী ছ-রকম আসনই আছে—ঘরের এক ধারে চেয়ার টেবিল বেঞ্চি সোফা কোচ আছে, অপর ধারে খুব নীচু তক্তপোষের উপর জাজিম-বিছানো ফরাশও আছে, ঘরের দেয়ালগুলি ছাদ-ছোঁওয়া উচু উচু আলুমারীতে ঢাকা ; সকল আলুমারীই বইএ ঠাসা, খাড়া করে' সাজানো বইএর সারির মাথায় আবার কাত করে' বই রাখা হয়েছে, তাতেও বইএর জায়গা কুলোয় নি, অনেক বই বেঞ্চিতে চেয়ারে মেঝের ধারে ধারে স্তূপাকার করে' রাখা হয়েছে ; পরাণ-বাবু খালি-গায়ে একখানা প্রকাণ্ড বড়ো চওড়া চেয়ার একেবারে ভরাট করে' বসে' আছেন, তাঁর প্রকাণ্ড কালো বেঁটে শরীরের তাল তাল মাংসপিণ্ড চেয়ারের কাঠের ফাঁক ও ফুকোর দিয়ে এদিকে ওদিকে ফুঁড়ে ফুঁড়ে ফেঁপে ফুলে বেরিয়ে প'ড়েছে, যেনো একতাল তিলকুটো সন্দেশ আহলাদী পুতুলের ছাঁচে ফেলা হয়েছে । পরাণ-বাবুর সামনে ও পাশে দশ বারো জন লোক চেয়ারে বেঞ্চিতে বসে' আছে,—আগন্তুকদের মধ্যে দুজন ইউরোপীয়ও আছে ; পরাণ-বাবু তাঁর প্রকাণ্ড ঝাঁপালো গোঁপের তলা থেকে গুরুগম্ভীর স্বরে তাদের সকলের সঙ্গে প্রসন্নমুখে আলাপ করছেন নিজের ভাষাতেই—দুজন ইউরোপীয় যে আছে তার জন্মে তাঁর খালি গায়ে থাকতে ও নিজের ভাষায় কথা কইতে একটুও সঙ্কোচ দেখা যাচ্ছে না ।

রামযাদু ঘরের দরোজার কাছে গিয়ে দাঁড়াতেই পরাণ-বাবু মুখ ফিরিয়ে তাকে দেখলেন ; তাকে দেখে বা মাত্রই তাঁর ছোটো ছোটো চোখ দুটি অমায়িক হাসির দীপ্তিতে উদ্ভাসিত হ'য়ে উঠলো ; খোঁয়াড়ের ঝাঁপ খোলা পেলে ভেড়ার পাল যেমন গম্ভীর স্বরে ডাকতে ডাকতে বেরিয়ে আসে, তেমনি তাঁর ঝাঁপালো গোঁপের তলা থেকে ভারী আওয়াজ আনন্দে উছলে বেরিয়ে এলো—এই যে রামযাদু-বাবু ! আস্থন, আস্থন, আসতে আজ্ঞা হোক । আমি থাকোহরির কাছে যে অবধি শুনেছি যে আপনি একদিন পায়ের ধূলো দিতে আসবেন সে অবধি আমি রোজই আপনার দর্শন প্রত্যাশা করছি ।

ঘরের পঁচিশ জোড়া চোখ একেবারে ঘুরে এসে আটাকা মিষ্টানের উপর মাছির মতন রামযাদুকে ছেকে ধরলো । রামযাদু এতো গুলি উৎসুক চোখের কোতূহলী দৃষ্টির সামনে একটু সঙ্কুচিত হ'য়ে লজ্জিত হাসিমুখে ঘরের মধ্যে প্রবেশ করলো । পরাণ-বাবু তাকে একখানা চেয়ার দেখিয়ে দিয়ে বললেন—বস্থন ।

তার পর সমবেত লোকদের দিকে ফিরে পরাণ-বাবু বললেন—ই্যা, আমাদের যে কথা হচ্ছিলো । সত্যি, আজ-কাল সব এম-এ, এম-এস্‌সি পাশ করে' পঞ্চাশ ষাট টাকার জগ্গে আপিসে চাকরীর উমেদার, কিন্তু এতো খরচ-পত্র আর কষ্ট করে' যে বিত্তে শিখছে তা কি শুধু রেড়ির-খোলার আর ছাতার বাঁটের রপ্তানি আমদানীর হিসেব লেখবার জগ্গে ? এতে আমার ভারি কষ্ট হয় ।

একজন লোক বললে—কি করবে বলুন, কিছু একটা করে' খেতে তো হবে।

পরাণ-বাবু বললেন—তা তো জানি; কিন্তু যে যা বিত্তে শিখেছে তার চর্চা আলোচনা অনুসন্ধান গবেষণা করলে টাকা আর যশ দু-ই যে হ'তে পারে। আমার দুঃখ হয় যে, এত ছোকরা আমার কাছে চাকরীর উমেদারী ক'রতে আসে, একজন কেউ বলে না যে মশায়, আমি এই বিষয়ের গবেষণা করছি, আপনার লাইব্রেরীতে আমি কাজ ক'রতে চাই, কিংবা আমি যাতে এই কাজই ক'রতে পারি তার একটা ব্যবস্থা করে' দিন।

ঘরের সমস্ত লোক একটু লজ্জিত সঙ্কুচিত হ'য়ে পড়লো। রামযাদু বুঝলে এরা সবাই পরাণ-বাবুর এই কথায় নিজেদের অপরাধী বিবেচনা ক'রছে।

পরাণ-বাবু একটু হেসে আবার বলতে লাগলেন—এই দেখো এই সাহেবরা—এরা কেউ কিছু বিত্তে শিখে, কেউ কিছু না শিখেও সাত সমুদ্র তেরো নদী পারে লক্ষ্মীর সন্ধানে আসছে; দুহাতে যেমন জেব ভর্তি ক'রছে, যে-দেশে কাজ করছে সে-দেশের সন্ধানও করছে তারাই;—ভারতবর্ষের পুরাতন ও বর্তমান সকল বিষয়ের তন্ন তন্ন সন্ধান ক'রেছে ও ক'রছে কারা? ওরা সব সরস্বতীকে সহায় করে' লক্ষ্মীকে বশ করে, তবে না হয় ওরা লক্ষপতি! আর আমরা সরস্বতীকে বিদায় দিয়ে লক্ষ্মীর সেবা ক'রতে চাই, তাই পাই শুধু পেঁচার মুখভ্রষ্ট উচ্ছিষ্ট উৎ এতোটুকু।

তার পরে পরাণ-বাবু হা হা করে' হেসে বললেন—বৃথা আক্ষেপ! এখন আপনাদের সব ছুটি, বেলা হলো। রামযাদু-বাবুর সঙ্গে আমার এখন কাজ আছে। Well Mr. Marris, I shall remember your request, and shall try my best. And you Mr. Kebble, please see me this day week, in the meantime I shall speak to Mr. Cottle. Good bye.

পরাণ-বাবু ইংরেজ দুজনের দিকে হাত বাড়িয়ে দিলেন। তারা সম্রমের সঙ্গে উঠে সম্মুখে নত হয়ে তাঁর হাত ধরে' বিদায় নিয়ে চলে' গেলো। অণ্ড সকলেও কল-টেপা পুতুলের মতন এক সঙ্গে দাঁড়িয়ে উঠলো ও একে একে নমস্কার করে' করে' ঘর থেকে বেরিয়ে যেতে লাগলো। যাবার সময় সকলেই একবার করে' রামযাদুকে দেখে নিচ্ছিলো,—তাদের সকলেই ঈর্ষা ও কৌতূহল হচ্ছিলো—কে এই ভাগ্যবান, যে সকলকে বিদায় করিয়ে একলা কর্তার কাছে রয়ে গেলো!

সকল লোক চলে' গেলে পরাণ-বাবু চকী চেয়ার ফিরিয়ে রামযাদুর দিকে মুখ করে' বসে' বললেন—আমার বড় সৌভাগ্য যে, আপনি দয়া করে' পায়ের ধুলো দিতে এসেছেন। সেদিন থেকে আপনার পরিচয় জান্‌বার জন্যে আমি ভারি উৎসুক হয়ে আছি।

রামযাদু তার শীর্ণ মুখে শুষ্ক হাস্যে বড় বড় দাঁত বিকশিত করে' বললে—আমরা সামান্য লোক, আমাদের পরিচয়ও

যৎসামান্য । আপনি মহাশয় ব্যক্তি, তাই পথের লোককে ডেকে
বাড়ীতে আনতে চান ।

পরান-বাবু স্মিতমুখে বললেন—পথে রত্ন কুড়িয়ে পেলে কে
ছাড়ে বলুন । পরান-বাবু হো হো করে' উচ্চ হাস্ত করলেন ।

রামঘাট্ট পাণ্টা জবাব দিলে—কিন্তু জহরীই কেবল রত্ন
চিন্তে পারে ।

রামঘাট্টর জবাবে পরান-বাবু আবার জোরে হেসে উঠলেন :
সে হাসি যে খুশীর, তা তাঁর চোখ-মুখ দেখেই রামঘাট্ট বুঝতে
পারলো । পরান-বাবু দীপ্ত মুখে জিজ্ঞাসা করলেন—মশায়ের
বিষয়-কর্ম কি করা হয় ?

রামঘাট্ট বললে—নামে বশোরে ওকালতী করি । কিন্তু
Law is a jealous mistress, তাঁর একাগ্র উপাসনা না করলে
তিনি প্রসন্ন কিছুতেই হন না ।

পরান-বাবু জিজ্ঞাসা করলেন—আপনার আর-কিছু কাজ
আছে কি ?

রামঘাট্ট মুখভাব একটু অপ্রতিভ করে' বললে—আজ্ঞে,
ঠিক কাজ নয়, একটু বাতিক আছে । বশোরের বাবে এর জন্মে
আমাকে কি কম উপহাস সহ করতে হয় ।

পরান-বাবু কৌতূহলী হয়ে উৎসুক স্বরে জিজ্ঞাসা করলেন—
আপনার বাতিকটা কি শুনতে পাই কি ?

রামঘাট্ট যেন গোপনীয় কথা অনিচ্ছায় বলছে এমনি সঙ্কচিত
ভাবে বললে—আজ্ঞে সে শোনবার মতন কিছু নয় । কতকগুলো

খেয়ালের বশে ভূতের বেগার খাটছি—তিনখানি বই লেখবার চেষ্টা করছি আজ বারো বছর ধরে'। ঘরে এমন পয়সা নেই যে ওকালতী ছেড়ে শুধু বই লিখি, আবার বই লেখার দিকে মন থাকাতে ওকালতীও ভালো লাগে না—কাজেই, পসারও জমে না—সত্যিকে মিথ্যে আর মিথ্যেকে সত্যি সাজাতে প্রবৃত্তিও হয় না—আমার হয়েছে এখন দু-নৌকোয় পা।

রামযাদু নিজের ব্যবসার ক্ষতি করে'ও বা-রো বছর ধরে' বই লিখে আর তার প্রবন্ধনার ব্যবসায় প্রবৃত্তিও নেই, এই খবর জেনে, রামযাদুর উপর পরাণ-বাবুর ভক্তি-শ্রদ্ধা দ্বিগুণ বেড়ে গেলো। তিনি সন্ত্রম-ভরা স্বরে জিজ্ঞাসা করলেন—কি কি বিষয়ে বই লিখছেন ?

রামযাদু বিনয়ের স্বরে বললে—সে বলবার মতন নয় ; বিশ্বরক্ষাও তাতে কারো কিছু উপকার হবে না। তবু লিখছি—ভূতে পাওয়ার মতন খেয়ালে পেলে তো আর রক্ষা নেই।—একখানার নাম দিয়েছি—পৌরাণিক উপাখ্যান ; তাতে এক একটা পৌরাণিক উপাখ্যান ধরে' তার development trace করবার চেষ্টা করেছি ; বেদ, ব্রাহ্মণ, কল্পসূত্র, ধর্মশাস্ত্র, রামায়ণ, মহাভারত, পুরাণ, উপপুরাণ, লৌকিক কাব্য আর জনপ্রবাদের ভিতর দিয়ে কালানুক্রমে একটি আখ্যান সামান্য বীজ থেকে কেমন করে' অঙ্কুরিত হয়ে ক্রমে পল্লবিত হয়েছে তারই ধারাগুলি আমি ধরবার চেষ্টা করছি।.....

পরাণ-বাবুর ছোটো ছোটো গোল গোল দুই চোখ বিষ্ময়ে

প্রশংসায় আনন্দে যেনো ফেটে ঠিকরে পড়বার মতন বিস্ফারিত হয়ে উঠলো, বাঁপের মতন তাঁর ঝোলা গোঁপ ফুলে বেঁকে উঠলো, তিনি উল্লসিত কণ্ঠে বলে' উঠলেন—এ যে অসাধারণ আশ্চর্য্য বই হচ্ছে !

রামযাদু নিজের ধূর্ততায় নিজের উপর পরম সন্তুষ্ট হয়ে বললে—কবি-রবি বলেছেন—‘যত সাধ ছিলো সাধ্য ছিলো না ।’ মনের মতন করে’ লিখতে পারছি কই ? থাকি যশোরে, না আছে সেখানে কারো ভালো লাইব্রেরী, আর না আছে আমার টাকা যে বই কিনবো । কানে-ভদ্রে একখানা বই কিনি, থেকে থেকে কল্কাতায় ছুটে আসি—তাতে ওকালতীরও ক্ষতি হয়, বই লেখার কাজও এগোয় না ।

পরান-বাবু জিজ্ঞাসা করলেন—তা এর কতোটা লেখা হয়েছে ?

রামযাদু বললে—তা হয়েছে অনেকখানি, একটা বেশ বড়ো বই হয় । কিন্তু হলে হবে কি ? টাকাও নেই যে বই ছাপি, আর রোজই দেখছি যে আঙ্ককের চেয়ে কালকের জ্ঞান আমার অসম্পূর্ণ ছিলো, তাই ছাপতে সাহসও হয় না ।

পরান-বাবু অত্যন্ত খুশী হয়ে জিজ্ঞাসা করলেন—আপনার আর দুখানা বই কি কি বিষয়ে ?

রামযাদু বললে—দ্বিতীয়খানা লিখছি—বাংলায় বৌদ্ধধর্মের ভগ্নাবশেষ সম্বন্ধে ; সহজিয়া, বাউল, নেড়ানেড়ি, ধর্মঠাকুর, চণ্ডী, শীতলা, মনসা প্রভৃতি ধর্ম যে বৌদ্ধধর্মেরই ভগ্নাবশেষ তা

প্রমাণ করবার চেষ্টা করেছি ; অনেক গান, ছড়া, প্রবাদ সংগ্রহ করে' আমার মত সমর্থন করেছি ; এর জন্মে আমাকে গাঁয়ে গাঁয়ে মেলায় মেলায় অনেক ঘুরতে হয়েছে ।

পরান-বাবু প্রশংসমান দৃষ্টিতে রামঘাতুর মুখের দিকে চেয়ে আবার জিজ্ঞাসা করলেন—আর তৃতীয় বই ?

রামঘাতু বললে—তৃতীয় বই লিখছি যশোর-খুলনার ইতিহাস । যশোর-খুলনা আমাদের বাংলার শেষ বীরত্বের ক্ষেত্র ; এখানে প্রতাপাদিত্য সীতারাম বাংলার শেষ স্বাধীন রাজ্য প্রতিষ্ঠা করেছিলেন । এর জন্মে আমাকে জঙ্গলে জঙ্গলে বেড়াতে হয়েছে । অনাহারে অনিদ্রায় পরিশ্রমে ম্যালেরিয়ায় শরীর একেবারে জীর্ণ হয়ে গেছে । এ শুধু আমাদের জেলার পলিটিক্যাল ইতিহাস নয়, এতে সামাজিক এবং সাহিত্যিক ইতিহাসও আছে ; জেলার কৃষি শিল্প বাণিজ্য যা ছিলো ও আছে, ও যা হতে পারে, তারও বিস্তারিত বিবরণ আছে ।

পরান-বাবু আনন্দিত ও মুগ্ধ হয়ে বলে' উঠলেন—ও ! তিনখানার একখানা লিখতে পারলেও যে একজন লোক অন্য দেশে ধনী আর অমর হয়ে যেতো । আপনি কাল যদি বই তিনখানা একবার নিয়ে আসেন, তা হলে আমি একবার দেখে ধন্য হই ।

রামঘাতু বললে—সে বই তো আমার সঙ্গে নেই । আমি এসিয়াটিক সোসাইটি থেকে কিছু বই নিয়ে যাবো বলে' কলকাতায় এসেছি । আমি তো নিজে এসিয়াটিক সোসাইটির মেম্বর নই ; একে-তাকে ধরে' বই সংগ্রহ করি...

পরান-বাবু একটু কুণ্ঠিত স্বরে বললেন—তা হলে আমার প্রতি আপনাকে একটু অনুগ্রহ করতে হবে। কি বই আপনার দরকার আমাকে বললে হয়তো আমি আমার লাইব্রেরী থেকে দিতে পারবো, নয় তো আমিই আনিয়ে দেবো। আর যশোরে গিয়ে বই তিনখানা যদি দয়া করে' নিয়ে আসেন, তা হলে আমি সেগুলি দেখে নয়ন মন সার্থক করে' বিশেষ উপকৃত হবো।

রামযাদু বললে—এর জন্মে আপনি অতো অনুরোধ করছেন কেনো? যশোরে তো শুধু লোকের উপহাস পাই; আপনি দয়া করে' আমার কৃতকর্ম যে দেখতে চাইছেন এই আমার সৌভাগ্য। নিজের লেখা নিজের সন্তানের মতন, একজন কেউ তার আদর করলে মন খুশী হ'য়ে ওঠে। আমি আজই যশোর গিয়ে কাল আপনাকে এনে বই দেখাবো।

পরান-বাবু ব্যগ্র হয়ে বললেন—আপনার কাজের যদি কোনো ক্ষতি না হয়.....

রামযাদু বললে—যে লোক অকাজ ঘাড়ে নিয়ে আছে তার আবার কাজের ক্ষতি। একজন সমবাদার লোককে যদি আমার পরিশ্রমের ফল দেখাতে পারি সে তো আমারই পরম সৌভাগ্য। ...আজকে তা হলে উঠি; ঢের বেলা হলো। আপনাকে তো আবার আপিস যেতে হবে?

পরান-বাবু বললেন—হ্যাঁ, এখন চান করবো।...অ বোঁচা-আ-আ!

পরান-বাবুর বজ্রগষ্ঠীর চীৎকারের উত্তরে—এজ্ঞে যাই—

বলার সঙ্গে-সঙ্গেই বোঁচা দৌড়ে এসে সামনে কাঠের পুতুলের মতন আড়ষ্ট হয়ে দাঁড়ালো।

পরাণ-বাবু বললেন—আমার হাত-বাক্স দে।

বোঁচা একটা দেরাজ খুলে একটা ছোট ক্যাশ বাক্স বাহির করে' এনে পরাণ-বাবুর সামনে টেবিলে রাখলো। পরাণ-বাবু বাক্স খুলে দশখানি দশ টাকার নোট গুণে বার করে' বাক্স বন্ধ করলেন। বোঁচা বাক্স তুলে নিয়ে দেরাজে রাখতে গেলো। রামঘাটু যাবার জগ্গে উঠে দাঁড়ালো। পরাণ-বাবু রামঘাটুকে বললেন—আপনার যশোর যাওয়া-আসার খরচ আপনাকে নিতে হবে।

রামঘাটু ব্যস্ত হ'য়ে বললে—সে আপনাকে দিতে হবে না।

পরাণ-বাবু বললেন—আমার জগ্গে আপনি কষ্ট করে' যাওয়া আসা সময়-নষ্ট করবেন, এই আপনার অশেষ অনুগ্রহ। যেটা আমি বহন করতে পারি, সেটা আমাকে বহন করতে আপনি অনুমতি করুন।

রামঘাটু বললে—তা অতো টাকা কি হবে? আমরা তো খার্ডক্লাশে যাতায়াত করি...

পরাণ-বাবু হেসে বললেন—সে নিজের কাজে। কিন্তু আমি আপনাকে আমার কাজে পাঠাচ্ছি—ফাষ্ট্ ক্লাশের পাথেয় আপনাকে দিতে আমি বাধ্য। আর তা-ছাড়া আপনাকে আমি ওকালতী ছাড়াবো হয়ত, কতোদিনে যে আপনি আমার কবল

থেকে ছাড়ান পাবেন তা বলতে পারিনে। সংস্কার প্রতি আমার বড়ো লোভ আছে রামঘাটু-বাবু।

পরান-বাবু হো হো করে' হেসে রামঘাটুর হাতে নোটগুলি গুঁজে দিলেন।

রামঘাটু নোটভরা অঞ্জলি তুলে পরান বাবুকে নমস্কার করে' বললে—আপনি আমাকে সেনেন না, শোনেন না, এতোগুলি টাকা আমাকে দিচ্ছেন! আমি যদি আর এমুখো না হই? আপনি আমার বিজ্ঞা-বুদ্ধি গবেষণা সম্বন্ধে আমার নিজের মুখের কথা ছাড়া আর কোনো পরিচয় পান নি; আমার কথা যদি মিথ্যা হয়, ভুলো হয়? শেষকালে প্রতারণিত প্রবঞ্চিত হয়েছেন বলে' দুঃখ পাবেন। আপনার মতন মহৎ ও সরল লোককে আমি ঠকাতে পারবো না। আমি আগে আমার পরিচয় দি, যদি যোগ্যতা প্রমাণ করতে পারি তবে আপনার দান আমি গ্রহণ করবো।

পরান-বাবু রামঘাটুর কথায় পরম সন্তুষ্ট হয়ে বললেন—দেখুন রামঘাটু বাবু, রোজ দুবেলায় আমার কাছে পঞ্চাশ ঘাট জন লোক স্বার্থসিদ্ধির সন্ধানে আসে। আমি যথাসাধ্য তাদের সাহায্য করি। সবাই কিন্তু ভাবে আমি ভারি বোকা, তারা সেয়ানা, আমাকে তারা ঠকিয়ে ভোগা দিয়ে গেলো! আমিও জেনে শুনে সকলের কাছে ঠকি, অথচ প্রকাশ করিনে। আপনার মতন সরল অকপট স্পষ্ট কথা আমি কারো কাছে শুনি নি। একবার না হয় আমাকে সত্যি সত্যি ঠকতে দিন।

রামঘাটু এইবার নোটগুলি পকেটে গুঁজতে গুঁজতে হেসে বললে— নেহাৎ যখন ঠকবেনই আপনি, তখন কি করবো বলুন। তবে আজ বিদায় হই।

পরান-বাবু বললেন—প্রণাম হই। কাল আবার পায়ের ধুলো পাবো এই প্রতীক্ষায় থাকবো।

রামঘাটু হেসে বললে—পায়ের ধুলোর যে-রকম মোটা বায়না আজ দান করলেন তাতে পায়ের ধুলো খুব ঘন ঘন পড়বে, সে বিষয়ে নিশ্চিত থাকবেন। কাঙালকে শাগের ক্ষেত দেখিয়েছেন ; শেষকালে মনে হবে আপদ বিদায় হলে বাঁচি।

পরান-বাবু অত্যন্ত খুশী হয়ে বললেন—এমন পষ্ট সত্যি কথা আমি কারো কাছে কখনো শুনি নি মুখুজে মশায়। যদি আপদ বোধ হয়, তা হলে আমিও পষ্ট সত্যি কথা বলতে চেষ্টা করবো। আচ্ছা, আজ ছুটি।

পরান-বাবুর গুরুগস্তীর উচ্চ হাস্যরোলে ঘর ভরাট হয়ে গম্গম্ করতে লাগলো।

রামঘাটু এক মন হাসি মনের মধ্যে চেপে রেখে বেরিয়ে যাবে, এমন সময় পাশের এক দরজা দিয়ে কৃষ্ণকলি সেই ঘরে এসে ঢুকলো। রামঘাটু অমনি ফিরে দাঁড়িয়ে কৃষ্ণকলিকে টপ করে' কোলে তুলে নিলে এবং পরান-বাবুকে জিজ্ঞাসা করলে— এটি আপনার ছোটো মেয়ে বুঝি ?

পরান-বাবু হেসে বললেন—হ্যাঁ, আপনাদের আশীর্বাদে ঐটিই এখন সম্বল।...

কৃষ্ণকলির সঙ্গে প্রথম সাক্ষাতেই রামঘাটু তাকে যে মুখ ভেঙিয়ে ভয় দেখিয়েছিলো সে-কথা কৃষ্ণকলি ভোলে নি। তাই এখন রামঘাটু তাকে কোলে তুলে নেওয়াতে সে কতক ভয়ে ও কতক বিরক্তিতে ও ঈষৎ লজ্জায় ব্যস্ত হয়ে রামঘাটুর কোল থেকে নেমে পড়বার জন্তে ছটফট করছিলো। কৃষ্ণকলিকে ব্যস্ত দেখে পরাণ-বাবু হেসে বললেন—ওকে ছেড়ে দিন মুখুজ্জ মশায়, ওর পা আপনার গায়ে লাগছে, ওর অকল্যাণ হবে।

এই অতি-কুৎসিত মেয়েটাকে কোলে করে' রামঘাটুর সমস্ত দেহ-মন কেমন ঘিন্ঘিন্ করছিলো। সে কৃষ্ণকলিকে মুখ ভেঙিয়ে যে অত্যাচার করেছিলো তার সংশোধনের চেষ্টাতেই সে একরকম মরিয়া হয়ে তাকে কোলে তুলে নিয়েছিলো; কিন্তু কৃষ্ণকলিকে তার আক্রমণে ধড়ফড় করতে দেখে ও পরাণ-বাবুর অনুরোধ শুনে সে কৃষ্ণকলিকে কোল থেকে নামিয়ে দেবার সূযোগ পেয়ে যেনো বিপদ থেকে পরিত্রাণ পেয়ে বাঁচলো। রামঘাটু কৃষ্ণকলিকে কোল থেকে নামিয়ে দিলে এবং নত হয়ে তার মাথায় হাত দিয়ে কাঁপ্তহাসি হেসে বললে—এমন বাপের মেয়ের কখনো অকল্যাণ হবে না।

কৃষ্ণকলি ছাড়া পেয়েই রামঘাটুর কাছ থেকে পালিয়ে এসে বাবার চেয়ার ঘেঁসে দাঁড়ালো। পরাণ-বাবু রামঘাটুর কথা শুনে সম্মেহে কণ্ঠাকে হাত দিয়ে জড়িয়ে বললেন—সে আপনাদের আশীর্বাদ।

রামঘাট্ মুখে হাসি মাথিয়ে এবার বিদায় হয়ে ঘর ছেড়ে বেরুলো।

রামঘাট্ অদৃশ্ হবামাত্র কৃষ্ণকলি বলে' উঠ্‌লো—ও লোকটা বড় ছুঁছুঁ বাবা!...

পরান-বাবু কন্যাকে কোলে তুলে নিয়ে মৃদু ভৎসনার স্বরে বললেন—ছি মা, অমন কথা বলতে নেই। জগতের সবাই ভালো, কেউ ছুঁছুঁ না।

কৃষ্ণকলি প্রতিবাদের স্বরে বলে' উঠ্‌লো—তবে ও আমাকে...

পরান-বাবু মনে করলেন, কৃষ্ণকলিকে কোলে তোলার জন্ম সে রামঘাট্‌র উপর বিরক্ত হয়েছে। কিন্তু কৃষ্ণকলির কথা শেষ হবার আগেই সেই ঘরে একজন লোক এসে প্রবেশ করলো। তাকে দেখেই পরান-বাবু বলে' উঠ্‌লেন—এই যে প্রতাপ-বাবু, আস্থন আস্থন, অনেক দিন পরে যে...

কৃষ্ণকলির নালিশ আর শেষ করা হলো না। সে আশু আশু বাবার কোল থেকে নেমে ঘর থেকে বেরিয়ে চলে' গেলো। পরান-বাবু আগন্তুকের সঙ্গে আলাপে প্রবৃত্ত হলেন। রামঘাট্‌র অদৃষ্ট তার প্রতি স্প্রসন্ন হয়ে তাকে এ-যাত্রা বাঁচিয়ে দিলে!

কিরণ-বাবু মৃত্যুর সময় রামঘাট্‌র হাতে দু-হাজার টাকা ও একটি বাক্সের চাবি দিয়ে তাকে বলেছিলেন—ঐ কাঠের বাক্সের ভিতর আমার জীবনের পঁচিশ বৎসরের পরিশ্রম সঞ্চিত

আছে। তিনখানা বই আমি লিখছিলাম, প্রায় শেষ করা হয়েছে ; ঐ তিনখানা তুমি ছাপিয়ে প্রকাশ কোরো। ছাপবার খরচ দু-হাজার টাকা তোমার হাতে দিলাম ; অত খরচ হয়তো লাগবে না—যা বাঁচবে তা তোমার ; আর বই বিক্রীর যা আয় হবে তাও তোমার। আমার এই শেষ অনুরোধটি তুমি রক্ষা কোরো, আমি পরলোক থেকে দেখে সুখী হবো।

রামঘাট্ট সেই দু-হাজার টাকা হাতে পেয়ে কতকগুলো বাজে লেখা ছাপিয়ে অপব্যয় করা আবশ্যিক মনে করে নি। কিরণ-বাবুর লেখা বই তিনখানির রাশীকৃত খাতা কাঠের বাক্সের মধ্যেই বন্ধ হয়ে পড়েছিলো, এবং কিরণ-বাবুর দেওয়া দু-হাজার টাকা রামঘাট্টর নিজের ও তার স্ত্রী-পুত্র-কণ্ঠার নামের সেভিংস্-ব্যাঙ্কের খাতায় চারিয়ে জমা হয়ে গিয়েছিলো। এই পুঁজির ভরসাতেই সে কথঞ্চিৎ নিশ্চিত হয়ে চাকরীর সন্ধান করছিলো।

কিরণ-বাবুর বই তিনখানার কথা রামঘাট্ট এক রকম ভুলেই গিয়েছিলো। আজ পরাণ-বাবুর মুখে সাধারণ চাকরীর উমেদারদের প্রতি তাঁর অবজ্ঞা ও বিঘ্নানুসন্ধিৎসুদের সাহায্য করতে স্বীকারোক্তি শুন্বামাত্রই রামঘাট্টর স্বার্থবুদ্ধি তৎক্ষণাৎ সজাগ হয়ে তাকে স্মরণ করিয়ে দিলে, সেই অবহেলিত কাঠের সিন্দুকটার কথা ; এতোদিন সে যে-খাতার রাশিকে অকেজো আর্জনা মনে করে' এসেছে, আজ তার সেগুলিকে টাকা-ধরা ঝড়শীর টোপ বলে' মনে হলো, আলাদীনের প্রদীপের মতন সেগুলির অসাধ্যসাধনের শক্তি তার কাছে স্পষ্ট হয়ে উঠলো।

সে তৎক্ষণাৎ স্থির করে' ফেললে, পরাণ-বাবুকে তাঁর নিজের কথার জ্বালে বন্ধ করে' কিরণ-বাবুর লেখা খাতাগুলিকে অস্ত্র করে' তাঁকে বধ করতে হবে। একবার তার মনে একটু ভয় হয়েছিলো যে কিরণ-বাবুর লেখার মধ্যে বাস্তবিক কোনো গুণপনা আছে কি না; সে তো শুধু বই তিনখানার নাম ও সূচীপত্র মাত্র পড়েছিলো, কোন্ বই কেমন লেখা হয়েছে যাচাই করে' দেখবার আগ্রহ তার তো একদিনও হয়নি— কারণ যেখানে অর্থলাভের সম্ভাবনা নেই, সে জিনিস যে তার কাছে নিতান্তই বাজে। এই-সব খাতার স্তূপ যদি বাস্তবিকই বাজে বকুনিতে ভরা থাকে তবে সেগুলি পরাণ-বাবুকে দেখিয়ে সে কি শেষকালে অপ্রস্তুত হয়ে যাবে? কিন্তু সঙ্গে সঙ্গে তার এও মনে হতে লাগলো যে, কিরণ-বাবুর মতন একজন শিক্ষিত বুদ্ধিমান লোক যে-বিষয়ে পঁচিশ বৎসর পরিশ্রম করেছে তু কি একেবারেই খেলো হবে?

এইরূপ সাত-পাঁচ ভাবতে ভাবতে রামযাছু তার বন্ধুর মেসে ফিরে গেলো। তার পর প্রফুল্ল মনে খাওয়া-দাওয়া করে' বললে, মার অস্থির কথার শুনে মনটা চঞ্চল হয়ে আছে; যদিও দেশের লোকটি বললে যে, মা ভালো আছেন, তবু মন স্থির হচ্ছে না; যাই একবার মাকে দেখেই আসি।

মেসের লোকে তার মাতৃবৎসলতা দেখে মুগ্ধ হয়ে গেলো। রামযাছু দেশে যাত্রা করলে।

রামযাছু প্রথম প্রাপ্ত ট্রেনে যশোরে পৌঁছেই কিরণ-বাবুর

বইএর সিন্দুকটা খুলে বসলো। সেই-সব খাতার মধ্যে মৌলিক গবেষণা আছে কি না খোঁজার চেয়ে, কোথাও কিরণ-বাবুর নাম-গন্ধ পরিচয় আছে কি না তাই তন্ন তন্ন 'করে' খুঁজতে লেগে গেলো। অতি সাবধানে কিরণ-বাবুর নাম বা পরিচয় খুঁজে খুঁজে সেই জায়গাটার কাগজ ছিঁড়ে ফেলবার উপায় থাকলে ছিঁড়ে ফেলতে লাগলো, নয়তো কালী দিয়ে তার উপরে এমন ঘন প্রলেপ দিতে লাগলো যে, তার ভিতর থেকে কিরণ-বাবুর নাম যেনো উঁকি মারতেও না পারে।

সমস্ত রাত জেগে এই চুরির আয়োজন সম্পূর্ণ করে' পরদিন সে সিন্দুকটি নিয়ে কলিকাতা রওনা হলো; পরাগ-বাবুর জন্তে এক ভাঁড় ভালো গাওয়া-ঘি ও একটা প্রকাণ্ড মানকচু সংগ্রহ করে' নিতেও তার ভুল হলো না।

কলকাতায় এসে সে একেবারে বরাবর পরাগ-বাবুর বাড়ীতে গিয়ে উপস্থিত। গাড়ীর ছাদ থেকে নামলো বইভরা সিন্দুক ও মানকচু এবং গাড়ীর জঁঠর থেকে বেরলো ঘিয়ের ভাঁড় ও জীর্ণ ছাতা হাতে শীর্ণ রামঘাট।

রামঘাট ব-মাল পরাগ-বাবুর সম্মুখে উপস্থিত হতেই পরাগ-বাবুর ছোটো ছোটো চোখ দুটি উজ্জ্বল হয়ে উঠলো ও ঝাঁপালো গোঁপটা আনন্দে ভয়-পাওয়া বিড়ালের মতন ফুলে উঠলো। পরাগ-বাবু বললেন—প্রণাম হই মুখুজে মশায়! অনেক রকম স্বপ্নাটু সামগ্রী এনেছেন যে!...ওরে রামা, গাড়ীর ভাঁড়া দিয়ে দিস্।

রামযাতু পকেট থেকে মনিব্যাগ বের করে' বললে—গাড়ীর ভাড়া আমি দিচ্ছি।

পরান-বাবু হেসে বললেন—আমার বাড়ীতে এসে আপনি গাড়ীভাড়া দেবেন কি ? আপনি নিশ্চিত হয়ে বসুন তো।

রামযাতুকে পয়সা খরচ না করা সম্বন্ধে দুবার অনুরোধ করতে হয় না। সে মনিব্যাগটি যথাস্থানে পুনঃস্থাপিত করে' চেয়ারে গিয়ে বসলো এবং সে শূন্যে পেলে গাড়ীখানা দরজার কাছ থেকে চলে' গেলো—তা হলে গাড়োয়ান ভাড়া ইতিমধ্যে পেয়ে গেছে।

রামযাতু বসলে পর পরান বাবু বললেন—ঐ সিঁদুকে আপনার বই আছে বুঝি ?

রামযাতু ঘাড় নেড়ে সায় দিলে দেখে পরান বাবু আবার প্রশ্ন করলেন—ঐ ভাঁড়ে কি ?

রামযাতু একটু সম্বন্ধমুক্তিত ভাবে বললে—আপনার জন্তে একটু খাঁটি গাওয়া-ঘি এনেছি।

পরান-বাবু উৎফুল্ল হয়ে বলে' উঠলেন—চমৎকার ! আমি মশায় একবার নড়ালে গিয়েছিলাম ; সে যে ঘি খেয়েছিলাম, তার গন্ধ আর স্বাদ এখনো যেনো আমার নাকে আর জিভে লেগে আছে ! কল্কাতায় এমন জিনিস পাবার জো নেই—মাখনে পর্য্যন্ত ভেজাল দেয় মশায় ! মাখন-গলানো ঘি খেয়ে অম্বলে গলা জলে' সারা হতে হয় ।...ওরে পচা !

পরাণ-বাবুর বজ্রনিদার উত্তরে নীচের তলা থেকে জবাব এলো—এজ্ঞে যাই !

শব্দ এসে পৌঁছাবার সঙ্গে সঙ্গেই পচা অভিধেয় ভৃত্য ছুটে এসে হাজির হলো এবং ছুটে আসার জন্তু দ্রুত নিশ্বাস চেপে স্বাভাবিক নিশ্বাস নেবার চেষ্টা করতে লাগলো ।

পরাণ-বাবু বললেন—এই ঘি আর কচু বাড়ীর ভিতর নিয়ে যা—ঘিটা ভালো করে' রাখতে বলবি—খাঁটি গাওয়া ঘি !—যশোরের !—বুঝ্‌লি ?

পচা নত হ'য়ে ভাঁড় ও কচু তুলতে তুলতে বললে—এজ্ঞে ।

পরাণ বাবু বললেন—আর বোঁচাকে বল, ঐ সিন্দুকটা পাশের ঘরে তুলে রেখে দেবে ।—বুঝ্‌লি ?

পচা ভাঁড় ও কচু নিয়ে চলে' যেতে যেতে বলে' গেলো—এজ্ঞে ।

এবার পরাণ-বাবু রামঘাতুর দিকে ফিরে বললেন—বলতে তো পারিনে মুখুচ্ছে মশায়, বেলা হয়েছে, যদি এখানেই স্নান করতেন.....

রামঘাতু অমনি তৎক্ষণাৎ অস্নান মুখে মিথ্যা কথা বললে—বই লেখবার তথ্য সংগ্রহ করবার জন্তে বনে-জঙ্গলে ঘুরে ঘুরে যে ম্যালেরিয়া ধরেছে, তাতে চান্ করলেই আমার জ্বর হয় ! তাই আজ বারো বচ্ছর আমি চান্ করিনি ।

পরাণ-বাবু বিস্ময় ও প্রশংসা-ভরা স্বরে বললেন—বারো বচ্ছর চান্ করেন নি ! আপনার অসাধারণ অধ্যবসায় ও

বিছানুরাগ ! এমন একনিষ্ঠ বাণীসেবক আমি কখনো দেখিনি !
.....তা হলে মুখুজ্জ মশায়, নতুন কাপড় ও গামছা আছে, দয়া
করে' পা-হাত ধুতে কি কোনো আপত্তি.....

রামঘাট বললে—আপত্তি আর কি ? ইতিহাসের সন্ধানে
ঘুরতে ঘুরতে এমন এক এক গাঁয়ে গিয়ে পড়েছি যে, সেখানে
নমঃশূত্র কি মুসলমান ছাড়া আর কোনো জাত নেই। তাদের
গোয়ালঘরে রান্না করে' খেতে হয়েছে, কি করি বলুন !

পরান-বাবু বললেন—তা হলে গা তুলুন। ওরে পচা, মুখুজ্জ
মশায়কে চানের ঘরে নিয়ে যা।

* * * *

রামঘাট পরান-বাবুর নিত্য অতিথি ও প্রতিপাল্য হ'য়ে
উঠেছে। পরান-বাবুর খরচে কিরণ-বাবুর লেখা বইগুলি
রামঘাটর নামে প্রকাশ হওয়াতে দেশময় রামঘাটর খ্যাতি
ও নাম ছড়িয়ে পড়েছে। দেশের সাহিত্যিক-মহলে
রামঘাটর অসাধারণ খ্যাতির ও প্রতিপত্তি; রামঘাটকে বহু
সভা-সমিতি থেকে সম্বর্ধনা করবার ও অভিনন্দন দেবার
ধুম পড়ে' গেছে। রামঘাট যে সাহিত্য-সাধনার তপশ্রায়
আপনার স্বাস্থ্যকে বলি দিয়েছে এই সংবাদটি যখন সে নিজে
ও পরানবাবুকে দিয়ে দেশময় বেশ করে' প্রচার ও রাষ্ট্র করে'
দিলে, তখন দেশময় সহানুভূতিপূর্ণ প্রশংসার বান ডাকতে
লাগলো; খবরের কাগজে রামঘাটর বইএর সমালোচনা উপলক্ষ্য
করে' নিছক প্রশংসা ও জয়জয়কার বিঘোষিত হ'তে লাগলো;

রামযাদু যে লক্ষ্মণের মতন চৌদ্দ বছর অনাহারে অনিদ্রায় বনে বনে বেড়িয়ে দেবী সরস্বতীর সাধনা করেছে এই সঁবাদেই লোকের মন এমন অভিভূত হ'য়ে উঠেছিলো যে কেউ আর তার নামে প্রচারিত রচনাগুলির প্রকৃত সমালোচনা করবার অবসরই পাচ্ছিলো না। কালকাতার বিশিষ্ট সমাজে রামযাদুর প্রতিষ্ঠা এমন ঠাৎ কায়েমা হ'য়ে গেলো যে, রামযাদুর নিজের বুদ্ধির প্রখরতা সম্বন্ধে গভীর বিশ্বাস থাকা সত্ত্বেও সেই বুদ্ধিরও এই রকম অপ্রত্যাশিত সাফল্য দেখে' সে আশ্চর্য্য হ'য়ে উঠলো। কলিকাতার বড়ো বড়ো ডাক্তার কবিরাজ বিনা পয়সায় রামযাদুকে চিকিৎসা করে' সুস্থ করবার ঠাগ্রঃ প্রকাশ করতে লাগলেন; বড়ো বড়ো কবিরাজেরা দামী দামী ঔষধ বিনামূল্যে রামযাদুর বাড়ীতে নিজেরা ব'য়ে নিয়ে এসে দিয়ে যান; রামযাদুর মেসের ঘর কবিরাজী ঔষধালয় হ'য়ে ওঠ'বার উপক্রম করতে লাগলো। এতো ঔষধ রামযাদু অকারণে খেতে মাখতেও পারে না; ঘরে জমিয়ে রাখতেও পারে না; কবিরাজেরা প্রায়ই অনাহৃত এসে উপস্থিত হন এবং তাঁরা যদি দেখেন যে, রামযাদু কোনো ঔষধই সেবন করে নি, তবে তাঁরা ক্ষুণ্ণ হবেন এবং তার বুজ ককিও ফাঁস হ'য়ে যাবে; পয়সার জিনিস প্রাণ ধরে' সে ফেলে দিতেও পারে না, সে বরং বিনা-অস্থখে ঔষধ সেবন করে' অস্থখে ভুগতে—এমন কি প্রাণ পর্য্যন্ত ত্যাগ করতে প্রস্তুত আছে, তবু সে প্রাণ ধরে' পয়সার জিনিস ফেলে দিতে পারবে না! ঠাৎ রামযাদুর মনে হলো এই-সব ঔষধ বেচেও তো

দু-পয়সা উপার্জন করে' নিতে পারা যায় ! মনে সঙ্কল্প উদয় হবার সঙ্গে সঙ্গে কর্ণে প্রবৃত্ত হওয়া রামযাদুর স্বভাব । সে ঔষধ বেচবার সন্ধানে নির্গত হলো । ভিন্ন পাড়ায় এক ছোট্ট ঘরের সামনে এক কবিরাজের কদর্য সাইনবোর্ড টাঙানো দেখে' রামযাদু বুঝলে এই কবিরাজটি হাতুড়ে যদিও বা না হয় তো বড়ো গরীব, ছোটো এঁদোপড়া ঘরে তার আস্তানা, আর তার এমন সঙ্গতি নেই যে, একখানা সুশ্রী সাইনবোর্ড লাগায় ; তাকে দিখেই নিজের কার্যসিদ্ধি হবে মনে করে' রামযাদু সেই কবিরাজের ঘরে গিয়ে ঢুকলো । কবিরাজ আগন্তুককে দেখেই গম্ভীর হ'য়ে খাড়া হ'য়ে বসলো । বেচারী হয়তো মনে করলে যে, সেদিন তার সুপ্রভাত ! তার ভাগ্যে একজন রোগী পাওয়া গেছে তা হলে ! রামযাদুর চেহারা একেই শীর্ণ স্নান, তাতে আবার সে নিজেকে রুগ্ন প্রতিপন্ন করবার জন্ম স্নান করা ছেড়ে দিয়েছে ; এই অ-স্থায় তাকে রোগী মনে করাতে কবিরাজের ছুরাশাকে কিছুমাত্র দোষী করা যায় না । কবিরাজের ঘরে একজন লোক বসে' ছিলো ; কবিরাজ তাকে সম্বোধন করে' বলে' উঠলো—আপনি তিন দিন ঔষধ খেয়েই যখন ভালো বোধ করছেন তখন ঐ ঔষধেই আপনার ব্যাধি আরোগ্য হবে ; পুরাতন ব্যাধি কিনা, দীর্ঘকাল ঔষধ সেবন না করলে তো নির্মূল হ'য়ে যাবে না । তার পর রামযাদুর দিকে ফিরে বললেন—আসুন, বসুন । আমি এঁকে দেখে নিয়ে, আপনাকে দেখছি । তার পরে আবার ঘরের অপর লোকটির দিকে

ফিরে কবিরাজ বললে—বৈকালের ঔষধটার অনুপানটা একটু বদলে দেবো। আচ্ছা আপনি বসুন... বলে! রামযাদুকে দেখিয়ে বললে—বাবুকে বড় কাতর কাহিল দেখছি! আগে ঔনাকে দেখে লই... এবং অমনি রামযাদুর দিকে ফিরে বললে—বাবুর ব্যাধিটি কি? একবার হাতটা দেখি—

রামযাদু কবিরাজের রকম দেখে মনে মনে হেসে কবিরাজের প্রসারিত হাতে নিজের হাত সমর্পণ না করে বললে—এঁকে দেখে নিন্। তার পর আমার কথা বলবো—আমার একটু গোপনে...

কবিরাজ উৎসাহিত হ'য়ে বলে উঠল—ও! আপনার গোপনীয় ব্যাধি হয়েছে! তার জন্তে কিছু চিন্তা করবেন না, ঐ ব্যাধির ধনুস্তরি ঔষধ আমার কাছে আছে...আমার পিতা-মহের স্বপ্নলব্ধ...

রামযাদু মনে মনে কৌতুক ও বিরক্তি উভয়ই অনুভব করে মনে মনে বললে—দূর বেটা গোবতি! তার পর প্রকাশে বললে—না মশায়, আমার কোনো ব্যাধি নেই। আমি অন্য একটি গোপন কথা আপনাকে বলতে এসেছি...

রামযাদুর এই কথা শুনে কবিরাজের দুই চক্ষু বিশ্বয়ে বিস্ফারিত হ'য়ে উঠলো; অপরিচিত লোক কবিরাজের কাছে চিকিৎসার কথা ছাড়া আর কি গোপনীয় কথা বলতে পারে, তা ঠিক করতে না পেরে কবিরাজ ঘরের অপর লোকটিকে বললে—আচ্ছা হরিচরণ, তুমি এখন যাও, তোমাকে অন্য সময় ব্যবস্থা করে দেবো...

হরিচরণকে কবিরাজ আগে আপনি বলে' সম্বোধন করছিলেন, এখন তাকে সে তুমি বললে, ধূর্ত রামযাদুর লক্ষ্য থেকে এই বিসদৃশ ব্যবহার এড়ালো না; রামযাদু মনে মনে হেসে বললে—বেটা ধড়িবাজ! বাড়ীর লোককে রোগী বানিয়ে পসার জমাবার জোচ্চুরি! আমার কাছে বেটার ধাপ্লাবাজী!

রামযাদু আড়চোখে চেয়ে দেখলে হরিচরণ কবিরাজের দিকে চেয়ে অর্থপূর্ণ ভাবে ঈষৎ হেসে ঘর থেকে বেরিয়ে গেলো।

হরিচরণ চলে' যেতেই কবিরাজ কৌতূহলী স্বরে বলে' উঠলো—আপনার কি কথা?

রামযাদু কণ্ঠস্বর নামিয়ে বললে—কিছু ওষুধ কিনবেন?

কবিরাজ জিজ্ঞাসা করলে—চোরাই মাল নাকি?

রামযাদু মনে মনে কবিরাজকে শক্ত রকম একটা গালাগালি দিয়ে প্রকাশ্যে বললে—না। একজন রোগীর জন্তে আনা হয়েছিলো, এখন আর দরকার নেই।

কবিরাজ জিজ্ঞাসা করলে—রোগীর মৃত্যু হয়েছে বুঝি?

রামযাদু মনে মনে বললে—তোর মৃত্যু হোক দন্ধানন! প্রকাশ্যে বললে—না, মৃত্যু হয় নি; এখন আর সে-সব ওষুধের দরকার নেই। আপনি কিনবেন কি না, তাই বলুন।

কবিরাজ বললে—আরে মশায়, চটেন কেনো? কার ওষুধ,

কি ওষুধ, কোন্ কবিরাজের প্রস্তুত, না জানলে কিনি কেমন করে' ?

রামযাছু বললে—ওষুধ আমার, শহরের সেরা কবিরাজের তৈরী, এই ওষুধের ফর্দ—

রামযাছু ওষুধের তালিকা পকেট থেকে বাহির করে' কবিরাজের সামনে ফেলে দিলে—কবিরাজ পড়তে লাগলো—
বসন্তকুসুমাকর দুই সপ্তাহ, চ্যবনপ্রাশ চার সপ্তাহ, মকরধ্বজ চার সপ্তাহ...এগুলি কি ?...ব্যবস্থাপত্র !...সহরের ধনুস্তরিকল্প কবিরাজদের !...চোরাইমাল নয় তা হলে !...আমি কিনতে পারি...কতো দিতে হবে ?

রামযাছু বললে—অর্দ্ধমূল্য ।

কবিরাজ ফর্দ ফেরত দিয়ে বললে—পারবো না, মাপ করবেন। কম-সম করে' দিলে কিনতে পারি ।

রামযাছু মনে মনে একটু ভেবে বললে—শাস্ত্রে বলেছে সর্বনাশে সমুৎপন্নে অর্দ্ধং ত্যজতি পণ্ডিতঃ! অর্দ্ধের বেশী ত্যাগ করা তো শাস্ত্রবিরুদ্ধ । আর কমাতে আমি পারবো না । বসুন তবে...

দাঁও ফেসে যায় দেখে' কবিরাজ ব্যস্ত হ'য়ে বলে' উঠলো—
আরে মশায়, যান কেনো, একটু বসুন না । ক্রয়-বিক্রয় কি এক কথায় হয়, কথায় বলে—

শও কথায় সওদা,

আর শতেক ঠাসায় ময়দা ;

শতেক চাষে মূলো.....

রামযাদু ব্যস্ত হ'য়ে বলে' উঠলো—আপনার প্লে'ক আবৃত্তি রেখে ওষুধ নিতে হয় তো নিয়ে ফেলুন, আমার ঢের কাজ আছে ।

কবিরাজ মনে মনে বললে—আচ্ছা বাস্তবাবগীশ তো ! দুনিয়ায় সবাই বস্ত, কেবল আমিই দেখি বেকার । তার পর প্রকাশে বললে—আচ্ছা আপনার কথাও থাক্, আমার কথাও থাক্—সিকিমূল্য হলেই ঠিক হতো, তা আপনি যখন বেশী কমাতে নারাজ তখন তেহাই দামে দিয়ে দিন্.....

রামযাদু যথালভ মনে করে' বললে—আচ্ছা, এই আমাদের প্রথম কার্‌বারের বউনি বলে' আপনাকে কম মূল্যে দিচ্ছি ; কিন্তু এর পবে অর্দ্ধমূল্য দিতে হবে ।

ভবিষ্যতেও এই রকম উৎকৃষ্ট ঔষধ অল্পমূল্যে পাবার সম্ভাবনায় উৎফুল্ল হ'য়ে কবিরাজ বললে—আপনি অন্তগ্রহ করে' এলে সে বিষয় বিবেচনা করে' দেখা যাবে । আপনারা ?

রামযাদু বললে—ব্রাহ্মণ ।

কবিরাজ হাতজোড় করে' মাথা তুইয়ে প্রণাম করে' বললে—মধ্যে মধ্যে পায়ের ধুলো দিয়ে কৃতার্থ করবেন । আপনার সঙ্গে আলাপ হ'য়ে বড়ো সুখী হলাম ।

রামযাদু কুকুরের মতন দাঁত বার করে' হেসে বললে—সে উভয়তই ।

রামযাদুর এ একটা নূতন উপার্জনের পথ হলো ; সে এখন আরো বেশী ক'রে শহরের বড়ো বড়ো কবিরাজের কাছে



নিজের স্বাস্থ্যহানির কাঁড়নি গেয়ে ঔষধ আদায় করে, আর সেই কবিরাজকে বেচে আসে।

এক দিন কবিরাজের কাছে ঔষধ বেচে ফিরে আসতে আসতে রামঘাটুর মনে হলো—মানুষের শরীর এই আছে এই নেই। পরাণ-বাবু যে-রকম মোটা, আর তাঁর বয়সও তো কম হয় নি, তাতে তাঁর জীবনের ভরসা আর কতো দিন। বেটা কেওট বেঁচে থাকতে থাকতে আমার একটা কায়েমী হিল্লো বাগিয়ে নিতে হবে।

রামঘাটুর চিন্তাকে কল্পে পরিণত করতে কথখনো কালবিগ্ন হয় না। সে কবিরাজের বাড়ী থেকে নিজের বাসায় ফিরে না গিয়ে বরাবর পরাণ-বাবুর বাড়ীতে গিয়ে উপস্থিত হলো।

তাকে আসতে দেখেই পরাণ-বাবু বলে' উঠলেন—এই যে মুখুজ্জ মশায়, প্রণাম হই। টাইম্‌স্‌ লিটারারী সাপ্লিমেন্টে আপনার বইএর কী রকম প্রশংসা বেরিয়েছে দেখেছেন ?

রামঘাটু উৎফুল্ল মুখে বললে—না...

“এই দেখুন” বলে' পরাণ বাবু কাগজখানা রামঘাটুর সামনে এগিয়ে দিলেন।

রামঘাটু কাগজখানা তুলে চেয়ারে বসতে বসতে বললে—আমি এণ্ডারসন, বেভারিজ, পাজিটার, গ্রিয়ার্সন আর য়াকোবির চিঠি পেয়েছি—তাঁরা সবাই তো দয়া করে' ভালোই বলেছেন। য়াকোবি বার্লিন টাগেব্লাট্‌ আর ট্‌সাইট্‌ থেকে দুটো সমালোচনার কাটিং পাঠিয়েছেন, কিন্তু আমি তো জান্‌মান জানি না...

পরাণ-বাবু বললেন—আপনি আমাকে সে দুটো দেবেন, আমি আমাদের আপিসের সাহেবদের দিয়ে.....

রামযাছু পরাণবাবুর কথার মাঝখানেই বলে' উঠলো— ভালো কথা মনে করে' দিয়েছেন—আমি ক'দিন থেকেই বলি-বলি করছি, কথায় কথায় চাপা পড়ে' যায়, আর বলা হয় না.....

পরাণ-বাবু উৎসুক হ'য়ে বললেন—আজ্ঞে করুন.....

রামযাছু বলতে লাগলো—আপনার আপিসের কথাতেই মনে হলো—আপনার আপিসে আমার যদি একটি কাজ...

পরাণ-বাবু ব্যস্ত হ'য়ে বললেন—আপনার আর কাজ করবার কি দরকার? আপনি নিশ্চিন্ত হ'য়ে সাহিত্যানুসন্ধান করুন; আমি তো বলেছি, আপনার সপরিবারের অভাব আমারই অভাব এবং তা মোচন করবার চিন্তাও আমারই...

রামযাছু দস্তবিকাশ করে' বললে—আপনার অসীম দয়া, পরম মহত্ত্ব, অগাধ উদারতা! কিন্তু...

পরাণ-বাবু উৎসুক হ'য়ে জিজ্ঞাসা করলেন—এতে আর কিন্তু কি মুখুজ্জি মশায়?

রামযাছু পরম বিনয়ের অভিনয় করে' মাথা নীচু করে' বললে—আজ্ঞে স্বাবলম্বী হ'য়ে সাহিত্যালোচনা করতে পারলেই...

পরাণ-বাবু আনন্দে উৎফুল্ল হ'য়ে উঠে বললেন—এ আপনারই উপযুক্ত কথা হয়েছে মুখুজ্জি মশায়! স্বাবলম্বন! এই কথাটি যে কত বড়ো কথা, তা আমাদের দেশের লোকেরা তো বড়ো-কেউ একটা বোঝে না! আপনার যে গুণগণনা আছে তাতে

আপনার অভাব-মোচনের ভার গভর্মেণ্টের ও দেশের লোকেরই নেওয়া উচিত এবং তা'রা নিতেও প্রস্তুত আছে; তৎসত্ত্বেও আপনি যে স্বোপাজ্জিত আয়ের উপরই নির্ভর করতে চান এতে আপনার পৌরুষ আর মহত্বেরই পরিচয় পাওয়া যায়।

রামযাছু আপনার কৌশলের সফলতায় হর্ষ-গদগদ হ'য়ে বললে—আপনি আমাকে অনুগ্রহ করেন বলে' এতোটা গৌরব আমাকে দিচ্ছেন ..

পরান-বাবু বললেন—আপনার গৌরব আপনি নিজে অর্জন করেন মুখুজ্জি মশায়! আপনার অর্থোপাজ্জনের পথও আপনা-হতেই মুক্ত হ'য়ে যাবে।

রামযাছু বললে—সে যদি হয় তবে হবে আপনারই অনুগ্রহে! প্রত্যক্ষ বা পরোক্ষ ভাবে আপনার কাছ থেকে উপকার পায়-নি এমন লোক বাংলা দেশে বিরল! আমার বইগুলো তো সিন্ধুকে বন্ধ হ'য়ে ধুলো হ'চ্ছিলো; তাদের আপনিই প্রকাশ করে' আমাকে কৃতার্থ করেছেন, আমাদের বঙ্গ-সরস্বতীকে জয়যুক্ত করেছেন! আমি সরস্বতীর অধম সেবক...

পরান-বাবু রামযাচুর গৌরবে গৌরবান্বিত অনুভব করে' গর্ষিত ভাবে বললেন—আপনি সরস্বতীর বরপুত্র!

রামযাছু প্রতারণালক এই স্তুতিবাক্যে সত্য-সত্যই লজ্জিত হ'য়ে মাথা নত করলে। পরান-বাবু দেখে ভাবলেন—আহা! কি বিনয়!

পরান-বাবু বললেন—আপনি তা হলে প্রস্তুত হ'য়ে থাকবেন,

কাল থেকেই আমাদের আপিসে আপনি বেরোবেন—আজ একবার বড়ো সাহেবকে বলে’...

রামযাদু বললে—যে-আজ্ঞে । সাহেব-টাহেব ও-সব তে-
মিথ্যে, আপনি সৰ্বশক্তিমান্ ..ইচ্ছাময়...পতিতপাবন...

পরান-বাবু তোষামোদে তুষ্ট হ’য়ে বড়ো বড়ো গোঁপের
ঝোঁপের ভিতর থেকে হেসে বললেন—না না, আপনারা আমার
বন্ধুরা আমাকে যা মনে করেন, তা আমি নই । আচ্ছা মুখুজ্জ
মশায়...

পরান-বাবুর এই আচ্ছা বলে’ স্বর টেনে থেমে যাওয়া মানে
যে সম্বোধিত ব্যক্তিকে বিদায় নিয়ে প্রস্থান করতে বলা তা
রামযাদু জেনে নিয়েছিলো । সে উঠে বললে—আচ্ছা, তবে
এখন আসি ..

রামযাদু বাইরে চলে’ যেতে যেতে মনে মনে বলতে লাগ’লা
—বেটা কেওট ! বোকা নিরেট ! আচ্ছা ভোগা দিয়ে মাথায়
কাঁঠাল ভেঙে খাওয়া যাচ্ছে ! বাবা তারকনাথ, আচ্ছা ফ’ন্দ
বাংলে দিয়েছো বাবা ! বিশ্বাসের পোকে আর কিছুদিন বাঁচিয়ে
যদি রাখো তো আমি বেশ দু-পয়সার সঙ্গতি করে’ নিতে
পারবো !

পরান-বাবুর কাছ থেকে বিদায় হ’য়ে রামযাদু নীচে নেমে
এসেই দেখলে, থাকোহরি নীচের দালানে দাঁড়িয়ে রয়েছে—তার

পরনে মিহি দেশী ধুতি, গায়ে জালি গেঞ্জির উপরে আন্ধির পাঞ্জাবী পিরাণ, পায়ে পেটেন্ট লেদারের চটি ; অধিকন্তু তার চোখে সোনার চশমা চ'ড়েছে, আর হাতের মণিবন্ধে সোনার বন্ধনীতে সোনার হাতঘড়ি বাঁধা আছে ! তাকে দেখেই রামযাদুর মন ঈর্ষায় জ্বলে' বলে' উঠলো—ঈস্ ! ঠিক যেনো জামাই-বাবু ! বেশ আছে বাবা !...

রামযাদুকে আসতে দেখেই থাকোহরি হাসিমুখে তার দিকে এগিয়ে চললো ।

থাকোহরিকে তার দিকে আসতে দেখে রামযাদু বললে—
কি হে থাকোহরি ! বলি খবর কি ?

থাকোহরি রামযাদুর নিকটস্থ হ'য়ে তাকে প্রণাম করবার জন্ম নত হতে হতে বললে—আজ্ঞে ভালো ।

রামযাদু হেসে বললে—ভালো যে তা তোমার চেহারা দেখেই মালুম হচ্ছে । তা এখন করা হচ্ছে কি ? পড়াশুনো বেশ হচ্ছে তো ?

থাকোহরি বললে—কর্তা কলেজ ছাড়িয়ে দিয়েছেন...

রামযাদু আশ্চর্য্য হ'য়ে চক্ষু বিস্ফারিত করে' বলে' উঠলো—
কর্তা কলেজ ছাড়িয়ে দিয়েছেন ! কেনো ?

থাকোহরি একটু কুণ্ঠিত সঙ্কচিত ভাবে বলতে লাগলো—কর্তা বললেন, আজকাল পাশ-টাস্ করে' তো বিশেষ কিছু হয় না, তার চেয়ে তাড়াতাড়ি আপিসে ঢুকলে কাজ-কর্ম শিখে উন্নতি হতে পারে । তাই তিনি আমাকে তাঁর আপিসে ভর্তি করে' দিয়েছেন ;

আর দুজন প্রাইভেট টিউটার রেখে দিয়েছেন, তাঁদের কাছে সকাল-সন্ধ্যায় আমি লেখাপড়াও করি...

রামযাদুর মন ঈর্ষায় পূর্ণ হ'য়ে উঠলো—এ'কেই বলে পাতা-চাপা কপাল! ছোঁড়া এগ্জামিনে ফেল্ করে' পথের ধারে দাঁড়িয়ে কাঁদছিলো, আর এখন একেবারে এগ্জামিনের ঝগাট কাটিয়ে নবাব বনে' গেছে! আমার আগে হতভাগা আপিসে ঢুকেছে—এইবার আমায় ডিঙিয়ে চলবে দেখছি!

রামযাদুকে মৌন ও বিস্ময়াপন্ন দেখে থাকোহরি তার মুখের দিকে তাকিয়ে ক্লতজ্ঞতাপূর্ণ স্বরে বললে—আমার এই সুখ-স্বচ্ছন্দের মূল আপনারই দয়া! আপনার কাছে আমি চিরকৃতজ্ঞ হ'য়ে.....

এতোক্ষণে রামযাদু আত্মসম্বরণ করে' বললে—না না, আমি আর তোমার কী করেছি! সকলের সকল সুখদুঃখের মূল নিজের নিজের প্রাক্তন কর্ম-ফল আর শ্রীভগবানের দয়া।

থাকোহরি ক্লতজ্ঞতায় গদগদ স্বরে বললে—ভগবানের দয়াই আপনার দয়া রূপে অবতীর্ণ হয়েছিলো!

রামযাদু একটু বিরক্ত স্বরে বলে' উঠলো—তোমার জ্যাঠামি রেখে দাও তো ছোকরা!.....আপিসে কি কাজ করা হয়?...অ্যাপ্রেন্টিস্ আছে বুঝি?...পেড্, না, আন্-পেড্?...

থাকোহরি রামযাদুর তিরস্কারে অপ্রস্তুত হ'য়েও রামযাদুর আত্মপ্রশংসা শ্রবণে অনিচ্ছার পরিচয় পেয়ে তার প্রতি অধিক

ভক্তিমান্ হ'য়ে বললে—কর্তা আমাকে অ্যাসিষ্ট্যান্ট কেশিয়ার করে' দিয়েছেন

বিশ্বয়ের আতিশয্যে রামঘাতুর মুখ থেকে নির্গত হতে যা'চ্ছিলো —“এক্কেবারে অ্যাসিষ্ট্যান্ট্ কেশিয়ার !” কিন্তু সে তার এই বিশ্বয়োক্তি দমন করে' সহজ ভাব অবলম্বন করে' বললে—কতো মাইনে ?

—দেড়শো টাকা থেকে আড়াইশো টাকা গ্রেড্.....

আবার রামঘাতুর মনের মধ্যে বিশ্বয় উন্মুখ হ'য়ে বলে' উঠলো —আরে বাস্ রে ! এক্কেবারে দেড়-শো টা-আ-কা !

তার পর সে প্রকাশ্যে থাকো'রিকে জিজ্ঞাসা করলে—কেশিয়ারের কাজে টাকা জমা দিতে হয় না ?...কর্তা তোমার জামিন হয়েছেন বুঝি ?

—সাহেবরা কর্তার উপরেই লোক বাহালের সব ভার দিয়ে রেখেছেন ; তাই কর্তা নিজের লোককে কেবল জামিন হ'য়ে বাহাল করতে ইচ্ছা করলেন না, তিনি এক লাখ টাকা সিকিউ'রটি ডিপোজিট করে দিয়েছেন ।

এই কথা বলতে বলতে থাকো'রিব চোখ ছলছল করে' উঠলো—তার এতোখানি সৌভাগ্য এবং পরাণ-বাবুর এতোখানি দয়া তার হৃদয়কে অভিভূত করে' তুললে ।

রামঘাতুর মন আবার বিশ্বয়-ভরে বলে' উঠলো—আরে বাস্ রে ! এ-ক লা-খ টা-কা !

কিন্তু সে বিশ্বয় বাহিরে প্রকাশ না করে' হর্ষের ভাব

দেখিয়ে বললে— বেশ ! বেশ ! বড্ড কষ্ট পেয়েছো, এখন ভগবানের রূপায় আর কঠোর অনুগ্রহে তোমার ভালো হোক । খুব সাবধানে কঠোর মন জুগিয়ে চোলো, তাঁর মনজরে যখন পড়েছো তোমার আখেরে ভালোই হবে ।

রামঘাতুর এই আশীর্ব্বাদে থাকোহরির পূর্ণ চিত্ত উদ্বেলিত হ'য়ে উঠলো ; কিন্তু সে রামঘাতুর তিরস্কারের ভয়ে তাকে মুখে কিছু না বলে' নীরবে নত হ'য়ে তার পায়ের ধুলো নিলে ।

রামঘাতু চিন্তিত মনে সেখান থেকে চলে' যেতে যেতে বললে— আচ্ছা ভাই, আমি এখন তবে আসি.

থাকোহরি মগ্ন ও মগ্ন দৃষ্টিতে রামঘাতুর মুখের দিকে তাকালে । রামঘাতু পরাণ-বাবুর বাড়ী থেকে বেরিয়ে চলে' গেলো ।

রামঘাতু রাস্তায় চলতে চলতে ভাবতে লাগলো—বেটা ঘুঁটে-কুড়ুনির ছানা একেবারে হঠাৎ-নবাব ! এ যে দেখি রাই কুড়ুতে বেল । পরাণে টা একে এতো তোয়াজ করছে কেনো ?বেগরাখানা কি ?পরাণে থাকো ছোঁড়ার চাঁদপানা মুখ দেখে ভুলে গেছে ! সাথে কি বন্ধিম-বাবু লিখেছিলেন—সুন্দর মুখের জয় সর্গত্র !... কিন্তু একটা ছোঁড়ার সুন্দর মুখের দাম কি এক লা-গ টা-আ কা ! ছুঁড়ি হলেও বা একটা মানের নাগাল পাওয়া যেতো !ছোঁড়ার মা-মাগীকেও তো এনে বাড়ী ত ভরেছে ! এই ছেলেকে কোলে করে' মাগী বিধবা হয়েছিলো, আর ছেলে হয় নি ; আমি আগে মনে করেছিলাম,

মরুক্ষে পোয়াতির ছেলে বলে' নাম রেখেছিলো থাকোহরি,
কিন্তু তা তো নয়, বিধবার ছেলে বলে' ঐ নাম ।

রামঘাট্ ভাবতে ভাবতে আশ্তে আশ্তে রাস্তায় চলছিলো ।
এখন থাকোহরিকে পরাণ বাবুর যত্ন করবার উদ্দেশ্য ও কার্য-
কারণ-সম্পর্ক আবিষ্কার করতে পেরেছে মনে করে' সে হন্থন্থ
করে' পথ হাঁটতে লাগলো ।

* * * * *

পরদিন সকালে রামঘাট্ নিয়মিত পরাণ-বাবুর বাড়ীতে
গিয়ে হাজির হলো ; এটি তার প্রাত্যহিক কর্ম । সে পরাণ-
বাবুর বাড়ীর মধ্যে ঢুকেই দেখলে—কুম্বকলি তার ফ্রকের
কোচড়ে কতকগুলো মটর নিয়ে উঠানের মাঝখানে দাঁড়িয়ে
ছড়িয়ে ছড়িয়ে দিচ্ছে, আর এক পাল সাদা পেখম-ধরা পায়রা
তাকে ঘিরে মটরগুলি খুঁটে খুঁটে খাচ্ছে, আর মদা পায়রাগুলো
থেকে থেকে গলা ফুলিয়ে ঘাড় নেড়ে নেড়ে বকম্-বকম্ করে'
ডাকতে ডাকতে ঘুরপাক খাচ্ছে । রামঘাট্ কুম্বকলিকে দেখেই
কণ্ঠস্বর যথাসম্ভব মোলায়েম ও স্নেহসিক্ত করে' বললে—এই যে
খুকুমণি ? কি হচ্ছে মা-লক্ষ্মীর ! পায়রাকে খাওয়ানো হচ্ছে ?
সর্বজীবে সমান দয়া তোমাদের ! এ যেনো লক্ষ্মীর সাক্ষাৎ
বৈকুণ্ঠ !

রামঘাট্ কথাগুলো একটু উঁচু গলাতেই বললে ; তার কথা
কুম্বকলি বুঝতে পারবে এমন সম্ভাবনা যে নেই তা জেনেও সে
ঐ-সব কথা বললে এই ভেবে, যে, যারা বুঝতে পারলে সাক্ষাতে

খোসামোদ না ক'রেও খোসামোদ করার কাজ হবে তারা যদি কোনো রকমে শুন্তে পেয়ে যায়।

রামযাদুর ডাক শুনেই রুঞ্চকলি একবার তার মুখ ফিরিয়ে রামযাদুকে দেখেই আড়ষ্ট হ'য়ে দাঁড়িয়েছিলো, এবং যেখানে দাঁড়িয়ে আছে সেখানেই দাঁড়িয়ে থাকবে, না ছুটে পালাবে ভাবছিলো ; তার উপর আবার রামযাদুর মুখে দুর্কোষ্য অনেক কথা শুনে তার বুক ছুঁছুঁ ক'রে কেঁপে উঠলো—এ লোকটা এখনই বুঝি আবার তাকে মুখ ভেংচে ভয় দেখাবে !

রামযাদু রুঞ্চকলিকে পালিয়ে না গিয়ে নীরবে দাঁড়িয়ে থাকতে দেখে আস্তে আস্তে তার দিকে এগিয়ে চললো। রুঞ্চকলি রামযাদুর দিকে পিছন ফিরে দাঁড়িয়ে ছিলো, এবং অনেক পায়রা কলরব ক'রে মটর খুঁটে খাচ্ছিলো ও উঠানের শানের উপর পায়রার ঠোঁট ঠোকর ঠক্ঠক শব্দও হচ্ছিলো, তাই সে রামযাদুর নিকটে আসা দেখতে বা শুন্তে পায় নি। রামযাদু পায়রার গণ্ডীর একেবারে কিনারে গিয়ে আবার ডাকলে—খুকুমনি ! তোমার পায়রাগুলি তো বেশ !...

রুঞ্চকলি একেবারে তার পিঠের কাছে রামযাদুর কথা শুন্তে পেয়ে হঠাৎ চমকে উঠলো এবং মুখ ফিরিয়েই রামযাদুকে শীর্ণ ফ্যাকাশে মুখে বড়ো বড়ো সাদা সাদা দাঁত বাহির ক'রে হাসতে দেখলে। রুঞ্চকলি তৎক্ষণাৎ কোঁচড়ের সমস্ত মটর পায়রাদের উপরে ছড়িয়ে ফেলে দিগ্বে উল্কাখাসে সেখান থেকে দৌড় দিয়ে বাড়ীর মধ্যে পালিয়ে গেলো। . . আর

সমস্ত পায়রা একসঙ্গে পাথা ফট্‌ফট্‌ ক'রে ধুলো উড়িয়ে রামযাছুকে চকিত ক'রে উড়ে গেলো এবং কতকগুলো উঠানের চারিধারের কাণিশের উপরে গিয়ে বসলো, আর কতকগুলো আবার উঠানে নেমে মটর খুঁটতে প্রবৃত্ত হলো ।

রামযাছু অপ্রস্তুত হ'য়ে ফিরে আসতে আসতে মনে মনে বললে—বেটি রক্ষাকালীর বাচ্চা ! তোকে দেখলেই গা-টা ঘিন্‌ঘিন্‌ করে ! কিন্তু তবু তোর সঙ্গে আমার ভাব করতেই হবে—রাপ-মার একমাত্র আত্মরে মেয়ে—তস্মিন্‌ তুষ্টে জগৎ তুষ্ট !

রামযাছু উপরে পরাণ-বাবুর ঘরে গিয়ে প্রবেশ করলে ; দেখলে এক-ঘর লোক ।

পরাণ-বাবু রামযাছুকে দেখেই হেসে বললেন—আসতে আজ্ঞে হোক মুখুজ্জে মশায় ! প্রণাম ! কার সঙ্গে কথা হচ্ছিলো ? কলির সঙ্গে বুঝি ?

রামযাছুর মন ব'লে উঠলো—কলি ! কলি-হুকো ! কালী—কালীর ছানা—বন্ধিম-বাবুর ইন্দিরার কালীর বোতল—শরৎ-বাবুর পোড়া-কাঠ !

কিন্তু রামযাছুর মুখ হাশ্বে বিকশিত হ'য়ে ব'লে উঠলো—আজ্ঞে হ্যাঁ । মা লক্ষ্মীর জীবে দয়া দেখে বড়ো আনন্দ হলো !

অমনি ঘরে উপবিষ্ট লোকেদের মধ্যে দু-তিনজন সমস্বরে ব'লে উঠলো—হবে না কেনো ? কেমন পিতা-মাতার কন্যা ! পিতা সাক্ষাৎ মহাদেব আর মাতা দুর্গা ! তাঁদের কন্যা তো লক্ষ্মী হবেনই ।

একজন ভট্টাচার্য্য কেবল-মাত্র উত্তরীয় গায়ে দিয়ে ব'সে ছিলো ; সে টিকি ছলিয়ে ব'লে উঠলো—হাঁ হাঁ, সঙ্গত কথাই ব'লেছেন—আকরে পদ্মরাগাণাং জন্মঃ কাচমণেঃ কুতঃ !

পরান-বাবু তোষামোদে তুষ্ট হ'য়েও যেনো কেউ তাঁর প্রশংসা-বাক্য উচ্চারণ করে নি অথবা তিনি তা শুনতে পান নি এমনি ভাবে রামঘাটুর কথারই উত্তরে স্মিতমুখে বললেন—হাঁ কলি জীব-জন্তু খুব ভালোবাসে—তার একটি চিড়িয়াখানা আছে—পায়রা, বেরাল, কুকুর, ময়না তাতেও ওর মন ভরে না, মাসে অন্ততঃ একদিন ওকে আলিপুরে চিড়িয়াখানা দেখাতে নিয়ে যেতে হয়.....

একজন লোক ব'লে উঠলো—The child is the father of the man !

ভট্টাচার্য্য বললে—এতদ্বারা ভবিষ্যৎ সূচনা করছে—জীবধাত্রী বহুস্বাক্ষরার গায় বহু পোষ্য পালন করতে হবে তো !

রামঘাটু মনে মনে বললে—রোস্ বেটী রক্ষাকালীর ছানা ! তোঁর মরণ-বাণের সঙ্কান পেয়েছি ! তোঁর সঙ্গে ভাব করতে আর বেগ পেতে হবে না !

পরান-বাবু পারিষদ্দের কথার কোনো উত্তর না দিয়ে হাসিমুখে রামঘাটুকে বললেন—তার পর মুখুজে মশায়, সব ঠিক । আজ থেকেই তা হ'লে কাজে লেগে যাবেন ।

রামঘাটুর মুখ লাভের আনন্দে উৎফুল্ল হ'য়ে উঠলো ; তার ইচ্ছা ছুঁনিবার হ'য়ে উঠতে লাগলো যে, সে জিজ্ঞাসা করে তার

কতো বেতন নিদিষ্ট হয়েছে ; কিন্তু এতো লোকের সামনে সে ঐ প্রশ্ন জিজ্ঞাসা করতে পারলে না ; সে উৎসুক জিজ্ঞাসু দৃষ্টিতে পরাণ-বাবুর মুখের দিকে চেয়ে দস্তবিকাশ করলে ।

ঘরে যারা যারা নিজের বা ছেলে ভাই ভাইপো ভাগ্নে শালা ভগ্নীপতি প্রভৃতির চাকরী বা মাইনে বৃদ্ধির বা বৃত্তি প্রভৃতির আশায় উমেদার হ'য়ে ব'সেছিলো তাদের সকলের উৎসুক দৃষ্টি পরাণ-বাবুর মুখের উপর থেকে ঈর্ষাকুল হ'য়ে রামঘাতুর মুখের উপর গিয়ে পড়লো ; তাদের দৃষ্টি যেনো বলতে চাইছিলো— তুই কে বেটা উড়ে এসে জুড়ে বস্‌ছিস্ ! আর আমরা এতোকাল থেকে নিষ্ফল উমেদারীতে টানা-হাঁটা করছি ! তা'রা সকলেই প্রার্থী ; কাজেই, নিজের মনস্কামনা সিদ্ধ হবার পূর্বে অপর কারো সফলতা দেখলেই তাদের আতঙ্ক হয় সফল ব্যক্তি বোধ হয় তাদেরই স্বার্থসিদ্ধির জায়গাটি অধিকার বা অবরোধ ক'রে বসলো ! পরাণ-বাবুর মন দরাজ ও ক্ষমতা অসাধারণ হ'লেও তারও তো একটা সীমা আছে ! সীমাবদ্ধ স্থানে বস্তু-সমাবেশ যতো হবে অপর বস্তুর স্থান ততো সঙ্কীর্ণ হ'য়ে আসবে এবং অবশেষে স্থানাভাবই ঘটবে । তাই উমেদারেরা অপরের সফলতায় কখনো প্রসন্ন হ'তে পারে না ।

তাই ভট্টাচার্য্য মনের ক্ষোভ দমন ক'রে রাখতে না পেয়ে ব'লে উঠলো—ধন্যোহসি কৃতপুণ্যোহসি !

পরাণ-বাবু সে-কথার দিকে কর্ণপাত না ক'রে রামঘাতুর জিজ্ঞাসু দৃষ্টির উত্তরে হাসতে হাসতে বললেন—আপনার মতন

একজন পণ্ডিত আর রোজ্গারী উকিলের জাত মারুতে যখন বসে'ছ তখন তার উপযুক্ত দক্ষিণা দিতে হবে তো, তাই ঠিক হয়েছে আপনি মুন্সেফের মাইনে পাবেন।

রামযাদুর একেবারে আশাতীত লাভ! তার মন আনন্দে উৎফুল্ল হ'য়ে উঠলো, তার ইচ্ছা করতে লাগলো সে মাটিতে লুটিয়ে প'ড়ে পরাণ-বাবুর পায়ের ধুলো নেয়। কিন্তু অনেক লোক ব'সে রয়েছে ব'লে লজ্জায়, আর পরাণ-বাবুর কাছে নিজের বামনাই-মর্যাদা ক্ষুণ্ণ হ'য়ে যাবার ভয়ে, সে আত্মসম্বরণ ক'রে ব'সে রইলো, কিন্তু তার দুই চোখ দিয়ে আনন্দাশ্রুধারা গড়িয়ে পড়তে লাগলো। একটা চাকরী জোটাবার জন্তু সে কতোবার কতো চেষ্টা করেছে, কতো লোকের দ্বারে গিয়ে ধন্য পেড়েছে, কিন্তু সুবিধা-মতো চাকরী জোটে নি, জুটেছিলো হতাশ হওয়ার দুঃখ আর ধনী বা পদস্থ লোকেদের কর্কশ বাক্য ও অনাদর উপেক্ষা অবহেলা। আর এ একেবারে আড়াই শো টাকা আয়ের চাকরী এক কথায় পেয়ে যাওয়া! রামযাদুর সমস্ত শরীর-মন আনন্দে বিগলিত হ'য়ে অশ্রুপ্রবাহে পরিণত হ'তে চাচ্ছিলো।

রামযাদুর এইরূপ ভাবাবেশ দেখে পরাণ-বাবু অত্যন্ত পরিতুষ্ট হলেন; একজন অভাবগ্রস্ত যথার্থ গুণী ব্যক্তির অভাব মোচনের উপলক্ষ্য হ'তে পেরেছেন মনে ক'রে তিনি আত্মপ্রসাদ লাভ করলেন।

উপস্থিত ব্যক্তিগণও রামযাদুর রকম দেখে নিজেদের কথা ভুলে গেলো এবং তার লাভে সহানুভূতি প্রকাশ ক'রে বলতে

লাগলো—বেশ হয়েছে ! বেশ হয়েছে ! মহতের আশ্রয়ে যখন এসে পড়েছেন তখন গুণের পুরস্কার লাভ তো হবেই ! অগতির গতি, দীনশরণ, আশ্রিতবৎসল মহাপুরুষের কৃপালাভ, গুণ না থাকলেও হয়, আর আপনি তো বিচার তপশ্চায় সিদ্ধপুরুষ !...

উমেদারেরা পরাণ-বাবুকে ও পরাণ-বাবুর প্রিয়পাত্র বিবেচনায়া রামঘাট্টকে একসঙ্গেই স্তুতি করতে লাগলো, এই রামঘাট্টর প্রশংসা অপ্রশংসা যে তাদের স্বার্থসিদ্ধির পক্ষে কতোখানি কার্যকরী, তা তো ঠিক জানা নেই, অতএব সাবধান থাকাই কর্তব্য ।

পরাণ-বাবু প্রশংসায় পরিতুষ্ট হ'লেও যেনো কোনো কথাই কানে তোলেন নি এমনভাবে বললেন—আচ্ছা মুখুজে মশায়, বেলা হচ্ছে, আপিসে সাড়ে দশটায় পৌছতে হবে.....

রামঘাট্ট নীরবে উঠে ধীরে ধীরে ঘর থেকে বেরিয়ে চ'লে গেলো । তার মন অপ্রত্যাশিত লাভের আনন্দে এমন অভিভূত হ'য়ে গিয়েছিলো যে, সে অবশ মনে কিছুই ভাবতে পারছিলো না ।

রামঘাট্ট পরাণ-বাবুর আপিসে পরাণ-বাবুর স্বকীয় কর্মচারী পার্সোনাল অ্যাসিস্ট্যান্ট নিযুক্ত হয়েছে । এতে প্রাচীন ও পুরাতন কর্মচারীরা মনে মনে একটু ক্ষণ ও বিরক্ত হলেও প্রকাশে কিছু বলতে পারে নি, কারণ পরাণ-বাবুর অবিচার সুবিচার বিচার করবার অধিকার কারো ছিলো না, তাদের অনেকের চাকরী বা পদোন্নতি যে বরাবর নিয়ম-সঙ্গত প্রণালীতেই হয়েছে এমন কথা অতি স্বার্থপর ব্যক্তিও নিজের মনে মনেও বলতে পারতো না ;

তাদের সকলের চাকরী ও বেতন-বৃদ্ধি বা পদোন্নতি সবই পরাণ-বাবুর একাধিক খেয়াল ও খুশী অনুসারেই হ'য়ে এসেছে।

চতুর রামঘাটু আপিসে এসেই বুঝলে, তার আগমনটা সেখানে বিশেষ প্রীতির কারণ হয় নি। এমনি সে বৃদ্ধদের সঙ্গে জ্যোষ্ঠা-মশায় দাদা-মশায়, এবং সমান-বয়স্ক বা বয়ঃকনিষ্ঠদের সঙ্গে ভাই ভাই-পো ইত্যাদি সম্পর্ক পাতিয়ে ফেললে। সে অবসর পেলেই অপরের ডেস্কের কাছে গিয়ে হাজির হয় এবং তাকে বলে—দাদা-মশায়, আপনার যদি কিছু বেশী কাজ জমে' থাকে তো দিন না, আমি খানিকটা ক'রে দি...এখন আমার হাত খালি আছে।

এমনি ক'রে সে সকলের কাজ ক'রে সকলকে সাহায্য ক'রে অল্পদিনেই তাদের প্রীতিভাজন হ'য়ে উঠলো। কারো ছুটি নেবার দরকার ; পরাণ-বাবু ছুটি দিতে আপত্তি করলে রামঘাটু বিনীতভাবে অনুরোধ ক'রে বলে—ভদ্রলোকের বিশেষ দরকার ব'লেই ছুটি চাচ্ছেন, আপনি ছুটি মঞ্জুর ক'রে দেন, আমি ওঁব কাজ চালিয়ে দেবো।

পরাণ-বাবু রামঘাটুর পরচ্ছন্দানুবর্তিতা ও কর্মে আগ্রহ দেখে খুশী হ'য়েও মুখে বলেন—আপনার অসুস্থ শরীর ! খেটে খেটে কি শেষকালে মারা পড়বেন !

রামঘাটু পরাণ-বাবুর স্নেহ-বাক্যে কৃতার্থ হ'য়ে হেসে বলে—কাজ করতে না পেলেই আমি মারা পড়বো।

প্রার্থীর ছুটি মঞ্জুর হ'য়ে যায়, সে রামঘাটুর উপর খুশী হ'য়ে থাকে।

আপিসের কারো অসুখ-বিসুখ হ'লে রামঘাটু নিত্য তার বাড়ীতে গিয়ে দেখে আসে ; রোজই সামান্য হ'লেও একটা কিছু পথ্য-সামগ্রী কিনে নিয়ে গিয়ে উপহার দিয়ে আসে ।

আপিসের সহকর্মীদের কারো বাড়ীর কোনো লোকের অসুখ হয়েছে শুনলেও রামঘাটু ব্যস্ত হ'য়ে বলে—যদি রাত জেগে সেবা-শুশ্রূষা করবার লোকের দরকার হয়, তবে অনুগ্রহ ক'রে আমাকে বলবেন ।

এইরূপে সকল লোকের বিপদে সম্পদে দুঃখ-সুখের ভাগী রূপে নিজের পরিচয় দিয়ে দিয়ে অতি অল্প দিনের মধ্যেই রামঘাটু সকলের বন্ধু ব'লে গণ্য হ'য়ে উঠলো । এবং সকলের কাজ ক'রে দেবার সুযোগে সে আপিসের সকল রকম কাজেই অভিজ্ঞ হ'য়ে উঠলো ; সমস্ত আপিসের মধ্যে এমন দশকর্ম্মান্বিত ব্যক্তি আর দ্বিতীয় রইলো না ।

রামঘাটুর কর্ম্মকুশলতায় সন্তুষ্ট হ'য়ে সাহেবেরা এবং তার সহায়তায় সন্তুষ্ট হ'য়ে তার সহকর্ম্মীরা পরাণ-বাবুর কাছে তার প্রশংসা করলে পরাণ-বাবুর ঝাঁপালো গোঁপ-জোড়া হাসিতে ছড়িয়ে যায়, আর ছোটো ছোটো চোখ দুটি উজ্জ্বল ও বিস্ফারিত হ'য়ে ওঠে, তিনি নীরবেই স্পষ্ট বলতে চান—দেখেছো ! কেমন লোক এনেছি !

সকলের কাজ ক'রে দিতে দিতে রামঘাটু যেমন নিজে অভিজ্ঞতা অর্জন করছিলো, তেমনি কোন্ কর্ম্মচারীর কোথায় গলদ ও ত্রুটি আছে তাও তার জানা হ'য়ে যাচ্ছিলো । তাদের

সে মনে মনে শাসিয়ে রাখতো—রোসো বাছাধন, তুমি কোনো দিন আমার সঙ্গে লেগেছো কি আমি তোমার মরণ-কল টিপেছি !

আপিসের সাহেবেরা" রামযাদুর সামনে তার প্রশংসা করলে সে বিনয়-নম্র স্বরে বলে—এতে তো তার প্রশংসা পাবার কিছু কারণ নেই, সে কর্তব্য পালন করে মাত্র ; সে কর্তব্য পালন না করলে অপরাধী হ'য়ে নিন্দাভাজন হবে ।

সাহেবেরা আর কিছু বলে না ; রামযাদু সেলাম ক'রে চ'লে আসে এবং সে বেশ বুঝে আসে যে, সে সাহেবদের খুব খুশী ক'রে দিয়ে এসেছে ।

রামযাদুর সখ্যাতিতে পরাণ-বাবু ছাড়া আর একজন সখী হ'চ্ছিলো—সে থাকোহরি । রামযাদুর কাছে কৃতজ্ঞতায় থাকোহরির অন্তর পূর্ণ হ'য়ে ছিলো, তাই রামযাদুর সখ্যাতিতে তার আনন্দ বৃদ্ধি প্রাপ্ত হ'চ্ছিলো ।

রামযাদু কিন্তু সম্পূর্ণ সন্তুষ্ট হ'তে পারে নি ; সে প্রায়ই ভাবে—সবাইকে তো ঘায়েল করলাম, কিন্তু ঐ কালিন্দী ছুঁড়িকে এখনো বশ করতে পারলাম না ! কি কুক্ষণেই তাকে মুখ ভেংচেছিলাম যে সে এমন ঘাব্ড়ে গেছে যে, তাকে কিছুতেই বাগ মানানো যাচ্ছে না । ছুঁড়ি জন্তু-জানোয়ার ভালোবাসে, কিন্তু সে-সব কিন্তে তো কম খরচ নয় ! কপালে কিছু অপব্যয় লেখা আছে দেখছি ।

রামযাদু কৃষ্ণকলির সঙ্গে ভাব করবার চেষ্টায় তার দিকে

অগ্রসর হ'লেই সে ছুটে বাড়ীর ভিতর পালিয়ে যায়। একদিনও কৃষ্ণকলিকে ধরতে না পেরে রামযাদু হতাশ হ'য়েই একদিন একজোড়া সাদা খরগোশ কিনে তারের জ্বালের খাঁচায় ক'রে নিয়ে এলো। তার মনে হচ্ছিলো—কৃষ্ণকলি হয় তো কিছুতেই পোষ মানবে না, মাঝে হ'তে গোটা কতক টাকা ন দেবায় ন ধর্মায় নাহক খরচ হ'য়ে গেলো।

রামযাদু পরাণ-বাবুর বাড়ীতে প্রবেশ ক'রেই চারিদিকে চোখ বুলিয়ে দেখতে লাগলো কোথায় কৃষ্ণকলি আছে। এই তার পায়রা খাওয়াবার সময়, সে উঠানে থাকবার কথা। রামযাদু উঠানের দিকে অগ্রসর হ'য়ে দেখলে, উঠানে কৃষ্ণকলি নেই; তার পায়রাদের খাবার দেওয়া হ'য়ে গেছে; পায়রাগুলো একটি গুল বৃত্ত ক'রে মটর খুঁটে খাচ্ছে আর কলরব করছে।

রামযাদু হতাশ ও বিপন্ন হ'য়ে চারিদিকে তাকাতে লাগলো; সে একবার ভাবলো—কোনো চাকরকে দিয়ে কৃষ্ণকলিকে ডেকে পাঠাই। কিন্তু পরক্ষণেই তার মনে হ'লো—আমি ডাকছি শুনলে তো সে আসবে না। তবে কি চাকরের হাত দিয়ে খাঁচাটা বাড়ীর ভিতর তার কাছে পাঠিয়ে দেবো? কিন্তু তাতে আমার লাভ কি হবে? তার চেয়ে একটা অন্য কিছু ছুতো ক'রে তাকে ডাকিয়ে আনি, তার পর তার চোখে খরগোশের ছানা পড়লে রক্ষাকালীর ছানা জ্বলে ধরা পড়বে।

এই কথা ভেবে সে কোনো একজন চাকরের সন্ধানে দালান দিয়ে অগ্রসর হ'য়ে চললো। একটু এগিয়ে গিয়েই সে দেখলে,

ঠাকুরদালানের এক কোণে একটা মাটির কৃষ্ণমূর্তি রঙীন পুতুল একটা ছোটো জলচৌকীর উপর বসিয়ে কৃষ্ণকলি কতকগুলি ফুল নিয়ে ঠাকুর-পূজার খেলা করছে।

রামঘাট্ আনন্দিত হ'য়ে প্রফুল্ল মুখে পায়ের শব্দ যথাসম্ভব নিবারণ ক'রে ঠাকুর-দালানে গিয়ে উঠলো।

রামঘাট্কে দালানে উঠতে দেখেই কৃষ্ণকলি চম্কে উঠলো ; তার মুখটা ভয়ে ও অপ্রতিভ ভাবে অন্ধকার হ'য়ে গেলো ; সে সেখান থেকে পালাবার ইচ্ছায় উঠে দাঁড়ালো।

রামঘাট্ কৃষ্ণকলিকে পলায়নোন্মুখ দেখেই ব্যস্ত হ'য়ে তাড়াতাড়ি বললে—থুকু সোনা, দেগো.....তোমার জন্মে কি এনেছি !.....

রামঘাট্ খর্গোশের খাঁচাটা সামনের দিকে এগিয়ে ধরলে। পালাবার উদ্যোগে কৃষ্ণকলির পিঠ রামঘাট্‌র দিকে অর্ধেক ফিরেছিলো ; রামঘাট্‌র কথা শুনে সে মুখ ফিরিয়ে পিঠের উপর দিয়ে দেখেই থম্কে দাঁড়িয়ে গেলো এবং আশ্বে আশ্বে ঘুরে দাঁড়ালো। রামঘাট্ দেখলে কৃষ্ণকলির আরক্ত ছোটো ছোটো চোখ দুটো আনন্দে ও কৌতূহলে উজ্জ্বল হ'য়ে উঠেছে।

রামঘাট্ কণ্ঠস্বর যথাসম্ভব স্নেহকোমল ক'রে বললে—থুকু সোনা, এসো...খর্গোশ নেবে এসো.....কিছু বলবে না...

এই ব'লে সে খাঁচাটা মাটিতে নামিয়ে খাঁচার দরজাটা খুলে দিলে। আর খর্গোশের বাচ্চা দুটি খাঁচার ভিতর থেকে বাহির হ'য়ে লম্বা কান নেড়ে নেড়ে আর শরীরের পশ্চাদ্ধ উৎফিষ্ট

ক'রে নাচিয়ে নাচিয়ে ঘরময় বেড়িয়ে বেড়াতে লাগলো এবং মাঝে মাঝে তাদের বেঁড়ে লেঙ্গটুকু তুড়্ তুড়্ ক'রে কাঁপিয়ে তুলতে লাগলো ।

কৃষ্ণকলির মুখ আনন্দে উদ্দীপ্ত হ'য়ে উঠেছে ; তার অদম্য আগ্রহ হচ্ছে ছুটে গিয়ে বাচ্চা দুটির গায়ে হাত দেয় ; কিন্তু রামযাদুর উপস্থিতি দুর্লভ্য অন্তরায় হ'য়ে তা'কে নিরস্ত ক'রে রাখছে । সে চকিত স্মিত দৃষ্টিতে একবার বাচ্চা দুটির দিকে, একবার রামযাদুর দিকে দেখতে লাগলো ।

রামযাদু একটি বাচ্চাকে ধ'রে কোলে তুলে তার গায়ে হাত বুলিয়ে দিতে দিতে বললে—তুমি কোলে নেবে ?...নাও না, কিছু ভয় নেই.....দেখো, কেমন নরম !.....

রামযাদু কৃষ্ণকলির কাছে এগিয়ে গিয়ে খরুগোশটাকে তার দিকে বাড়িয়ে ধরলে । কৃষ্ণকলি একটু লজ্জিত অপ্রতিভ ভাবে স্মিত মুখে ধীরে ধীরে হাত বাড়িয়ে খরুগোশের অঙ্গ স্পর্শ করলে এবং তখনই আবার সঙ্কচিত হ'য়ে হাত সরিয়ে নিলে ।

রামযাদু কৃষ্ণকলিকে বললে—কোলে নাও তুমি.....

কৃষ্ণকলির মন কৌতুকে ও ঈর্ষ্য ভয়ের ভাবে আবিষ্ট হ'য়ে উঠলো । কিন্তু যখন সে খরুগোশটাকে কোলে নিয়ে দেখলে সেটা তাকে কামড়ালেও না, আঁচড়ালেও না, তখন নিরবচ্ছিন্ন আনন্দে তার মন পূর্ণ হ'য়ে উঠলো ।

ইতিমধ্যে অপর খরুগোশটা লাফাতে লাফাতে গিয়ে কৃষ্ণকলির পজার ফুল নৈবেদ্য খেতে আরম্ভ ক'রে দিয়েছে ।

রামঘাটু তা দেখে তাকে তাড়া দিয়ে ব'লে উঠলো—ধেৎ.....
ধেৎ.....

কৃষ্ণকলি কোলের খর্গোশটির গায়ে হাত বুলাতে বুলাতে
লজ্জিত কুণ্ঠিত মৃদুস্বরে বললে—ও থাক! ও ফুল নৈবিদ্যি তো
খেলা-ঘরের.....

কৃষ্ণকলিকে কথা বলতে শুনে রামঘাটু আপনার উদ্দেশ্যের
সফলতায় উৎফুল্ল হ'য়ে হাসতে হাসতে বললে—আমি আবার
কাল তোমাকে সাদা ইঁদুর এনে দেবো...আর আমরা দুজনে
একসঙ্গে তাদের নিয়ে খেলা করবো...কেমন?

কৃষ্ণকলি তার ঘাড় অল্প একটু কাত ক'রে সম্মতি জানালে;
এবং কোলের খর্গোশটাকে খাঁচার মধ্যে পূরে, অপরটাকে ছুটে
ধরতে গেলো। কৃষ্ণকলিকে ছুটে নিকটে আসতে দেখে
খর্গোশটা ভয়-চকিত হ'য়ে তুড়ুক তুড়ুক ক'রে লাফাতে লাফাতে
ঘরের অপর দিকে চ'লে গেলো। রামঘাটু সেটাকে ধ'রে খাঁচার
পূরে দিলে।

কৃষ্ণকলি দুই হাতে খাঁচাটা টেনে তুললে এবং ভারী খাঁচা
বহনের প্রযত্নে পিঠের দিকে একটু চিতিয়ে চলতে চলতে যেনো
জনাস্তিকে রামঘাটুকে ব'লে গেলো—যাই, মাকে দেখাইগে.....

রামঘাটু বললে—কাল ইঁদুর আনবো, মনে থাকে যেনো....

কৃষ্ণকলি ঘাড় নেড়ে সম্মতি জানালে। কিন্তু তখন সে পূজার
দালান থেকে অন্দর মহলে যাবার পথে বেরিয়ে পড়াতে
রামঘাটুর দৃষ্টির অন্তরালে চ'লে গিয়েছিলো; 'রামঘাটু তার' ঘাড়

নাড়া যে দেখতে পেলো না তার স্নানক্ষে তার কোনো উদ্বেগ প্রকাশ পেলো না।

রামযাদু মনে মনে বললে—টোপ গিলেছে, এইবার খেচ মারলেই গেঁথে যাবে; তার পর বাছাধন আর যাবেন কোথা!

এর পরদিন রামযাদু একখাঁচা সাদা ও সাদায়-কালোয় ছিটে-ফোঁটা ইঁদুর নিয়ে পরাণ-বাবুর বাড়ীতে এসে ঢুকেই দেখলে কৃষ্ণকলি উৎসুক দৃষ্টিতে পথের দিকে তাকিয়ে দাঁড়িয়ে আছে। তাকে দেখেই কৃষ্ণকলির চোখ দুটি উজ্জ্বল ও মুখ প্রফুল্ল বিকসিত হ'য়ে ওঠাতে আরো কুৎসিত হ'য়ে উঠলো। রামযাদু দেখেই বুঝতে পারলে যে, কৃষ্ণকলি তারই আগমন প্রতীক্ষা করছে। রামযাদু ইঁদুরের খাঁচাটা তুলে ধ'রে কৃষ্ণকলিকে দেখিয়ে হাসলে, তার মনে হলো এইবার কৃষ্ণকলি তার কাছে ছুটে আসবে। কিন্তু সে এক পাও অগ্রসর না হ'য়ে যেখানে দাঁড়িয়ে ছিলো সেই-খানেই দাঁড়িয়ে থেকে মুখ ঈষৎ অবনত ক'রে লজ্জিত স্বথের হাসি হাসলে। কৃষ্ণকলির মুখ তাতে কদর্যতর হ'য়ে উঠলো। রামযাদুর মনটা কেমন ঘিন্‌ঘিন্‌ ক'রে উঠলো, সে মনে মনে বললে—এঃ রামঃ! একেবারে শেওড়া গাছের পেত্নী! ঢের ঢের কুৎসিত কদর্য দেখেছি, কিন্তু এমন ফরমাস-দেওয়া বে-চপ ভয়ঙ্কর চেহারা কখনো দেখিনি। ছোটো জাতের মেয়ে আর কতো ভালো হবে!

এই কথা ভাবতে ভাবতে রামযাদু অগ্রসর হ'য়ে কৃষ্ণকলির

কাছে গেলো এবং চেষ্ঠা ক'রে হেসে বললে—খুকু সোনা, এই দেখো কেমন ঈঁদুর !

কৃষ্ণকলি দেখলে খাঁচার মধ্যে লোহার তারের তৈরি একটা ঘূর্ণী চাকায় চ'ড়ে দুটো ঈঁদুর সিঁড়ির ধাপে ধাপে পা দিয়ে চড়বার ক্রমাগত চেষ্ঠায় চাকাটাকে বন্বন্ ক'রে ঘোরাচ্ছে। ঈঁদুরের এই খেলা দেখেই কৃষ্ণকলি উল্লসিত হ'য়ে হাততালি দিয়ে খিলখিল ক'রে হেসে উঠলো ; কিন্তু পরক্ষণেই লজ্জা-শঙ্কা-ভরা দৃষ্টিতে রামযাদুর মুখের দিকে চেয়েই নিজের চঞ্চলতা দমন ক'রে ফেললে।

রামযাদু জিজ্ঞাসা করলে—তোমাব খরগোশ তোমার পোষ মেনেছে তো ?

কৃষ্ণকলি লজ্জিত স্মিত মুখে একবার রামযাদুর দিকে চেয়ে নীরবে ঘাড় নেড়ে সম্মতি জানালে।

রামযাদু কৃষ্ণকলিকে কথা কওয়াবার জন্তু জিজ্ঞাসা করলে—খুকু সোনা, তোমার আর কি চাই বলো তো, আমি এনে দেবো।

কৃষ্ণকলি অর্দেক আনন্দ ও অর্দেক সন্দেহে দোলায়মান-চিত্ত হ'য়ে মৃদু অস্ফুট স্বরে বললে—একটা কাকাতুয়া।

রামযাদু মনে মনে শিউরে উঠে ব'লে উঠলো—টিপ-কপালীর সখ কম না ! এইবার আমায় সেরেছে ! কাকাতুয়া তো দু-এক টাকার কর্ম নয় !

কিন্তু সে প্রকাশে বললে—বেশ ! কাল তোমার কাকাতুয়া আসবে।

অসীম আনন্দে অধীর হ'য়ে কৃষ্ণকলি ইঁদুরের খাঁচা তুলে নিয়ে ছুটে বাড়ীর মধ্যে চ'লে গেলো।

রামঘাট্ খুশী মনে পরাণ-বাবুর সাক্ষাৎ-কক্ষের দিকে প্রস্থান করলো।

পরাণ-বাবু রামঘাট্কে আসতে দেখেই হাসিমুখে ব'লে উঠলেন—আসুন মুখুজ্জৈ মশায়, প্রণাম হই। কলি তো আপনার খব্বাখোশ পেয়ে মহা খুশী! আপনি আবার সাদা ইঁদুর এনে দেবেন বলেছেন ব'লে সে ভোর বেলা উঠে কেবল ঘর-বার করছে যে কখন আপনি আসবেন। আপনি তাকে আচ্ছা লোভ দেখিয়েছেন!

রামঘাট্ পরাণ-বাবুর প্রশংসায় ও সমাদরে গদগদ হ'য়ে দস্ত বিকাশ ক'রে বললে—ছেলেমানুষের খেলনা একটা তো চাই; কিন্তু কৃষ্ণকলি যে কেমন বাপ-মায়ের মেয়ে, তা তার খেলা দেখলেই টের পাওয়া যায়। তার খেলা হয় ঠাকুরপূজা, নয় জীবসেবা। সেই খেলাচ্ছলে পুণ্যসঞ্চয়ের একটু ভাগ আমিও ফাঁকতালে নিয়ে নিলাম।

পরাণ-বাবু রামঘাট্‌র কথায় খুশী হ'য়ে হাসতে লাগলেন; অমনি ঘরে সমাগত সমস্ত লোক রামঘাট্‌র প্রশংসায় মুখর হ'য়ে উঠলো; কেউ বললে—সাধু সাধু! কেউ বললে—এ রামঘাট্‌-বাবুর প্রকৃতির অনুরূপ কথাই হয়েছে! এক টিকি-ওয়ালী ব্রাহ্মণ-পণ্ডিত বললে—যদ্ যেন যুজ্যতে লোকে বিধিস্ তৎ তেন যোজয়েৎ! এ একেবারে মনি-কাঞ্চন যোগ! ব্রাহ্মণ

রামঘাটকে উপলক্ষ্য ক'রে পরাণ-বাবুরও একটু প্রশংসা ক'রে নিলো দেখে একজন জ্যোতিষী ব'লে উঠলো—এ একেবারে বুদ্ধাদিত্য যোগ, গুরু-শুক্রেব রাজযোটক। একজন বললে—আমাদের কৃষ্ণকলি তার পিতা-মাতার পুণ্যফল মূর্ত্তিমতী !

পরাণ-বাবু পরিতুষ্ট হ'য়ে প্রফুল্লমুখে বললেন—আপনারা দশ জনে প্রসন্ন মনে আশীর্বাদ করবেন, আমার ঐ গুঁড়োটুকু বেঁচে-ব'র্ত্তে থাকুক আর ও যেনো জীবনে সুখী হয়।

অমনি সকলে সমস্বরে ব'লে উঠলো—আমরা তো নিত্য নিরন্তর আশীর্বাদ করছিই ; আপনার অন্তগ্রহ আর কৃপা লাভ করে নি এমন লোক বাংলা দেশে অতি অল্পই আছে ; অগণ্য কৃতজ্ঞ হৃদয় হ'তে কল্যাণ-কামনা অহরহই উখিত হচ্ছে।

পরাণ-বাবু খুশী হ'য়ে ও বিনয় প্রকাশ করে' বললেন—আমি আর কি করছি, আমার শক্তিই বা কতোটুকু ?

রামঘাট ব'লে উঠলো—আপনি হচ্ছেন বাংলা দেশের পরাণ ! দেহে প্রাণ যে কতো কাজ করে তা দেহই জানতে পারে, পরাণের কৃপা হ'তে যার দেহ বঞ্চিত হয় সে-ই তখন হাড়ে হাড়ে বুঝতে পারে যে, পরাণের কাজ ও শক্তি কতো।

সেখানে একজন ডাক্তার ছিলো, সে মনে মনে রামঘাটের উপর ঈর্ষান্বিত হ'য়ে উঠলো, তার মনে হ'লো এই physiological খোসামোদটা তারই করা উচিত ছিলো, কিন্তু করলে কি না ঐ প্রত্নতাত্ত্বিক রামঘাট ! একেই বলে কপাল ! একেই বলে অদৃষ্টের অন্তগ্রহ !

পরান-বাবু রামঘাটুর বাক্‌চাতুরীতে মুগ্ধ হ'য়ে হাসতে হাসতে বললেন—মুখুজ্জ মশায়, আপনি প্রভুতাত্ত্বিক না হ'য়ে কবি হ'তেও পারতেন !

রামঘাটু লম্বা লম্বা মাদা মাদা দাঁত বাহির ক'রে শীর্ণ মুখ হাসিতে ভ'রে বললে—আপনার রূপা থাকলে তাও বাকী থাকবে না। আপনার রূপা—

মুকং করোতি বাচালং পঙ্গুং লজ্জয়তে গিরিম্ ।.....

রামঘাটুর কথা শুনেই পণ্ডিতের মন হায় হায় ক'রে উঠলো —“আহা হা ! এই শ্লোকটা তো আমার বলা উচিত ছিলো !” যেই এই কথা তার মনে হওয়া, অমনি সে রামঘাটুর মুখের অসমাপ্ত কথা কেড়ে নিয়ে বললে—

যৎ রূপা তম্ অহং বন্দে পরমানন্দ-কারণম্ ॥

পরান-বাবু পরিতুষ্ট হ'য়ে পণ্ডিতের কথা যেনো শুনতে পান নি এমন ভাবে রামঘাটুকে বললেন—তা হ'লে আমাদের আর-একবার আশ্চর্য্য ক'রে দেবার আয়োজন মুখুজ্জ মশায় লুকিয়ে লুকিয়ে করছেন ! আপনি কবিতা লেখেন তা তো জান্তাম না ! একেই তো বলে সাধনা ! গোপনে শক্তিসঞ্চয় হচ্ছে ; যেদিন প্রকাশিত হবে, সেদিন জগৎ স্তম্ভিত হ'য়ে যাবে !

রামঘাটু বিনয় দেখিয়ে মুখ কাচুমাচু ক'রে বললে—না না, সে শক্তি আমার নেই, তবে কখনো-কখনো দু-একটা লিখতে চেষ্টা করি।

পরান-বাবু বললেন—আপনার কবিতা দেখবার জগ্গে উৎসুক

হ'য়ে রইলাম ; কিন্তু আপনি গবেষণা ত্যাগ করবেন না, মুখুজে-মশায় ।

রামযাদু দন্তবিকাশ ক'রে বললে—আপনার চেয়ে বেশী গবেষণা করবার শক্তি তো কারো নেই ।

পরাণ-বাবু আশ্চর্য হ'য়ে বললেন—আমি গবেষণা করি !

রামযাদু পূর্ববৎ হাসতে হাসতে বললে—হ্যাঁ, গো-এষণাগোকু-খোঁজা তো আপনার প্রধান কর্ম ।

পরাণ-বাবু রামযাদুর শ্লেষ বুঝতে পেরে—ও হো হো ! ব'লে উচ্চ হাস্ত ক'রে উঠলেন ।

ব্রাহ্মণ-পণ্ডিতটি রামযাদুর কথার তাৎপর্য হৃদয়ঙ্গম করতে না পেরে ব'লে উঠলো—হাঁ হাঁ, সাক্ষাৎ শ্রীকৃষ্ণের অবতার ! শ্রীকৃষ্ণের শ্রীমুখেরই বাণী তো শ্রীমদ্ভগবদ্গীতায় উক্ত হয়েছে—

পরিভ্রাণায় চ সাধুনাং বিনাশায় চ দুষ্কৃতাং ।

ধম্মসংরক্ষণার্থায় সন্তুভামি যুগে যুগে ॥

এ-রকম তোষামোদ-বৃষ্টি অনন্ত কাল চলতে পারতো, কিন্তু পরাণ-বাবু তোষামোদ শুন্তে ভালোবাসলেও কাজের সময় মধ্যপথেই থামিয়েও দিতে পারতেন । তিনি বললেন—আচ্ছা ।

এই আচ্ছার মানে সবাই বুঝতো । সৈনিকের কানে কমাণ্ডারের সঙ্কেত-ধ্বনি প্রবেশ কর্বামাত্র সে যেমন তৎক্ষণাৎ আদিষ্ট কর্ম সম্পন্ন করে, তেমনি ঘরে উপবিষ্ট সমস্ত লোক একটি স্প্রিঙের কল-টেপা পুতুলের মতন এক সঙ্গে উঠে দাঁড়ালো ও ধীরে ধীরে বিদায় হয়ে চ'লে যেতে লাগলো ।

ব্রাহ্মণ-পণ্ডিতটি যখন দরজার কাছে গিয়েছে, তখন পরাণ-বাবু বললেন—বিদ্যারত্ন মশায়, আপনার সম্বন্ধীকে কাল একবার আমার আপিসে পাঠিয়ে দেবেন, দেখবো যদি কিছু করতে পারি।

বিদ্যারত্ন আনন্দে গদগদ হ'য়ে বললে—যে আজ্ঞে।

পরাণ-বাবুর এই “দেখবো যদি কিছু করতে পারি” কথা কয়টির যে কি শক্তি তা অনেকেরই জানা ছিলো। সকলে বিদ্যারত্নের সাফল্যে ঈর্ষান্বিত হ'য়ে উঠলো, এবং ভাবতে ভাবতে চললো—কাল হতে তারাও কি রকম ভাবে খোসামোদ ক'রে পরাণ-বাবুর প্রসন্নতা লাভ করবার চেষ্টা করবে।

রামযাদু সেইদিনই নিজের নাম-ধাম গোপন রেখে ও বক্স-নম্বর দিয়ে তিনটি খবরের কাগজে বিজ্ঞাপন দিলে—কারও যদি অপ্রকাশিত কবিতার খাতা থাকে, তবে সে সেই খাতা দেখতে পেলে ও তার কাছে উৎকৃষ্ট বিবেচিত হ'লে উপযুক্ত মূল্য দিয়ে কিনে নিয়ে সে নিজের খরচে প্রকাশ করবে।

এবং সেই দিন বিকাল বেলা আপিসের ছুটির পর কৃষ্ণকলির জন্ত একটা কাকাতুয়া, একটা ময়ূর ও একটা হরিণের ছানা কিনে গাড়ী ক'রে পরাণ-বাবুর বাড়ীতে এসে হাজির হ'লো।

বাড়ীর উপর তলার বারান্দা থেকে কৃষ্ণকলি রামযাদুকে দেখতে পেয়েই উল্লাসে চীৎকার ক'রে বললে—বাবা, বাবা,

মুখুজ্জ-কাকা কাকাতুয়া নিয়ে এসেছে..... শুধু কাকাতুয়া নয়,.....একটা ময়ূর.....একটা আবার পুঁচকে হরিণ !...

কৃষ্ণকলি ছুটে নীচে নেমে গেলো, কিন্তু রামঘাটুর সামনে গিয়েই তার সেই চাঞ্চল্য থেমে গেলো, উল্লাস সংযত হ'য়ে গেলো, সে প্রফুল্ল বিস্ফারিত নয়নে সেই উপহারগুলির প্রতি সতৃষ্ণ দৃষ্টিতে তাকিয়ে রইলো ।

রামঘাটু তাকে দেখে হেসে বললে—খুকু সোনা, তোমার জন্মে কতো কি এনেছি । এইবার আমার সঙ্গে ভাব করবে ?...

কৃষ্ণকলি প্রফুল্ল মুখে লজ্জা মাখিয়ে মাথা কাত ক'রে নীরবে সম্মতি জানালে ।

রামঘাটু আবার জিজ্ঞাসা করলে—আর আড়ি নয় তো ?

কৃষ্ণকলি আবার নীরবে মাথা নেড়ে জানালে—না ।

রামঘাটু মাথা ছুলিয়ে ডাকলে—এসো তবে আমার কাছে, কাকাতুয়া নেবে.....

কৃষ্ণকলি কুণ্ঠিত মন্থর পদে অগ্রসর হ'য়ে আবার থমকে দাঁড়ালো ।

রামঘাটু কৃষ্ণকলির দিকে কাকাতুয়ার দাঁড়টা বাড়িয়ে ধ'রে বললে—ধরো.....গায়ে হাত বুলিয়ে দাওঘাড় চুলুকে দাও দেখি, ও চুপ ক'রে ঘাড় নীচু ক'রে থাকবে.....

কৃষ্ণকলি সঙ্কোচের ও ঈষৎ ভয়ের সহিত কাকাতুয়ার গায়ে হাত দিলে । কাকাতুয়া অমনি গলা নীচু ও কাত ক'রে দিলে । কৃষ্ণকলি কাকাতুয়ার গলায় হাত দিতেই কাকাতুয়া মাথার ঝুঁটি

খাড়া ক'রে তুললো। কৃষ্ণকলি দেখলে, সেই দুধের মতন সাদা কাকাতুয়ার ঝুঁটিটার তলার রং হলুদে আর গোলাপীতে মেশা। কৃষ্ণকলির উল্লাসে হাততালি দিয়ে নেচে উঠতে ইচ্ছা করছিলো, কিন্তু সে আড়চোখে একবার রামঘাটকে দেখে নিজেকে সামলে নিলে এবং একমনে কাকাতুয়ার ঘাড় চুলকে দিতে লাগলো। কাকাতুয়া তুষ্ট হ'য়ে ডেকে উঠলো—কাকাতুয়া ! কৃষ্ণকলির মন আবার আনন্দে নেচে উঠলো।

রামঘাটকে গাড়ী থেকে পশু-পক্ষী নিয়ে নামতে দেখেই দুজন চাকর দৌড়ে এসেছিলো। তারা হরিণ-ছানার গলার শিকল ধ'রে ও ময়ূরের খাঁচা নিয়ে দাঁড়িয়ে ছিলো। রামঘাট তাদের অপেক্ষা করতে দেখে কৃষ্ণকলিকে বললে—যাও খুকু সোনা, তুমি মাকে দেখাও গে তোমার পাখী হরিণ।

রামঘাটর কথা শুনে রামঘাটর সম্মুখ থেকে অপমৃত হবার সুযোগ পাওয়ার আগ্রহে তৎক্ষণাৎ কৃষ্ণকলি কাকাতুয়ার দাঁড় কণ্ঠে বহন ক'রে প্রস্থানোত্ত হলো।

রামঘাট বললে—কাকাতুয়াটা বোঁচার হাতে দাও।

কৃষ্ণকলি কাকাতুয়ার দাঁড় বোঁচার হাতে দিয়েই একছুটে বাড়ীর ভিতর চ'লে গেলো। সে দৌড়ে গিয়ে চোঁচিয়ে মাকে বললে—মা দেখো দেখো, আমার আঙুলে কাকাতুয়ার গলা থেকে কেমন পাউডারের মতন রেণু লেগেছে !.....

কৃষ্ণকলি চ'লে গলে রামঘাট উপরে পরাণ-বাবুর ঘরে এলো।

রামযাদুকে চৌকাঠের কাছে দেখেই হাসতে হাসতে পরাণ-বাবু বললেন—মুখুজ্জ মশায়, আপনি যে আমার বাড়ীটা চিড়িয়াখানা ক'রে তুললেন !

রামযাদু ঘরের মধ্যে এসে একখানা চেয়ারে বসতে বসতে বললে—আপনি নিজেই তো অনেক আগে থেকে চিড়িয়াখানা বানিয়ে রেখেছেন। আপনি তো Greatest menagerie-keeper in the world—হরেক রকম জানোয়ার আপনার চিড়িয়াখানায় !

পরাণ-বাবুর কাছে সমাগত লোকেরা পরাণ-বাবুর সঙ্গে হো-হো ক'রে হেসে উঠলো বটে, কিন্তু রামযাদুর কথাটা সকলের গায়ে গিয়ে বিঁধলো। অনেকেই মনে মনে বললে—তুমি একটি মস্ত জানোয়ার ! কিন্তু সেই জানোয়ারটি যে কি, তৎসম্বন্ধে সনাক্ত করাতে মতভেদ হ'লো—কেউ মনে মনে বললে—তুমি একটি মর্কট ! কেউ বললে—হন্নমান্ ! কেউ বললে—ধূর্ত শৃগাল ! কেউ বললে—ছিনে জোঁক !

পরাণ-বাবুর হাসির ঝোঁক থামলে তিনি বললেন--কিন্তু আপনি এতো পয়সা খরচ করছেন, এ ভারি অন্টায় !

রামযাদু তৎক্ষণাৎ বললে—এ কার পয়সা খরচ করছি, এ পয়সাও তো আপনারই.....এ আমার গঙ্গাজলে গঙ্গাপূজাকানে জল দিয়ে কানের জল বের করবার ফন্দি। আমরা কেউ বিনা স্বার্থে কি আপনার মতন কাজ করি ?

পরাণ-বাবু রামযাদুকে এক-ঘর লোকের সামনে এমন

অকপটে স্পষ্ট কথা বলতে শুনে খুশী হ'য়ে আবার হো হো ক'রে হেসে উঠলেন এবং পরে বললেন—জগতে সবাই স্বার্থ খোঁজে। আমিও কম স্বার্থপর নই, আপনারা কেউ টের পান না, ঐখানেই তো আমার বাহাদুরী !

একজন লোক মনে মনে বললে—A bit too frank !

ঘরের সকল লোক রামযাদুর কথায় অস্বস্তি অনুভব করতে লাগলো ; তারা রামযাদুর কথায় নিজেদের স্বরূপকে অকস্মাৎ উলঙ্গ ভাবে প্রকাশিত হ'য়ে যেতে দেখে যে লজ্জা পেলে, তাতে তারা রামযাদুর উপর অপ্রসন্ন হ'য়ে উঠলো, অথচ রামযাদু সত্য কথাই বলেছে ব'লে তার উপর যথেষ্ট বিরক্ত হতেও পারছিলো না।

পরান-বাবু ঘরের লোকদের মুখ অপ্রতিভ ও অপ্রস্তুত হ'য়ে উঠেছে দেখে অন্য প্রসঙ্গ অবতারণ ক'রে বললেন—উঃ ! এবার কী গরমই পড়েছে !

তখন বাক্যশ্রোত গ্রীষ্ম থেকে বৃষ্টি হওয়ার সম্ভাবনায় ও ক্রমে লেংড়া-আমের চড়া দর আলোচনায় এঁকে বেঁকে প্রবাহিত হ'য়ে চললো। সকলে সহজ কথা আলোচনার অবসর পেয়ে ইঁপ ছেড়ে বাঁচলো।

* * * *

পূজার ছুটি আসন্ন। পরান-বাবুর আপিসে সাহেব কর্তাদের মঞ্জুরী ছুটি মাত্র চার দিন। পরান-বাবু কর্মচারীদের ভাগাভাগি ক'রে আরও বারো দিন ছুটি দিয়ে থাকেন ; অর্ধেক লোক দশমীর পরে বারো দিন ছুটি ভোগ করে এবং তারা ফিরে এলে

বাকী অর্ধেক ছুটি পায়। যাদের বাড়ী মফঃস্বলে, দূরে, তা'রা প্রথম বারো দিন ছুটি নিয়ে থাকে।

রামযাছু থাকোহরিকে জিজ্ঞাসা করলে—কি হে থাকোবাবু, ছুটিতে বাড়ী-টাড়ী যাচ্ছে না কি ?

থাকোহরি একটু বিষাদাচ্ছন্ন কুণ্ঠিত স্বরে লজ্জিত হাসিমুখে বললে—আমার আবার বাড়ী ! কথায় বলে—

চাল না চুলো

ঢেঁকি না কুলো,

পরের বাড়ী হবিগি !

রামযাচুর পরদুঃখ-কাতর চিত্ত চঞ্চল হ'য়ে উঠলো, চোখ ছল্ছল্ করতে লাগলো ; সে ব্যথিত স্বরে বললে—ঈশ্বর তোমার ভালো করবেন। যে মহাপুরুষের আশ্রয় পেয়েছো, তাতে তুমি অচিরেই বাড়ী-জুড়ী ক'রে স্বাধীন হতে পারবে। আর এই বাড়ীই তো এখন তোমার বাড়ী !

থাকোহরি কৃতজ্ঞতায় গদগদ স্বরে বললে—হ্যাঁ, সমস্তই আপনার আশীর্বাদে হয়েছে ; যা হবে তাও আপনার আশীর্বাদেই হবে। কর্তা আর গিন্নি-মা আমাকে নিজের ছেলের মতনই ভালোবাসেন ; আমার কোনো অভাব নেই, আপনার আশীর্বাদে।

রামযাচুর স্বভাবটা একটু জটিল রকমের ; সে লোকের দুঃখে ব্যথিত হয়, আবার কারো ভালো দেখলেও সে সহ করতে পারে না। থাকোহরির কোনো অভাব নেই শুনে রামযাছু

প্রফুল্ল হ'য়েও একটু ঈর্ষা-বিদ্‌হ হ'য়ে বললে—বেশ্ বেশ্ !
ভাগ্যবানের বোঝা ভগবান্ ব'য়ে থাকেন। তাহ'লে তুমি
এখানেই থাকছো ? তবে তুমি শেষের দিকে ছুটি নেবে ?

থাকোহরি বললে—আজ্ঞে না, কর্তা কানী যাচ্ছেন,
আমাকেও সঙ্গে নিয়ে যাবেন বলছেন।

—তা হলে তোমার মা-ঠাকুরগণও তীর্থ করতে যাচ্ছেন ?

—না। মা তো এখানে নেই। আমরা এ বাড়ীতে
আমার দিন পনেরো পরেই দেশে চ'লে গেছেন,...

রামযাদুর সকল আন্দাজ ভঙুল হ'য়ে গেলো ; থাকোহরির
মা যদি এখানে না থাকে তবে থাকোহরির এমন রাজার হালে
থাকার হেতু কি ? বিশ্বয়ে কৌতূহলে রামযাদুর চক্ষু দুটি
বিস্ফারিত হ'য়ে উঠলো।

রামযাদুর চক্ষু কৌতূহলে বিশ্বয়ে বিস্ফারিত হয়ে উঠলো
দেখে থাকোহরি বলতে লাগলো—আমার এক মামা আছেন,
তাঁর হঠাৎ পক্ষাঘাত হয়েছে, মামীমার ছেলে হয়েছে, তাই মাকে
সেখানে যেতে হয়েছে।

রামযাদু চিন্তাসাগরে তলিয়ে যেতে যেতে শুধু বললে—ও !

সে থাকোহরিকে আর কিছু না ব'লে পরাণ-বাবুর সঙ্গে
সাক্ষাৎ করতে তাঁর বৈঠকখানার দিকে যেতে যেতে ভাবতে
লাগলো—আমি যা আন্দাজ ক'রেছিলুম তা তো নয় দেখছি।
তবে ? এই ছোঁড়াকে এমন তোয়াজ করবার হেতু কি ?

চতুর রামযাদুর তৎপর বুদ্ধি এইখানে সমস্যায় ঠেকে আটকে

গেলো। সে সমস্তার কোনো কিছু মীমাংসায় উপনীত হবার আগেই পরাণ-বাবুর ঘরে গিয়ে উপস্থিত হলো। তাকে দেখবামাত্রই পরাণ-বাবু তাকে সম্ভাষণ ক'রে অভ্যর্থনা করলেন—এই যে মুখুজে মশায়, আসতে আজ্ঞা হোক। প্রণাম হই!

পরাণ-বাবু মুখে মাত্র প্রণাম শব্দ উচ্চারণ করলেন, কিন্তু সেই প্রণাম-বোধক মাথা নত করা বা হাত তুলে কপালে ঠেকানো বা আর কোনো রকম অঙ্গ-চেষ্টা কিছুমাত্র প্রকাশ করলেন না। ব্রাহ্মণকে ভক্তি-বশতঃ তাঁর এই প্রণাম নয়; এই প্রণামের মধ্যে নিয়ম জাতিতে জন্মলাভের লজ্জা, নিজেকে বিনীত ব'লে প্রকাশ করবার অহঙ্কার এবং নিজের পদমর্ষ্যাদার ও শ্রেষ্ঠত্বের সম্বন্ধে সচেতনত্ব সম্মিলিত ভাবে প্রচ্ছন্ন হ'য়ে থাকে।

পরাণ-বাবু প্রণাম-বাক্য উচ্চারণ করতেই রামযাদু বললে—আপনি প্রণাম করলেই আমার বুকের ভিতরটা কেঁপে ওঠে!...

পরাণ-বাবুর ছোট্টা ছোট্টো চোখ দুটি উজ্জ্বল হ'য়ে উঠলো, চাপা হাসির ঠোঁট ঠেলে বেরিয়ে পড়বার চেষ্টায় ঝাঁপালো গোঁপ-জোড়া ফুলে উঠলো; তিনি রামযাদুর তোষামোদ শে'ন্বার আগ্রহে তার মুখের দিকে তাকিয়ে রইলেন।

ঘরের সকল লোকই উৎসুক দৃষ্টি রামযাদুর মুখের উপর স্থাপন করলে।

রামযাদু বলতে লাগলো—আপনি কলিকালে ভগবান বিষ্ণুর একাদশ অবতার! মহাপুরুষ! পতিতপাবন! অগতির গতি! আপনি কাউকে প্রণাম করলে তার পাপ হয়। আপনাকে কী

ব'লেই বা আশীর্বাদ করবো ? কিসের অভাব আছে আপনার ? ইহ-পরকাল তো কর্মে ও পুণ্যে জয় ক'রে ব'সে আছেন ! ভগবান বিষ্ণু যেমন ভৃগুর পদাঘাত বক্ষে ধারণ ক'রে ব্রাহ্মণের মর্যাদা বাড়িয়েছিলেন, আপনিও তেমনি নিজে পরমপুরুষ হ'য়েও ব্রাহ্মণকে বাড়ানো চান। আপনার যখন লীলা যে আমি বড়ো হই, তখন আমি সাহস ক'রে আশীর্বাদ করি.....

পরান-বাবু ও সমবেত লোকদের দৃষ্টি আর-একটু আগ্রহান্বিত ও উজ্জ্বল হ'য়ে উঠলো।

রামযাদু বললে—আপনি আরো বেশী ক'রে আমাদের মতন অভাজনদের মনোবাঞ্ছা পূর্ণ করুন, আমাদের সকলের মঙ্গল বিধান করুন।

রামযাদুর এই বাক্যপটুতায় পরান-বাবু খুশী হলেন ; উপস্থিত উমেদারেরা খুশী হলো।

পরান-বাবু নিজের প্রশংসাকে শুনে নেন, কিন্তু তার অধিক আলোচনার অবসর দেন না ; তিনি যে তোষামোদে তুষ্ট হয়েছেন এমন আভাসও প্রকাশ করেন না। চাটুবাদ সমাপ্ত হওয়ার সঙ্গে সঙ্গে তিনি অপর কথা পেড়ে সেই প্রশংসার প্রসঙ্গ চাপা দেন। রামযাদুর বক্তৃতা বিরত হতেই পরান-বাবু বললেন—ছুটিতে বাড়ী যাবেন নাকি মুখুজে মশায় ?

রামযাদু একটি চেয়ারে উপবেশন ক'রে বললে—আজ্ঞে হ্যাঁ, ষষ্ঠীর দিন রাত্রে গাড়ীতেই ...

—কিন্তু এ সময় তো আপনাদের দেশে বিষম ম্যালেরিয়া ?

—আজ্ঞে হ্যাঁ, ম্যালেরিয়ার উৎপত্তিই তো আমাদের যশোরে; দেশ-মাতা কি নিজের সন্তানের মমতা ত্যাগ করতে পারেন—সে সন্তান এখন যতোই বড়ো আর বিখ্যাত হোক না কেনো।

রামঘাটুর বাক্‌চাতুরীতে প্রীত হ'য়ে পরাণ-বাবু বললেন—
কিন্তু আপনার স্বাস্থ্য ভালো নয়, ম্যালেরিয়াতে ভুগছেন,
এ অবস্থায়.....

—তা বটে, কিন্তু অনেক দিন ছেলে-মেয়েগুলোকে দেখি
নি.....

পরাণ-বাবু হো হো ক'রে হেসে উঠে বললেন—ছেলে-মেয়ের
মাও মেঘদূত হংসদূত পবনদূত প্রেরণ করছেন !

উপস্থিত একজন তিলক-কণ্ঠা-ধারী মুণ্ডিত-মস্তকে স্থূল শিখা-
ধারী বৈষ্ণব ব'লে উঠলো—পদাঙ্ক-দূতটাই বা বাদ যায় কেনো ?

রামঘাটুর মুখ অপ্রতিভ হ'য়ে উঠলো, সে অ্যা-ওঁ ক'রে
বললে—আমাদের সে রসের বয়েস ব'য়ে গেছে...এখন অন্ত-চিন্তা
চমৎকারা ! আধ দর্জন ছেলে-মেয়ের চ্যা-ভ্যা'র মধ্যে কি আর
কবিত্ব জমে ? তার উপর নিত্য চিন্তা কোন্ ছেলেটা কখন বা
শিঙে ফোঁকে !.....

হাস্তরসটা করুণরসে পরিণত হচ্ছে দেখে পরাণ-বাবু বললেন—
—আপনি বাড়ী গিয়েই বিজয়া-দশমীর দিনই বা কোজাগর-
লক্ষ্মীপূজার দিনই সকলকে নিয়ে কল্‌কাতায় চ'লে আসুন। ঐ
দিন তো শুভযাত্রা, পাঁজি দেখবার দরকার হবে না।

রামঘাটু হতাশ-ভাবে বললে—এতো বড়ো সংসার নিয়ে

কল্‌কাতায় বাস করা কি মুখের কথা ! বাড়ীভাড়া দিতে আর ছেলেদের দুধ কিনতেই তো সব ক'টি টাকা উবে যাবে.....

একজন লোক বললে—আপনি আর ক'টি টাকা বলবেন না রাম-বাবু ; কর্তার রূপায়.....

রামযাদু বক্তার মুখের কথা কেড়ে নিয়ে বললে—কর্তার রূপায় আমি আমার যোগ্যতার অতিরিক্ত আশাতীত বেতন পাই সত্য, কিন্তু আমার খরচ অনেক...

তার পর সে পরাণ-বাবুর দিকে ফিরে বলতে লাগলো—আমার ভগিনীপতির মনিব আর আমার বাল্যের সাহায্যদাতা কিরণ-বাবুর বিধবা নিরাশ্রয় স্ত্রীকে মাসে মাসে মাসহারা দিতে হয় ; আমার পিতার আর কিরণ-বাবুর কিছু ঋণ আছে, তাও মাসে মাসে শোধ করতে হচ্ছে ; কিরণ-বাবুর মেয়ে বড়ো হ'য়ে উঠেছে, কিরণ-বাবুর স্ত্রী চিন্তিত হ'য়ে চিঠি লিখেছেন, তাঁর মেয়ের বিয়ের ভারও আমাকে নিতে হয়েছে.....

রামযাদুর কথায় মুগ্ধ হ'য়ে পরাণ-বাবু গম্ভীর স্বরে বললেন—মুখুজ্জ-মশায়, মহাপুরুষ আমি, না আপনি ? আমি পরের ধনে পোদ্ধারী করি—পরের আপিসে চাকরী ক'রে দি, নিজের এক কড়া খরচ করি কি ? কিন্তু..... যাক সে কথা, আপনাকে প্রশংসা ক'রে আপনার সাম্বিক দানের অমর্যাদা করবো না !... আপনি আপনার পরিবার নিয়ে কল্‌কাতায় চ'লে আসুন, আপনার কিছু ভাবতে হবে না। আপনি পরের ভাবনা ভাবুন, আপনার নিজের ভাবনার ভার আমার উপরে ছেড়ে দিন.....

রামযাদু আশায় আনন্দে উৎফুল্ল হ'য়ে বললে—থাকোহরির মতন আমিও সপরিবারে আপনার বাড়ী দখল ক'রে বসবো নাকি ?

পরান-বাবু হাসিমুখে বলতে লাগলেন—আপনি ব্রাহ্মণ না হ'লে সে ব্যবস্থাও হ'তে পারতো...আমার এতো বড়ো বাড়ী, আর আমরা তিনটি শ্রাণী, আমরা বাড়ীর এক টেরে প'ড়ে থাকি, আর একটা পরিবার স্বচ্ছন্দে এই বাড়ীতে আঁটে। কিন্তু আপনাকে তো এমন অনুরোধ করতে পারি নে।.....আমার শিক্দার-বাগানের বাড়ীর ভাড়াটে উঠে গেছে ; আমি আর সে বাড়ী ভাড়া দিই নি ; মেরামত চুনকাম করাচ্ছি আপনারই বাসের জন্যে। আপনি পরিবার নিয়ে চ'লে আসুন, ততো দিনে মেরামত হ'য়ে যাবে।.....আর আমার একটা গোকুর সম্প্রতি বাচ্চা হয়েছে, সে'র দশ-বারো দুধ দিচ্ছে ; দুধ খাবার লোক আমার বাড়ীতে তো এক কৃষ্ণকলি ; কিন্তু সে তো তা'র মার সঙ্গে কালীপূজা পর্য্যন্ত কাশীতেই থাকবে ; কিছুদিন গোকুটা আপনার কাছেই রেখে দেবো ভাবছি।

রামযাদু আশাতীত লাভের আনন্দে অভিভূত হ'য়ে অবাক হ'য়ে পরান-বাবুর মুখের দিকে তাকিয়ে রইলো, তার দুই চোখ দিয়ে জলধারা গড়িয়ে পড়তে লাগলো।

একজন লোক রামযাদুর সৌভাগ্যোদয় দেখে আর আত্মসম্বরণ করতে না পেরে পরান-বাবুকে বললে—আপনি আমাকে একখানা বাড়ী ক'রে দেবেন আশা দিয়েছিলেন.....

পরাণ-বাবু হেসে বললেন—পরাণ বিশ্বাসকে বিশ্বাস ক'রে অপেক্ষা করো, পরাণ বিশ্বাস কখনো প্রতিজ্ঞা ভঙ্গ করে না।

সেই লোকটি মুখ কাচুমাচু ক'রে বললে—মিষ্টার দত্ত-গুপ্তর বাড়ী হলো, দ্বিপেন হাজারার বাড়ী হলো.....

পরাণ-বাবু হাসি চেপে গান্ধীঘোর ভাণ ক'রে বললেন—তুমি আমার কাছে কতো দিন আসছে ?

—আজ্ঞে ন-অ ব-চ্ছ-র !

—দত্তগুপ্ত আমার কাছে আসছে চোদ্দ বছর, আর হাজারা আসছে তেরো বছর ! তা হলে তোমার আরও চার বছর আসতে হবে।

লোকটা এই বিলম্বের কথা শুনে দ'মে গেলো, সে নিতান্ত নির্লজ্জের মতন বললে—কিন্তু মুখুজ্জে-মশায় তো.....

পরাণ-বাবু এবার গতাই গন্তীর হ'য়ে বললেন—মুখুজ্জে মশায়ের কথা স্বতন্ত্র। তাঁর মতন গুণ তোমাদের কারো নেই !যাক, Comparison is odious. তুমি তিসি আর শোরগোঁজা জোগাবার কন্ট্র্যাক্টের টেণ্ডার দিয়েছো তো ? তুমিই অর্ডার পাবে, আর তাতেই তোমার বাড়ী হ'য়ে যাবে। কেমন, হবে না ?

—আজ্ঞে, আপনার রূপা থাকলে তা হবে।

—আচ্ছা, তবে যাও.....

পরাণ-বাবু চেয়ার ছেড়ে উঠে দাঁড়ালেন। অমনি ঘরের সকল লোকই এক স্প্রিং-টেপা পুতুলের মতন উঠে দাঁড়ালো

এবং একে একে ঘর থেকে বেরিয়ে চললো। রামযাদু আর তিসির কন্ট্রাক্টর আপন আপন সৌভাগ্যে উৎফুল্ল হ'লেও পরস্পরের প্রতি ঈর্ষা ও বিদ্বেষ অনুভব করছিলেন, তাদের দুজনেরই মনের ভাবটা যেনো ঐ অপর ব্যক্তিটা কিছু না পেলে তার নিজের পাওনাটা হয়তো বেশী হতো। আর যারা আজ বিফল-মনোরথ হ'য়ে ফিবলো তারা ঐ দুজনের সৌভাগ্যে ঈর্ষান্বিত, নিজেদের নিষ্ফলতায় ক্ষুব্ধ এবং ভবিষ্যতের আশায় লুপ্ত হ'য়ে বিদায় হলো।

রামযাদু অপ্রত্যাশিত লাভের অতি-আনন্দে থাকোহরির সৌভাগ্য-সমস্তার কথা একদম ভুলেই গেলো।

রামযাদু গ্রামের বাড়ীর দাওয়ায় মাদুর পেতে ব'সে তার বিজ্ঞাপনের আকর্ষণে প্রেরিত কবিতার খাতার স্তূপ থেকে কবি-প্রতিভা আবিষ্কার করবার সন্ধান করছে। সত্যদাস দত্ত নামক একটি লোকের খাতার কবিতাগুলি পড়তে পড়তে রামযাদু বিশ্বয়ে আনন্দে পুলকিত হ'য়ে উঠছে—এমন একজন প্রকৃত কবি আজও প্রচ্ছন্ন হ'য়ে আছে! এ কেবল রামযাদুকে প্রসিদ্ধ ক'রে তোলবার জন্য ভগবানের লীলা! সত্যদাসের কবিতার ছন্দ যেমন নিখুঁত ও বিচিত্র, ভাষা তেমনি পরিমার্জিত, শব্দবিদ্যাস তেমনি যথার্থ, ভাব তেমনি কবিত্বময় ও নূতন, তার অভিমত সাহসী সত্যমূল দৃঢ়। রামযাদু এ'কেই

অর্জুন ক'রে নিজে শিখণ্ডী হ'য়ে এর শানিত করিত্ব-বাণে পরাণ-বাবুকে কাবু করতে হবে সঙ্কল্প স্থির করছে, এমন সময় একজন স্থূলকায় শ্রামবর্ণ বৃদ্ধ ভট্টাচার্য্য ধরণের ভদ্রলোক রামযাদুর উঠানে এসে উপস্থিত হলেন। তাঁর গায়ে একটা খদরের বেনিয়ান জামা, একপাশে ফিতে দিয়ে বাঁধা ; তার খাটো হাতায় হাতের তিন ভাগ ঢেকেছে ; সেই বেনিয়ানের উপরে মোটা খদরের একখানি চাদর ; পরণে খদরের সাদা ধুতি ; পায়ে তালতলার সাদা চটি জুতা ; বাঁ হাতে একটি ক্যান্ডিশের ব্যাগ, তার স্থূল উদর বেষ্টন ক'রে একটি আধ-ময়লা লালপাড়-দেওয়া সাদা গড়ার গামছা বাঁধা ; তাঁর ডান হাতে একটি ছাতা ও তর্জনীতে সোনার তারের পুঁটে-দেওয়া একটা আংটি ; তাঁর দাড়ি-গোঁপ কামানো ; তাঁর মাথার চুল হয় খুব খাটো ক'রে ছাঁটা, নয় মাস খানেক আগে একেবারে মুণ্ডনের পর উদগত হয়েছে, একটি স্থূল শিখা গ্রস্থি-বন্ধ হ'য়ে মাথার পিছনে গুটিস্থিটি হ'য়ে আছে, লম্বিত হ'য়ে ছলছে না।

রামযাদুর মুখ কবিত্ব-গ্যাতি অর্জুনের আশু সস্তাবনায় উজ্জ্বল হ'য়ে উঠতে যাচ্ছিলো, এমন সময় তার দৃষ্টির সম্মুখে ঐ ব্রাহ্মণের আবির্ভাব হওয়াতেই তার মনটা দ'মে গেলো, মুখ ম্লান গম্ভীর হ'য়ে উঠলো। কিন্তু সে তাড়াতাড়ি উঠে দাড়িয়ে তটস্থ ভাবে দাঁওয়া থেকে নামতে নামতে মুখে অভ্যর্থনা করলে—আমুন আমুন.....

এবং সে সেই বৃদ্ধের নিকটস্থ হ'য়ে ভূমিষ্ঠ প্রণাম ক'রে

পদধূলি নিতে নিতে বললে—আপনি এখন কোথা থেকে আসছেন ?

আগন্তুক রামঘাটুর গুরুদেব ; তাঁর নাম রাজচন্দ্র বিষ্ণারত্ন । বিষ্ণারত্ন বললেন—কল্যাণ হোক বাবা, ধনে-পুত্রে লক্ষ্মীলাভ হোক, স্বধর্ম্মে মতি হোক ।...এখন নলডাঙা থেকে আসছি ।

রামঘাটু প্রণাম ক'রে উঠে গুরুর হাত থেকে ব্যাগ ও ছাতা নিয়ে তাঁকে অগ্রসর ক'রে দাওয়ায় এসে উঠলো এবং ঘরের মধ্যে তাড়াতাড়ি গিয়ে ব্যাগ ছাতা রেখে একটা গালিচার আসন এনে পেতে দিলে ।

বিষ্ণারত্ন আসনে উপবেশন করলে রামঘাটু চীৎকার ক'রে ডাক দিলে—ওরে . বিম্বলী, এক ঘটা পা ধোবার জল নিয়ে আয়, গুরুদেব এসেছেন !

বিষ্ণারত্ন রামঘাটুকে জিজ্ঞাসা করলেন—বাড়ীর সব কুশল তো বাবা ? ছেলেপিলে সব ভালো আছে ?.....বৌমার শরীর ভালো ?...

রামঘাটু হাত অঞ্জলিবদ্ধ ক'রে বৃকের কাছে তুলে বললে—আজ্ঞে হ্যাঁ, আপনার শ্রীচরণের আশীর্ব্বাদে !

বিষ্ণারত্ন রামঘাটুকে বললেন—লোক-পরম্পরায় শুন্লাম যে, কল্কাতায় তোমার উত্তম চাকরী হয়েছে...

রামঘাটু বিষ্ণুর সম্মুখে গুরুড়ের মতন, রামচন্দ্রের সাক্ষাতে হনুমানের মতন, গুরুর সম্মুখে জোড় হাত বৃকের কাছে তুলে ভক্তি-গদগদ স্বরে বললে—আজ্ঞে হ্যাঁ, আপনার শ্রীচরণের

আশীর্বাদে একটা জুটেছে একরকম, কায়-ক্লেশে সংসার চ'লে যাচ্ছে।

বিদ্যারত্ন একটা জার্মান-রুপার কোঁটা থেকে এক টিপ নশ্ব নিয়ে নাকে দিতে দিতে বললেন—তা বাবা, তুমি তো এমন শুভ সংবাদটা আমাকে জানাও নি! আমি কিন্তু তোমার কল্যাণ-কামনায় নিত্য স্বস্ত্যয়ন করেছি, নারায়ণকে তুলসী দিয়েছি...

রামযাদু যে গুরুকে চাকরী হওয়ার সংবাদ দেয় নি, এই অনুযোগে সে একটু লজ্জিত হ'তে যাচ্ছিলো, কিন্তু গুরু নিত্য স্বস্ত্যয়ন করেছেন আর নারায়ণকে তুলসী দিয়েছেন শুনেই রামযাদুর মন বিরক্ত হ'য়ে উঠলো—তার মনে হ'লো এমন নির্জলা মিথ্যা কথাটা গুরুর না বললেও হ'তো। রামযাদু একটু শুষ্ক স্বরেই বললে—আমি সংবাদ দিই নি এই ভেবে যে বার্ষিক নেবার জন্মে তো আপনি আমার বাড়ীতে পায়ের ধূলো দেবেন, তখনই জানতে পারবেন...তা এবার যে পূজোর সময়েই বাড়ী ছেড়ে বেরিয়ে পড়েছেন?

বিদ্যারত্ন ক্ষুণ্ণ স্বরে বললেন—আর বাবা, বাড়ী কি আছে? অগ্নিদেব সমস্তই গ্রহণ করেছেন। ছেলে-পিলেদের পরের বাড়ীতে রেখে কিছু অর্থ সংগ্রহের চেষ্টায় বেরিয়েছি; তোমরা পাঁচ জনে সাহায্য করলে তবে মাথা গুঁজ্বার একটু আচ্ছাদন তুলতে পারবো।

রামযাদু ব্যথিত স্বরে বললে—আহা! আপনার মতন পুণ্যাত্মা লোকেরও এমন বিপদ হয়। কিছু টাকা কি সংগ্রহ হ'লো?

বিষ্ণুর নশ্বর কোঁটাটা বেনিয়ানের পকেটে রেখে বললেন—যৎকিঞ্চিৎ পেয়েছি। তুমি লক্ষ্মীমন্তু আর ভক্তিমান্ শিষ্য, তোমার ভরসাই আমি অধিক করি।

এই সময় বিম্বলী নামে পরিচিতা একটি নয়-দশ বৎসরের মেয়ে এক ঘটা জল এনে রামযাদু ও বিষ্ণুর মাঝখানে রেখে দিয়ে গেলো, এবং তার পিছনে পিছনে রামযাদুর স্ত্রী মনমোহিনী মাথায় ঘোমটা দিয়ে একটা পিতলের গাম্বলা এনে সেই ঘটার কাছে রাখলে এবং কাপড়ের আঁচল গলায় জড়িয়ে গুরুর সামনে মাটিতে মাথা ঠেকিয়ে প্রণাম করলে।

বিষ্ণুর নিজের দক্ষিণ পদাঙ্গুষ্ঠ মনমোহিনীর মাথায় ঠেকিয়ে দিয়ে বললেন—সাবিত্রী সমা ভব, পতি-দেবতাকা ভব।

মনমোহিনী প্রণাম ক'রে উঠে ব'সে গাম্বলার ভিতর থেকে এক জোড়া খড়ম ও একখানা গাম্ছা বাহির ক'রে মাটিতে রাখলে। অমনি গুরু দুই হাতের আঙুল হাঁটুর সামনে শৃঙ্খলিত ক'রে ডান পা শূণ্ণে বাড়িয়ে গাম্বলার উপর তুলে দিলেন। রামযাদু ঘটা থেকে জল পায়ে ঢেলে দিতে লাগলো এবং মনমোহিনী দুই হাতে গুরুর পা ধুইয়ে গাম্ছা দিয়ে মুছিয়ে দিতে লাগলো।

পাছে গুরুর পা-ধোয়ানি জল কোথাও পড়ে ও কেউ মাড়িয়ে পাপগ্রস্ত হয়, তাই এই সাবধানতা; এবং গুরু বার্ষিক আদায় করতে এলে পায়ে দেবেন বা ব্যবহার করবেন ব'লে রামযাদু খড়ম গাম্ছা আসন শয্যা প্রভৃতি সব সামগ্রী এক প্রস্থ

স্বতন্ত্র ও পৃথক্ ক'রে রেখে দিয়েছে। রামযাদুর এই গুরুভক্তি গ্রামের আদর্শ, তার গুরুভক্তিতে গুরুও প্রসন্ন।

গুরুর পা ধোয়া হ'লে সেই জল একটু হাতে নিয়ে রামযাদু মাথা পিছন দিকে হেলিয়ে উর্দ্ধমুখে হাঁ ক'রে আলগোছে মুখে কয়েক ফোঁটা ঢেলে দিলে এবং তার পরে মাথা সোজা ক'রে জলসিক্ত হাতটা মাথার চুলের উপর বুলিয়ে মুছে ফেললে।

মনমোহিনী গাম্বলা-সুন্ধ জল ও গাম্ছা নিয়ে জড়োসড়ো ভাবে বাড়ীর ভিতরে চ'লে গেলো।

গুরুদেব জলের ঘটটি নিয়ে উঠানের এক পাশে গিয়ে হাত-মুখ ধুয়ে এসে আবার আসনে বসলেন।

বিম্বলী এসে খবর দিলে—বাবা, মা বললে—গুরুঠাকুরের জলখাবার দেওয়া হয়েছে।

রামযাদু হাত জোড় ক'রে বললে—তা হ'লে কৃপা ক'রে একবার গা তুলুন।

বিষ্ণারত্ন খড়ম পায়ে দিয়ে বাড়ীর ভিতরে চললেন, রামযাদু গুরুর আসনখানি তুলে নিয়ে অগ্রে অগ্রে পথ দেখিয়ে চললো।

গুরু গিয়ে দেখলেন—একখানি শ্বেতপাথরের রেকাবির উপর পেঁপে বাতাবী-নেবু শশা কলা নারিকেল-কোরা ও একটু গুড় সাজানো আছে; পাশে আছে শ্বেতপাথরের গেলাসে কর্পূর-দেওয়া জল।

গুরু খেতে বসলে রামযাদু স্ত্রীকে উদ্দেশ্য ক'রে বললে—

গুরুদেবের জন্তে রাতে একটু ছানা কি ক্ষীর তৈরী কোরো, আর চারটি কাঁচা মুগের ডাল ভিজিয়ে দিয়ো।

গুরু শিষ্যবাড়ী এসে রাতে আচমনী কিছু খান না, যদিও নিজের বাড়ীতে অনেকেই এই নিষ্ঠা পালন করেন না।

রাতে আহালাদির পর বাহিরের ঘরে গুরুর শয্যা রচনা করা হ'লো। গুরুকে শয্যায় বসিয়ে রামঘাট্ বল্লে—ব্যাগটা বাড়ীর ভিতরে নিয়ে গিয়ে রাখি ?

গুরু ব্যস্ত হ'য়ে বল্লে—না বাবা, এটা আমার কাছেই থাক্.....

এই ব'লেই গুরু গায়ের চাদরখানা লম্বা ক'রে তার এক প্রান্ত দিয়ে ব্যাগটাকে বাঁধতে প্রবৃত্ত হলেন।

রামঘাট্ এই দেখে বল্লে—গ্রামে বড়ো চোরের উপদ্রব হয়েছে.....তা হ'লে আমিও এই ঘরে শোবো.....

—তাই শুয়ো বাবা তাই শুয়ো...বল্তে বল্তে গুরু চাদরের অপর প্রান্তটা নিজের বালিশের সঙ্গে বেঁধে ফেললেন। বালিশে-ব্যাগে গাঁট-ছড়া বেঁধে গুরু 'পদ্মনাভ ! পদ্মনাভ !' ব'লে শুয়ে পড়লেন।

গভীর রাত্রি। গুরুর নাসিকা-গর্জনে ঘরের বাতাস আলোড়িত হচ্ছে। রামঘাট্ শয্যা ছেড়ে উঠলো এবং পাছে গুরুর নিদ্রার ব্যাঘাত হয় এজন্য অত্যন্ত সস্তর্পণে বাহিরে যাবার দরজার শিকল খুলতে লাগলো। শিকলে একটু খুট ক'রে শব্দ হ'তেই গুরু নাসাপথে নির্গমোৎসুক নিঃশ্বাস-প্রবাহটা মুখের মধ্যে

হড়াৎ ক'রে টেনে নিয়ে খাস-লালা-নিদ্রালেশে জড়িত স্বরে
জিজ্ঞাসা করলেন—ক্যা ?

রামযাছু ধীরে উত্তর দিলো—আজ্ঞে আমি রামযাছু ।

গুরু নিদ্রাজড়িত স্বরে ছবার “রাম ! রাম !” ব'লে পাশ
ফিরে গুলেন ।

রামযাছু গাড়ু হাতে নিয়ে ঘর থেকে বাহির হ'য়ে গেলো ।

বিচারত্বের আবার ঘুম এসে গেছে ; রামযাছু ঘরে ফিরে
আসতে আসতে শুনলে গুরুদেবের দুর্জয় নাসিকা-গর্জন হচ্ছে ।

বিচারত্বের মাথার তলা থেকে বালিশটা হঠাৎ হ্যাচ্কা টানে
স'রে যেতেই তার মাথাটা হ'ড়্কে বিছানার উপর প'ড়ে গেলো
এবং তিনি খতোমতো খেয়ে ঘুমের ঘোরে জড়িত স্বরে চঁচিয়ে
উঠলেন—আ-া ১...মা ১-১...ব্যা-১ ১...গ...

গুরুর সেই অস্পষ্ট কাতরোক্তি ডুবিয়ে দিয়ে রামযাছু চীৎকার
ক'রে উঠলো—চোর ! চোর ! ধর ! ..

এবং সেই সঙ্গে সঙ্গে রামযাছু ছুটে ঘর থেকে বেরিয়ে বাড়ীর
ভিতর দিকে দৌড়ে গেলো । চোর...চোর...ধর...ধর...
যায়...ইত্যাদি চীৎকারে সে সমস্ত গ্রামকে উচ্চকিত ক'রে বাড়ী
থেকে বেরিয়ে এ-বাগানের ভিতর দিয়ে সে-বাড়ীর উঠান দিয়ে,
ও-বাড়ীর পাদাড় দিয়ে ছুটে বেড়াতে লাগলো ।

বিচারত্ব রামযাচুর চীৎকারে আচম্কা প্রবুদ্ধ হ'য়ে ও ছুটে
তাকে ঘর থেকে বেরিয়ে যেতে দেখে তিনিও তার সঙ্গে সঙ্গে
চোর ধরবার চেষ্টায় ছুটে ঘর থেকে বেরিয়ে পড়লেন । কিন্তু

স্থূল উদরের উপর খন্দরের মোটা কাপড়ের পরিবেষ্টনী শিথিল হ'য়ে গিয়েছিলো, কাছা খুলে গিয়েছিলো ; তিনি কাপড়ের কষি গুঁজতে গুঁজতে ছুটে যাবার চেষ্টায় দাওয়ায় গিয়ে উপস্থিত হতেই মুক্ত কাছাটা তাঁর পায়ে জড়িয়ে গেলো এবং আচম্কা ঘুম ভেঙে ওঠাতে ও ব্যাগ চুরি যাওয়ার আশঙ্কায় ব্যস্ত হওয়াতে অচেনা দাওয়া থেকে নামতে গিয়ে তিনি তালগোল পাকিয়ে দাওয়ার নীচে ছাঁচ-তলায় প'ড়ে গেলেন এবং আঘাতের বেদনায় ও ব্যাগের শোকে গৌঁ গৌঁ ক'রে কাতরাতে লাগলেন—
ব্যা...ব্যা.....

রামযাদুর চীৎকারে গ্রামের ছেলে-বুড়ো, মেয়ে-পুরুষ, অনেকেই লঠন জেলে লাঠি নিয়ে দিকে দিকে বেরিয়ে পড়লো । ঝোপ ঝাড় জঙ্গল বাগান তন্ন তন্ন ক'রে খোঁজা হ'লো, কিন্তু চোরের পাত্তা পাওয়া গেলো না, ব্যাগেরও দর্শন মিললো না ।

যখন গ্রামবাসীদের সঙ্গে নিয়ে রামযাদু বাড়ীতে ফিরে এলো, তখন দেখলে গুরুদেব সেই ছাঁচ-তলাতে ব'সে দুই হাতে মাথা ধ'রে কেবল বলছেন—মধুসূদন ! মধুসূদন !... মধুসূদন ! মধুসূদন !... আর তাঁর দুই চোখ দিয়ে জল গড়িয়ে পড়ছে ।

রামযাদু তাড়াতাড়ি এসে গুরুদেবকে ধ'রে তুলতে তুলতে জিজ্ঞাসা করলে—ব্যাগের মধ্যে বেশী কিছু ছিলো কি ?

বিচারত্ব নাক ঝেড়ে আঙুলের কফ কাপড়ে মুছতে মুছতে বললে—ছিলো বৈ কি বাবা, আমার সর্বস্ব ছিলো...গৃহদাহের

দায় জানিয়ে শিষ্য-বাড়ী থেকে প্রায় সাড়ে পাঁচ শো টাকা সংগ্রহ ক'রেছিলাম... আমার সব গেলো !

বৃদ্ধ এবার প্রকাশে কেঁদে ফেললেন ।

রামষাট্ বল্লে—আপনি জ্ঞানী, আপনি অধীর হ'লে আমরা কা'কে দেখে হৃদয়ে বল সঞ্চয় করবো । স্থির হোন । কাল সকালেই পুলিশে খবর...

বিচারত্ব কপালে করাঘাত ক'রে বল্লে—আর পুলিশ ! আমার গ্রহ-বৈগুণ্য উপস্থিত হয়েছে !

গ্রামের নানা লোকে নানা রকম আন্দাজ ক'রতে লাগলো, নানা উপায় নির্দেশ ক'রতে লাগলো ।

রামষাট্ তাদের বল্লে—আর রাত ভোর হ'য়ে এলো... তোমরা সব এখন বাড়ী যাও...সকালে যা হয় পরামর্শ করা যাবে.....

সকল লোকে একে একে চ'লে গেলো । রামষাট্ ও বিচারত্ব বাকী রাত্রিটুকু জেগে ব'সেই কাটিয়ে দিলে ।

রামষাট্ ভোরবেলা শোঁচে নদীর ধারে গিয়েই চেষ্টা করে উঠলো —গুরুদেবের ব্যাগ পাওয়া গেছে ! গুরুদেবের ব্যাগ পাওয়া গেছে !

এই চীৎকারে পাড়ার দু চারজন লোক আবার ছুটে বেরিয়ে এলো । লোকেরা সমাগত হ'লে রামষাট্ গিয়ে ব্যাগটাকে তুললে ...চোর ব্যাগ খুলতে না পেরে ছুরি দিয়ে ব্যাগের পেট ফাঁশিয়ে ফেলেছে, কিন্তু ব্যাগের উদর ফীত হ'য়েই আছে । রামষাট্ তা

দেখে উৎফুল্ল হ'য়ে ব'লে উঠলো—চোর বেটা ব্যাগটা কেটেও কিছু নিতে পারে নি ; আমাদের তাড়াছড়ো পেয়ে ব্যাগ ফেলেই পালিয়েছে ।

সকলে বিজয়োল্লাস করতে করতে গুরুর কাছে এনে ব্যাগ দিলে । রামযাদু প্রফুল্লমুখে বললে—ব্যাগের জিনিস কিছু নিতে পারে নি ।

এই সুসংবাদ শোন্বামাত্র বিদ্যারত্নের মৃতদেহে যেনো প্রাণ এলো ; তিনি যেনো মৃতমণ্ড পুত্রকে ফিরে পাচ্ছেন এমনি আগ্রহে হাত বাড়িয়ে বললেন—কই বাবা কই, দেখি ?

রামযাদু গুরুর সামনে ব্যাগটি স্থাপন করলে ।

বিদ্যারত্ন চাবি দিয়ে ব্যাগ খোলার বিলম্ব স্বীকার না ক'রে ব্যাগের বিদীর্ণ উদর থেকেই অভ্যন্তরের সমস্ত দ্রব্যাদি টেনে টেনে বাহির ক'রে চারিদিকে ছড়িয়ে ফেলতে লাগলেন ।... কাপড়, উড়ানি, নাগাবলী, রুদ্রাক্ষের মালা, পুরোহিত-দর্পণ, কোশা-কুশি, এমনি কতো কি ।

জিনিস যতোই বেরিয়ে আসতে লাগলো বিদ্যারত্নের মুখ ততোই বিশুদ্ধ ম্লান হ'য়ে উঠতে লাগলো ! সব জিনিস বাহির করা হ'লো, ব্যাগের ছিন্ন উদর চিপসে ঝলঝল করতে লাগলো, তবু বিদ্যারত্নের যেনো প্রত্যয় হয় না, তিনি ছেঁড়ার ভিতরে হাত ঢুকিয়ে ব্যাগের উদরে হাত বুলিয়ে বুলিয়ে দেখতে লাগলেন, কোথাও কোনো কোণে কিছু আটকে লুকিয়ে আছে কি না । এই রকম অনুসন্ধানে সন্তুষ্ট না হ'য়ে তিনি আবার পৈতাতে

আট্‌কানো চাবি দিয়ে ব্যাগের তালা খুলে ফেললেন এবং ব্যাগের মুখ বিস্তার ক'রে দু-মুখ খোলা থলের মতন ব্যাগটাকে ঝেড়ে ঝেড়ে এবং তার মধ্যে উঁকি মেরে মেরে দেখতে লাগলেন।

রামঘাটু বিষন্ন কাতর মুখে জিজ্ঞাসা করলে—আর কি খুঁজছেন ?

বিচারত্ব হতাশ স্বরে বললেন—আমার টাকা ! টাকার পুঁটলিটা নেই.....

রামঘাটু বললে—আর একবার সব জিনিসগুলো মিলিয়ে উল্টে পাণ্টে দেখুন তো.....কোনো কাপড়ের মধ্যে ঢুকে থাকতে পারে.....

বিচারত্ব তন্ন তন্ন ক'রে দেখে বললেন—টাকার পুঁটলিটা আর একটা নতুন গরদের জোড় নেই...আর সব আছে।

রামঘাটু ব্যথিত স্বরে “তাই তো” বলে দীর্ঘনিশ্বাস ফেললে।

প্রভাতে রামঘাটুর অত্যন্ত পীড়াপীড়িতে বিচারত্ব স্নানাহার করলেন। মাত্র ভাতে-ভাত রান্না করলেন, কিন্তু হাতে-ভাতে ক'রেই উঠে পড়লেন, মুখে অন্ন রুচলো না।

রামঘাটু কাতর স্বরে বললে—আপনার যে কেবল রন্ধনের ক্লেশ স্বীকার করাই হ'লো !

বিচারত্ব দীর্ঘনিশ্বাস ফেলে বললেন—আর বাবা !

বিচারত্ব আচমন ক'রে মুখ মুছতে মুছতে বললেন—আমি এখনই যাবো বাবা,.....

রামযাছু ব্যস্ত হ'য়ে বললে—এখনই ?

—হ্যাঁ, এখনই। মনটা বড়ো উতলা হ'য়ে উঠেছে। একবার সিঙ্গেতে একটি শিশুর বাড়ী হ'য়ে আজকের ট্রেনেই বাড়ী চ'লে যাবো।

রামযাছু ক্ষুণ্ণ স্বরে বললে—যেমন আঞ্জা করবেন তাই হবে। আমরা মনে ক'রেছিলাম দু-দিন প্রসাদ পাবো, পদ-সেবা করতে পারবো.....

—তোমরা কলকাতায় গিয়ে স্থির হ'য়ে বসলে আমাকে সংবাদ দিয়ো, আমি তোমাদের নূতন আবাসে গিয়ে আশীর্বাদ ক'রে আসবো।

বিদ্যারত্ন ব্যাগের সামগ্রীগুলি একটি পৌন্টলায় বাঁধবার উদ্যোগ করছেন। রামযাছু বাড়ীর ভিতর থেকে একটা ভালো কার্পেটের ব্যাগ এনে গুরুর সামনে রাখলে, এবং দশটাকার দশখানি নোট গুরুর পায়ের কাছে রেখে প্রণাম করলে।

বিদ্যারত্ন রামযাচুর গুরুভক্তি দেখে আনন্দে বিহ্বল হ'য়ে কোনো কথা বলতে পারলেন না, কেবল রামযাচুর মাথায় হাত বুলিয়ে দিতে লাগলেন।

রামযাছু কুণ্ঠিত স্বরে বললে—আমাকে সপরিবারে কলকাতায় গিয়ে নতুন বাসা পত্তন করতে হবে, নইলে আরো কিছু আপনাকে দিতাম। আমারই বাড়ী থেকে যে টাকা চুরি হ'য়ে গেলো তার ক্ষতিপূরণ আমারই করা উচিত ছিলো। কিন্তু এখন এই সামান্য কিছু দিতে পারছি ব'লে অত্যন্ত দুঃখিত হচ্ছি।

বিচারত্ব নূতন ব্যাগে জিনিসগুলি ভরতে ভরতে বললেন—
এই আমার লক্ষ টাকা! শিশু পুত্রে ভেদ নেই; তোমাদের
উন্নতি হোক, আমরা তো তোমাদেরই প্রতিপাল্য।.....

গুরু ছলছল চোখে বিদায় হলেন। রামযাছু সপরিবারে
গুরুর পদধূলি মাথায় দিয়ে দীর্ঘনিশ্বাস ছাড়লে।

শীঘ্রই গ্রামে রাষ্ট্র হ'য়ে গেলো যে রামযাছু গুরুকে একশত
টাকা প্রণামী দিয়েছে!

দুষ্ট লোকে চোখ টেপাটিপি ক'রে চাপা গলায় বললে—
গোক মেরে জুতো দান!

দুষ্ট লোকে কাণাঘুষা ক'রতে লাগলো—ব্যাগ-চুরির ব্যাপারটা
ধড়িবাঙ্ক রামযাচুরই কারসাজি! বেটা কী সয়তান! গুরুস্ব
অপহরণ করুতেও ওর বুক কাঁপে না!

রামযাছু এই দুর্নাম রটনা শুনে চীৎকার ক'রে বললে—
পরের ভালো কেউ দেখতে পারে না! আমার একটু উন্নতি
হচ্ছে অমনি লোকের চোখ টাটাচ্ছে—কিসে আমাকে খাটো
করবে অপদস্থ করবে তার ছুতো খুঁজছে! এমন ঈর্ষাকাতর
গায়ে মানুষ বাস করে! এই গাঁ জন্মের মতন ছেড়ে চললাম,
জীবনে যদি কখনো ফিরে আসি তো.....

শপথটা রামযাচুর ক্রোধস্থলিত বাক্যে ভালো বোঝা গেলো
না।

রামযাছু সপরিবারে কল্কাতায় এসে পরাগবাবুর শিকদার-

বাগানের বাড়ীতে আস্তানা গেড়েছে ; বাড়ীর ভাড়া লাগে না, দুখালো গরু দুবেলায় আট দশ সের দুধ ঢাল্ছে, রামযাদু সপরিবারে দিব্য আরামেই আছে। কর্তা কাশী গেছেন, আপিসে তাঁর এখনও ছুটি, কাজেই রামযাদুর অখণ্ড অবসর। সে সেই অবসরটি কবি-খ্যাতি অর্জনের আয়োজনে নিযুক্ত করলে। সে কল্কাতায় এসেই সত্যদাসকে চিঠি লিখলে যে সত্যদাস এসে তার সঙ্গে দেখা করলে সত্যদাসের কবিতা প্রকাশ করার ব্যবস্থা সম্বন্ধে কথাবার্তা হতে পারে।

সত্যদাস রামযাদুর বাড়ীতে এলো ! রামযাদু দেখলে, সত্যদাস বুদ্ধির প্রভায় স্ত্রী যুবক, কিন্তু সে দরিদ্র। রামযাদুর মন আশায় প্রফুল্ল হ'য়ে উঠলো। রামযাদু সত্যদাসকে জিজ্ঞাসা করলে—তুমি এমন সুন্দর কবিতা লিখতে পারো, এ পর্য্যন্ত কোনো মাসিক-পত্রে ছাপতে দাওনি কেনো ? কোনো কাগজে তোমার কবিতা দেখেছি ব'লে তো মনে হচ্ছে না ?

সত্যদাস কুণ্ঠিত ভাবে বললে—আমার ইচ্ছা ছিলো যে, সাধনার দ্বারা শক্তি সঞ্চয় ক'রে তার পর আত্মপ্রকাশ করবো। এই বইখানি যদি কোনো রকমে ছাপতে পারি, আর লোকে আমার কবিতার প্রশংসা করে, আর সম্পাদকেরা নিজে থেকে আমার কবিতা চেয়ে নেন, তবেই মাসিকপত্রে কবিতা দেবো।

রামযাদু সত্যদাসের গর্বিত মনের পরিচয় পেয়ে চিন্তিতও হ'লো, আবার সত্যদাসের এমন সু-রচনার শক্তি যে বঙ্গসাহিত্য-ক্ষেত্রে এখনও একেবারে অপরিচিত আছে, তাতে সে আনন্দিত

ও আশাবিত্ত হ'লো। সে সত্যদাসকে বললে,—বেশ! বেশ!
আমি খরচ দিয়ে তোমার এই বই ছেপে প্রকাশ ক'রে দেবো।...
তুমি এখন কি করো?

—কিছুই করি না। অনেক দিন থেকে একটা চাকরী
খুঁজছি, কিন্তু আমার কেউ মুক্ৰিও নেই, কারো বেশী
খোসামোদও করতে পারি না, আমার কোনো ডিগ্রি-ফিগ্রিও
নেই.....

—তোমার লেখার মধ্যে তো গভীর জ্ঞান ও চিন্তার পরিচয়
পেয়েছি—সমস্ত শাস্ত্র আর ইতিহাসে তো তোমার অসাধারণ
জ্ঞান! তুমি স্কুল-কলেজে কতোদূর পড়েছিলে?...

সত্যদাস রামযাদুর প্রশংসায় প্রফুল্ল এবং তার প্রশ্নে লজ্জিত
হ'য়ে বললে—আমি আই-এ পাস করতে পারি নি.....

—তুমি আমাদের আপিসে চাকরী করবে? প্রথমে একশো
টাকা পাবে, পরে দুশো আড়াইশো টাকা পর্যন্ত যাতে পাও
তার আমি চেষ্টা করবো.....

রামযাদু উত্তরের আশায় সত্যদাসের মুখের দিকে তাকিয়ে
একটু চুপ করলে, কিন্তু সত্যদাস আনন্দে ও কৃতজ্ঞতায় অভিভূত
হ'য়ে তখনই কোনো কথা বলতে পারলে না।

সত্যদাসের মনের অবস্থা বুঝতে পেরে খুশী হ'য়ে রামযাদু
বলতে লাগলো—কল্কাতায় তোমার মেসে-টেসে থাকবারও
দরকার হবে না, আমার বাড়ীতেই স্বচ্ছন্দে থাকতে পারবে...
নিজের বাড়ীর মতন থাকবে, তোমার কোনো কষ্ট হবে না...

সত্যদাস বিশ্বয়ে আনন্দে অভিভূত হ'য়ে একেবারে অবাক হ'য়ে গিয়েছে, সে বুঝতে পারছে না যে, তার উপর রামঘাটুর এই অনুগ্রহের কারণ কি হ'তে পারে ?

রামঘাটু সত্যদাসকে বললে—তা হ'লে আপিস খুললেই তোমাকে কাজে বাহাল ক'রে দেবো। আর তুমি ইচ্ছা করলে আজ থেকেই আমার বাড়ীতে থাকতে পারো।

সত্যদাস সন্তুষ্ট হ'য়ে বললে—আমি আপনার চিঠি পেয়ে দেশ থেকে তাড়াতাড়ি চ'লে এসেছি, একবার দেশে গিয়ে কাপড়-চোপড় নিয়ে আসতে হবে.....

রামঘাটু হেসে বললে—কল্কাতায় তো কাপড়-চোপড়ের কিছুমাত্র অভাব নেই; যা দরকার হবে কিনে নিলেই হবে। তুমি আজ থেকেই আমার কাছে থেকে যাও, তোমার সঙ্গে একটু সাহিত্য-আলোচনা করা যাবে।

সত্যদাস আনন্দে অভিভূত হ'য়ে মৌন হ'য়ে রইলো। রামঘাটু সত্যদাসের মৌনতাকে সম্মতির লক্ষণ জেনে উচ্চ চীৎকার ক'রে ডাকলে—ওরে বুনো,.....বুনো.....

নেপথ্য থেকে বালক-কণ্ঠের সূক্ষ্ম স্বরে জবাব এলো—
কি বাবা ?

রামঘাটু আবার চৈঁচিয়ে ডাকলে—ওনে যা.....

একটি এগারো-বারো বছর বয়সের ফর্সা রোগা ছেলে গলার উপর কোঁচার কাপড় জড়িয়ে ছুটে এসে ঘরে ঢুকলো। তার নাম বনমালী, সে রামঘাটুর মেজো ছেলে।

রামঘাট বনমালীকে দেখেই বললে—এই সত্যদাসবাবু আজ থেকে আমাদের বাড়ীতে থাকবেন। তোমার মাকে গিয়ে বলো গে। তোমাদের পড়বার ঘরের পাশের ঘরে ইনি থাকবেন ; এঁর বিছানা-টিছানা সেখানে ঠিক ক'রে দিয়ো। আর এখন তোমার সত্যদাদাকে জলখাবার এনে দাও, আর আমাকে ত্রিশটে টাকা এনে দাও

বনমালী ছুটে ঘর থেকে বেরিয়ে চ'লে গেলো।

রামঘাট তখন সত্যদাসের দিকে ফিরে বললে—জল খেয়ে একবার বাজার ঘুরে এসো—ধোয়া জামা-কাপড় জুতো ছাতা যা যা দরকার কিনে নিয়ে এসো...একটা ষ্টীল-ট্রাকও কিনে এনো, জামা-কাপড় রাখতে হবে.....

সত্যদাস কুণ্ঠিত ভাবে বললে—এ-সবের কিছু দরকার ছিলো না, আমি বাড়ী গিয়ে.....

রামঘাট হেসে বললে—তুমি মনে কোরো না যে, আমি charity করছি ; তোমার কুণ্ঠিত হবার কোনো কারণ নেই। আমি অল্প-স্বল্প Research work ক'রে থাকি...

সত্যদাস সঙ্কুচিত ভাবে বললে—তা আমি জানি ; আপনার নাম ভারতবর্ষে কে না জানে ?

রামঘাট সত্যদাসের প্রশংসায় তুষ্ট হ'য়ে বলতে লাগলো, সেই রিসার্চের কাজে আমাকে সাহায্য করবার জগ্রে একজন বুদ্ধিমান চতুর সাহিত্যানুরাগী যুবককে আমি খুঁজছিলাম। ভগবান তোমাকে জুটিয়ে দিয়েছেন ; তোমাকে আমি অল্পে অব্যাহতি

দেবো না। তোমাকে আমার কাছে রাখছি কেনো জানো ? তোমাকে আচ্ছা ক'রে খাটিয়ে নেবো... আমার যখন যা দরকার হবে তোমাকে দিয়ে খুঁজিয়ে নেবো ; লেখা নকল করিয়ে নেবো ; কখনো বা আমি মুখে ব'লে যাবো তুমি লিখে দেবে ; তার পর ছেলেমেয়েগুলোর লেখাপড়াটাও তুমি দেখতে পারবে। বাড়ীতে যখন বাড়ীর লোকের মতন থাকবে তখন কোন্ না মাঝে মাঝে হাট-বাজারটাও ক'রে দেবে ?

এই ব'লে রামযাদু হাসতে লাগলো এবং রামযাদুর কথা শুনে সত্যদাসের মন থেকে অপরের কাছে দান গ্রহণের গ্লানি দূর হ'য়ে গেলো। সে নিজের মনে মনে বললে—এমন সদাশয় সরল লোকের সাহায্যে সে তার সমস্ত শক্তি নিয়োজিত ক'রে দিতে প্রস্তুত থাকবে।

বনমালী এক থালা জলখাবার ও এক গেলাস জল দুই হাতে নিয়ে ঘরে এলো এবং সত্যদাসের সামনে নামিয়ে রেখে দিলে ; তার পর ট্যাক থেকে ভাঁজ-করা নোট বা'র ক'রে বাবার হাতে দিলে।

সত্যদাসের জল-খাওয়া শেষ হ'লে রামযাদু নোটের ভাঁজ খুলে তিন খানা দশটাকার নোট তার হাতে দিলে। সত্যদাস আবশ্যিক সামগ্রী কিন্তে বাজারে বেরিয়ে গেলো।

*

*

*

আপিসের ছুটি ফুরিয়ে গেছে। পরাগ-বাবু কাশী থেকে আজ ফিরে আসবেন। রামযাদু বর্ধমান স্টেশন পর্যন্ত গিয়ে

অপেক্ষা করছে ; পরাণ-বাবুকে আগ-বাড়িয়ে নিয়ে সে কাশীর ট্রেনে কলকাতায় ফিরবে। কাশীর ট্রেন ষ্টেশনে এসে প্রবেশ করতেই পরাণ-বাবু দেখলেন, প্লাটফর্মের উপর রামযাদু দাঁড়িয়ে আছে। পরাণ-বাবু রামযাদুকে দেখেই হাসলেন এবং রামযাদুও হাসিমুখে পরাণ-বাবুর কাম্রার সামনে পৌঁছাবার চেষ্টায় ক্রমশঃ-মস্তুর-গতি চলন্ত ট্রেনের সঙ্গে ছুটতে লাগলো। ট্রেন একেবারে থেমে গেলে রামযাদু হাঁপাতে হাঁপাতে এসে পরাণ-বাবুর গাড়ীর সামনে দাঁড়ালো।

পরাণ-বাবু প্রফুল্ল মুখে বললেন—প্রণাম হই মুখুজ্জ মশায়। এখানে কি করতে এসেছিলেন ?

রামযাদু দন্তবিকাশ ক'রে বললে—তীর্থ-প্রত্যাগত পুণ্যাত্মাদের দর্শন ক'রে একটু পুণ্যসঞ্চয় ক'রে নিতে।

পরাণ-বাবু রামযাদুর তোষামোদে তুষ্ট হ'য়ে বললেন—সে কর্মটা তো হাবড়া ষ্টেশনেও হ'তে পারতো ?

—কষ্ট স্বীকার ক'রে আগ্রহের পরিচয় না দিলে অনায়াসে পুণ্য হয় না।

—আসুন, গাড়ীতে উঠে পড়ুন।

—আমরা কি ফার্ষ্ট-সেকেণ্ড ক্লাসে যাবার যোগ্য লোক। আমরা সামান্য ব্যক্তি সর্বনিম্ন ক্লাসে যাবো।

—না না, এ আমাদের রিজার্ভ্ গাড়ী, আপনি আসুন, একসঙ্গে গল্প করতে করতে যাওয়া যাবে।

রামযাদু আর আপত্তি না ক'রে বললে—আচ্ছা আমি আসছি।

এই ব'লেই সে ছুটে চ'লে গেলো এবং দু-টাকার সীতাভোগ মিহিদানা কিনে নিয়ে হাঁপাতে হাঁপাতে ছুটে এসে পরাণ বাবুর কামরায় উঠলো।

পরাণ-বাবু বললেন, ও আবার কি আনলেন মুখুজে মশায়।

পরাণ-বাবু মাতঙ্গিনী ও কৃষ্ণকলি ষ্টেশনেব প্ল্যাটফর্মের দিকের বেঞ্চিতে ব'সে ছিলেন। আর থাকোহরি ছিলো অপর প্রান্তের বেঞ্চিতে। মাতঙ্গিনী রামযাদুকে দেখেই ঘোমটা টেনে কৃষ্ণকলিকে নিয়ে গাড়ীর অপর দিকে গিয়ে ব'সেছিলেন। থাকোহরি উঠে এসে মাঝের বেঞ্চিতে ব'সেছিলো। রামযাদু গাড়ীতে উঠে মাঝের বেঞ্চির উপর থাকোহরির পাশে সীতাভোগের খাঞ্চাটা রেখে পরাণ-বাবুর দিকে মুখ ও মাতঙ্গিনীর দিকে পিঠ ফিরিয়ে বসতে বসতে বললে—কৃষ্ণকলির জন্তে একটু সীতাভোগ মিহিদানা কিনে নিয়ে এলাম।

থাকোহরি রামযাদুকে প্রণাম ক'রে পায়ের ধুলো নিলে। রামযাদু নীরবে তার মাথায় হাত দিলে।

পরাণ-বাবু হাসিমুখে জিজ্ঞাসা করলেন—আপনার ছেলেমেয়েদের জন্তে কিছু নিলেন না ?

রামযাদু বললে—মা-ষষ্ঠীর পরম অন্তগ্রহে আমার বাড়ীতে তো একটি পন্টন ; তাদের মুখে একটি ক'রেও দিতে পারি এমন সঙ্গতি আমার নেই। আমার গো-ভাগিয়া নেই, এঁঠুলি-ভাগিয়া আছে !

এই সময় গাড়ীর সামনে দিয়ে একজন ফেরিওয়ালো মিষ্টানের

গাড়ী ঠেলে নিয়ে যাচ্ছিলো ; পরাণবাবু তাকে ডেকে বললেন—
এই, পাঁচ টাকার সীতাভোগ মিহিদানা দাও তো ।

রামঘাট্ট একবারও একটু আপত্তি প্রকাশ না ক'রে দস্তবিকাশ
ক'রে ব'সে রইলো ।

পরাণ-বাবু মিষ্টানের মূল্য চুকিয়ে দিয়ে মিষ্টানের ঝড়িটা
রামঘাট্টর পাশে রেখে হাসিমুখে বললেন—ছেলেদের বলবেন
আমি তাদের খেতে দিয়েছি ।

রামঘাট্ট বললে—আপনিই তো তাদের খেতে পরতে দিচ্ছেন
—আপনি বিশ্ববাংলার অন্নদাতা ভয়ত্রাতা !

পরাণ-বাবু তুষ্ট হ'য়ে বললেন—আমরা কাশী থেকে মিষ্টান্ন
চমচম গুপচুপ আকের মোরঝা প্রভৃতি আর বেনারসী শাড়ী
জোড় এনেছি । কালকে উনি নিজে গিয়ে বৌমাকে দিয়ে
আসবেন, আর নতুন বাড়ীতে এসে তাঁরা কেমন আছেন তাও
দেখে আসবেন ।

রামঘাট্ট একবার মুখ অর্ধেক ফিরিয়ে মাতঙ্গিনীর দিকে নত
চক্ষুর দৃষ্টিপাত ক'রে বললে—আপনাদের অসীম অনুগ্রহে আমরা
ত চিরকালের জন্ম কেনা হ'য়ে রয়েছি ।

পরাণ-বাবু প্রফুল্ল মুখে জিজ্ঞাসা করলেন—এই ছুটিতে কি
লিখলেন মুখুজে মশায় ?

—কতকগুলো কবিতা বাছাই ক'রে একখানা বইএর মতন
ক'রে রেখেছি । মনে করছি ছাপাবো ।

পরাণ-বাবু বিস্ময়পূর্ণ আনন্দ প্রকাশ ক'রে বললেন—

আপনি কবিতা লিখতেও পারেন? পাণ্ডিত্য ও কবিত্ব দুইয়ের সমাবেশ আপনাতে হয়েছে! এমন অসামান্য প্রতিভা আপনার!

রামযাদু যেনো আত্মপ্রশংসায় লজ্জিত হ'য়ে বিনয়ে সঙ্কচিত হাস্য করলে।

পরাণ-বাবু বলতে লাগলেন—চটপট ছাপিয়ে ফেলুন। ছাপা খানার বিলটা আমার নামে করতে বলবেন।

রামযাদু পুনঃপুনঃ লাভে প্রফুল্ল হ'য়ে বললে—আমি কিছু কিছু রিসার্চও করছি। কিন্তু আজকাল আপিসে যেতে হয়, বেশী তো সময় পাই না, তাই আমাকে সন্মানে সাহায্য করবার জন্যে একজন লোক রেখেছি।

—বেশ করেছেন। তাকে কতো দিতে হবে?

—কিছু দিতে হবে না। আমার বাড়ীতে থাকবে থাকবে, আর আপিসে একটা কিছু কাজ ক'রে দেবো বলেছি...ছেলেটি বড়ো গরিব, কিন্তু বেশ বুদ্ধিমান।

গরিব ঃ অথচ বুদ্ধিমান শুনেই পরাণ-বাবুর মন গ'লে গেলো। তিনি বললেন—তা হলে Export Departmentএ বিল্কার্কের খালি কাজটা ঐ ছেলেটিকে দিলে ত হয়...

রামযাদু খুশী হ'য়ে বললে—কিন্তু সে কাজের মাইনে তো বেশী, একশো থেকে আড়াইশো...

পরাণ-বাবু বললেন—তা একটু বেশী মাইনে না দিলে ছেলেটি মন দিয়ে কাজ করবে কেনো, আর বেশী দিন টিকেই বা থাকবে কেনো?

রামঘাটু অভীষ্টসিদ্ধির আনন্দে অভিভূত হ'য়ে কেবল হাসলে এবং তার পরে কাশীতে এখন কেমন ভিড়, শীত পড়েছে কি না, ইত্যাদি প্রশ্ন করতে আরম্ভ করলে ।

সত্যদাসের চাকরী হ'য়ে গেছে । সে অপ্রত্যাশিত অধিক বেতনের চাকরী পেয়ে রামঘাটুর কাছে কৃতজ্ঞতায় একেবারে তার অনুরক্ত আজ্ঞাধীন হ'য়ে পড়েছে ।

রামঘাটু একদিন সত্যদাসকে বললে—সত্যদাস, এইবার তোমার বইখানা প্রেসে দেবো । খুব ভালো ক'রে ছাপাতে হবে ।

সত্যদাসের মুখ আনন্দে উজ্জ্বল হ'য়ে উঠলো ।

রামঘাটু বলতে লাগলো—কিন্তু একটা মুস্কিল আছে । আপিসের সাহেবেরা ইচ্ছা করে না যে, তাদের কর্মচারীরা আপিসের কাজ ছাড়া আর কিছু করে । বিশেষতঃ লেখকদেরকে ওরা দেখতে পারে না । তবে যদি আমার কথা বলো সে স্বতন্ত্র ; আমি লেখক ব'লে খ্যাতি লাভ করার পর ওদের আপিসে ঢুকেছি ।

সত্যদাস শঙ্কাকুল হতাশ নিরুপায় দৃষ্টিতে রামঘাটুর মুখের দিকে চেয়ে রইলো ।

রামঘাটু বলতে লাগলো—কিন্তু আমি ভেবে চিন্তে একটা উপায় স্থির করেছি.....

সত্যদাসের মুখ আবার আশার আলোকে উদ্ভাসিত হ'য়ে উঠলো।

রামযাদু বলতে লাগলো—তুমি একটা ছদ্মনাম নিলেই তো চুকে যায়। শেষে সেই ছদ্মনামেই লেখকের খ্যাতি জড়িয়ে থাকে। জর্জ ইলিয়ট, মার্ক টোয়েন, জর্জ স্যাণ্ড্‌ তাঁদের ছদ্মনামেই প্রসিদ্ধ। বাংলাতেও হুরেশ্বর শর্মা, বীরেশ্বর গোস্বামী এক সময়ে বেশ খ্যাতি অর্জন ক'রেছিলেন, কিন্তু ঐ দুটিই ছদ্মনাম। বীরবল তো স্বনামপ্রসিদ্ধ। এমন কি স্বয়ং বঙ্কিমবাবুও কমলাকান্ত আর রাম শর্মা নাম নিয়ে লিখে ছদ্মনাম দুটিকেও অমর ক'রে রেখে গেছেন। তাই আমি বলি কি, তুমি বঙ্কিমবাবুর ছদ্মনাম রাম শর্মা নামেই বই ছাপো, কাগজে লেখে। বঙ্কিমবাবুর ঐ ছদ্মনামটির কথা বেশী লোকে জানে না, অথচ অমর বঙ্কিমচন্দ্রের আশীর্বাদ নিয়ে তোমার সাহিত্যক্ষেত্রে বিজয়-অভিযান হবে। কি বলো ?

সত্যদাস বঙ্কিমচন্দ্রের অমর আত্মার আশীর্বাদ লাভের সৌভাগ্যে ও আনন্দে কৃতার্থ হ'য়ে বললে—আজ্ঞে, সে খুব ভালো হবে।

সত্যদাস মনে মনে ভাবলে, পরম ভাগ্যবলে সে রামযাদুর ন্যায় একজন পরমহিতৈষী বন্ধু মুকুর্বি পেয়ে গেছে। তার মন ভক্তিতে শ্রদ্ধায় ও কৃতজ্ঞতায় গদগদ হ'য়ে উঠলো।

এই ব্যবস্থা অনুসারে সত্যদাসের কবিতার বই ছাপা হলো ; তার পরিচয়-পত্রে ছাপা হলো শ্রীরাম শর্মা কর্তৃক বিরচিত,

শ্রীরামযাছু মুখোপাধ্যায় কর্তৃক শিকদারবাগান লেন হইতে প্রকাশিত, এবং ভূমিকায় লেখা হলো, এই গ্রন্থ প্রকাশে শ্রীযুক্ত রামযাছু মুখোপাধ্যায় মহাশয় ও আমার পরমস্নেহভাজন বন্ধু শ্রীমান্ সত্যদাস দত্ত আমাকে প্রভূত সাহায্য করিয়াছেন, তাহার জন্য আমি উভয়ের নিকটেই বিশেষ কৃতজ্ঞ। ইতি শ্রীরাম শর্মা, শিকদার-বাগান লেন, কলিকাতা, শ্যামাপূজা, কার্তিক ১৩০০।

এই ভূমিকা দেখে সত্যদাস খুব কোঁতুক অনুভব করলে যে, রামযাছু-বাবু বেশ কৌশল ক'রে তার নামটাও বইয়ের ভিতরে ঢুকিয়ে দিয়েছেন। তার মুখের ভাব দেখে চতুর রামযাছু তার মনের ভাব বুঝতে পেরে বললে—তোমার নামটাও এর ভিতরে ঢুকিয়ে দিলাম, রাম শর্মা যে কে, তা লোকে শীঘ্রই সনাক্ত করতে পারবে।

সত্যদাসের কৃতজ্ঞতা উত্তরোত্তর বর্দ্ধিত হ'য়ে রামযাচুর প্রতি অন্ধ ভক্তিতে পরিণত হ'তে চললো।

কিন্তু লোকে রাম শর্মা নামটিকে রামযাচুরই নাম-সংক্ষেপ ব'লেই সহজেই বুঝে নিলে। রামযাছু ব্রাহ্মণ, সুতরাং রাম শর্মা সে তো বটেই; তার উপর আবার সে-ই প্রকাশক, রাম শর্মা পুস্তকের ভূমিকায় নিজের যে ঠিকানা দিয়েছে, তা রামযাচুরই বাড়ীর ঠিকানা; অতএব রামযাচুই যে রাম শর্মা এ সম্বন্ধে কারও একটুও সন্দেহ রইলো না।

খবরের কাগজে পুস্তকের প্রশংসা বিঘোষিত হ'তে লাগলো। এক কাগজে লিখলে—এই রাম শর্মা যে কে তা বুঝতে কোনো

পাঠকেরই একটুও কষ্ট হবে না ; লেখক যে ছদ্মনাম গ্রহণ করেছেন সেটি যেনো মাকড়সার জালের পর্দার আড়ালে জালি কাপড়ের ঘোমটা দিয়ে আত্মগোপন করার চেষ্টা। অন্য এক কাগজে লিখলে—যিনি অকস্মাৎ পুরাতত্ত্বের গবেষণায় অসামান্য কৃতিত্ব দেখিয়ে ঐতিহাসিকদের চকংকৃত ক'রেছিলেন, তিনিই আবার অকস্মাৎ কবিরূপে বঙ্গসাহিত্যক্ষেত্রে অবতীর্ণ হয়েছেন। এরূপ বিভিন্নমুখী প্রতিভা সচরাচর দেখতে পাওয়া যায় না ; রবীন্দ্রনাথের যুগে এমন স্বতন্ত্র কবিত্বপ্রতিভাসম্পন্ন কবির আবির্ভাব বঙ্গবাসীর পরম সৌভাগ্যই সূচনা করছে। এই কবিতাগুলি অক্ষয় শিক্ষানবিসের প্রথম উত্তম নয়, এ একেবারে পাকা হাতের লেখা ; ছন্দ অনবদ্য, ভাষা ললিত মার্জিত, ভাব পাণ্ডিত্যলব্ধ গভীর ও নূতন। এতো বিচিত্র গুণের একত্র সমাবেশ খুব অল্প রচনাতেই দেখা যায়। কবি একটি নূতন বাণী, নিজস্ব মেসেজ্ শোনাতে আবির্ভূত হয়েছেন।

রামযাহু দাঁত বা'র ক'রে হাস্তে হাস্তে সত্যদাসকে বললে—খবরের কাগজওয়ালারা কী মূর্খ! তারা মনে করছে, এ বইখানাও আমারই লেখা! যেনো বাংলা দেশে ভালো রচনা আমি ছাড়া আর কেউ করতে পারে না। তা এতে তোমার ভালোই হলো! আমার লেখা মনে ক'রে সকলেই খুব প্রশংসা করছে, সহজেই তোমার যশ প্রতিষ্ঠা লাভ করবে। এর পরে যা লিখবে তা-ই সমাদর লাভ করবে।

সত্যদাস আনন্দোৎফুল্ল লজ্জিত মুখ নত ক'রে চুপ ক'রে
রইলো ।

পরাণ-বাবুর বাড়ীতে রামযাছু যাওয়া মাত্রই পরাণ-
বাবু এক ঘর লোকের সামনে ব'লে উঠলেন—মুখুজ্জে মশায়,
আপনি এতো উঁচু দরের কবি, তা তো আমরা জান্তাম
না !

একজন উমেদার ব'লে উঠলো—কোনো কোনো বিষয়ে ইনি
রবি-ঠাকুরকেও ছাড়িয়ে গেছেন ।

অপর একজন বললে—রামযাছু-বাবু হচ্ছেন বিশ্বয় মূর্তিমান্ !
ইতিহাস লিখে তাকু লাগিয়ে দিলেন ; লোকে বিশ্বয়ভাব
সাম্লাতে না সাম্লাতে আর এক বিশ্বয় এসে উপস্থিত ! এর পরে
আবার যদি অঙ্কশাস্ত্রে নূতন কিছু আবিষ্কার ক'রে ফেলেন, তাতেও
আর আশ্চর্য্য হবার কিছু থাকবে না !

রামযাছু হাসিভরা মুখে বিনয় মাথিয়ে বললে—হ্যাঃ হ্যাঃ,
আমি আর এমন কি লিখতে পেরেছি ! গবেষণার পরিশ্রমে
ক্লান্ত মস্তিষ্কে একটু অন্তমনস্ক করবার জন্ত মাঝে মাঝে যে
কবিতা রচনা ক'রে থাকি, তারই গোটা কয়েক এক জায়গায়
ক'রে বা'র করেছি ।

—এবার আপনাকে আমরা আর দীর্ঘকাল নীরব হ'য়ে
থাকতে দিচ্ছি নে । আপনাকে মাঝে মাঝে মাসিক পত্রিকায়
কবিতা দিতে হবে ।

পরাণ-বাবু বললেন—আর আমাদের অনুরোধের অপেক্ষা

থাকবে না। সম্পাদকেরা বাড়ীতে চড়াও হ'য়ে আদায় ক'রে নিয়ে যাবে !

রামযাদুর মুখ ক্লান্ততার হাসিতে উদ্ভাসিত হ'য়ে উঠলো।

বাস্তবিক পরাণ-বাবুর কথাই সত্য হ'লো। রামযাদু সম্পাদকদের লিখিত ও বাচনিক তাগাদায় উদ্ভাস্ত হ'য়ে ওঠবার উপক্রম হ'লো। এবং সে সত্যদাসের নূতন নূতন কবিতা তার কাছ থেকে চেয়ে নিয়ে নিজের নাম-ঠিকানা ছাপা কাগজে চিঠি লিখে সেই চিঠির সঙ্গে বিভিন্ন কাগজে পাঠাতে লাগলো। সকলের মনে এই ধারণা বদ্ধমূল হ'য়ে উঠলো যে রামযাদুই রাম শর্মা, এবং রামযাদুর সম্মুখে এই কথা উত্থাপিত হ'লে সে প্রতিবাদ তো করেই না, বরং এমন ভাব দেখায় যে, সে যে-কথা লুকাতে চেয়েছিলো সেটা বড়োই স্পষ্ট রকমে ধরা প'ড়ে গেছে।

রামযাদুর সাহিত্য-সাধনার কৃতিত্ব যতো সুখ্যাতি অর্জন করতে লাগলো, ততোই রামযাদুর কাছে নবীন ও সাহিত্যক্ষেত্রে প্রবেশাধিকারপ্রার্থী বহু সাহিত্যিক নিজেদের রচনা যাচাই করবার জন্ম, রচনা কোনো সম্পাদকের নিকট সুপারিশ ক'রে দেবার জন্ম, রচনার পরিচয় স্বরূপ পুস্তকের ভূমিকা লিখে দেবার জন্ম সনির্বন্ধ অনুরোধ নিয়ে আসা-যাওয়া করতে লাগলো। রামযাদুর বাড়ী সাহিত্যসেবীদের তীর্থস্থান হ'য়ে উঠলো ; কবি ঔপন্যাসিক ঐতিহাসিক প্রত্নতাত্ত্বিক সমালোচক সকল

প্রকারের সাহিত্যিক সকল বিকাল রামঘাটুর বৈঠকখানায় সমবেত হ'য়ে সাহিত্যের সকল বিভাগের আলোচনা করে, রামঘাটুর অভিমত উৎস্ক হ'য়ে শোনে। রামঘাটুর কাছে যে-সব সাহিত্য-যশঃ-প্রার্থী নিজেদের রচনা দেখতে দিয়ে যায়, রামঘাটু সেইগুলি প'ড়ে তার মধ্যে কোনো নূতন ভাব, সুন্দর আখ্যান বা নূতন তত্ত্ব পেলে সেগুলিকে লিখে রাখে এবং সেইগুলি সত্যদাসকে ব'লে কবিতায় বা নিজে গড়ে লিখে নিজের নামে চটপট প্রকাশ করে।

একদিন একজন প্রৌঢ় বয়সের ব্রাহ্মণ-পণ্ডিত রামঘাটুর কাছে এসে বিনীতভাবে বললে—আমি তেরো বৎসর নিরন্তর অন্তসন্ধান ক'রে প্রাচীন বঙ্গের রীতিনীতি সম্বন্ধে এই বইখানি লিখেছি ; ইতিহাস সাহিত্য ছড়া ব্রতকথা রূপকথা কিম্বদন্তী এ-পর্যন্ত যেখানে যা-কিছু লিখিত সংগৃহীত হয়েছে তা তো আমি পুঙ্খানুপুঙ্খরূপে পাঠ করেছি, আবার নিজেও জেলায় জেলায় ঘুরে অনেক নূতন তত্ত্ব সংগ্রহ করেছি। আমার অল্প কয়েক ঘর শিষ্য আছে ; মাঝে মাঝে আমাকে বিভিন্ন জেলায় যেতে হয় ; কাজেই, আমার অনেক সুযোগ জুটেছে। বইখানি অনেক দিন থেকে লিখে রেখেছি কিন্তু অর্থাভাবে ছাপাতে পারি নি। কোনো পুস্তক প্রকাশকই এই বই পয়সা খরচ ক'রে ছাপতে চায় না, বলে—উপন্যাস ছাড়া বাঙালী পাঠক-পাঠিকারা আর কিছু পড়ে না। এখন আপনি যদি একটু সুপারিশ ক'রে ব'লে দেন, তা হলে আমাব এতো দিনের

পরিশ্রম সার্থক হয়, আর আমি আপনার কাছে চিরক্ৰান্ত হ'য়ে থাকি ।

রামযাদু ব্রাহ্মণের সকল কথা মন দিয়ে শুনতে শুনতে তার খাতার পাতা উন্টে উন্টে দেখছিলো যে, পুস্তকখানিতে কি আছে ও তার মূল্যই বা কি । সমস্ত কথা ব'লে ব্রাহ্মণ নিবৃত্ত হ'য়ে রামযাদুর অভিমত জানবার জ্ঞ রামযাদুর মুখের দিকে উৎসুক আশাবিত্ত অনুনয়ের দৃষ্টিতে তাকালো ।

রামযাদু ব্রাহ্মণকে নিরস্ত হ'তে দেখে খাতা থেকে মুখ তুলে জিজ্ঞাসা করলে—মশায়ের নাম ?

—আজ্ঞে আমার নাম শ্রীবনমালী বিদ্যাবাগীশ, আমরা মুখোপাধ্যায় ।

—আপনার নিবাস ?

—এই বাঁপডদা-মাকড়দা ।

রামযাদু বিদ্যাবাগীশের পুস্তকের হস্তলিপির পাতা পাণ্টাতে পাণ্টাতে বললে—আমি ঠিক এমনি একখানি বই লিখে ছাপতে দিয়েছি । ছাপা প্রায় হ'য়ে এসেছে, আর দিন দশ পনেরোর মধ্যে বই বাজারে বেরিয়ে যাবে । তবে আপনি যদি ইচ্ছে করেন, তবে খাতা রেখে যেতে পারেন, আমি একবার প'ড়ে দেখবো ; যদি কিছু নতুন বিবরণ থাকে তবে নিশ্চয় স্পারিশ ক'রে দেবো ।

বিদ্যাবাগীশ আনন্দিত হ'য়ে বললে—তেরো বৎসরের কঠিন পরিশ্রম যে বিষয়ে করেছি, তা'তে কিছু হয়তো নূতন তথ্য থাকতে পারে ।

রামযাদু পরম গম্ভীরভাবে বিজ্ঞের মতন মুগ্ধ ক'রে বললে—ই্যা, দেখছি তো, আপনি যথেষ্ট পরিশ্রম ক'রেছেন। নিশ্চয় আপনার কিছু নূতনত্ব আছেই। আমি যথাসাধ্য চেষ্টা করবো যাতে আপনার এই বই প্রকাশিত হয়। কোনো প্রকাশক প্রকাশের ভার না নিতে চাইলে আমি নিজে খরচ দিয়ে ছাপিয়ে দেবো।

বিজ্ঞাবাগীশ খুশী হ'য়ে বললে—ব্রাহ্মণশ্চ ব্রাহ্মণো গতিঃ। তাতে আবার আমরা সাহিত্যের একই ক্ষেত্রের সমকর্মী। আপনার সহৃদয় সাহায্য যে পাবোই, তা আমি জান্তাম।

রামযাদু বললে—আপনি দিন পনেরো পরে আসবেন, আমি এর মধ্যে প'ড়ে রাখবো। আমার হাতে এতো কাজ যে অবকাশ পাই না; একটু বিলম্ব হবে; ক্ষমা করবেন।

বিজ্ঞাবাগীশ রামযাদুর সৌজন্যে ও বিনয়ে তুষ্ট হ'য়ে বললে—যে বই প্রকাশের জন্য তেরো বৎসর অপেক্ষা ক'রে আছি তার কাছে পনেরো দিন তো কিছুই নয়। তবে আপনার শেষ অভিমত জানবার আগ্রহে আমার কাছে এক পক্ষ এক কল্পের তুল্যই দীর্ঘ মনে হবে। আচ্ছা, আজ তবে আসি, আপনার বহুমূল্য সময়ের আর অপব্যয় করবো না।

বিজ্ঞাবাগীশ রামযাদুকে নমস্কার ক'রে চ'লে গেলো।

রামযাদু তৎক্ষণাৎ খাতার উপরের পাতাটা ছিঁড়ে ফেলে দিলে, সেখানে বনমালী বিজ্ঞাবাগীশের নাম লেখা ছিলো। তার পর একবার খাতার আছোপাস্ত তাড়াতাড়ি উন্টে দেখে

নিলে আর কোথাও বিদ্যাবাগীশের নাম লেখা আছে কি না। যখন দেখলে যে আর কোথাও নেই, তখন সে চারজন লোক ভাড়া করে' নিয়ে এলো এবং তাদের বললে—এই বইখানা আমি তেরো বছর পরিশ্রম করে' উপাদান সংগ্রহের পর লিখে শেষ করেছি। এখন ছাপতে দেবো। প্রেসে যদি কপি হারিয়ে ফেলে তবেই সর্বনাশ! একটা নকল করে' দিতে হবে। খাতাখানা চার পাঁচ ভাগ করে' চার পাঁচ জনে নকল করলেই চট করে' হ'য়ে যাবে।

এই ব'লে রামযাদু খাতাখানা ছ-খণ্ড করে' ফেললে এবং ভাড়া-করা চারজন লেখক, সত্যদাস ও নিজে মিলে এক দিনেই বইখানা নকল করে' নিলে। তার পর দপ্তরীকে দিয়ে খাতাখানা বাঁধিয়ে আবার সম্পূর্ণ করে' রেখে দিলে।

রামযাদু কুড়িটা প্রেসে পুস্তকের কুড়িটা পরিচ্ছেদ ভাগ করে' ছাপতে দিলে এবং প্রেসের নিদিষ্ট মজুরীর দ্বিগুণ দিয়ে ১০ দিনেই বই ছেপে দপ্তরীকে দিয়ে বাঁধিয়ে বাহির ক'রে ফেললে এবং বিদ্যাবাগীশের আগমন প্রতীক্ষা করতে লাগলো।

পনেরো দিন পরে বিদ্যাবাগীশ ফিরে এলে রামযাদু বললে—আমার বইএর সঙ্গে আপনার বইয়ের বিশেষ কিছু পার্থক্য দেখলাম না। কাজেই, আমি দুঃখিত হচ্ছি আপনাকে কিছু সাহায্য করতে পারছি না। এই আমার বই বেরিয়েছে। একখানা আপনি নিয়ে যান। আপনার খাতাখানা আমার

ছেলে ছিঁড়ে ফেলেছিলো। আমি বাঁধিয়ে দিয়েছি ; কিছু মনে করবেন না।

বিছাবাগীশ ক্ষুণ্ণমনে চ'লে গেলো, এবং সে কৌতূহলী হ'য়ে রামযাদুর বই পড়তে আরম্ভ করে' দেখলে, রামযাদুর বই হুবহু তার খাতার নকল এবং রামযাদুর বইয়ে পত্রাঙ্ক নেই।

খবরের কাগজে রামযাদুর নূতন বইয়ের ঘণ বিঘোষিত হ'তে লাগলো।

রামযাদু কয়েক দিন পরে খবর পেলে যে, সেই বনমালী বিছাবাগীশ পাগল হ'য়ে গেছে। এতে রামযাদুর আনন্দটা একটু বিষাদে ও ভয়ে দ'মে গেলো।

ভাই-ফোঁটার দিন। রামযাদু সকাল-বেলা পরাণ-বাবুর বাড়ীতে এসে ঢুকতেই দেখলে, কৃষ্ণকলি থাকোহরির হাত ধ'রে দাঁড়িয়ে আছে। তাদের দেখেই রামযাদু হাসিমুখে কৃষ্ণকলিকে বললে—কি গো কৃষ্ণকলি, তোমার থাকো-দাদাকে ভাই-ফোঁটা দিয়েছো ?

কৃষ্ণকলি লজ্জা পেয়ে মুখ নামিয়ে চোখ বাঁকিয়ে বললে—
ধ্যৎ ! বরকে কি কেউ ভাই-ফোঁটা দেয় ?

রামযাদুর দৃষ্টির সামনে থেকে যেনো একটা পর্দা উঠে গেলো, অনেক অনির্গীত সমস্তার মীমাংসা এক নিমিষে হ'য়ে গেলো ; সে এখন স্পষ্ট বুঝতে পারলে যে, পরাণ-বাবু কেনো থাকোহরিকে এমন জামাই-আদরে প্রতিপালন করছেন। কৃষ্ণকলি অতি

কদর্য্য রকমের কুৎসিত মেয়ে ; তার ভাগ্যে সংপাত্ত জোটানো কুবেরেরও অসাধ্য ; অর্থলোলুপ কোনো যুবা কাঞ্চন-কল্প-লতিকার পুষ্প-রুষ্টির লোভে এই কালো ভোম্বুরার সঙ্গ সহ করবে কেবল ততোক্ষণই, যতোক্ষণ পুষ্প সঙ্কেতে তার নিজের কোঁচড় পরিপূর্ণ হ'য়ে না উঠছে। রামযাদুর মনে পড়লো রবিবাবুর শেষরক্ষা নাটকের বাগবাজারের চৌধুরীদের কাদম্বিনীর কথা ; আহা বেচারী রূপহীনা ব'লে সে এমনই ভাগ্যহীনা যে, তাকে নিয়ে অপর সবার প্রতি দরদী কবিও ব্যঙ্গ-বিদ্রূপের নিষ্ঠুর কৌতুক করতে দ্বিধা বোধ করেন নি ; যে কবি কাব্যে উপেক্ষিতা ব'লে উন্মিলার হুঃখের প্রতি অপরের দৃষ্টি আকর্ষণ করেছেন, তিনিও সেই কাদম্বিনীর প্রতি একটু সহানুভূতি কোথাও দেখান নি : অথ-গৃধ্র, ললিত যে কাদম্বিনীকে বিয়ে করে' তাকে ফেলে রেখে' তার টাকা নিয়ে বিলাতে পলায়ন করলে, এতোবড়ো নিশ্চয়ম ব্যবহারটা কবি পরম কৌতুকের মধ্যে ডুবিয়ে লোক-চক্ষুর অগোচরেই রেখে দিয়েছেন। এই রকম কোনো একটা দুর্ঘটনা পাছে ঘটে, এই ভয়েই বোধ হয় পরাণ-বাবু থাকোহরির সঙ্গেই নিজের একমাত্র কন্যার বিবাহ দেবার সঙ্কল্প করেছেন ; থাকোহরি দেখতে সুশ্রী, স্বভাব-চরিত্রও ভালো ; থাকোহরি দুনিয়ায় নিরাশ্রয় হ'য়ে যখন চতুর্দিক অন্ধকার দেখছিলো তখন পরাণ-বাবু কেবল তাকে আশ্রয়ই দেন নি, ধনীর আত্মীয়তা দিয়ে তাকে সুখে স্বচ্ছন্দে রেখেছেন ; থাকোহরি এই উপকার লাভের কৃতজ্ঞতায় অভিভূত হ'য়ে উপকারকের কন্যা কৃষ্ণকলিকেও যত্ন-মমতা দেখাবে

এবং বহুকাল এইভাবে একত্র থাকার ফলে থাকোহরির মনের থেকে কৃষ্ণকলির কদর্যতার প্রতি ঘৃণা অনেকখানি লোপ পেয়ে যাবে ; অবশেষে থাকোহরির সঙ্গে কৃষ্ণকলির বিবাহের প্রস্তাব করলে থাকোহরি আপত্তি করতে পারবে না, এবং বিবাহ হ'য়ে গেলেও তার অবস্থার কোনো পরিবর্তন ঘটবে না ব'লে সে নিজের কুৎসিত স্ত্রী-লাভের দুর্ভাগ্য সম্বন্ধেও সচেতন হবে না ; সে দিব্য আরামে ঘর-জামাই হ'য়ে কৃষ্ণকলিকে নিয়েই ঘর-কন্না করবে ।

এই-সব কথা মনের উপর দিয়ে প্রবাহিত হ'য়ে যেতেই রামযাদু মনে মনে ব'লে উঠলো—উঃ ! বেটা কেওটের কী কুটবুদ্ধি ! পাক্কা ধড়িবাজ ! চাণক্য পণ্ডিতের চেলা । আমার চোখেও এতোদিন ধূলো দিয়ে রেখেছে, ঘুণাক্ষরে মৎলবটা ফাঁস করে নি ! আচ্ছা, এইবার দেখা যাবে ।

রামযাদু এই রকম ভাবতে ভাবতে পরাগ-বাবুর ঘরে গিয়ে উপনীত হ'লো । পরাগ-বাবু ঘরে তখন একলা ব'সে ছিলেন ।

পরাগ-বাবু রামযাদুকে ঘরে আসতে দেখেই বললেন—এই যে মুখুজ্জ মশায় ! প্রণাম হই । আপনার নতুন বইখানার তো খুব সূখ্যাতি হয়েছে । ওটাকে এবার ইংরেজী ক'রে ডক্টরেটের থিসিস্ সাবমিট করুন ।

রামযাদু উপবেশন করতে করতে বললে—হ্যাঁ, আমিও ঐ কথাই ভাবছিলাম । তা আপনি যদি অনুমতি করেন তো চেষ্টা করে' দেখি ।

পরাণ-বাবু খুশী হ'য়ে বললেন—হ্যাঁ, হ্যাঁ, এতে আবার আমার অনুমতি কি ?

রামযাছু এ প্রসঙ্গ ছেড়ে দিয়ে বললে—আপনাকে আমি অনেকদিন থেকে একটা কথা বলবো বলবো মনে করছি, বলবার সুযোগ আর পাই নি ; আজ আপনাকে একলা পেয়েছি, যদি অনুমতি করেন তো ব'লে ফেলি...

রামযাছু হাস্যমুখে অপেক্ষমাণ দৃষ্টিতে পরাণ-বাবুর মুখের দিকে চেয়ে রইলো ।

পরাণ-বাবু কৌতুহলাক্রান্ত হ'য়ে বললেন—কি বলবেন স্বচ্ছন্দে বলুন ।

রামযাছু যেনো পরের উপকারের জন্য অন্তবোধ করছে এমনি ভাবে বলতে লাগলো—আমি আপনাকে থাকোহরির কথা বলছিলাম.....

রামযাছু যে নিজের জন্য কিছু বলছে না, এবং থাকোহরির কোনো কথা বলতে যাচ্ছে, এতে পরাণ-বাবু বিস্মিত ও উৎসুক হ'য়ে বললেন—হ্যাঁ, কি বলবেন বলুন...

রামযাছু বললে—ছেলেটি বড়ো খাসা...

পরাণ-বাবুর মনের মধ্যে একটু আশঙ্কা উঁকি মারছিলো, হয়তো রামযাছু থাকোহরির কোনো দোষের কথাই বা উত্থাপন করতে যাচ্ছে ; কিন্তু তাঁর আশঙ্কা অমূলক প্রতিপন্ন হ'য়ে যাওয়া মাত্র তিনি উৎফুল্ল হ'য়ে বললেন—হ্যাঁ, ছেলেটি সত্যিই খাসা !

রামঘাট্ ব'লে যেতে লাগলো—আমি কিছুদিন থেকে লক্ষ্য করছি থাকোহরি আমাদের কৃষ্ণকলিকে খুব ভালোবাসে, আর কৃষ্ণকলিও থাকোহরির খুব নেওটো হয়েছে !...

পরান-বাবুর ক্ষুদ্র চক্ষুর দৃষ্টি উজ্জ্বল তীক্ষ্ণ হ'য়ে উঠলো, মুখ আনন্দে বিকশিত হ'য়ে উঠলো ।

রামঘাট্ বলতে লাগলো—কৃষ্ণকলির সঙ্গে থাকোর বিষয়ে হ'লে বেশ হয় ; থাকো ঘর-জামাই হ'য়েই যদি থাকে, তা হলে আমাদের মা-লক্ষ্মীকে আর আমাদের কাছছাড়া করতে হয় না...

পরান-বাবু উৎফুল্ল মুখে জিজ্ঞাসা করলেন—আপনি কি মনে করেন মুখুজ্জৈ মশায়, যে, এই ব্যবস্থা করলে উত্তম হবে ?

রামঘাট্ গম্ভীরভাবে বললে—আমার তো মনে হয় এর চেয়ে উৎকৃষ্ট ব্যবস্থা আর কিছু হতে পারে না ।

পরান-বাবু খুশী হ'য়ে বললেন—তবে আপনাকে আমাদের মনের কথাটাও খুলে বলি মুখুজ্জৈ মশায়,—আমরাও এই রকম সঙ্কল্প মনে মনে এঁচে রেখেছি । এবার কাশীতে গিয়ে বড়ো বড়ো জ্যোতিষীদের দিয়ে ওদের দুজনের কোষ্ঠী বিচার ও গণনা করিয়ে দেখেছি ; সবাই বলেছেন এ বিবাহ হ'লে রাজঘোটক হবে । কেবল একজন জ্যোতিষী বলেছেন যে, এ বিবাহ হ'লে ভালোই হবে বটে, কিন্তু কৃষ্ণকলির পতিযোগ এতোই উৎকৃষ্ট যে, থাকোহরির চেয়েও গুণান্বিত কোনো পাত্রের সঙ্গেই কৃষ্ণকলির বিবাহ হওয়া সম্ভব । সেইজন্মে আমরা আর বছর কতক অপেক্ষা ক'রে দেখবো, ভবিষ্যৎ কি হয় । ওরা দুজনেই

এখন তো ছেলেমানুষ । তিন চার বছর অপেক্ষা করা স্বচ্ছন্দেই চলবে । কিন্তু আমাদের মনের মধ্যে যে সঙ্কল্প উদয় হয়েছিলো, আপনার মনেও যখন সেইটিরই সমর্থন হচ্ছে, তখন আমাদের মনোবাঞ্ছাই পূর্ণ হবে বুঝতে পারছি । এখন প্রজাপতি আর ভবিতব্যতার আশীর্বাদ ।

রামযাছু বললে—যার সঙ্গেই বিয়ে হোক, কৃষ্ণকলি যে সংপতি লাভ করবে, তাতে আর সন্দেহ নেই । আমরা কোণ্ঠী দেখতে না জানলেও এ তো জানি, যে, পিতৃমাতৃপুণ্যের জোরে সস্তান সর্বথা মঙ্গলাম্পদ হয় ।

পরান-বাবু পরিতুষ্ট হ'য়ে বললেন—সে আপনাদের দশ জনের আশীর্বাদ ও অনুগ্রহের উপরই নির্ভর করছে ।

এমন সময় ঘরের পাশের কাঠের সিঁড়িতে মানুষ ওঠার ধপ্ধপ্ পদশব্দ শোনা গেলো । রামযাছু লোক-সমাগমের সম্ভাবনা দেখেই উঠে দাঁড়িয়ে বললে—আমি এখন আসি । আমাদের দশজনের জালায় আপনার আর আরাম বিশ্রাম করবার জো নেই ।

পরান-বাবু সন্তুষ্ট হ'য়ে প্রফুল্লমুখে বললেন—আপনাদের অনুগ্রহে এই আমার পরম সৌভাগ্য ।

পরান-বাবুর ঘরে কয়েকজন লোক এসে প্রবেশ করতে লাগলো । রামযাছু সমাগতদের সমবেত ভাবে একটি নমস্কারে অভিনন্দিত ক'রে ঘর থেকে বেরিয়ে চ'লে গেলো । সমাগত লোকদের দৃষ্টি তখন পরান-বাবুর দৃষ্টি আকর্ষণ করতে উৎসুক

ও হস্ত দুটি তাঁর দর্শন লাভ করা মাত্র নমস্কার করবার উদ্যোগে যুক্ত হয়ে ছিলো, তাই রামঘাটুর প্রস্থান ও নমস্কার কেউ-বা লক্ষ্য করলে আর কেউ-বা লক্ষ্য করবার অবকাশ পেলো না। যদিও তারা জানে যে, রামঘাটু পরাণ-বাবুর প্রধান কৃপাপাত্র, স্তূতরাং তাকে তুষ্ট রাখাতেও তাদের স্বার্থ আছে, তথাপি প্রধান দেবতা ও তাঁর বাহনের মধ্যে কার পূজা আগে করবে স্থির করতে পারবার আগেই রামঘাটু ঘর থেকে বাহির হ'য়ে গেলো।

রামঘাটু নীচে নেমে গিয়েই দেখলে যে, থাকোহরি কৃষ্ণকলির হরিণ-ছানাকে ঘাস খাওয়াচ্ছে, কিন্তু এখন আর তার কাছে কৃষ্ণকলি নেই। থাকোহরিকে দেখেই রামঘাটু হাসিমুখে ব'লে উঠলো—বেশ্, বাবাজী বেশ্, লাভ মি অ্যাণ্ড্ লাভ্, মাই ডগ!

থাকোহরি মুখ ফিরিয়ে রামঘাটুকে দেখেই লজ্জাকুণ্ঠিত ভাবে হাসলে এবং হাতের ঘাস ফেলে দিয়ে সোজা হ'য়ে রামঘাটুর দিকে ফিরে দাঁড়ালো।

রামঘাটু থাকোহরির কাছে এসে তার কাঁধে হাত রেখে কণ্ঠস্বরে আদর মাখিয়ে বললে—তোমাকে বলবো না মনে ক'রেছিলাম বাবাজী। কিন্তু দেখছি কৃষ্ণকলি পর্য্যন্ত যখন জানতে পেরেছে, তখন তোমারও জানতে বাকী নেই...আর আজ কৃষ্ণকলি তো তোমার সামনেই তোমাকে বর ব'লে পরিচয় দিয়ে গেলো, যদি-বা কথাটা তোমার অগোচর ছিলো তবে

তো আজই তা জানা হ'য়ে গেলো। এখন তোমাকে বলতে আর বাধা নেই.....আমিই কর্তাকে প্রথমে এই কথা বলি যে, “থাকোহরি তো আপনাদের স্বজাত আর ছেলেটিও দেখতে শুনতে স্বভাব-চরিত্রে খুব ভালো, ওর সঙ্গে আমাদের কৃষ্ণকলির বিয়ে দিলে বেশ হয়।” তাতে কর্তা বললেন—“থাকোহরির অবস্থা তেমন ভালো নয়, বংশ-পরিচয়ও” তাতে আমি তাঁর কথায় বাধা দিয়ে বললাম—“থাকোহরির যেমন রূপ-গুণ, তাতে সে সদ্বংশজাত না হ'য়ে যায় না ; আর তা যদি না-ই হয়, তাতেই বা কি ? কয়লার খনিতে হীরক পাওয়া গেলে সেই হীরকের সমাদর তো কয়লার দরে হয় না ? দৈবায়ত্ত্বং কুলে জন্ম, মদায়ত্ত্বন্ত পৌরুষম্—কর্ণের এই বাক্য একটি মহৎবাক্য ! আর থাকোহরির অবস্থা ভালো না-ই বা হলো ? আপনার অগাধ সম্পত্তি থেকে আপনার কন্যাকে তো আপনি বঞ্চিত করতে যাচ্ছেন না ? আর থাকোহরি যখন আপনার কৃপা লাভ করেছে, তখন সে নিজেও যথেষ্ট রোজ্গার করতে পারবে।” এই-সব কথা শুনে কর্তা একটু চুপ ক'রে থেকে ভেবে চিন্তে বললেন—“হ্যাঁ তা বটে, কিন্তু আমার মেয়ে কালো কুচ্ছিত, তাকে যদি থাকোহরির পছন্দ না হয়...” এতে আমি বললাম—“মানুষের বাহিরটাই কি সব ? অমর বন্ধিমচন্দ্র কি দেখিয়ে যান নি যে ভ্রমরের কাছে শত রোহিণী তুচ্ছ ! তা ছাড়া থাকোহরির মনের কৃতজ্ঞতা তার চোখে যে প্রীতির অঙ্গন মাখিয়ে দেবে, তাতে জগতের সকল স্নন্দরী কৃষ্ণকলির মাধুর্যের

কাছে পরাজিত হ'য়ে যাবে !” আমার এই কথা শুনে কর্তা অনেকক্ষণ ভেবে শেষে নিম্রাজী হ'য়ে বললেন—“আচ্ছা, কিছু দিন ভেবে-চিন্তে দেখি আর থাকোহরি আর কৃষ্ণকলির মনের ভাবটাও কিছুকাল লক্ষ্য ক'রে দেখি, তার পর আপনার পরামর্শ-মতো যা-হয় কিছু করা যাবে।” আজকে কৃষ্ণকলির কথা শুনে এই কথাটা আমার মনে প'ড়ে গেলো ; আজ আবার কর্তার কাছে কথাটা তুলেছিলাম ; তিনি বললেন,—“আরও দু-চার বছর লক্ষ্য ক'রে দেখি।” তা দেখো বাবাজী, এই অতুল সম্পত্তি যদি লাভ করতে চাও, তবে কৃষ্ণকলিকে খুব ভালো বাসবে আর খুব শান্ত শিষ্ট হ'য়ে কর্তা-গিন্নির মন জুগিয়ে চলবে। আমি তোমার জন্তে কুবেরের ভাগুরের দরজা খুলে দিয়েছি, এখন তুমি দখল করতে পারলেই হয়।

থাকোহরি রামযাদুর বানানো উপন্যাস সত্য ব'লে বিশ্বাস ক'রে রামযাদুর প্রতি কৃতজ্ঞতায় অবনত হ'য়ে তার পায়ের ধুলো নিয়ে বললে—আমার সমস্ত শুভাদৃষ্টের মূল আপনি। আপনার শ্রীচরণের আশীর্বাদ থাকলে আমার কর্তব্যের কিছু ক্রটি হবে না।

রামযাদু নিজের বুদ্ধির কৌশল ও থাকোহরির ভক্তিশ্রদ্ধা দেখে খুশী হ'য়ে বললে—বেশ বাবাজী বেশ ! আমি তোমাকে সদা-সর্বদাই সংপরামর্শ দেবো।

*

*

*

রামযাদু কল্কাতায় এসে অবধি পরাণ-বাবুর বাড়ীতেই পরাণ-বাবুর গোরুর খাঁটি দুধ দই ক্ষীর মাখন ছানা শর খেয়ে

সপরিবারে দিব্য আরামে আছে, কিন্তু নিশ্চিত হ'য়ে নেই।
রামঘাতুর সদাই মনের মধ্যে ভয়-ভয় করে, কখন বুঝি বা পরাণ-
বাবু বাড়ীটা ছেড়ে দিতে বলেন বা ভাড়াই চেয়ে বসেন, আর
কখন বা গোকটাই ফিরে চান। এই জন্য সে আজ-
কাল পরাণ-বাবুকে পরিতৃষ্ণ রাখবার জন্য বিধিমতো চেষ্টা
করে।

এক দিন গভীর রাত্রে রামঘাতু সপরিবারে থিয়েটার দেখে
বাসায় ফিরছিলেন। পরাণ-বাবুর বাড়ীর কাছাকাছি এসে তার
উর্ধ্বর মস্তিষ্কে হঠাৎ একটা স্মৃতি গজিয়ে উঠলো; সে
গাড়োয়ানকে বললে—দেখ, তোকে আট আনা পরমা বেশী
দেবো, তুই এই গলির ভিতর দিয়ে একটু ঘুরে চল..... এক
জায়গায় একজনের সঙ্গে দেখা ক'রে যাবো.....

গাড়োয়ানদের স্বভাবসিদ্ধ আপত্তি অমনি রুক্ষ স্বরে
বিঘোষিত হলো—না বাবু, কতো দেরী করবেন, আট আনা
হবে না.....

রামঘাতু মোলায়েম স্বরেই বললে—না রে বাপু, বেশী দেরী
হবে না, বড়ো জোর পনেরো মিনিট। বেশী দেরী হয় তো
বেশীই দেবো, তার আর কথা কি ?

গাড়ী গলির মধ্যে দিয়ে পরাণ-বাবুর বাড়ীর সামনে গিয়ে
দাঁড়ালো।

রামঘাতুর স্ত্রী জিজ্ঞাসা করলে—এতো রাত্রে কর্তার বাড়ীতে
কি করতে এলে ?

রামঘাট্ বল্লে—বাড়ীখানা যাতে ফিরিয়ে না চায় তার একটা চেষ্টা করা উচিত তো ?

এ-সম্বন্ধে রামঘাট্‌র সহধর্মিণীর কিছুমাত্র মতামৈক্য ছিলো না। তবে সে বুঝতে পার্লে না যে রাত তিনটের সময় তার স্বামীর সেই সাধু চেষ্টা কি উপায়ে সম্পন্ন হবে। সে ‘ফলেন পরিচীযতে’ নীতি অবলম্বন করে’ মৌন হ’য়ে রইলো। তাদের ছেলেমেয়েগুলো সব গাড়ীতে ঘুমিয়ে পড়েছে।

রামঘাট্ গাড়ী থেকে নেমে পরাণ-বাবুর বাড়ীর দরজায় জোরে জোরে ধাক্কা দিতে দিতে মহাচীৎকার করে’ ডাকা-ডাকি সুরু করে’ দিলে—দরোয়ানজী, এ দরোয়ানজী ! ওরে বোঁচা ! রাইচরণ !.....থাকোহরি !.....সরকার মশায় !.....

তার শোরগোলে বাড়ীশুদ্ধ লোক সচকিত হ’য়ে জেগে উঠলো। ঘরে ঘরে ইলেকট্রিক্ লাইট জ্বলে ওঠার সঙ্গে সঙ্গে নিদ্রা-বিজড়িত বিভিন্ন স্বরে প্রশ্ন হতে লাগলো—কোন ছায় ?কে ?.....কি চাই ?.....

রামঘাট্ প্রশ্নের উত্তরে ব্যস্তসমস্ত ভাবে ডাকলে—দরোয়ানজী জলদি দরওয়াজা খোলো—হাম রামঘাট্ মুখুজ্জা মশা ছায়.....

প্রকাণ্ড দরজার প্রকাণ্ড ছড়্কা হড়াত ক’রে খুলে গেলো এবং দরোয়ান চাকর সরকার প্রভৃতি চার পাঁচ জনে উৎকণ্ঠিত স্বরে জিজ্ঞাসা করলে—ক্যা মুখুজ্জা মশা ? ক্যা ছয়া ?...কি হয়েছে ?.....

রামঘাট ব্যগ্র স্বরে তাড়াতাড়ি জিজ্ঞাসা করলে—কর্তা ভালো
আছেন তো ?

সকলে রামঘাটর প্রশ্ন শুনে আশ্চর্য হ'য়ে বললে—হ্যাঁ, তিনি
তো ভালোই আছেন !

রামঘাট পরম স্বস্তি অনুভবের ভাণ করে' নিঃশ্বাস ফেলে
বললে—আঃ ! বাঁচা গেলো ! এতোক্ষণে ধড়ে প্রাণ
এলো !.....

সকলে রামঘাটর কথার অর্থ হৃদয়ঙ্গম করতে না পেরে অবাক
হ'য়ে রামঘাটর মুখের দিকে চেয়ে যখন আশা করছে যে, রামঘাট
হয় তো রহস্যটা আর একটু পরিষ্কার করে' তুলবে, তখন দোতলা
থেকে পরাণ-বাবুর গম্ভীর গলার প্রশ্ন শোনা গেলো—বেচা, কী
হয়েছে রে ? মুখুজ্জ মশায়ের গলা শুন্ছি যেনো ?

রামঘাটর ডাক-হাঁক শুনে থাকোহরিও ঘুম থেকে জেগে
উঠে দরজার কাছে এসে দাঁড়িয়েছিলো ; সে পরাণ-বাবুর প্রশ্ন
শুনে বললে—হ্যাঁ, মুখুজ্জ মশায়ই এসেছেন ।

পরাণ-বাবু আবার প্রশ্ন করলেন—কেনো ? বাড়ীতে কারো
অসুখ-বিসুখ হয় নি তো ?

রামঘাট পরাণ-বাবুর কথা শুনেই ব'লে উঠলো—আঃ !
প্রাণটা জুড়োলো !...কী দুর্ভাবনাই হয়েছিলো !.....

পরাণ-বাবু প্রশ্ন করার সঙ্গে সঙ্গে থাকোহরির উত্তর না পেয়ে
উৎকণ্ঠিত হ'য়ে নীচে নেমে এলেন ; থাকোহরি অনুক্ষণ অপেক্ষা
করছিলো যে, এইবার হয় তো রামঘাট তার অসাময়িক আগমনের

কারণ ব্যক্ত করে' বলবে ; তাই সে অবাক হ'য়ে রামযাদুর মুখের দিকেই তাকিয়ে ছিলো, সে পরাণ-বাবুকে কিছুই জবাব দিতে পারছিলো না।

পরাণ-বাবু নীচে এসেই ব্যস্ত ভাবে জিজ্ঞাসা করলেন—কী হয়েছে মুখুজ্জ মশায় ? বাড়ীর সব ভালো তো ?

রামযাদু আবার আরামের নিঃশ্বাস ফেলে বললে—যাক, দুর্ভাবনা ঘুচলো। বাঁচা গেলো ! ধড়ে প্রাণ এলো !...

সমবেত লোকেরা রামযাদুর মুখে কেবল এই একই কথার পুনরাবৃত্তি শুনতে শুনতে হাঁপিয়ে উঠছিলো, এবং রামযাদুর দুর্ভাবনাটা যে কিসের, তা জানবার জন্যে সকলেই ব্যস্ত ও ব্যগ্র হয়ে উঠেছিলো।

পরাণ-বাবুও উৎসুক স্বরে জিজ্ঞাসা করলেন—কিসের দুর্ভাবনা মুখুজ্জ মশায় ? ব্যাপার কি ?

রামযাদু বললে—আমার স্ত্রী ঘুমের ঘোরে হঠাৎ কেঁদে উঠলেন। আমি তাঁকে জাগিয়ে জিজ্ঞাসা করলাম—“কি স্বপ্ন দেখে কেঁদে উঠলে ?” জেগে উঠেও তিনি হাপুস-নয়নে কাঁদতে লাগলেন, কান্না আর থামে না, কথাও বলতে পারেন না। অনেক সাহসনা দেওয়ার পর তিনি ফোঁপাতে ফোঁপাতে বললেন—“আমি স্বপ্নে কর্তার অমঙ্গল দেখেছি।” আমি তাঁকে অনেক করে' বোঝালাম যে, আমি তো রাত্তিরে কর্তার বাড়ী থেকে এসেছি, তাঁকে ভালো দেখে এসেছি ; কিন্তু তিনি কিছুতেই প্রবোধ মানতে চান না। তখন আমি অগত্যা বললাম, আচ্ছা,

তুমি স্থির হ'য়ে থাকো, আমি গিয়ে কর্তার খবর নিয়ে আসছি। কিন্তু তিনি এ কথাতেও ধৈর্য মানলেন না, বললেন—আমিও তোমার সঙ্গে যাবো; তুমি বাবে, ফিরে আসবে, অতোকণ দেবী আমি সহ করতে পারবো না। তখন গাড়ী ডেকে তাঁকে শুদ্ধ নিয়ে এলাম, ছেলে-মেয়েগুলোও সঙ্গে ছাড়লে না!

পরাণ-বাবু খুশীর হাসিতে প্রকাণ্ড বাড়ী ভরিয়ে দিয়ে বললেন—আচ্ছা পাগল তো আপনারা! এতো রাতে বৌমাও বুঝি কচি-কাচা কাচা-বাচা সবাইকে নিয়ে এসেছেন? তিনি গাড়ীতে ব'সে আছেন! যান যান, বাড়ী যান, ছেলেগুলোর রাত জাগলে হিম-টিম লেগে অস্থখ-বিস্থখ করতে পারে।

রামযাদু বললে—না না, আমাদের তো ঘুম ভেঙেই ছিলো; না এলে তো দুর্ভাবনায় সমস্ত রাত্রি ঘুমই হ'তো না। তবে অসময়ে এসে যে আপনাদের জ্বালাতন কবে' গেলাম এই এখন আমার মনস্তাপ হচ্ছে।

পরাণ-বাবু খুশী হ'য়ে বললেন—না না, আমার ওঠবার তো সময় হ'য়েই এসেছিলো।...যান, আর বিলম্ব করবেন না।

রামযাদু বললে—হ্যাঁ যাই, গিন্নি আবার সত্যনারাণের শিল্পি, স্তবচনীর পূজো, কালীঘাটের কালীর কাছে কালো-ধলো পাঠা, আর মা-কালীর জিব সমান উঁচু চিনির নৈবিড়ি দিয়ে পূজো মানত করেছেন, তার আয়োজন করতে হবে...

পরাণ-বাবু পরম পরিতুষ্ট হ'য়ে বললেন—দুজনেই আপনারা সমান ক্যাপা দেখছি। থাকো, তোমার মা'র কাছ থেকে

একশো টাকা এনে মুখুজে মশায়কে দাও তো... আমার জন্মে
ওঁর সুখ-দণ্ড হয় কেনো ?

রামযাদু দস্ত বিকশিত করে' বললে—তা টাকা দেবেন
দিন, আপনার দৌলতেই তো আমরা খেয়ে-প'রে বেঁচে-ব'র্তে
আছি... অতো বড়ো একটা বাড়ীই অম্নি পেয়ে গেছি...
গঙ্গাজলেই গঙ্গাপূজা হবে...

খাকোহরি ছুটে মাতঙ্গিনীর কাছে গিয়ে এক-শো টাকা
এনে রামযাদুকে দিলে। রামযাদু খুশী হ'য়ে বললে—তবে এখন
আসি।

পরান-বাবু হাসিমুখে বললেন—ই্যা ই্যা, আর বিলম্ব করবেন
না। কাল আপনার বাড়ীর সঙ্গে টেলিফোন কনেক্সন করিয়ে
দেবো, তা হলে আর রাত দুপুরে গাড়ীভাড়া ক'রে ছেলেপুলেদের
শুদ্ধ টেনে নিয়ে আসতে হবে না।

পরান-বাবুর কথাটা রামযাদুর কানে ব্যঙ্গের মতন শোনালো ;
সে কিঞ্চিৎ অপ্রস্তুত হ'য়ে হ্যা-হ্যা ক'রে হাসতে হাসতে এসে
গাড়ীতে উঠলো।

গাড়ী চ'লে কিছুদূর এলে রামযাদু নিজের সহধর্মিণীকে
বললে—শুনেছো তো সব ? ক্যায়সা বুদ্ধির কৌশল খাটিয়ে
বেটা কেওটকে বোকা বানিয়ে দিয়ে এসেছি ! বাড়ীটা আর
ফিরে চাইতে পারবে না।

মনমোহিনী স্বামীর কথা শুনে কেবল বললে—“হঁ !” সে
স্বামীর সহধর্মিণী হ'লেও স্বামীর এই মিথ্যাচার ও প্রবঞ্চনার

কৌশলে সুখী হবে বা দুঃখিত হবে স্থির ক'রে উঠতে পারছিলো না।

পরদিন হ'তে রামঘাটুর বাড়ীতে শান্তি-স্বস্ত্যয়নের ধুম লেগে গেলো—অবশ্য পরাণ-বাবুর টাকায়, কিন্তু পরাণ-বাবুর মঙ্গল-কামনায় নয়, পরাণ-বাবুর বাড়ীটি যাতে নিষ্কিন্বে করায়ত্ত হয় এই কামনায়। আর রামঘাটুর বাড়ী থেকে পরাণ-বাবুর বাড়ীতে রোজই পূজার প্রসাদ আসে—আজ সত্য-নারায়ণের শিনি, কাল সুবচনীর্ আটভাজা আর কলা, পরশু কালীর প্রসাদ কবন্ধ কালো পাঠা আর সের-খানেক চিনি! যদিও কালী লোল রসনা পর্য্যন্ত উঁচু চিনির পাহাড়ের নৈবেদ্য পান নি—কারণ রামঘাটু মিষ্ট বাক্য যতোটা বাজেখরচ করতে প্রস্তুত, রজতমুদ্রা বাজেখরচ করতে তার সিকি পরিমাণও প্রস্তুত ছিলো না।

এর কয়েক দিন পরে পরাণ-বাবুর আপিসের সমস্ত ভারত-বাসী কর্মচারী—বাঙালী উড়িয়া পশ্চিমা মহারাষ্ট্রী মাদ্রাজী গুজরাটী—সকালবেলা একসঙ্গে পরাণ-বাবুর বাড়ীতে এসে উপস্থিত। তাদের কারো হাতে ফুল, কারো হাতে চন্দন, কারো হাতে ধূপ, কারো হাতে ধূনা, কারো হাতে শঙ্খ, কারো হাতে ঘণ্টা, আর রামঘাটুর হাতে চামর! তাদের দেখেই পরাণ-বাবু চমৎকৃত হ'য়ে আসন ছেড়ে দাঁড়িয়ে উঠতে উঠতে বললেন—এ কি? ব্যাপার কি?

রামঘাটু হাস্যমুখে বললে—আজ আপনার জন্মদিন।

পরান-বাবু পরম পরিতুষ্ট হ'য়ে উচ্চহাস্তে ঘর ভা'রে তুলে ব'লে উঠলেন—ওহো ! তা এখন আমাকে কি করতে হবে ?

রামযাদু বললে—এখন আমাদের শ্রদ্ধাঞ্জলি গ্রহণ করতে হবে ।

পরান-বাবু বললেন—এ সমস্তই মুখুজ্জে মশায়ের অদ্ভুত খেয়াল বোধ হচ্ছে ?

রামযাদু বললে—আজ্ঞে হ্যাঁ, মহাপুরুষ-পূজার প্রধান পুরোহিত আমিই বটে ।

পরান-বাবু হাসিভরা প্রসন্ন মুখে মিষ্ট স্বরে বললেন—আপনার ভারী অন্তায় মুখুজ্জে মশায় ! এ অত্যন্ত বাড়াবাড়ি ।

রামযাদু পূজার আয়োজন করতে করতে বললে,—ভক্তের অত্যাচার ভগবান্কে নিত্য কালই সহ করতে হয় ।

পরান-বাবু আবার সন্তোষের হাসি হাসলেন ।

দেখতে দেখতে ঘরের মাঝখানকার চেয়ার টেবিল স'রে জায়গা সাফ হ'য়ে গেলো । সেখানে পাতা হলো নূতন আসন ও সম্মুখে সজ্জিত হলো পূজোপকরণ । একজোড়া নূতন গরদের জোড়ও বাহির হ'লো এবং পরান-বাবুকে সেই জোড় পরিয়ে চন্দনচর্চিত ও মাল্যভূষিত ক'রে শঙ্খ-ঘণ্টা নিনাদিত হ'তে লাগলো । তারপর ভারতবর্ষের সকল ভাষায় রচিত প্রশস্তি পাঠের ধুম লেগে গেলো । পরান-বাবু সেই-সব অবোধ্য বন্দনা হাস্তমুখেই শুনতে লাগলেন ।

অনুষ্ঠান শেষ হ'লে সকলকেই পরান-বাবুর বাড়ীতে প্রচুর রূপে মিষ্টমুখ ক'রে যেতে হ'লো ।

দেবতারা এইবার রামঘাতুর ঘুষ সত্য সত্যই খেলেন। একদিন বিকাল-বেলা পরাণ-বাবুর মোটর-গাড়ী এসে রামঘাতুর বাড়ীর সামনে থামলো, আর অমনি রামঘাতুর ছেলে বনমালী বোঁ ক'রে ছুটে এসে পিতার দৃষ্টান্তে শিক্ষা পেয়ে হাত জোড় ক'রে পরাণ-বাবুকে বিনীত স্বরে বললে—বাবা তো বাড়ী নেই।

পরাণ-বাবু হাসিমুখে গাড়ী থেকে নামতে নামতে বললেন—তা জানি রে জানি, সেইজন্মেই তো এখন এসেছি। যা তোর মাকে বল্ গে যে জেঠা মশায় এসেছে.....

পরাণ-বাবু বৈঠকখানা-ঘরে গিয়ে ঘরের মাঝখানে দাঁড়ালেন; মনমোহিনী এসে দরজার আড়ালে দাঁড়ালো; বনমালী এসে বললে—মা এসেছেন.....

পরাণ-বাবু বললেন—দেখো বোমা, আমি এই বাড়ীটার দান-পত্র রেজেস্টারী ক'রে দিতে এসেছি; মুখুজ্জ মশায়কে দিতে গেলে তিনি হয়তো শূদ্রের দান নিতে আপত্তি করতেন, তাই আমি দলিলখানা তোমার কাছে রেখে যাচ্ছি, এ বাড়ী আমি ছেলেদের দিলাম; আর গোকটাও তোমার বাড়ীতেই থাক, খোকারা দুধ খাবে।

মনমোহিনী চাপা গলায় পরাণ-বাবুর শ্রুতিগম্য স্বরে বললে—বুনো, তুই কর্তাকে বল, আমরা তো তাঁরই আশ্রিত, আমাদের যা অভাব হবে তা তাঁকেই পূর্ণ করতে হবে।

পরাণ-বাবু হো হো ক'রে হাসতে হাসতে ঘর থেকে বেরিয়ে এসে মোটরে উঠলেন।

রামঘাটু বাড়ীতে এসে পত্নীর কাছ থেকে দলিল পেয়ে খুশীতে এক-মুখ হেসে বললে—বেটা কেওটকে আচ্ছা ভোগা দিয়েছি।

কিন্তু মহাত্মা রামঘাটুর মনে কেওটের দান গ্রহণে এতোটুকু আপত্তিও উদয় হ'লো না।

রামঘাটুর আপিসের সকল কর্মচারী রামঘাটুর লাভের সংবাদে মুখে হর্ষ প্রকাশ করলেও মনে মনে ও পরস্পরে চুপি চুপি বলতে লাগলো—পূজো করলাম আমরা সকলে, আর দেবতার বর মিললো একা রামঘাটুর ভাগ্যে! আমরা শুধু লেংড়া আম আর মিষ্টান্ন খেয়েই বিদায়!

কিন্তু সকলের মনেই আশা জেগে রইলো যে, এই পূজার ফল তারাও কোনো না কোনো আকারে কিছু না কিছু পাবে। কিন্তু রামঘাটুর লাভের সমতুল্য যে হবে না, এটা নিশ্চিত জেনে তারা রামঘাটুর সৌভাগ্যে ঈর্ষান্বিত হ'য়ে রইলো।

* * *

রামঘাটু বাড়ীটি কায়েমি ভাবে লাভ ক'রেই, আরও অধিক লাভ করবার জন্ত ব্যস্ত হ'য়ে উঠলো। সে স্থির করলে, শহরের বাইরে কোথাও অল্প ভাড়ায় একটা বাড়ী নিয়ে পরাণ-বাবুর দেওয়া বাড়ীটা বেশী টাকায় ভাড়া দিয়ে কিছু আয়ের উপায় ক'রে নেবে। কিন্তু তার চিন্তা হ'লো কোন্ ছলে সে এই বাড়ী ছেড়ে শহরের বাইরে যাবে; পরাণ-বাবু তাকে বাড়ী দান করেছেন সপরিবারে বাস করবার জন্ত; এখন যদি সে সেই বাড়ী ভাড়া দিয়ে অন্ত্র ষেতে চায়, তবে তিনি কি মনে করবেন?

পরাণ-বাবুর কাছে চক্ষুলাজ্জা রামঘাতুকে একটু বিব্রত ক'রে তুললো। কিন্তু তার উর্কর মস্তিষ্ক অল্প ক্ষণেই একটা ফিকির অ'বিষ্কার করলে—সে যদি পরাণ-বাবুকে বলে যে শহরের গোলমালের মধ্যে তার গবেষণা আর সাহিত্য রচনা যথোপযুক্ত রকমে হ'তে পারছে না, তা হ'লে তিনিই হয় তো শহরতলীর কোথাও তার বাসের সুবন্দোবস্ত ক'রে দেবেন। কিন্তু অগত্যা যাওয়ার জগ্য কেবল এই ওজরটি তার যথেষ্ট মনে হ'লো না। সে আবার উন্ননা হ'য়ে বলবত্তর কোনো কারণ অনুসন্ধানে নিজের চিন্তা ও চিত্তকে নিযুক্ত করলে।

একদিন আপিস থেকে বাড়ী ফিরবার পথে সে দেখলে একটি ছোটো ছেলে কেঁদে কেঁদে পথে বেড়িয়ে বেড়াচ্ছে। ছোটো ছেলেটির উদ্ভ্রান্ত দৃষ্টি আর ব্যাকুল ক্রন্দন দেখে রামঘাতুর চিত্ত চঞ্চল হ'য়ে উঠলো, সে তাড়াতাড়ি তার কাছে গিয়ে স্নেহভরা কোমল স্বরে জিজ্ঞাসা করলে—তোমার কি হয়েছে বাবা ?

ছোটো ছেলেটি কান্নার ফাঁকে ফাঁকে হাঁপিয়ে হাঁপিয়ে যা বললে, তা জোড়া-তাড়া দিয়ে যামঘাতু এই বুঝতে পারলে যে, ছেলেটির মা গঙ্গাসাগরে তীর্থ করতে গিয়েছিলো, সেইখানেই তার মৃত্যু হয়েছে, তীর্থযাত্রী লোকেরা দয়া ক'রে তাকে কল্কাতায় ফিরিয়ে এনে পথে ছেড়ে দিয়ে বলেছে যাও ভিক্ষে ক'রে খাও। বালক ভিক্ষা করতেও জানে না, আর নিরাশ্রয় হ'য়ে লোকারণ্যে হারিয়ে গিয়েছে ব'লে ভয় পেয়ে কাঁদছে।

তাদের বাড়ী নিশ্চিন্তপুর, তারা সেখান থেকে অনেকখানি পথ হেঁটে রেলের উঠে কলকাতায় এসেছিলো ; এর বেশী খবর আর সে কিছু দিতে পারলে না ; সেই নিশ্চিন্তপুর যে কোন্ জেলায় বা কোন্ থানা বা পোষ্ট অফিসের অন্তর্গত তা সেই বালক জানে না । রামঘাট ছেলেটিকে জিজ্ঞাসা ক'রে ক'রে জানলে—তার মা আর সে একখানা কুঁড়ে ঘরে থাকতো, তার মা ধান ভানতো, তাদের আর কেউ নেই ; তারা কি জাত সে তা জানে না ।

রামঘাটের পরদুঃখকাতর চিত্ত বালকের কাহিনী শুনে ব্যথিত হ'য়ে উঠলো, তার চোখ ছলছল করতে লাগলো, সে ককর্ণার্দ্র স্বরে বললে—চলো বাবা তুমি আমার সঙ্গে ; কাগজে বিজ্ঞাপন দিয়ে দেখবো কেউ যদি তোমার আপনার লোক সাড়া দেয় তার কাছে পাঠিয়ে দেবো নইলে... ..

—“অনাথ-আশ্রমে পাঠিয়ে দেবেন ।”—রোরুঢ়মান বালক ও রামঘাটকে ঘিরে যে জনতা জমেছিলো সেই জনতার মধ্যে থেকে একজন পরামর্শ দিলে ।

রামঘাটের মনের উপর দিয়ে বিদ্যুৎ-চমকের মতন এই কথাটা বালক মেরে গেলো, তার মনের অনেকখানি স্থান এক মুহূর্তে আলোকে উদ্ভাসিত হ'য়ে উঠলো ; রামঘাট মনে মনে বললে—অনাথ-আশ্রম আমিই খুলবো আর এই উপলক্ষ্য ক'রেই আমি শহর ছেড়ে বাইরে যেতে পারবো ।

রামঘাটের অশ্রুপূর্ণ চক্ষুর দৃষ্টি উজ্জ্বল হ'য়ে উঠলো, সে

তাড়াতাড়ি চোখের জল মুছে ছেলেটির হাত ধ'রে স্নিগ্ধ স্বরে
বললে—এসো বাবা, আমার সঙ্গে এসো.....

রামঘাতু সন্ধ্যার পর পরাগ-বাবুর বাড়ীতে গেলো এবং
কথায় কথায় অনাথ নিরাশ্রয় বালককে আশ্রয় দেওয়ার কথা
জানিয়ে অবশেষে বললে—আমি যখন ছেলেটিকে বললাম যে,
চলো বাবা এখন আপাততঃ আমার বাড়ীতেই থাকবে, তার
পর কাগজে বিজ্ঞাপন দিয়ে তোমার আত্মীয়-স্বজনদের খোঁজ
ক'রে তোমাকে তাদের কাছে পাঠিয়ে দেবো, তখন কোথা
থেকে এই আকাশ-ভাষণ ভেসে এলো—এই বালককে নিয়ে তুমি
একটি অনাথ-আশ্রম খোলো! আমি চমকে উঠলাম; কে এ
কথা বললে দেখ'বো মনে করলাম, কিন্তু স্থির করতে পারলাম
না সেই কথা কোন্ দিক থেকে উচ্চারিত হয়েছে; মনে হ'তে
লাগলো যেনো সমস্ত আকাশ ভ'রে চারিদিক থেকেই সেই
কথার ধ্বনি ভেসে আসছে; তখন আমার মনে হ'লো—এ
দৈববাণী! এই সম্ভাবনা মনে উদয় হ'বা মাত্র দেখলাম, কারা
পূজা করবে ব'লে অন্নপূর্ণার প্রতিমা কিনে নিয়ে আসছে—মাতা
জগদ্ধাত্রী অন্নপূর্ণা ভিখারী শিবকে অন্ন দান করছেন। আমার
গায়ে রোমাঞ্চ হ'লো...এখনও ঐ কথা স্মরণ করতে আমার
রোমাঞ্চ হচ্ছে...

পরাগ-বাবু ভাব-বিহ্বল কণ্ঠে বললেন—

নমস্তস্মৈ নমস্তস্মৈ নমস্তস্মৈ নমো নমঃ।

যা দেবী সর্বভূতেষু দয়া-রূপেণ সংস্থিতা ॥

সেই মহামায়া জগদম্বা দয়া রূপে আপনার হৃদয়ে নিত্য বসতি করছেন ; আপনি দেবানুগৃহীত মহৎ ব্যক্তি এর পরিচয় আমি বার বার পেয়ে আসছি । শিবানীর যে দৈববাণী আপনি শুনেছেন সেই আদেশ আপনি পালন করুন, জগতের কল্যাণ-ব্রতে প্রবৃত্ত হ'লে আপনার কোনো অভাব হবে না ।

রামযাদু পরাণ-বাবুর ভাবোচ্ছ্বাস শুনে স্ত্যোগ পেয়ে বললে—তাই আমি মনে করেছি কল্কাতার বাড়ীটা ভাড়া দিয়ে শহরের বাইরে একটা পুকুর-বাগান-ওয়াল বাড়ী ভাড়া নেবো ; তাতে কিছু টাকা লাভ হবে, আর তাই দিয়ে এখনকার মতন অনাথ-আশ্রমের খরচ চ'লে যাবে ; আর পুকুরের মাছ আর বাগানের ফল-ফুলুরী তরী-তরকারী পেলে অনাথদের ভরণ-পোষণেরও অনেকটা আনুকূল্য হবে ।

পরাণ-বাবু রামযাদুর প্রস্তাব শুনে আনন্দিত হ'য়ে বললেন—সাধু সঙ্কল্প ! আপনি সেই রকম একটা বাড়ী খোঁজ করুন, আমিও লোক লাগিয়ে খোঁজ করবো । সব ঠিক হ'য়ে যাবে মুখুজে মশায়, আপনি কিছু ভাববেন না ; যা অন্নপূর্ণা সব অভাব পূর্ণ ক'রে দেবেন ।

রামযাদু বুঝতে পারলে যে, পরাণ-বাবুর ঐ কথাই অর্থ কি ; তাই সে হাসিমুখে বললে—আপনি যখন আশ্বাস দিচ্ছেন, তখন আর আমার ভাবনা কি ? জয়োহস্ত পাণ্ডুপুত্রাণাং যেষাং পক্ষে জনাৰ্দ্দিনঃ !

অতি শীঘ্রই কলিকাতার উপকণ্ঠ বালিগঞ্জ রেলওয়ে-ষ্টেশনের নিকটেই একটি বাগান-পুষ্করিণী-সংলগ্ন দ্বিতল বাড়ী অল্প ভাড়ায় পাওয়া গেলো। রামযাদু কলিকাতার বাড়ী ভাড়া দিয়ে সেই নূতন ভাড়াটে বাড়ীতে বাস করতে গেলো; এতে মাসে তার পঞ্চাশ টাকা আয় বৃদ্ধি হ'লো।

রামযাদু একখানা এনামেল-করা লোহার পাটায় বড়ো বড়ো অক্ষরে বাড়ীর নাম লেখালে অল্পপূর্ণা অনাথ-আশ্রম, এবং সেখানাকে সাইন-বোর্ডের মতন বাড়ীর সামনে লটকে দিলে।

তার পর সে কাগজে কাগজে বিজ্ঞাপন দিলে কেউ কোথাও কোনো অনাথ ছেলে-মেয়ের সন্ধান পেলে যেনো অনুগ্রহ ক'রে তার আশ্রমে পাঠিয়ে দেন।

রামযাদুর এই আত্মত্যাগমূলক পরোপকার-ব্রতের সংবাদ সত্বর সারা বঙ্গদেশে ছড়িয়ে পড়লো; সংবাদপত্রে তার প্রশংসা বিঘোষিত হ'তে লাগলো।

আপিসের সাহেবেরা এই সংবাদ পাঠ ক'রে রামযাদুকে ডেকে খুব আনন্দ প্রকাশ করলেন এবং রামযাদুর সং প্রচেষ্টার সাফল্য কামনা করলেন। তাঁরা স্বতঃপ্রবৃত্ত হ'য়ে বললেন—আপনি সাধারণের কাছে অর্থ-সাহায্যের জন্তে একটা বিজ্ঞাপন দেন, আমরা আপিস থেকে সকলে কিছু কিছু দিয়ে চাঁদা আদায়ের সূত্রপাত ক'রে দেবো।

এই কথা ব'লে বড়ো সাহেব বললেন—আমাদের আপিস

আপনার আশ্রমকে হাজার টাকা দেবে, আর আমি নিজে দেবো পাঁচ শো টাকা।

ছোটো সাহেব বললেন—আমি দেবো আড়াই শো টাকা।

পরান-বাবু সেখানে উৎফুল্ল-মুখে ব'সে সাহেবদের কথা শুনছিলেন ; তিনিও বললেন—আমি দেবো দু শো টাকা ; আর থাকোহরি দেবে পঞ্চাশ টাকা।

রামযাদুর মুখ অপ্রত্যাশিত লাভে উজ্জ্বল হ'য়ে উঠলো— একেবারে থোক দু হাজার টাকা হাতে লাভ ! এর টানে আবার কতো হাজার এসে পড়বে তার নির্ণয় কে করবে ?

রামযাদু সাহেবদের বিনীত ধন্যবাদ জানিয়ে বললে—সে তার মুনিবদের সাহায্য ও পরামর্শ বরাবর পাবার আশাতেই এই দুর্লভ ব্রত গ্রহণ করেছে।

রামযাদু ও পরান-বাবু সাহেবদের ঘর থেকে বেরিয়ে এলো। বাইরে এসে পরান-বাবু হাসিমুখে রামযাদুকে বললেন—আমার এই টাঁদাটা প্রথম কিস্তি ; ছোটো সাহেবের চেয়ে আমি তো বেশী দিতে পারি না, তাই ঐ অল্প পরিমাণই বলতে হ'লো.....

রামযাদুও খুশীতে হেসে বললে—তা আমি জানি...আপনার ভরুসাতেই তো আমার এতোবড়ো কাজে হাত দিতে সাহস হয়েছে।

পরান-বাবু আপিসের সকলকে ডেকে সাহেবদের টাঁদা দেওয়ার কথা বললেন এবং সকলকে যথেষ্ট দান করতে সাহেবদের অনুরোধ জানালেন।

সাহেবদের অনুরোধ পরাণ-বাবুর মুখে ব্যক্ত ও সমর্থিত হওয়ার মানেই হুকুম। সকলে বিনা বাক্য ব্যয়ে চাঁদার তালিকায় নিজেদের দেয় অর্থের অঙ্কপাত করতে লাগলো। দেখতে দেখতে আপিস থেকে আরও সহস্রাধিক টাকা উঠে গেলো।

এই চাঁদা আদায়ের তালিকা সমেত সাহায্যের আবেদন যখন কাগজে কাগজে বাহির হ'লো তখন চারিদিক থেকে অনাথ-বালক-বালিকা ও অজস্র অর্থ অন্ন বস্ত্র আমদানী হ'তে লাগলো।

রামঘাটু দেখলে এ এক মন্দ ব্যবসায় নয়। অনাথদের দৌলতে তার নিজের ছেলেদেরও জামা-কাপড় কিনতে হয় না; বদান্ত দাতারা অনাথদের খাওয়া-সামগ্রী উপহার দিলে সেই ভোজ থেকে তারাও বঞ্চিত হয় না; রামঘাটুর বাড়ীতে নূতন কম্বল বিছানা চাদর এতো জ'মে যায় যে, সে তাও মাঝে মাঝে বেচে ফেলে বেশ দু পয়সা আয় ক'রে নেয়। তাই এখন তার মুখে অনাথদের অপার দুঃখ ও তা মোচনের জন্য প্রার্থনা ছাড়া আর অন্য কথা বড়ো একটা শোনা যায় না। এতে অনাথদের সুবিধা যতো হোক না হোক, তার নিজের সুবিধা বিলক্ষণ হচ্ছিলো। তবে তার প্রতি ঈর্ষান্বিত কোনো কোনো লোক অপ্রকাশে তাকে 'অফ'্যান্ দি গ্রেট' ব'লে বিদ্রূপ করতেও ক্রটি করতো না। রামঘাটু সে-সব বিদ্রূপ শুনেও শোনে না।

রামঘাটুর হাতে অনাথ-আশ্রমের আকর্ষণে এতো টাকা এসে জমলো যে, সে যে-বাড়ীটাতে অনাথ-আশ্রম করেছিলো সেই

বাড়ীটা কিনে ফেললে ; কিন্তু অনাথ-আশ্রমের নামে নয়, নিজেই নামে ।

রামঘাটুর এই পরোপকারক প্রতিষ্ঠানের জন্য সকল সমাজে তার বিশেষ প্রতিষ্ঠা । গভর্নমেন্ট, কর্মচারীরা, আপিসের সাহেবেরা ও সাধারণ সম্ভ্রান্ত ব্যক্তিরা সকলেই তাকে বিশেষ খাতির করে । এক বৎসর পরেই সম্রাটের জন্মদিনে রামঘাটু রায় বাহাদুর খেতাবে সম্মানিত হ'লো । রামঘাটু এখন সকল সভা-সমিতিতে গণ্য-মান্য অভ্যাগতের আসন সহজেই অধিকার ক'রে বসে ।

একদিন সকাল বেলা রামঘাটু ব্যস্ত-সমস্ত ভাবে পাড়ার সকলকে খবর দিয়ে বেড়াতে লাগলো, যে, কাল রাত্রে মা অন্নপূর্ণা আমাকে স্বপ্ন দিয়েছেন যে, তিনি অষ্টধাতুর প্রতিমা রূপে আমার বাড়ীর পুষ্করিণীর ঈশান কোণে আবির্ভূত হয়েছেন, তাঁকে উদ্ধার ক'রে বাড়ীতে প্রতিষ্ঠা করতে হবে । আপনারা সকলে আস্থন... যদি স্বপ্ন অমূলক চিন্তা মাত্র না হয় তা হলে মায়ের আবির্ভাব স্বচক্ষে দেখবেন ।

দেখতে দেখতে এই সংবাদ বহু দূর পর্য্যন্ত ছড়িয়ে গেলো ; কাতারে কাতারে লোক এসে রামঘাটুর বাগানে মেলা জমিয়ে তুললে ।

পুষ্করিণীর ঈশান কোণে পুরোহিত মন্ত্র পাঠ করিয়ে রামঘাটুকে অন্নপূর্ণার পূজা হোম পুরস্চরণ করালে । তার পর বেলা তৃতীয় প্রহরের সময় পূজা সাক্ষ ক'রে রামঘাটু প্রতিমা উদ্ধার করতে জলে নামলো । অনাথ বালক-বালিকারা কাঁশী ঘণ্টা শব্দ বাজিয়ে

লোকের কানে তালা লাগিয়ে দিতে লাগলো। অন্নপূর্ণা-পূজার উপলক্ষে ঢাক ঢোল কাঁশী বাজনাও আনানো হয়েছিলো, তার বাজনদারেরাও উন্মত্তের মতন ঢাক ঢোল কাঁশী পিটিয়ে পিটিয়ে যেনো ভেঙে ফেলবার উপক্রম করেছে।

রামযাদু ডুবের পর ডুব পাড়ছে; সে একবার ডুব দিচ্ছে, আর যতক্ষণ দম জলের তলে ডুবে থেকে মাটি হাণ্ডে হাণ্ডে জল ঘুলিয়ে ফেলছে, তার পর নিষ্ফল হ'য়ে উঠে করুণ কাতর স্বরে চীৎকার করছে—মা! মা! করুণাময়ী! দয়া করো মা!...

রামযাদু এক-একবার উঠছে আর তার চোখে-মুখে নিরাশার ভাব ফুটে উঠছে। সমবেত লোকেরা প্রত্যেক বারই আশা করছে এইবার হয় তো দেবীর আবির্ভাব হবে। রামযাদু দু-দুবার ডুবেও যখন কিছু তুলতে পারলে না, তখন সবাই বলাবলি করতে লাগলো বার বার তিন বার! তিনবার না চেষ্টা করলে কি ত্র্যম্বক-গৃহিণী ত্রিগুণাত্মিকা ত্রিনয়না মহামায়ার দর্শন মিলবে? কিন্তু তৃতীয় বারেও যখন রামযাদু শূন্য হাতে উঠলো তখন সকলে বললে—পাঁচবারের বার পঞ্চানন-পত্নীর আবির্ভাব হতে পারে। পাঁচবার ডুবেও যখন রামযাদু কিছু তুলতে পারলে না, তখন অর্ধেক লোক হতাশ হ'য়ে পড়লো, সিকি ভাগ গোক ব্যঙ্গ বিদ্রোপ করতে লাগলো—মা অন্নপূর্ণা ঠুঁকে স্বপ্ন দিয়েছেন! এমন কী স্মৃতি করেছেন উনি যে জগদম্বা যেচে ঠুঁর ঘরে আসবেন?...

কেউ কেউ বললে—কিছু বলা যায় না রে' ভাই, লোকটার
যে রকম পাতা-চাপা কপাল, মায়ের কৃপা না হ'লে কি এতো অল্প
দিনে এমন বাড়বাড়ন্ত হয় !

একজন বিজ্ঞ বললে—ষড়ানন-জননী ষষ্ঠ বারে নিশ্চয়
উঠবেন ।

রামঘাতুর ষষ্ঠ ডুবও নিফল হলো ।

তখন সকলের মনই হতাশ হ'য়ে গেলো । কিন্তু রামঘাতু তার-
স্বরে চীৎকার ক'রে উঠলো—জগদম্বা, আমি ডুবে ডুবে ম'রে
যাবো তাও স্বীকার, কিন্তু তোকে না নিয়ে আমি উঠবো না...
স্বপ্নে যখন দেখা দিয়ে আদেশ করেছি' তখন তোকে ধরাও দিতে
হবে পাষণী !

রামঘাতুর বক্তৃতায় বিশ্বাসী ভক্তদের গায়ে কাঁটা দিয়ে উঠলো,
কারো কারো চোখে জলও দেখা দিলো ।

সাত বারের বার । রামঘাতু মা মা ক'রে ডাকতে ডাকতে
ডুব মারলে । অনেকক্ষণ জল নিস্তর অচঞ্চল হ'য়ে রইলো ;
সকলে নিঃশ্বাস রুদ্ধ ক'রে রামঘাতুর উত্থানের অপেক্ষায় জলের
দিকে দৃষ্টি নিবদ্ধ ক'রে রইলো । খানিক পরে জলের উপর
ভুড়ভুড়ি উঠতে লাগলো, ক্রমে সেই ভুড়ভুড়ি কলসীতে
জল ভরার সময় কলসীর অভ্যন্তরের বাতাস নির্গমনের মতন
জলের উপর ভড়াক্ ভড়াক্ শব্দ ক'রে উথলে উথলে উঠলো ;
তার পরই রামঘাতু জল ছেড়ে কাঁলা মাছের আফাল দেওয়ার
মতন লাফিয়ে উঠলো এবং হাত উঁচু ক'রে তুলে মুখ বেয়ে

জলধারা পতনের বাধা ঠেলে চীৎকার ক'রে উঠলো—পেয়েছি !
পেয়েছি ! মা ধরা দিয়েছেন ! মা জগদম্বা করুণাময়ী !.....

রামযাদুর কথা ঢাক ঢোল কাঁশী, কাঁসর ঘণ্টা শঙ্খ ও সহস্র
কণ্ঠের মা মা শব্দের মহা কলরোলের মধ্যে ডুবে গেলো । সমস্ত
জনতা যেনো উন্মত্ত হ'য়ে তাণ্ডব নৃত্য করতে করতে চীৎকার
করতে লাগলো । রামযাদুও এক ছুটে জল থেকে ডাঙায় উঠে
অন্নপূর্ণা-প্রতিমা দুই হাতে ধ'রে মাথায় রেখে ধেই ধেই
ক'রে নাচতে শুরু ক'রে দিলে ! সকল লোকে সবিস্ময়ে দেখলে
একখানি ক্ষুদ্র সিংহবাহিনী দেবীমূর্তি ! সকলে সাষ্টাঙ্গে প্রণিপাত
করতে আরম্ভ করলে !

রামযাদু যখন শ্রান্ত হ'য়ে হাঁপিয়ে পড়লো তখন সে নৃত্য
থেকে নিবৃত্ত হ'য়ে চীৎকার ক'রে বললে—এইবার মা জগদম্বার
প্রতিষ্ঠা অভিষেক পূজা হবে ; তার পর বলি আর ভোগ হবে ।
যাঁরা দয়া ক'রে আমার সামান্য কুটীরে পদার্পণ ক'রেছেন তাঁরা
সকলে রাত্রে এসে মায়ের প্রসাদ পেয়ে যাবেন, আমি সকলকে
নিমন্ত্রণ করছি ।

সকল লোকে রামযাদুর ভক্তির জোর ও কপালের জোর
সম্বন্ধে আলোচনা করতে লাগলো । কেবল দু'চার জন কলেজের
ছেলে অবিশ্বাসের হাসি হেসে বললে—আগে থাকতে একটা
প্রতিমা জলে ডুবিয়ে রেখে তুলতে আমরাও পারি । বেটার
আগাগোড়া সব ভড়ং আর বুজুর্গী !

রামযাদুর দেবী-লাভের সংবাদ শীঘ্রই সারা কলকাতায়

ছড়িয়ে পড়লো। শত শত লোক গাড়ীতে মোটরে হেঁটে দেবী-দর্শন করতে আসতে লাগলো। প্রণামী দক্ষিণা পড়তে পড়তে প্রতিমার সামনে টাকা আর মোহরের পাহাড় হ'য়ে উঠলো। ওঙ্কারমল জেঠিয়া এক গাড়ী ঘি ময়দা চিনি দেবীর ভোগের জন্ম পাঠিয়ে দিয়েছে; রামভজ বুনবুনওয়াল এক গাড়ী অত্যন্তম আতপ্ চাল পাঠিয়েছে। পাঁঠা তরী-তরকারী মাছ ডাল কোথা থেকে কে যে পাঠাচ্ছে তার আর হিসাবই রাখা গেলো না। শিউবখশ্ হালওয়াই এক গাড়ী মিষ্টান্ন পাঠিয়েছে।

রামঘাট্ট এই-সব সামগ্রী সমাগত দেখেই পঞ্চাশ জন হালুইকর ব্রাহ্মণ আনিয়ে নিলে এবং বাগানের মধ্যে বড়ো বড়ো জোল কেটে পাচকদের ভোগ রাখতে লাগিয়ে দিলে। রাত আটটার মধ্যে ভোগ হ'য়ে গেলো এবং পাড়াপড়শী সকলে মিলে সাহায্য ক'রে হাজার হাজার লোককে পরিতোষ ক'রে আহার করিয়ে বিদায় দিতে লাগলো। রাত একটার পর সকলকে বিদায় দিয়ে রামঘাট্ট একটু বিশ্রামের অবসর পেলে; তখন সে মুচ্কি হেসে সহধর্মিণীকে বললে—যদি জোটে রোজ এমনি বিনি পয়সার ভোজ!

মনমোহিনী স্বামীর আহারের ঠাই করতে করতে বললে—আজ সমস্ত দিন তো পেঁটে অন্ন জুটলো না, এখন খেতে বোসো।

রামঘাট্ট খেতে বসতে বসতে হেসে বললে, এক দিন উপোষ ক'রে চিরদিনের খোরাকের জোগাড় ক'রে নিলাম রে পাগলী!

স্বামিভক্তিতে মনমোহিনীর মন পূর্ণ হ'য়ে উঠলো ।

এর পর দেনা-পাওনা সম্বন্ধে কাউকে কিছু বলতে হলেই রামষাটু বলে—“আমি তো কিছু জানি না, সে মা অন্নপূর্ণা জানেন !” দিতে হ'লে অন্নপূর্ণা কম দিতে বলেন এবং পেতে হলে অন্নপূর্ণা বেশী নিতে বলেন ।

রামষাটুর কল্কাতার বাড়ীর ভাড়াটে উঠে গেছে ; আবার বাড়ী ভাড়া দেওয়া হবে । একজন ভদ্রলোক সেই বাড়ীর ভাড়া ঠিক করতে এসে রামষাটুকে বললে—মশায়, আপনার বাড়ীটি...

রামষাটু অমনি তাড়াতাড়ি বাধা দিয়ে বললে—আমার বাড়ী নয়, মা অন্নদার বাড়ী...

ভদ্রলোক মনে মনে বললে—মা অন্নদা কেবল অন্নই দেন না, তিনি বাড়ীদাও বটে !

তার পর সে প্রকাশে বললে—তা যাই বা বাড়ী হোক, ভাড়ার কথা-বার্তা তো আপনার সঙ্গেই কইতে হবে ? আমরা পাপী লোক, মা অন্নদার দেখা তো আমরা পাবো না যে তাঁর সঙ্গে কথা বলবো ?

রামষাটু হেসে বিনয় প্রকাশ ক'রে বললে—হেঁ হেঁঃ হেঁ, আমি মায়ের সেবক ছকুম-বরদার মাত্র !

—তা যাই হোন, ঐ বাড়ীটির ভাড়া কতো ?

—হেঁ হেঁঃ হেঁ, আজ্ঞে মা বলেছেন—একশো এক টাকা নিতে ।

—আমি ঐ বাড়ীতে পঁচিশ ত্রিশ বছর থাকবো, যতো দিন

না ম'রে যাই ; স্থায়ী ভাড়াটের কাছে কিছু কম নেওয়া উচিত, আমি আশি টাকা ক'রে দেবো...

—ভাড়ার কথা আমি তো কিছু জানি না, সে মা অন্নপূর্ণা জানেন। তিনি আমার মনে এই চিন্তা উদয় ক'রে দিয়েছিলেন যে, একশো এক টাকা হ'লেই আমার পূজা ভোগ বেশ সুশৃঙ্খলায় হবে ; তাই আমি সেই পরিমাণ ভাড়ার কথাই বললাম। তা আপনি যদি কিছু কম দিতে চান দিন, তাতে আমার কিছু ক্ষতি-বৃদ্ধি নেই, মায়ের পূজা ভোগ একটু কম হবে।

রামযাত্র এ কথার পর সে ভদ্রলোক আর ভাড়া কম করবার কথা মুখেও আনতে পারলে না ; সে কাচ্চা-বাচ্চা নিয়ে বাস করবে, দেব-পূজার বিঘ্ন ঘটিলে সে দেবতার বিরাগ-ভাজন হ'তে যাবে এতো বড়ো সাহস তার নেই ; সে তাই তৎক্ষণাৎ বললে—না না, আমি মায়ের পূজার ক্রটি ঘটাতে চাই না ; বাড়ীখানি আমাদের পছন্দ হয়েছে, আমরা মায়ের পূজার জন্ত একশো এক টাকা ক'রেই মাসে মাসে দেবো।

রামযাত্র নিজের স্থির-করা ভাড়াতেই একজন স্থায়ী ভাড়াটে পেয়ে খুশী হ'য়ে বললে—মায়ের বরে আপনার খুব বাড়-বাড়ন্ত হবে, ধূলোমুঠো ধরতে সোনামুঠো হবে। আর একটি কথা আছে, মায়ের আর একটি আদেশ আছে, প্রত্যেক মাসের ভাড়া সেই মাসের পয়লা আগাম দিয়ে দিতে হবে, নইলে তাঁর ভোগ পূজা চলা দুষ্কর হবে, আমি তো ছাঁ-পোষা মানুষ, সামান্য মাইনে পাই...

ভদ্রলোক বললে—সে আর বেশী কথা কি ? মাসের শেষে দেওয়াও যা, আর মাসের গোড়ায় দেওয়াও তাই । আমি সঙ্কে টাকা এনেছি । এ মাসের টাকাটা দিয়ে যাচ্ছি । একটা রসিদ দেবেন কি ?

রামযাছু আরো খুশী হ'য়ে বললে—অবিশি, রসিদ দেবো বৈ কি ।

রামযাছু কাগজ কলম নিয়ে যখন বাড়ীর ভাড়ার রসিদ লিখতে প্রবৃত্ত হ'লো, তখন সেই ভদ্রলোক পকেট থেকে মনিব্যাগ বাহির ক'রে ও তার ভিতর থেকে এক গোছা নোট বাহির ক'রে দশখানি নোট গুণে দিতে লাগলো । রামযাছু রসিদ লিখে দিলে—

শ্রীশ্রীঅন্নপূর্ণা মাতা সহায়

কস্য রসিদপত্রমিদং কার্য্যক্ষাগে—

আমার বলিয়া লোক-সমাজে পরিচিত রামরতন পালিত ষ্ট্রীটস্থ ১৭ বি নম্বর বাটী আমি মাতা অন্নপূর্ণা দেবীর সেবান্ত-কূল্যের জন্ত শ্রীযুক্ত প্রতুলচন্দ্র মুখোপাধ্যায় মহাশয়কে মাসিক একশত এক (১০১) টাকা হারে ভাড়া দিয়া তাহার এপ্রেল মাসের ভাড়া অগ্রিম বুঝিয়া পাইয়া এই রসিদ লিখিয়া দিলাম ।

ইতি—

* * *

এই সময় বেঙ্গল গ্রাশনাল ব্যাঙ্ক ফেল হ'লো, বেঙ্গলস্বী কটন মিল অচল হ'লো, মেডিক্যাল-কলেজের তহবিল-তছরূপাত

ধরা পড়লো, আর এমনি আরও কয়েকটা প্রবঞ্চনার ব্যাপার আদালতে পর্য্যস্ত গড়ালো। যখন সমস্ত বাংলা দেশ এই-সকল ব্যাপার আলোচনায় চঞ্চল হ'য়ে উঠেছে, তখন একদিন রামযাদু অতি ধীর ভাবে থাকোহরিকে নির্জনে ডেকে নিয়ে বললে— দেখো বাপু থাকোহরি. গ্ৰামিনাল ব্যাক্, বঙ্গলক্ষ্মী কটন মিল আর মেডিক্যাল কলেজের মকদ্দমার বিবরণ কাগজে পড়ছো তো? তুমি কিন্তু খুব হুঁশিয়ার! তোমার হাত দিয়ে অনেক টাকার লেনা-দেনা হয়; তুমি ইচ্ছে করলে এই রকম ক'রে কিছু টাকা মেরে নিয়ে স্বচ্ছন্দেই যুরোপে কি আমেরিকায় বা জাপানে স'রে পড়তে পারো; পুলিশ হাত বাড়াতে না বাড়াতে পগার পার হ'য়ে যাওয়া কঠিন নয়। তাই তোমায় বলছি বাপু, তৃতীয় রিপুটিকে বশে রেখো।

থাকোহরি হেসে বললে—আপনার আশীর্ব্বাদে আমার কোনো অভাব নেই; আমি কর্তার কাছে নেমকহারামী করতে পারবো না।

রামযাদু খুশী প্রকাশ ক'রে থাকোহরির কাঁধ চাপড়ে বললে—এই তো চাই ভায়া! বেশ, বেশ!...

রামযাদু থাকোহরিকে কখনো ভাই, কখনো বাপু, বাবাজী বলে, তার সম্পর্কের ও সম্বোধনের স্থিরতা নেই। সে বলতে লাগলো—কিন্তু এও তো তোমার মনে হ'তে পারে—আপিসের টাকা তো আর কর্তার নয়, ইংরেজের; ইংরেজেরা আমাদের দেশ গুণে লুটে খাচ্ছে, তাদের লুটের ধনে খাবল মারলে চোরের

উপর বাটপাড়ি হ'তে পারে কিন্তু পাপ হয় না। আরো, তা ছাড়া, এও তো তোমার মনে হয় কখনো কখনো...আমার কাছে লুকিয়ে না ভায়া ..যে, ঐ কালো কুচ্ছিত বিদিকিচ্ছি রক্ষাকালীর বাচ্ছা মেয়েটাকে বিয়ে না ক'রে একটি দিবিা সুন্দর ফুটফুটে মেয়ে বিয়ে করতে পারলে বেশ হ'তো! ঐ কালীর বোতল মেয়েটাকে বিয়ে করবার কল্পনা করতে তোমার গা ঘিন্-ঘিন্ করে কি না, একবার স্পষ্ট ক'রে বলো তো ?

থাকোহরি লজ্জিত মুখ নত ক'রে নিরুত্তর হ'য়ে রইলো।

রামঘাট্ বলতে লাগলো—তবেই বাবাজী, ভেবে দেখো, এ প্রবৃত্তি হওয়া সম্ভব কি না, যে, কর্তা তো কিছুই দেখেন না, তহবিল আমার হাতে সঁপে নিশ্চিত হ'য়ে আছেন, এই অবসরে আমি যদি বেশী নয়, লাখ খানেক টাকা হাতিয়ে জাপানে কি চীনে স'রে পড়ি, তা হ'লে সেখানে একটি মেয়ে বিয়ে ক'রে সুখে স্বচ্ছন্দে বসবাস করতে পারি। চীনে মেয়ে খেঁদা বোঁচা কোটর-চোখী হলেও কৃষ্ণকলির চেয়ে তো লক্ষগুণে সুন্দরী!...

থাকোহরি গম্ভীর নতমুখে নিরুত্তর। রামঘাট্ তার মনে ভাবনার আগুন ধরিয়ে দিয়েছে, তার মন পুড়তে শুরু করেছে।

রামঘাট্ থাকোহরির চিন্তাক্রিষ্ট মুখ দেখে খুশী হ'য়ে আবার তার কাঁধ চাপ্ড়ে বললে—অতএব সাবধান বাবাজী! নাস্তি লোভাৎ পরো রিপু! লোভে পাপ, পাপে মৃত্যু শাস্ত্রের বচন!

থাকোহরি মুখ তুলে একবার রামঘাটর মুখের দিকে চাইলে, কিন্তু তার দৃষ্টি লক্ষ্য-হারা, মুখ বচনবিহীন। সে দুর্ভাবনায় ত্র-মশঃ তলিয়ে চলেছে। সে কৃষ্ণকলিকে কোনো দিন সচেতন ভাবে ভাবী স্ত্রীরূপে ভেবে দেখে নি; নিরাশ্রয়ের আশ্রয়দাতা হিতৈষী উপকারকের কণ্ঠা ব'লে তাকে সে আদর-যত্ন করেছে, অনেকটা খোসামোদের খাতিরে; দু-একবার যখন তার মনে হয়েছে যে কৃষ্ণকলি তার স্ত্রী হবে, তখন সে সেটা নিয়তি-নির্দিষ্ট অনিবার্য্য অপ্ৰতিকার্য্য ভবিতব্য ব'লেই মেনে নিয়েছে; যেমন নিজের চেহারা বা পিতা-মাতার চেহারা বেছে নেবার উপায় নেই, বিধাতার বিধান মেনে নিতেই হয়, সেই রকম ভাবেই থাকোহরি কৃষ্ণকলিকে স্ত্রী-রূপে অপ্ৰতিবাদে মেনে নিতে অভ্যস্ত হ'ছিলো। কিন্তু আজ রামঘাট তার সেই মোহাবেশ হঠাৎ সরিয়ে তার চেতনা এনে দিলে; তার মনে হ'লো, তাই তো, এই অসম্ভব কুৎসিতটাকে জীবনের অভিশাপের মতন চিরজীবন বহন করতে কেনো যাই? নিজে রোজ্গার করছি, তাতেই তো স্বাধীন ঘরকন্না পেতে মনের মতন পাত্রী খুঁজে বিয়ে করতে পারি। ঐ অপূর্ব কুৎসিতকে চিরজীবন সহ্য করা অসম্ভব। এই দুর্বিপাক তো অনিবার্য্য নয়।

থাকোহরিকে চিন্তিত দেখে রামঘাট সন্তুষ্ট হ'য়ে বললে—
চারিদিক বেশ ক'রে ভেবে চিন্তে দেখো ভায়া, তোমার সামনে
সোনার কাঠি রূপোর কাঠি দু-ই প'ড়ে রয়েছে—রাজকুমারীকে

চেতনা দিয়ে তেপাস্তুর মাঠ পেরিয়ে পালাবে, না, রাক্ষসের পুরীতে হতচেতন ক'রেই রেখে যাবে ! কিন্তু এ পথে বিপদ আছে—সাত-শো রাক্ষসী পিছনে তাড়া করবে !

থাকোহরি নিরুত্তর । রামঘাট্ তার মুখের দিকে চেয়ে মুচ্কি হেসে ধীর মন্ত্র পদে প্রস্থান করলো পরাণ-বাবুর ঘরের দিকে ।

মানুষের যৌবনে রূপ-লিপ্সা অত্যন্ত প্রবল হয়, থাকোহরির নবযৌবনাবিষ্ট মনের সামনে কৃষ্ণকলিকে রামঘাট্ যে কুৎসিত রূপে উপস্থিত ক'রে দিয়ে গেলো তাতে তার মন ঘৃণায় ও বিরাগে সঙ্কুচিত হ'য়ে উঠতে লাগলো । থাকোহরির মন দুর্ভাবনায় ভ'রে উঠলো, তার কেবলই মনে হ'তে লাগলো সে কি উপায়ে এই বিপদ থেকে পরিত্রাণ পেতে পারে ? সে নিজের জীবনটাকে একেবারে ঐ রক্ষাকালীর বাচ্চার কাছে বলি দিতে পারবে না, পারবে না, পারবে না, কিছুতেই পারবে না ।

থাকোহরি যখন একা দাঁড়িয়ে তার অদৃষ্টের দৈবদুর্বিপাকের কথা ভাবছে, এমন সময় কৃষ্ণকলি ছুটে সেইখানে এসে হাসতে হাসতে বললে—মাষ্টার মশায়, আমার হাঁড়রের আর খরুগোশের বাচ্ছা হয়েছে...সাদা ধব্ধবে !...দেখবে এসো...

লোকে অন্ধকারে ভূত কল্পনা ক'রে যেমন চম্কে ওঠে, থাকোহরি কৃষ্ণকলিকে দেখে তেমনি চম্কে উঠলো । ভয়ে ঘৃণায় তার গায়ে কাঁটা দিয়ে উঠলো । সে যেনো আজ প্রথম কৃষ্ণকলির দিকে তার সম্পূর্ণ দৃষ্টি খুলে তাকিয়ে দেখলে—কী

বীভৎস কুৎসিত সে ! তার রং কালো খসখসে, তার কপাল নাক ঠোঁট সবই একই প্লেনে অবস্থিত ! তার হাসিই বা কী ভয়ানক ! হাসিতে তার মুখের হাঁ এতো বিস্তৃত হয় যেনো এক কান থেকে আর এক কান পর্য্যন্ত চিরে গেছে ; তার কালো ঠোঁটের প্রান্ত দুটো ধূসর, দাঁতের মাড়ি লাল টকটকে, হাসতে সমস্ত মাড়ি বেরিয়ে পড়ে ; দেখে থাকোহরির মনে হ'লো যেনো দুখানা টিকেতে আগুন ধরিয়ে দিয়েছে, তার খানিকটা পুড়ে ছাই হয়েছে, সেই ছাইয়ের কোলে আগুনের লাল অঁজি, তার পরেই কালো ! এই দুর্দর্শন আতঙ্ক তার জীবনসঙ্গিনী হবে মনে করতেই থাকোহরির গায়ে কাঁটা দিয়ে উঠলো ।

কৃষ্ণকলি থাকোহরিকে অবাক হ'য়ে তার দিকে তাকিয়ে থাকতে দেখে অধীর হ'য়ে আবার ডাকলে — মাষ্টার মশায়, দেখ্বে এসো না, কেমন সাদা ধবধবে বাচ্ছা !

থাকোহরির মনে হ'লো—হঁদুর বেরাল কুকুর খব্গোশ পশুদের বাচ্ছাও সাদা ধবধবে হয়, আর এই না মানুষ না-পশু মেয়েটাকে বিয়ে করলে এর বাচ্ছা হবে কাকের ছানার চেয়েও কালো—কালো মিশ্‌মিশে, ঘুট্‌ঘুটে অন্ধকার, যাকে বলে কালীকৃষ্ণী ! সেই-সব ছেলে-মেয়েদের সে কি প্রাণ খুলে আদর করতে পারবে, না লোকালয়ে তাদের বা'র করতে পারবে ? ঐসব সন্তানের পিতা ব'লে তাকে চিরজীবন লজ্জিত কুণ্ঠিত হ'য়ে থাকতে হবে না ? আমরণ অবিবাহিত থেকে সে পরাণ-বাবুর ঋণের কাছে আত্ম-বলি দেবে. কিন্তু তার বেশী আর সে

ক্ষতি স্বীকার করতে পারবে না। তার সৌন্দর্য্যজ্ঞান, পছন্দ ও রুচিকে লোকে যে ধিক্কার দেবে এ সে সহ্য করতে পারবে না। এমন স্ত্রীকে সে কি কখনো ভালোবাসতে পারবে, না, তার কাছে তন্নিষ্ঠ হ'য়ে থাকতে পারবে? না—না—না—না। একটা বিরাট না'য়ের হাহাকারে থাকোহরির মন ভ'রে উঠলো।

থাকোহরি কৃষ্ণকলির আহ্বান উপেক্ষা ক'রে সেখান থেকে চ'লে গেলো। যেতে যেতে তার মনে হ'লো দ্বিজেন্দ্রলালের অমর গান—

“কালো রূপে ম'ছেছে আমার মন !

ওগো সে যে মিশ্ মিশে কালো,

সে যে ঘোরতর কালো—অতি নিরুপম।

কোকিল কালো, ভোম্‌রা কালো,

আমরা কালো, তোম্‌রা কালো,

মুচি মিস্ত্রি ডোমরা কালো ;—

কিন্তু জানো না কী কালো সেই কালো রঙ্—

ওগো সেই কালো রঙ্ !

অমাবস্কার নিশি কালো,

কালী কালো, মিশি কালো,

আর গদাধরের পিসি কালো ;

কিন্তু তার চেয়েও কালো সে কালো-বরণ—

ওগো, সে কালো-বরণ !”

এই গানের পদ আত্মস্ত মনে মনে আওড়াতেই থাকো-
হরির মুখের উপর একটা ঘৃণা-মিশ্র বিদ্রূপের হাসি ফুটে
উঠলো।

কৃষ্ণকলি তার আহ্বান উপেক্ষা ক'রে থাকোহরিকে চ'লে
যেতে দেখে আশ্চর্য হ'লো, এবং ক্ষণকাল অবাক হ'য়ে থাকোহরির
চ'লে যাওয়ার দিকে তাকিয়ে দাঁড়িয়ে রইলো; তার পর সে বিড়-
বিড় ক'রে নিজেকেই বলতে লাগলো—

আড়ি! আড়ি! আড়ি!

কাল যাবো বাড়ী!

পরশু যাবো ঘর,

কী করবি কর।

মাষ্টার-মশায়ের সঙ্গে আমি আর ককখনো কথা কইবো না, ...
সেধে ভাব করতে এলেও না...

রামযাদু থাকোহরির কাছ থেকে বরাবর পরাণ-বাবুর কাছে
গেলো। পরাণ-বাবুর কাছে তখনো লোক-সমাগম হয় নি,
পরাণ-বাবু একা ব'সে খবরের কাগজ পড়ছিলেন।

রামযাদু ঘরে পা দিতেই পরাণ-বাবু খবরের কাগজ থেকে
মুখ তুলে আধা-চশ্মার উপরের ফাঁক দিয়ে দৃষ্টি পাঠিয়ে দেখলেন
কে এলো। রামযাদুকে দেখেই তিনি চোখের চশমা খুলে
ফেলতে ফেলতে বললেন—আম্নন মুখুজ্জ মশায়! খবরের
কাগজে গ্ৰাণগ্ৰাল-ব্যাঙ্ক, বঙ্গলক্ষ্মী-কটন-মিল আর মেডিকেল-
কলেজের ব্যাপার পড়ছেন?

রামযাদু পরাণ-বাবুর সামনে টেবিলের এপারে একখানা চেয়ারে বসতে বসতে বললে—পড়ছি বই কি। তারই জন্মে আপনাকে একটা কথা বলতে এসেছিলাম, এখন নিরিবিলাি আছেন, ব'লে ফেলি.....

ব্যাক্ প্রভৃতির চুরির প্রসঙ্গে রামযাদুর পরাণবাবুকে কী বলবার থাকতে পারে, তা বুঝতে না পেরে পরাণ-বাবু ঈষৎ কৌতূহলী হ'য়ে বললেন—হাঁ বলুন।

রামযাদু বলতে লাগলো—থাকোহরি ছেলেটি অতি সং, বিশ্বাসী, কৃতজ্ঞ; কিন্তু নিতান্ত ছেলেমানুষ তো, .. ওর ওপর আপনি একটু সতর্ক নজর রাখবেন, .. অনেক টাকা নাড়াচাড়া করে...কোন্ রিপু কখন যে প্রবল হ'য়ে ওঠে তা তো বলা যায় না...

পরাণ-বাবু তাঁর স্বভাবসিদ্ধ সরল প্রাণ-খোলা উচ্চ হাসি হেসে নিয়ে বললেন—মুখুজ্জ মশায়, আপনি আমার আর থাকোহরির হিতৈষী বন্ধু ব'লে অকারণে শঙ্কিত হচ্ছেন। কিন্তু ভেবে দেখুন, থাকোহরি চুরি করতে যাবে কেনো? আমার যা খুদ-কুঁড়ো আছে সবই তো তার...

রামযাদু গম্ভীর হ'য়ে বললে—হ্যাঁ তা তো জানি, কিন্তু... যে-রকম দিনকাল প'ড়েছে তাতে জামাই বাবাজীরা তো শ্বশুর মশায়দের দয়ে মজাতে দ্বিধা করেন না, খবরের কাগজে সব দেখছেন তো...থাকোহরি তো এখনও জামাই হন নি, হবু হ'য়ে আছেন...ধরুন একটা কথার কথা...সে জোয়ান

সোমথ ছেলে, আর আমাদের কৃষ্ণকলি কচি খুকীটি কৃষ্ণকলিকে তার যদি পছন্দ না হয়, আর থাকোহরি যদি কোনো মূলজী জেঠার চেক ভাঙিয়ে পগার ডিঙিয়ে যুরোপে বা জাপানে স'রে পড়ে, তবে তাকে খুঁজে ধ'রে আনা কঠিন হবে।

পরান-বাবু আবার হো হো ক'রে হেসে উঠে বললেন— মুখুজ্জে মশায়, আপনি কেবল ঐতিহাসিক বা কবি নন, আপনার মধ্যে ঔপন্যাসিকের কল্পনাও উঁকি মারে, দিব্য ঘটনাঙ্কাল বুনেছে আপনার কল্পনা! আপনি উপন্যাস লিখতেও আরম্ভ করুন।

পরান-বাবু রামযাহুর উপদেশটা তুচ্ছ অগ্রাহ্য ক'রে হেসে উড়িয়ে দিলেন দেখে রামযাহু খুব খুশী হ'লো, এবং সেও হাসতে হাসতে বললে—চারিদিকের ব্যাপার দেখে শুনে আমার মনে কেমন একটা আতঙ্ক ধ'রে গেছে। ঈশ্বর করুন, আমার ভয় মিথ্যা হোক। জগৎ থেকে মিথ্যা প্রবঞ্চনা চুরি পাপ লুপ্ত হ'য়ে যাক!

শেষের কথাটা বলবার সময় রামযাহু পরম গম্ভীর এবং গদগদ হ'য়ে উঠলো।

পরান-বাবু রামযাহুর কথায় পরিতুষ্ট হ'য়ে বললেন— মুখুজ্জে মশায়, আপনাকে যতো দেখছি ততো আমার ভক্তি বাড়ছে; আপনি পরম ধার্মিক, পরোপকারী, পরহিতৈষী মহাশয় ব্যক্তি! জ্ঞান, কর্ম ও ভক্তির এমন সমন্বয় সচরাচর মানব-চরিত্রে দেখা যায় না।

এমন সময় পাশের কাঠের সিঁড়িতে চার-পাঁচজন লোক ঠাঠার পদধ্বনি শুন্তে পেয়ে রামযাদু উঠে দাঁড়ালো, এবং মুখ কাচুমাচু ক'রে বললে—আমি এখন তবে আসি।

পরাণ-বাবু প্রসন্ন উদার দৃষ্টিতে রামযাদুর মুখের দিকে তাকিয়ে বললেন—আচ্ছা। প্রণাম হই।

রামযাদু পৃষ্ঠ পরাবর্তন ক'রে প্রস্থানোচ্চত হ'তেই পরাণ-বাবু মনে মনে ভাবলেন—মুখুজ্জ মশায় নিজের প্রশংসা কখনো শুন্তে পারেন না, প্রশংসা শোন্বা মাত্র বিষের মতন পরিহার ক'রে চ'লে যান, পাছে সত্ত্বগুণপ্রধান চিত্তে তমোগুণের স্পর্শদোষ ঘটে ! মহাশয় ব্যক্তি !

রামযাদু সিঁড়ির মুখের কাছে যেতেই আগন্তুক একজন তাকে বললে—এই যে মুখুজ্জ মশায়, চললেন যে এরই মধ্যে ?

রামযাদু হেসে বললে—আপনাদের জন্মে ফীল্ড্ ক্রিয়ার ক'রে রেখে গেলাম।

আগন্তুক একজন ব্যঙ্গ ক'রে বললে—ফীল্ড্ কম্প্লীট্ ক্রিয়ার ! একটি শস্ত্র-কণাও আমাদের জন্মে ফেলে রাখেন নি বোধ হয় ?

রামযাদু গলার স্বর উচ্চ ক'রে যাতে পরাণ-বাবু শুন্তে পান এমন ভাবে বললে—এ ফীল্ড্ তো বহুঙ্করা, রত্নাকর,—নিয়ে ফুরোতে পারবেন না, তবে নিতে জানতে হয়।

আগন্তুকদের একজন রামযাদুকে উদ্দেশ্য ক'রে বললে—সেটি আপনি বিলক্ষণ জানেন।

কিন্তু রামঘাটু যেনো সে-কথা শুন্তে পায় নি, এমনি ভাবে হাসতে হাসতে নীচে নেমে চ'লে গেলো। চোরকে চুরি করতে ও গৃহস্থকে সাবধান হতে ব'লে রামঘাটুর মনটা আজ ভারি খুশী হ'য়ে উঠেছিলো, সে যখন বাড়ী থেকে বেরিয়ে রাস্তায় চলেছে তখনও তার মুখে হাসির আভা ঝক্‌মক্‌ করছে।

পরান-বাবুর বাড়ী থেকে বেরিয়ে রামঘাটু একেবারে মিউনিসিপ্যাল মার্কেটে গিয়ে হাজির। সে বাজারের সেরা দেখে এক শ ল্যাংড়া আম, বড়ো গল্‌দা চিংড়ি আর তপ্‌সী মাছ কিনলে; বাজার ক'রেও যখন দেখলে তার কাছে তখনও কয়েক টাকা অবশিষ্ট আছে, তখন সে এক কাঁদি উৎকৃষ্ট কানাই-বাঁশী কলা আর গোটাকতক সিঙ্গাপুরী আনারস কিনলে। এই দ্রব্যগুলিকে সে দুই ভাগ ক'রে তার আপিসের বড়ো সাহেব ও ছোটো সাহেবকে ভেট দিতে তাদের বাড়ীতে চল্লো। তারা দুজনে একসঙ্গে এক বাড়ীতে থাকে; বড়ো সাহেবের মেম বিলাতে, ছোটো সাহেব অবিবাহিত। রামঘাটু সাহেবদের সামনে খুব নত হ'য়ে লম্বা হাতে বিনীত সেলাম ক'রে বললে— তার এক শালা থাকে মজঃফরপুরে, সেখান থেকে সে ল্যাংড়া আম পাঠিয়েছে; এক বন্ধু থাকে সিঙ্গাপুরে, সে আনারস পাঠিয়েছে; এক সম্পর্কে শ্বশুর থাকে ঘাটালে, সে আজ কল্‌কাতায় এসেছে, তাই সঙ্গে কিছু তপ্‌সী মাছ এনেছে; আর কলা তার দেশের বাগানের এবং গল্‌দা চিংড়ি তার পুকুরের। তাদের দেশের শাস্ত্রে বলে, ভালো জিনিস একলা উপভোগ করতে

নেই, তাই সে তার অন্নদাতাদের যৎকিঞ্চিৎ উপহার দিতে এই সব এনেছে।

রামঘাটুর শালা স্বপ্তর বন্ধু নানা দিগ্দেশ থেকে কেমন ক'রে এমন হিসাব ক'রে জিনিস উপহার পাঠালো যে, সবগুলি একই সময়ে একই দিনে এসে রামঘাটুর কাছে পৌঁছালো এবং তার বাড়ীর বাগান ও পুকুর থেকেই বা ঠিক তাক বুঝে কেমন ক'রে যে কলা ও মাছ এসে জুটলো, তা বলবার আবশ্যকতা রামঘাটুও মনে করলে না, সাহেবরাও জিজ্ঞাসা করার কথা মনে আনলে না। তারা কেবল বললে—থ্যাঙ্ক্ ইউ ভেরি মাচ্ রায় বাহাদুর!

উপহার দেওয়া ও নেওয়ার আপ্যায়নের পর রামঘাটু কথায় কথায় ব্যাঙ্ক্ মিল্ আর মেডিক্যাল-কলেজের চুরির মকদ্দমার কথা তুললে এবং অবশেষে বললে—আমাদের আপিসেও সাবধান হওয়া দরকার; এই সব মকদ্দমায় অনেকের চোখ ফুটেছে, যারা ঠকাতে জানতো না তারাও ঠকাতে শিখলে।

সাহেবেরা বললে—তা শিখুক, তাতে আমাদের কোনো ভয় নেই; আমাদের কেশিয়ার থাকো-বাবু পরাণ-বাবুর লোক, তার কাজ-কর্ম খুব পরিষ্কার; আর পরাণ বাবু বিশ্বাসের অবতার!

রামঘাটু বললে—হ্যাঁ...তা বটে...কিন্তু...থাকোহরি নিতান্ত ছেলেমানুষ...আর পরাণ-বাবু সকলকে অত্যন্ত বিশ্বাস করেন বলে নিজে তো কিছু দেখেন শোনেন না...

সাহেবেরা বললে—থ্যাঙ্ক্ ইউ রায় বাহাদুর! আমরা

পরাণ-বাবুকে ব'লে দেবো। আর শীগ্গিরই হিসাব অডিট করাবো।

রামঘাটু আবার লম্বা সেলাম ক'রে বিদায় হ'লো।

আপিসে গিয়েই সে দেখলে থাকোহরির সদাপ্রফুল্ল মুখ আজ চিন্তাক্রিষ্ট বিমর্ষ হ'য়ে আছে। দেখেই সে খুশী হ'য়ে থাকোহরির কাছে গিয়ে চুপিচুপি বললে—দেখো ভায়া, বিশ্বাস-ঘাতকতা কোরো না, পরাণ-বিশ্বাস তোমাকে বিশ্বাস ক'রে তোমার হাতে তাঁর কণ্ঠা আর ক্রেডিট ম'পে নিশ্চিত হ'য়ে আছেন। কুৎসিত কালো মেয়ে তোমার অপছন্দ হতে পারে, হওয়াটাই স্বাভাবিক, হয় তো কৃষ্ণকলিকে বিবাহ করলে তোমার জীবনটা বিশ্বাদ হ'য়ে যাবে, তবু মনে রেখো—

ধর্ম এব হতো হস্তি ধর্মো রক্ষতি রক্ষিতঃ ।

তস্মাৎ ধর্মো ন হস্তব্যো মা নো ধর্মো হতোহবধীৎ ॥

থাকোহরি গম্ভীর হ'য়ে রইলো, কোনো কথাই বললে না।

রামঘাটু মনে মনে হাসতে হাসতে নিজের কাজে চ'লে গেলো।

এর পর থেকে থাকোহরির দেখা পেলেই রামঘাটু তাকে স্মরণ করিয়ে দেয় তার ভাবী পত্নী পেত্নী-তুল্যা, তার জীবনের সুখ আনন্দ গ্রাস করতে উত্ততা হ'য়ে আছে ; সে ইচ্ছা করলেই মুক্তি পেতে পারে ; কিন্তু তাতে তার অধর্ম হবে ; মানুষের ইহলোকটাই সর্বস্ব নয়, পরলোকটার দিকেও তাকাতে হবে, যদিও অনেকে পরলোকের অস্তিত্ব স্বীকারই করেন না—চার্বাক-

অনেক আধুনিক বলেন বটে—ভস্মীভূতশ্চ দেহশ্চ

পুনরাগমনং কুতঃ । আর ধর্মভয়কে তাঁরা বলেন—A bugbear of the weak mind ! তোমরা তো সেই আধুনিকের দলে !

রামযাদু থাকোহরির সামনে কৃষ্ণকলির স্বামী হওয়ার ভয়ালতা ও তার হাত থেকে মুক্তির পথও নির্দেশ করে, আবার ধর্মের ভয় দেখিয়ে সেই পথে যেতে প্রতিনিবৃত্তও করে, এবং ধর্মভয় যে কাল্পনিক এ কথা ব'লে তাকে ধর্ম উল্লঙ্ঘন করতে প্ররোচিতও করে ।

থাকোহরির মনে শাস্তি নেই, তার চিন্তে চিন্তার অন্ত নেই । তার এখন সব-চেয়ে দুঃভাবনা, কৃষ্ণকলির হাত থেকে সে কেমন ক'রে উদ্ধার পায় ।

একদিন থাকোহরি আপিস থেকে চিন্তাকুল মুখে বাড়ী ফিরছে, দেখলে বেখুন-কলেজের গাড়ী এসে তাদের বাড়ীর পাশের বাড়ীর দরজার কাছে থামলো ; সেই গাড়ীর দরজার মুখের কাছে ব'সেছিলো একটি সুন্দরী চতুর্দশী মেয়ে । তাকে দেখেই থাকোহরির দৃষ্টি ব্যাকুল উজ্জ্বল হ'য়ে উঠলো ; তার মনে হ'লো এই মেয়েটিকে তো সে চেনে—পাশের বাড়ীর শ্যাম-বাবুর মেয়ে সুলোচনা ; তারাও তো থাকোহরিদের জাত ; এই মেয়েটির সঙ্গে তো তার বিয়ে হতে পারে, সুন্দরী প্রথম-যৌবনা চতুর্দশ বসন্তের একগাছি মালার মতন এই সুশিক্ষিতা মেয়েটিকে পেলে তার জীবন ধন্য হ'য়ে যেতে পারে ! কিন্তু তার জীবন পেত্নীতে-পাওয়া অভিশপ্ত ! থাকোহরির বুক ঠেলে দীর্ঘনিশ্বাস পড়লো ।

স্বলোচনা গাড়ীর জান্না থেকে যখন দেখলে থাকোহরি তার দিকে বুভুক্ষু দৃষ্টিতে দেখছে, তখন তার মুখ লজ্জায় সঙ্কোচে অপ্রতিভ হ'য়ে উঠলো ; গাড়ী বাড়ীর দরজায় ধাম্বা মাত্র সহিস যেই গাড়ীর দরজা খুলে দিলে অমনি স্বলোচনা গাড়ী থেকে তাড়াতাড়ি নেমে পড়লো, কিন্তু বাড়ীর মধ্যে অদৃশ হ'য়ে যাবার আগে আর-একবার থাকোহরির দিকে ফিরে দেখে নিলে ।

স্বলোচনার ফিরে তাকানো কেবল মাত্র কৌতূহল ও কৌতুকের বশে হ'তে পারে ; কিন্তু থাকোহরির মনে হ'লো স্বলোচনা তার প্রতি অনুরাগিণী, তাই স্বলোচনার মুখ তা'কে দেখে অমন লজ্জারূপ হ'য়ে উঠেছিলো ।

থাকোহরি উন্ননা হ'য়ে বাড়ীর মধ্যে প্রবেশ করলে । সে বাড়ীতে গিয়েই দেখলে দেশ থেকে তার মা এসেছে । তার মা তার ঘরে এসে দেশের খবর দেবার প্রসঙ্গে বললে—তোমার মামীর বোনের বিয়ের সম্বন্ধ হচ্ছে ; তোমার মামীর বড়ো ইচ্ছে যে, তোমার সঙ্গে তার বোনের বিয়ে হয় ; কিন্তু আমি বললাম তা তো হবার জো নেই । এখানেও পাশের বাড়ীর স্বলোচনার মাও বল্ছিলো—“তোমার ছেলের সঙ্গে আমার মেয়ের বিয়ে হ'লে বেশ হ'তো ।” বেশ তো হ'তো, কিন্তু...

থাকোহরির মা চারিদিকে একবার তাকিয়ে কণ্ঠস্বর চেপে চুপিচুপি বলতে লাগলো—কর্তা-গিন্নির ইচ্ছে কেটোকলির সঙ্গে তোমার বিয়ে দেবেন । আমার কিন্তু মন সরে না, যে মেয়ের ছিরি ! আমার সাত নয়, পাঁচ নয়, সবে এক বেটার বৌ,

সে অমন কালো কুচ্ছিত হবে, এ দুঃখ আমি কা'কেই বা কেমন ক'রে বলি। কর্তা-গিন্নি যদি আবার রাগ করেন? তোর এই উন্নতি তো কর্তার আশীর্বাদেই!

থাকোহরি ঘর থেকে বেরিয়ে চ'লে গেলো; সে বাড়ী ছেড়ে পথে বেরিয়ে পড়লো। সে আনমনা হ'য়ে পথ চলতে চলতে এই ভাবতে লাগলো—সুলোচনার মা বলছিলেন আমার সঙ্গে সুলোচনার বিয়ে হ'লে বেশ হ'তো! সুলোচনা বোধ হয় তার মায়ের এই ইচ্ছার কথা জানতে পেরেছে; তাই আমার প্রতি তার অনুরাগ জন্মেছে. আমাকে দেখলেই সে লজ্জা পায়! সুলোচনা তো কৃষ্ণকলির তুলনায় স্বর্গের অপরী; মামীর বোনও যে কৃষ্ণকলির চেয়ে ঢের ঢের ভালো—সে লেখাপড়া না জানুক, দেখতে মানুষের মতন তো ... আহামরি সুন্দরী না-ই হোক ...

সেই দিন থেকে থাকোহরির সকাল বিকালের কাজ হ'লো সুলোচনার স্কুলে যাওয়া-আসার সময় দরজার সামনে দাঁড়িয়ে থাকা। সুলোচনা হয় তো বা তার মায়ের কাছে থাকোহরির সঙ্গে তার বিবাহ দেওয়ার প্রস্তাব শুনেছে, অথবা থাকোহরিকে ব্যগ্র দৃষ্টিতে তার দিকে তাকিয়ে থাকতে দেখে ব'লেই থাকোহরিকে দেখলে তার মুখ লজ্জার হাসিতে উদ্ভাসিত অথচ সঙ্কচিত হ'য়ে যায়। আর থাকোহরি ভাবে, সেটি নব-অনুরাগিণী কিশোরীর লজ্জাবেশ। যতোই থাকোহরি সুলোচনাকে নিজের প্রতি অনুরক্ত অনুমান করে, ততোই তার ব্যগ্রতা বেড়ে চলে, এবং

স্বলোচনা ততোই বেশী লজ্জা পায়, আর থাকোহরি সেই লজ্জাকে প্রণয়চিহ্ন মনে ক'রে আরো ব্যগ্র হয়। এমনি বৃত্তাবর্তে তাদের দুজনের মনের ভাব ঘুরপাক খেতে লাগলো, ইংরেজী লজ্জিকে যাকে বলে vicious circle ! এখন কৃষ্ণকলি থাকোহরির একে-বারে চক্ষুশূল হ'য়ে দাঁড়িয়েছে ; কৃষ্ণকলিকে দূর থেকে দেখলেই সে পলায়ন করে। আতুরে মেয়ে কৃষ্ণকলি থাকোহরির এই হতাদর বুঝতে পারে, সেও অভিমানে ক্রোধে থম্‌থমে হ'য়ে দূরে দূরেই থাকতে চেষ্টা করে।

থাকোহরির উন্মনস্কতা ও কৃষ্ণকলির উপর বিরাগ হয় তো পরাণ-বাবু ও মাতঙ্গিনীর দৃষ্টি আকর্ষণ করতো, কিন্তু একদিন হঠাৎ অতিস্বলাঙ্গী মাতঙ্গিনী হার্ট্‌ ফেল্‌ ক'রে মারা গেলেন। সমস্ত সংসার শোকাচ্ছন্ন হ'য়ে গেলো। সকলে মনে করলে থাকোহরির বিষণ্ণতার কারণও কর্তী ঠাকুরাণীর আকস্মিক মৃত্যু।

পরাণ-বাবু পত্নীবিয়োগে বিহ্বল হ'য়ে পড়লেন। তিনি কৃষ্ণকলিকে নিয়ে তেতালার ঘরে যে আশ্রয় নিয়েছেন, সেখান থেকে আর বাহির হন না। দলে দলে লোক আসে সমবেদনা দেখাতে। পরাণ-বাবু কারো সঙ্গে সাক্ষাৎ করেন না, সকলে হতাশ ক্ষুণ্ণ হ'য়ে ফিরে ফিরে চ'লে যায়। তাঁর কাছে একমাত্র যেতে পারে থাকোহরি ; সেই তাঁকে সময়-মতো নাওয়ায়, খাওয়ায়। কিন্তু কৃষ্ণকলিকে দেখলেই থাকোহরির গা শিউরে

ওঠে, এবং থাকোহরির বিরাগাচ্ছন্ন মুখ দেখলে কৃষ্ণকলিও স্বস্তি অনুভব করে না। থাকোহরিও নিতান্ত কাজ না পড়লে পরাগ-বাবুর কাছে ঘেঁষে না। থাকোহরি স্বেচ্ছায় যতোটুকু সময় তার কাছে অতিবাহিত করে, তার বেশী এক মিনিটও পরাগ-বাবু থাকতে অনুরোধ করেন না। কেবল কৃষ্ণকলি চোখের আড়াল হ'লে তিনি ব্যাকুল ও চঞ্চল হ'য়ে ওঠেন। তাই কৃষ্ণকলিকে তার চিড়িয়াখানা সমেত সেই তেতালার বৃহৎ ঘরে পিতাব শোকের বেষ্টনে বন্দিনী হ'তে হইয়াছে।

আপিসের জরুরী কাগজপত্র যে-কোনো কাম্‌চারী নিয়ে এসে থাকোহরিকে দেয়; থাকোহরি পরাগ-বাবুর কাছে নিয়ে গিয়ে কোন্টা কিসের কাগজ বুঝিয়ে দিতে চাইলে তিনি বলেন—ও-সব আমি এখন দেখতে শুনতে চাইনে; তুমি আর মুখুজ্জ মশায় দেখে শুনে যা হয় কোরো; কেবল আমাকে কি করতে হবে বলা...কেবল সই ক'রে দেওয়া ছাড়া আর আমি কিছু করতে পারবো না।

থাকোহরি সই করিয়ে কাগজপত্র ফিরিয়ে নিয়ে যায়, নীরবে দুশ্চিন্তায় কাতর হ'য়ে।

রামঘাট যখন শুনলে যে কর্তা কাগজ-পত্র কিছু দেখেন না, অমনি সই ক'রে দেন, তখন সে থাকোহরিকে বললে—দেখো ভায়া, তোমার সামনে মগু প্রলোভনের পথ খোলা প'ড়ে রয়েছে, খুব সাবধান! কর্তাকে দিয়ে এখন তুমি বা-খুশী তা করিয়ে নিতে পারো, তিনি টেরও পাবেন না; কিন্তু সে প্রবৃত্তি মনের

কোণেও ঠাঁই দিয়ো না। কৃষ্ণকলিকে তোমার পছন্দ হয় না, কিন্তু জীবনে ক'টা জিনিসই বা পছন্দসই হয় ?

রামযাদুর উপদেশের বক্তৃতা শুনে থাকোহরি চুপ ক'রে থাকে, কিন্তু তার মন জ্বলতে থাকে।

একদিন সকালে পরাণ-বাবু প্রাতঃকৃত্য সমাধা ক'রে প্রতীক্ষা করছেন নিত্যকার মতন আজও থাকোহরি এসে তাঁর চা খাওয়ার ব্যবস্থা ক'রে দেবে। কিন্তু অনেক বেলা হ'য়ে গেলো, তবু থাকোহরির দেখা নেই ; থাকোহরির প্রাত্যহিক নিয়মিত আগমন কয়েক দিনেই পরাণ-বাবুর অভ্যাস হ'য়ে গিয়েছিলো, আজ তার ব্যতিক্রম হওয়াতে তাঁর পত্নীর মৃত্যু তাঁর জীবনে যে বিরাট্ অভাব সৃষ্টি ক'রে গেছে, সেইটা যেনো আজ অধিকতর উৎকট হ'য়ে তাঁর মনের সামনে এসে দেখা দিলো। তাঁর পত্নী দিনের পর দিন সমান ভাবে দীর্ঘ বত্রিশ বৎসর নিয়মিত নিরলস সেবা ক'রে গেছেন ; আর তাঁর অভাবের এই ষোলো দিনের দিনই অপরে ক্লান্ত হ'য়ে পড়লো ! জীবনের তো এখনও হয় তো অনেকখানিই বাকী ; চাওয়ার আগে পাওয়ার আনন্দ জীবন থেকে ঘুচে গেলো, এখন প্রত্যেক বস্তু চেয়ে চেয়ে তবে পেতে হবে। কিন্তু তাঁর নিজের জীবন তো পরমাযুর অনেকখানি পথ অতিক্রম ক'রে এসেছে, কৃষ্ণকলির তো সবে যাত্রা শুরু ! তার জীবনের অভাব মোচন করবে কে ? পরাণ-বাবুর মনে এই প্রশ্ন উদয় হবার সঙ্গে সঙ্গেই উত্তরও উদয় হলো—কৃষ্ণকলির জীবনের অভাব মোচন করবে তাকে সব চেয়ে যে ভালোবাসবে

...তার স্বামী ! কোষ্ঠীতে বলেছে কৃষ্ণকলি স্বামি-সোহাগিনী সৌভাগ্যবতী হবে। পরাণ-বাবু নিদ্রিতা কণ্ঠার ললাটে আপনার দক্ষিণ হস্ত স্থাপন করলেন, ব্যথিত পিতৃ-অস্তুরের ঐকান্তিক আশীর্বাদ যেনো তা'র মাথায় ঢেলে দিলেন; তাঁর দু'চোখ দিয়ে সন্তাপের অশ্রুধারা গড়িয়ে পড়তে লাগলো।

কৃষ্ণকলি কপালে পিতার হস্তস্পর্শ পেয়ে ঘুম থেকে জেগে চোখ মেলে হাসতে গিয়েই দেখলে, বাবার চোখে জল। তার আর হাসা হ'লো না, সে তাড়াতাড়ি উঠে দুই হাত দিয়ে বাবার গলা জড়িয়ে ধরলে। পরাণ-বাবু তাড়াতাড়ি চোখ মুছে ফেলে হাসতে চেষ্টা ক'রে বললেন—ঘুম ভাঙলো মা-জননীর ? তোমার ছেলেরা যে খাবার জন্মে ছটফট করছে, তোমার প্রসাদ পাবে ব'লে ব্যস্ত হয়েছে।

কৃষ্ণকলি স্নেহার্দ্ৰ দৃষ্টিতে কাকাতুয়া আর খর্গোশের দিকে দেখলে।

পুরাতন ভৃত্য বোঁচা বড়ো একখানা আংটা-দেওয়া খালায় ক'রে চা দুধ পাউরুটী জেলী সন্দেশ ইত্যাদি নিয়ে সেই ঘরে এসে প্রবেশ করলে।

বোঁচাকে দেখেই পরাণ-বাবু প্রশ্ন করলেন—হরি-বাবু কোথায় রে ?

বোঁচা খাবারের খালা টেবিলের উপর নামিয়ে রাখতে রাখতে হাতের জিনিসের দিকেই দৃষ্টি রেখে বললে—তিনি তাঁর মাকে নিয়ে কাল রাত্রে বাড়ী গেছেন।

পরাণ-বাবু আশ্চর্য হ'য়ে ব'লে উঠলেন—বাড়ী গেছে ?
কেনো ?

বোঁচা এইবার পরাণ-বাবুর মুখের দিকে তাকিয়ে বললে—
তা তো জানি নে।

পরাণ-বাবু চিন্তিত ও দুঃখিত হ'য়ে চুপ ক'রে রইলেন ; তাঁর
মনের মধ্যে একটা টানা দীর্ঘ-নিঃশ্বাস পড়লো—থাকোহরি
বাড়ী গেলো, কিন্তু একবার আমাকে ব'লে গেলো না।

পরক্ষণেই তিনি সে চিন্তা মন থেকে সরিয়ে ফেললেন,
তাঁর বিষণ্ণ হবার অবসর নেই, তিনি বিষণ্ণ হ'লে কৃষ্ণকলি বিষণ্ণ
হয়, তিনি জোর ক'রে হেসে বললেন—এসো মা অন্নপূর্ণা, তোমার
সস্তানদের প্রসাদ বিতরণ করো।

কৃষ্ণকলি খাট থেকে বাবার গলা ধ'রে ঝুলে নীচে নেমে প'ড়ে
বললে—মাষ্টার মশায় বাড়ী চ'লে গেছে, বেশ হয়েছে বাবা।
আমি ওকে দুচক্ষে দেখতে পারি নে; আমি ওর সঙ্গে জন্মের
মতন আড়ি ক'রে দিয়েছি !

পরাণ-বাবুর চিন্তা কন্ঠার কথা ভাবী স্বামীর প্রতি অনুরাগ-
ব্যঞ্জক অনুমান ক'রে সুখাবেশে পরিপ্লুত হ'য়ে উঠলো। তাঁর
মনে হলো—গিন্নি যদি এদের দুজনের মিলনটা দেখে যেতে
পারতেন, তা হ'লে আমার আর এতো ক্ষোভ হতো না। এখন
তো এক বৎসর বিয়ের প্রতিবন্ধক পড়লো। আমি দেখে
যেতে পারলে হয়। আকৈশোরের জীবনসঙ্গিনী সহধর্মিণীকে
ছেড়ে কি আমিই বেশী দিন বাঁচবো ?

তার অবর্তমানে কৃষ্ণকলিকে কে দেখবে শুনবে এই চিন্তা পরাণ-বাবুর মনে উদ্গত হ'তে যাচ্ছিলো, এমন সময় কৃষ্ণকলি বললে— বাবা, তুমি চা চানো, আমি চট্ ক'রে মুখ ধুয়ে কাপড় ছেড়ে আসছি।

পরাণ-বাবু মায়ের যত্ন দিয়ে মেয়ের আহাৰ্য্য প্রস্তুত করতে মনোনিবেশ করলেন।

একটু পরেই কৃষ্ণকলির চিডিয়াখানার মধ্যে পরাণ-বাবুর সমস্ত চিন্তা হারিয়ে গেলো। পিতা কণ্ঠ্যর সঙ্গে তার খেলায় যোগ দিলেন।

বেলা দশটার সময় বোঁচা এসে খবর দিলে মুখুজ্জ মশায় কাগজপত্র সই করাতে এসেছেন।

কৃষ্ণকলি বললে—তুমি চট্ ক'রে কাজ সেরে নাও বাবা, আমি ততোক্ষণে নেয়ে আসি। নইলে তুমি নাইতে কল-ঘরে ঢুকলে আমার নাইতে দেবী হ'য়ে যাবে।

কৃষ্ণকলি লাফাতে লাফাতে ঘর থেকে বেরিয়ে গেলো। রামঘাট্ একতাড়া কাগজপত্র হাতে ক'রে নিয়ে ঘরে এসে ঢুকলো—তার মুখ অত্যন্ত ম্লান বিম্ব, কিন্তু ছোটো ছোটো চোখ দুটো ধারালো ছুরীর ফলার ডগার মতন ভারী বেশী উজ্জল চক্চক্ করছে।

রামঘাট্ ঘরে ঢুকেই বললে—খাকোহরি বাবাজী হঠাৎ বাড়ী চ'লে গেছেন; আমাকে চিঠি লিখে গেছেন আপিসের কাগজ-পত্র-

গুলো আপনাকে দিয়ে সই করিয়ে নিয়ে যেতে হবে। তাই তাড়াতাড়ি সকাল-বেলাতেই এলাম.....

পরাণ-বাবু শোকাক্ত চিত্ত এখন একটুতেই অধিক ব্যথিত হয়; থাকোহরি বাড়ী যাওয়ার খবরটা রামঘাটকে দিয়ে গেলো, কিন্তু তাঁকে দিয়ে যেতে পারলে না, এতে পরাণ-বাবুর মন অভিমানের বেদনায় টন্টন্ ক'রে উঠলো। তিনি থাকোহরির প্রসঙ্গ মাত্র উত্থাপন না ক'রে কাগজ-পত্রে সই ক'রে দেবার জন্ত ফাউণ্টেন-পেন খুলে নিলেন। রামঘাট প্রত্যেক কাগজের কেবল সই করবার জায়গাটা খুলে খুলে পরাণ-বাবুর সামনে ধরতে লাগলো, আর পরাণ-বাবু কোন্ কাগজে কি আছে না দেখে-শুনেই সই ক'রে যেতে লাগলেন। রামঘাট কিন্তু মাঝে মাঝে পরাণ-বাবুকে শুনিয়ে শুনিয়ে বল্ছিলো কোন্ চিঠি কা'কে কোন্ কাজের জন্ত লেখা হয়েছে। রামঘাট কতকগুলো চিঠিপত্র সই করিয়ে নিয়ে এক তাড়া কাগজের শেষ পৃষ্ঠাটা পরাণ-বাবুর সামনে খুলে ধরলে; সেই সময় তার হাত দু'খানা একটু কাপলো, চোখ দুটা একটু সঙ্কচিত হ'য়ে চঞ্চল হ'য়ে উঠলো; কিন্তু পরাণ-বাবু সই ক'রে দিয়ে পরবর্তী কাগজে সই করবার প্রতীক্ষায় কলম তুলে নিতেই রামঘাটের মুখ উজ্জ্বল হ'য়ে উঠলো, সে তাড়াতাড়ি ক্ষিপ্ৰ হস্তে সেই কাগজগুলো সরিয়ে কতকগুলো বিল্ ইন্ভয়েস্ পরাণ-বাবুর সামনে ধ'রে দিলে, সেগুলো সই হ'লে রামঘাট আবার পূর্কের গায় একতাড়া কাগজের শেষ পৃষ্ঠাটা পরাণ-বাবুর সামনে ধরলে; এবং পরাণ-বাবু সেটাতেও না দেখে

সই ক'রে দিলেন। তার পব রামঘাটু কয়েকখানা চেক সই করিয়ে নিতে লাগলো, এবং পরাণ-বাবু সই করবার অবসরে সে নিজের সাফাই স্বরূপ ব'লে যেতে লাগলো কোন্ চেকে কতো টাকা কোন্ পাওনাদারকে দেবার জন্য সে পরাণ বাবু স্বাক্ষর নিচ্ছে।

সমস্ত কাগজ-পত্রে পরাণ-বাবু সই হ'য়ে যেতেই রামঘাটু সমস্ত কাগজপত্র গুটিয়ে নিয়ে উঠে দাঁড়ালো। এবং বললে—এখন তবে আসি, আপিস যেতে হবে...

পরাণ-বাবু উদাস ভাবে বললেন—আচ্ছা।

রামঘাটু ঘর থেকে বাইরে বেরিয়ে গিয়েই দুটি তাড়া ডেমি কাগজে লেখা দলিল, কাগজ-পত্র থেকে স্বতন্ত্র ক'রে নিয়ে, ভাঁজ ক'রে নিজের কোটের ভিতরকার বুক-পকেটে পুরে রাখলে। তার পর আবার পরাণ-বাবুর ঘরের দিকে ফিরে চললো।

রামঘাটুকে প্রত্যাবৃত্ত হ'তে দেখে পরাণ-বাবু জিজ্ঞাসু দৃষ্টিতে রামঘাটুর মুখের দিকে তাকালেন।

রামঘাটু ঘরে প্রবেশ ক'রে বলতে লাগলো—থাকোহরি আমাকে একখানা চিঠি লিখে গেছে; সে চিঠিখানা আপনার দেখা দরকার। কিন্তু এখন আপনার মানসিক অবস্থা যে রকম, তাতে মানসিক উদ্বেগ অশান্তি বৃদ্ধি হয় এমন বিষয় আপনার কাছে উপস্থিত করতেও ইচ্ছা হয় না, কষ্টও হয়।

পরাণ-বাবু কোনো উদ্বেগ প্রকাশ না ক'রে ধীর ভাবেই বললেন—হরির চিঠি? কই? দেখি.....

রামযাদু পকেট থেকে একখানা চিঠির মুখ-ছেঁড়া খাম বাহির ক'রে পরাণ-বাবুর হাতে দিলে।

পরাণ-বাবু খাম হাতে নিয়ে দেখলেন যে, চিঠি ডাকে পাঠানো। তিনি খামের ভিতর থেকে চিঠি বাহির করতে করতে রামযাদুকে বললেন—বসুন।

রামযাদু মুখ কাচমাচু ক'রে বললে—আজ্ঞে থাক, আমাকে এখনই যেতে হবে ...

পরাণ-বাবু আর কিছু না বলে থাকোহরির চিঠি পড়তে লাগলেন—

শ্রীচরণকমলে—

ভক্তি-কৃতজ্ঞতা পূর্ণ অসংখ্য প্রণাম পূর্বক নিবেদন, মহাত্মন, আপনার কাছে আমি অশেষ প্রকারে উপকৃত। আপন হতেই আমার যতো কিছু উন্নতির সূত্রপাত, কর্তার আশ্রয় পেয়ে আমি বর্তে গিয়েছিলাম। কিন্তু কর্তা আর গিন্নি-মা আমাকে অহেতুক স্নেহ করেন নি, তাঁদের স্বার্থবুদ্ধি তাঁদের স্নেহকে ক্ষুণ্ণ খর্ব ক'রেছিলো—তাঁরা চেয়েছিলেন তাঁদের বিদিকিচ্ছ কুচ্ছিত মেয়েটাকে আমার ঘাড়ে চাপিয়ে দিয়ে নিজেরা কণ্ঠাদায় থেকে নিষ্কৃতি পেতে ও আমার জীবনটাকে চির-অভিশপ্ত করতে। তাঁরা বুঝেছিলেন যে, তাঁদের ছিরি-ছাঁদ-বিহীনা কণ্ঠাকে অগাধ টাকার লোভেও কেউ সহজে বিবাহ করতে চাইবে না, লোভে প'ড়ে বিবাহ করলেও তার স্বামী কোনোদিন তাকে ভালো বাসতে পারবে না। তাই তাঁরা বাড়ীতে পোষা আমারই ঘাড়ে

ঐ দুর্দৈব চাপাতে সঙ্কল্প ক'রেছিলেন। মনে ক'রেছিলেন বহুদিনের একত্র বাসের ফলে তাঁদের কণ্ঠার বীভৎস কুশ্রীতা আমার অভ্যাসের বশে সহ্য হ'য়ে যাবে এবং আমি কণ্ঠার পিতামাতার প্রতি কৃতজ্ঞতার ভক্তিকে কণ্ঠার প্রতি প্রীতিতে পরিণত ক'রে ফেলবো, কিন্তু তাঁদের সেই উদ্দেশ্য আমার কাছে স্পষ্ট প্রতিভাত হওয়াতে তাঁদের এই স্বার্থবুদ্ধির চাণক্যনীতি আমার মনকে বিরূপ ও তিক্ত ক'রে তুলেছিলো ; আমার মনের কৃতজ্ঞতা বিরাগে পরিণত হয়েছিলো। আমি কোনো রকমে মনোভাব দমন ক'রে ছিলাম, কিন্তু আপনার তীক্ষ্ণ দৃষ্টি থেকে তা গোপন করতে পারি নি। আপনি বোধ হয় আমার মনের ভাব জানতে পেরেই আমাকে বারম্বার বলেছেন, কৃষ্ণকলি কালো কুৎসিত হ'লেও তাকে বিবাহ ক'রে ভালোবাসা আমার কর্তব্য। তার পর বেঙ্গল গ্রাশিয়াল ব্যাঙ্ক, বঙ্গলক্ষ্মী কটন-মিল আর মেডিকেল কলেজের চুরির মামলার কথা কাগজে প'ড়ে আমার মগজে যখন নানা রকম চিন্তা জোট পাকাচ্ছিলো তখনও আপনি আমাকে সে-রকম প্রবঞ্চনাময় চুরি করবার সঙ্কল্প থেকে বিরত থাকবার জ্ঞান বহু উপদেশ ও শাস্ত্রের দোহাই দিয়েছেন ; তা'তে ফল হ'লো এই যে, আমার উদ্দেশ্য ও সঙ্কল্প যা অস্পষ্ট অনির্দিষ্ট ছিলো তা আপনার কথায় আর উপদেশে সুস্পষ্ট ও নির্দিষ্ট হ'য়ে উঠলো। আমি স্থির করলাম জীবনকে চির-অভিশাপ থেকে মুক্ত করবার এই সুযোগ ত্যাগ করা নৈব নৈব চ। আমি আমাদের আপিসের একখানা তুলার বিলের দক্ষিণ দু লক্ষ সাতান্ন হাজার টাকার

একখানা চেক কর্তার নামে বাক্স থেকে ভাঙিয়ে নিয়েছি এবং ইতিমধ্যে বিদেশে যাবার পাসপোর্টও জোগাড় ক'রে নিয়েছি। আমি জন্মের মতন ভারতবর্ষ থেকে পালিয়ে চললাম; বিদেশেই মনের মতন সুন্দরী একটিকে বিবাহ ক'রে সেই দেশেই বাস করবো। কোথায় চললাম সেই কথাটি বলবো না; মাকেও আমার মংলবের বিন্দুবিসর্গ জানাই নি, তাঁকে কিছু টাকা দিয়ে দেশে পাঠিয়ে গেলাম। আমি কর্তার কাছে অনেক উপকার পেয়েছি; তাঁর শোকের সময় তাঁকে হঠাৎ এই খবর দিতে পারলাম না; আপনিই অবসর বুঝে তাঁকে জানাবেন। তিনি তো আমাকে তাঁর সমস্ত সম্পত্তিই কন্যার সহিত দিতে প্রস্তুত ছিলেন; আমি তাঁর কন্যাটিকে বাদ দিয়ে, তাঁর কাছেই রেখে, মাত্র যৎকিঞ্চিৎ পাথেয় নিয়ে স'রে পড়লাম। কর্তা তো অজস্র দাতা; তিনি মনে করবেন আমাকে টাকাটা দান ক'রেছেন; স্পেকুলেশনে তো টাকা লোকসান হয়, মনে করবেন জামাই-ধরা ব্যবসায়ে কিছু টাকা মারা পড়লো। আর তাঁকে বলবেন যে, না দেখে শুনে কোনো কাগজপত্রে যেনা আর সই না করেন। আমার শেষ প্রণাম কর্তার ও আপনার চরণে জানিয়ে চিরবিদায় নিলাম।

চিরকৃতজ্ঞ থাকোহরি জানা।

পুনশ্চ — আমার বসবার ঘরের দেবাজের ডান দিকের টানার মধ্যে আপিসের কতকগুলো কাগজপত্র আছে বা'র ক'রে যথাবিহিত ব্যবস্থা করবেন। — থাকোহরি।

পরান-বাবু পত্রখানি পড়া শেষ ক'রে মিনিট খানেক স্তম্ভিত হ'য়ে ব'সে রইলেন, তার পর আবার পড়তে আরম্ভ করলেন, তিনি যেনো আপনার দৃষ্টি ও বোধশক্তিকে বিশ্বাস করতে পারছিলেন না। দ্বিতীয় বার পত্রখানা পড়া শেষ ক'রেও তার সন্দেহ হ'লো এ কি থাকোহরির লেখা? তিনি নিপুণ পরীক্ষকের তীক্ষ্ণ দৃষ্টি দিয়ে দেখতে লাগলেন যে ঐ হাতের লেখা কি থাকোহরির নিছের, না আর কারো জাল। তার জীবনে তিনি উপকার করতে গিয়ে অনেক প্রবঞ্চিত হয়েছেন, অনেক অকৃতজ্ঞতার আঘাত খেয়েছেন, কিন্তু এতো বড়ো প্রবঞ্চনামা অকৃতজ্ঞতা যেনো তাঁর ধারণার অতীত ব'লে মনে হচ্ছিলো।

পরান-বাবুকে নিরীক স্তম্ভিত হ'য়ে ব'সে থাকতে দেখে রামঘাটু কথা বললে—পুলিসে খবর দিলে এখনও কোনো পোটে তাকে ধরতে পারা যায়।

রামঘাটুর কথার আঘাতে পরান-বাবুর চেতনা যেনো ফিরে এলো; তিনি চম্কে উঠে বললেন—কাশীর জ্যোতিষী ঠিক গণনা ক'রে বলেছিলো, থাকোহরির সঙ্গে কৃষ্ণকলির বিবাহ হবে না, তার চেয়ে সৎপাত্রের সঙ্গে হবে। যাক, বাঁচলাম। টাকার লোভে বিয়ে ক'রে পরে যদি সে কৃষ্ণকলিকে অনাদর অবহেলা করতো, তো সে বড়ো বিষম দুঃসহ ব্যাপার হ'তো; সে এখন কেবল টাকাই নিয়েছে, কৃষ্ণকলির জীবনের স্তখ তো হরণ করে নি। এর জগুই আমি তার উপরে সন্তুষ্ট। মুখুজ্জ মশায়, আপনি লোক-চরিত্রজ্ঞ; আপনি আমাকে অনেক আগেই

সাবধান করেছিলেন, কিন্তু আমি তখন আপনাকে অতি-সাবধানী সন্দিক্চরিত্র মনে করেছিলাম। সে জন্ত আমিই দোষী ; থাকোহরির কোনো দোষ নেই।

রামঘাট্ অলক্ষণ অবাক্ হ'য়ে পরাণ-বাবুর মুখের দিকে তাকিয়ে থেকে বল্লে—থাকোহরির দোষ নেই ! অতোগুলো টাকা আপনি তাকে অম্নি ছেড়ে দেবেন ? পুলিসে খবর দিলে

পরাণ-বাবু দীর্ঘনিশ্বাস চেপে বল্লে—আমি জীবনে সকলের ভালো করবার, সুখ-স্বাচ্ছন্দ্য বৃদ্ধি করবারই চেষ্টা করেছি, কাউকে কোনো রকমে উৎপীড়ন করতে ইচ্ছাও করিনি ; জীবনের এই শেষ অবস্থায় যাকে পুত্র-তুল্য স্নেহ ক'রেছি তার পীড়া ঘটাতে পারবো না। যাক্ সে যেখানে খুশী, সুখে থাকুক।

রামঘাট্ পরাণ-বাবুর মহত্বের অত্যাচ্ছতার নাগাল ধরতে না পেরে বিস্ময়ে সন্ত্রমে পূর্ণ হ'য়ে বল্লে—কিন্তু আপিসের এতো টাকা.....!

পরাণ-বাবু মুহূর্ত্ কাল চূপ ক'রে থেকে বল্লে—এখন আপনি এ কথা কাউকে বলবেন না ; আমি টাকাটা দু-তিন দিনের মধ্যেই শোধ ক'রে দেবো ; ব্যাঙ্কে আমার লাখ দুই টাকা জমা আছে ; এই বাড়ী খানার দাম হাজার পঞ্চাশ হবে, আমি আজই দালাল লাগিয়ে বিক্রির ব্যবস্থা করছি, আপনিও একটু চেষ্টা দেখবেন, দশ পাঁচ হাজার কম হ'লেও ছেড়ে

দেবো; বাঁশতলা গলির বাড়ীটারও দাম বিশ-পঁচিশ হাজার হবে.

রামযাদু আশ্চর্য হ'য়ে ব'লে উঠলো—তা হ'লে তো আপনার সর্বস্বই গেলো! থাকলো কি?

পরান-বাবু ম্লান হাসি হেসে বললেন—থাকলো মান, মুখুজে মশায়, থাকলো ইজ্জৎ.

পরান-বাবুর এই কথায় রামযাদুর মনে শ্রদ্ধার সঞ্চার হ'লো না, উন্টে উদয় হ'লো অবজ্ঞা—লোকটার বৈষয়িক বুদ্ধি যে এতো কাঁচা, তা তার আগে জানা ছিলো না। রামযাদু বললে—কিন্তু পরের চুরির গুনাহগারী আপনি দিতে যাবেন কেনো? সাহেবদের ব'লে দিন না যে থাকোহরি চুরি ক'রে পালিয়েছে। তার পর তাদের প্রাণ যা চায় তারা করুকগে!

পরান-বাবু বললেন—মুখুজে মশায়, আপনি ভুলে যাচ্ছেন যে, থাকোহরিকে আমি নিযুক্ত ক'রে দায়িত্বের কাজ দিয়েছিলাম, আমি তার জামিন ছিলাম।

রামযাদু বললে,—কিন্তু জামানতনামা তো লেখা-পড়া কিছু নেই?

পরান-বাবু হেসে বললেন—মুখের কথাও কারো কাছে নেই।

রামযাদু অধিকতর আশ্চর্য হ'য়ে চক্ষু বিস্ফারিত ক'রে বললে—তবে?

পরান-বাবু ম্লান মুখে হেসে বললেন—তবে অ-বলা একটা

বোঝাপড়া আছে যে আমার সকল কাজের জ্ঞান আমি দায়ী।

রামযাদু পরাণ-বাবুর মহৎচরিত্রের ধাধায় প'ড়ে বুলে—
কিন্তু সর্বস্ব খোয়ালে কৃষ্ণকলির জ্ঞান কি থাকবে ?

পরাণ-বাবু ক্ষণকাল গম্ভীর হ'য়ে চিন্তা ক'রে বুলেন—
থাকবে তার পিতার সত্য-রক্ষার স্বকৃতি, আর আপনাদের
দশ জনের আশীর্বাদ। টাকা দিয়ে বর কেন্‌বার সঙ্কল্প ত্যাগ
করলাম। ধনগর্বে মনে ক'রেছিলাম স্বখ-সৌভাগ্য প্রীতি-
ভক্তিও বুঝি টাকাতেই কিন্তে পাওয়া যায় ! সে ভুল থাকোহরি
ভেঙে দিয়ে গেছে। সন্তান-বাৎসল্য অন্ধ ; তাই আমাদের
চোখে মেয়ের কুরূপ স্পষ্ট হ'য়ে ধরা পড়ে নি ; আজ থাকোহরি
সে অন্ধতাও মোচন ক'রে দিয়েছে। মেয়েকে আমি লেখাপড়া
শেখাবো, বয়স বেশী হ'লে বয়োধর্ম্মে সে যদি কাউকে ভালোবেসে
তার ভালোবাসা আকর্ষণ করতে পারে, আর সেই ব্যক্তি যদি
কুরূপের অন্তরালে সদৃগুণের পরিচয় পেয়ে আমার মেয়েকে
প্রার্থনা করে, তা হ'লে মেয়ের বিয়ে হবে, নয় তো মেয়ে আমরণ
কুমারীই থাকবে।.....

রামযাদু এ-কথার উত্তরে বুলবার কিছু খুঁজে না পেয়ে অবাক
হ'য়ে দাঁড়িয়ে রইলো।

পরাণ-বাবু ক্ষণকাল চূপ ক'রে থেকে বুলেন—আচ্ছা,
আপনি এখন আসুন মুখুজ্জ মশায়। আমার প্রত্যেক মুহূর্ত্ত
এখন দরকারী।

রামঘাট মুখ কাচুমাচু ক'রে ঘর থেকে বাহির হ'য়ে চল্লো, কিন্তু পরাণ-বাবুর দিকে পিছন ফিরতেই তার মুখ উজ্জ্বল ও দৃষ্টি চঞ্চল হ'য়ে উঠলো ; ঘরের দরজা পার হ'য়েই তার মনে হ'লো —কেওটের পো এইবার কাবে প'ড়েছেন ! জলের দামে বাড়ী দুখানা বিকিয়ে যাবে । দেখি আমি যদি দাঁও মারতে পারি । আমাকে যে দুখানা বাড়ী ও-ই দিয়েছে, সেই দুখানা বন্ধক রেখে টাকা তুলে অন্ততঃ একখানা বাড়ী কিনে ফেলতে হবে.....তা হ'লে মাছের তেলে মাছ-ভাজা হবে !

রামঘাট রাস্তায় বেরিয়েই একখানা ট্যাক্সি-গাড়ী ভাড়া ক'রে ছুটে চল্লো ; তা'র সময় নেই, যথাসম্ভব সহর তা'র সব কাজ চুকিয়ে ফেলতে হবে ।

রামঘাট ট্যাক্সি ছুটিয়ে সব-প্রথমে গেলো সাহেবদের বাড়ী । তাকে অসময়ে ব্যস্ত হ'য়ে আসতে দেখে সাহেবেরা জিজ্ঞাসা করলে—হ্যালো রায় বাহাদুর, এমন অসময়ে কি কাজ ?

রামঘাট ব্যস্ত-সমস্ত ভাবে বললে—থাকোহরি ফেরার হয়েছে !.....

সাহেবেরা আশ্চর্য্য ও ভীত হ'য়ে বললে—আ ! কে বললে...?

থাকোহরি যে তাকে চিঠি লিখে পালিয়েছে এ-কথা গোপন ক'রে বললে—আমি এই মাত্র কতকগুলো চিঠিপত্র সই করাতে পরাণ-বাবুর বাড়ীতে গিয়েছিলাম, তাঁর কাছেই শুনে এলাম।

সাহেবেরা উৎসুক হ'য়ে জিজ্ঞাসা করলে—পরাণ-বাবু কি বললেন.....?

—তিনি বললেন, এ-কথা এখন কাউকে বোলো না; থাকোহরি করমচাঁদ ধরমচাঁদ ঠাকরসীর তুলার চেক আমাকে দিয়ে সই করিয়ে নিয়ে টাকা ক্যাশ করেছে; আমি চুপিচুপি ঐ টাকাটা আপিসে পুরিয়ে দেবো.....

—ঠাকরসীর তুলার বিল তো অনেক টাকার! সব টাকাই কি থাকোহরি নিয়ে পালিয়েছে? কিন্তু পরাণ-বাবুকে দিয়ে চেক সই করলে কেমন ক'রে?

—পরাণ-বাবু তো এখন পত্নীশোকে বিহ্বল হ'য়ে আছেন, কোনো কাজকর্মই দেখেন না, তাতে আবার থাকোহরিকে অত্যন্ত বিশ্বাস করতেন.....

—আপনি রায় বাহাদুর, থাকোহরির দিকে নজর রাখতে আমাদের আগেই ব'লে সাবধান করেছিলেন; আমরা আপনার সেই উপদেশ গ্রাহ্য করি নি, তথাপি আমরা আপনাকে ধন্যবাদ জানাচ্ছি। আজও আপনি সব প্রথমে দৌড়ে এসেছেন আমাদের খবর দিতে, এর জন্য আমরা আপনার কাছে কৃতজ্ঞ।.....আচ্ছা, আমরা এখনই আপিসে যাচ্ছি, এবং দেখছি কতো টাকা

থাকোহরি নিয়ে ভেগেছেপুলিসেও তো খবর দিতে হবে...
আপনিও একটু সকাল-সকাল আপিসে যাবেন রায়-বাহাদুর,
আপিসের সমস্ত হিসাব-নিকাশ অভিট করাতে হবে, আমাদের
অডিটারদের এখনি ফোন করছি.....

রামযাদু যে-আজ্ঞে ব'লে খুব নীচু হ'য়ে লম্বা হাতে সেলাম
ক'রে বিদায় হ'লো।

ট্যাক্সি ছুটিয়ে রামযাদু গেলো মাড়োয়ারী ধনী ব্যাংকার
মূলজী শেঠীর কাছে।

মূলজী রামযাদুকে দেখেই হেসে অভ্যর্থনা করলে—আস্মেন
রায়-বাহাদুর, কী মনে করিয়ে আসিয়েসেন? সবেরে আপকে
দর্শন মিললো হামি তো বহুৎ ভাগমান। আপনকার কোন্
খিদমতে হামি লাগতে পারি?

রামযাদু জুতা খুলে ফরাসের উপর বসতে বসতে বললে—
আমার হাজার পঞ্চাশ ষাট টাকা চাই শেঠজী। আজই
এখনই। পরাণ-বাবু বাড়ী বিক্রি করবেন, সেই বাড়ী আমি
কিনুবো।

মূলজী আশ্চর্য হ'য়ে জিজ্ঞাসা করলে—পরাণ-বাবু বাড়ী
বিক্রি করিয়ে ফেলবেন? কেনে?

রামযাদু বলতে লাগলো—বৌ ম'রে গেছে : এখন তো শুধু
নিজে আর মেয়ে; অতো-বড়ো বাড়ী রেখে আর কি করবেন?
আর চাকরীও করবেন না, তীর্থে তীর্থে গিয়ে রাস করবেন
বোধ হয়.....

মূলজী বললে—হাঁ হাঁ, এ বাত মুনাসিব আছে ! তীরথ-বাস বহুত ভালো !

রামঘাট্ মনে মনে বললে—তোমার গুপ্তির মাথা ! তীরথ-বাস ভালো তো তোদের আবু পাহাড় ছেড়ে কলকাতায় এসে টাকার কুমীর হ'য়ে ব'সে আছিষ্ কেনো ?.....

তার পর সে প্রকাশে বললে—টাকাটা হয় আমার ফড়িয়া-পুকুরের বাড়ী আর বালিগঞ্জের অল্পপূর্ণা-আশ্রম বাঁধা রেখে দেবেন, নয় তো পরাণ-বাবুর বাড়ীটা আপনি বেনামীতে কিনে নিয়ে বাঁধা রাখুন, আমি টাকা জোগাড় ক'রে বাড়ী খালাস ক'রে নেবো ।

মূলজী বললে—উ তো মুনাসিব বাত আছে ! হামি দোনোমে রাজী ! আপনকার হাওনোট ভি চলতে পারে । টাকা কি এখনই চান ?

রামঘাট্ ঘাড় নেড়ে ইঙ্গিত করলে দেখে শেঠজী বলতে লাগলো,—তো চলেন গদীমে । আপকে সাথ গাড়ী-উড়ী কুছু আসে ?

রামঘাট্ বললে—হ্যাঁ আছে, ট্যাক্সি । তবে আপনি একটু মেহেরবানী ক'রে তকলিফ্ উঠান... ..

“চলেন.....” ব'লেই শেঠজী হাঁক দিলেন—এ হরকরাম, হমরা কুর্ভা ওর চদর ওর জুতী তো লাও.....

মিনিট দুই পরে এক ভৃত্য একটা গিলে-করা সত্ত ধোপার-পাট-ভাঙা আন্ধির পাঞ্জাবী, রেশমী ও জরীর পাড় দেওয়া

একখানা উড়ানী ও এক জোড়া সেলিমশাহী ছুতা এনে মূলজীকে দিলে। মূলজী প্রস্তুত হ'তেই রামযাদু তাকে নিয়ে প্রশ্নান করলে।

মূলজীর গদী থেকে টাকা নিয়ে মূলজীকে সঙ্গে ক'রে রামযাদু ট্যাক্সি ছুটিয়ে পরাণ-বাবুর বাড়ীতে গেলো।

রামযাদু পরাণ-বাবুর ঘরে গিয়ে বললে—আমি মূলজী শেঠীকে গিয়ে বলতেই ও আপনার বাড়ী কিন্তে রাজী হয়েছে। ও টাকা নিয়ে এসেছে। এটর্নীকে ফোন করেছে, তিনিও এলেন ব'লে, এখনই লেখাপড়া হ'য়ে যাবে, আর আজই রেজেষ্টারীও হ'য়ে যাবে।

পরাণ-বাবু আশ্বস্ত হ'য়ে বললেন,—আপনি আমাকে বাঁচালেন মুখুজ্জ মশায়! আপনার ঋণ আমি জীবনে শোধ করতে পারবো না।

রামযাদু মুখ কাচুমাচু ক'রে বললে—এর জন্তে আপনি এতো ব্যস্ত হচ্ছেন কেনো, এ তো আমার কর্তব্য, আপনার কাছে কৃতজ্ঞতার ঋণে তো আমার মাথার চুল পর্যন্ত বিকিয়ে আছে, তারই কিঞ্চিৎ পরিশোধ করবার চেষ্টা করছি।.....শেঠজীকে নীচে বসিয়ে এসেছি.....

পরাণ-বাবু ব্যস্ত হ'য়ে উঠে দাঁড়িয়ে কোমরের কাপড়ের ঢল্কা খুঁট এঁটে ক'ষে গুঁজতে গুঁজতে বললেন—চলুন, চলুন।

পরাণ-বাবু নীচের ঘরে গিয়ে প্রবেশ করতেই মূলজী ত্রস্ত

ভাবে উঠে দাঁড়িয়ে দুই হাত জোড় ক'রে সামনের দিকে অল্প মাথা ঝুঁকিয়ে বললে—আপনকার জোকর মোতের কথা শুনিয়েসে বাবুজী। বড়ী আফশোষকী বাত ! আদমীর নসিবই এয়সা... রামজী ললার্টমে জো লিখা হায়.....রায়-বাহাদুর বোল্লেন আপনি বাড়ী উড়ী বিকিরি ক'রে তীরথ-বাস করতে যাবেন ! সো তো বহুং মুনাসিব হিচ্ছা !

পরান-বাবু শেঠের কথা শুনে রামযাদুর উপর খুশী হ'য়ে উঠলেন—রামযাদু যে তাঁর বাড়ী বেচার প্রকৃত কারণ প্রকাশ করে নি, এবং কৌশলে তাঁর মানসভ্রম বজায় রেখেছে, এতে তাঁর মন রামযাদুর প্রতি কৃতজ্ঞতায় পূর্ণ হ'য়ে উঠলো। এবং তীর্থবাসের কথাটা তাঁর মনে উদিত হ'বা মাত্রই তিনি পরম আগ্রহে বল্লেন—হ্যাঁ শেঠজী, আমি তীর্থবাসই করবো ! বড়ো বয়সে আর সংসারে জড়িয়ে থাকবো কা'র জন্তে ?

শেঠজী খুব জোরে দীর্ঘনিশ্বাস ফেলে বললে—আপকা লেড়কীর সাদী হোয়েসে ?

পরান-বাবু বল্লেন—না, সেটা হ'য়ে গেলেই আমার অবশিষ্ট একটা বাঁধন কেটে যায়।

এমন সময় শিবাপ্রসাদ দত্ত এটর্নী তাঁর এক কেরানীকে সঙ্গে ক'রে দলিল লেখবার কাগজপত্র নিয়ে ঘরে এসে প্রবেশ করলে।

মূলজী এটর্নীকে দেখেই বললে—এই যে এটর্নী বাবুজী

আসিয়েসেন। হামি পরাণ-বাবুর দুটা বাড়ী কিন্বো, বাকী বেনামী কিন্বো.....রায়-বাহাদুরের নামে কিন্বো.....

পরাণ-বাবু রামঘাতুর দিকে একবার অপাঙ্গে দেখে নিয়ে বললেন—“বেশ!” তাঁর মন সংশয়ে সন্দেহে আন্দোলিত হ’য়ে উঠলো—শেঠ রামঘাতুর বেনামীতে বাড়ী কিন্ছে কেনো? এর মধ্যেও রামঘাতুর নিশ্চয় কোনো কৌশল আছে! নিশ্চয় রামঘাতু তাঁর বাড়ীখানি একেবারে বেহাত হ’য়ে না যায়, তার জগে কোনো গোপন উপায় অবলম্বন করেছে! এই কথা মনে হ’তেই পরাণ-বাবুর মন রামঘাতুর প্রতি প্রীতি ও কৃতজ্ঞতায় উদ্বেলিত হ’য়ে উঠলো। তিনি প্রসন্ন উজ্জ্বল দৃষ্টিতে রামঘাতুর দিকে চাইলেন।

রামঘাতুর মুখ অপ্রতিভ হ’য়ে শুকিয়ে উঠলো, সে তাড়াতাড়ি মাথা হেঁট করলে; তার মনে আশঙ্কা হ’লো—কেওটের পো বোধ হয় আমার চালবাজী ধান্নাবাজী ধ’রে ফেলেছে!

রামঘাতুকে মুখ কাঁচুমাচু ক’রে মাথা নীচু করতে দেখে’ পরাণ-বাবুর মুখ ও মন আরো প্রসন্ন হ’য়ে উঠলো—মুখুজ্জে মশায়ের চরিত্র কী স্নিগ্ধ অনাড়ম্বর নিরহকার! তিনি বিনয় মূর্তিমান! লোকের মঙ্গল ক’রে প্রশংসা পেতে পর্য্যস্ত চান না; কৃতজ্ঞতার দৃষ্টি পর্য্যস্ত সহ্য করতে পারেন না, সঙ্কোচে মুষ্ড়ে যান!

মূলজী বললে—রায়-বাহাদুর আপনকার নাম লিয়ে যেই বোললেন হামি ঐসা তুরন্ত্ চলিয়ে আলাম রুপেয়া লিয়ে। আপনকার জরুরী কাম, হামী ওর দালাল উলাল দিলোম না,

যাচাই ভি করলোম না, দরাদরী ভি করতে হিচ্ছা নাই।
দরদাম আপনিই একটা মুনাসিব সম্বন্ধে ঠিক ক'রে দিবেন

পরান-বাবু বললেন—আমার এই বাড়ী আর বাঁশতলার
বাড়ী সময় নিয়ে বেচলে এক লাখ টাকা স্বচ্ছন্দে পাওয়া যেতে
পারে। আপনি এখন আমাকে ষাট হাজার টাকা দিলে আমার
কাজ মেটে।

শেঠ বললে—আচ্ছা বাবুজী, আপনার কোথা ভি থাক্,
হামের কোথা ভি থাক্, হামি পচাস হাজার এক রুপেয়া দিবো।

পরান-বাবু তৎক্ষণাৎ বললেন—আচ্ছা, তাই সই।

পরান-বাবুর এই উক্তি শুনেই রামঘাট মনের খুশী মুখের
কাঁচুমাচু ভাবে চাপা দিয়ে বললে—আমি তা হ'লে এখন আসি।
আপিস যেতে হবে.....

পরান-বাবু তার দিকে তাকিয়ে বললেন—আচ্ছা। লেখা-
পড়াটা হ'লে দলিলটা রেজেষ্টারী করিয়ে আমিও যতো শীগগির
পারি আপিসে যাচ্ছি। কিন্তু এ কথা এখন.....

রামঘাট ব'লে উঠলো—সে-কথা আমাকে আপনার বলতে
হবে না।...তবে আমি আসি শেঠজী...শিব-বাবু নমস্কার.....

রামঘাট ঘরে উপস্থিত তিনজনের কাছে এক নমস্কারে বিদায়
নিয়ে প্রস্থান করলো।

তার ট্যাক্সি ছুটে চললো বালিগঞ্জ অন্নপূর্ণা-আশ্রমে।

সে স্ত্রীর কাছে গিয়েই উৎফুল্ল স্বরে বললে—কেল্লা কতে রে

পাগলী, কেলা ফতে ! অসমঞ্জ মুখ্জের গল্পের জগদীশ লাহিড়ী যেমন বলেছে বীট দি ফোট উইলিয়ম, সেই রকম আর কি ! খাসা লোক সেই জগদীশ লাহিড়ী ! আমাকেও হার মানিয়েছে ! তার কাছে আমি অনেক কারচুপি শিখতে পেরেছি !

মনমোহিনী বিশ্বয়ে কৌতূহলে নির্ঝাক্ হ'য়ে উৎসুক দৃষ্টি মেলে স্বামীর মুখের দিকে চেয়ে রইলো । রামঘাট কোটের ভিতরের বুক-পকেট থেকে দু-তাড়া কাগজ বাহির ক'রে বললে— পরাণ-বাবু এই দলিলে সহ ক'রে তাঁর স্থাবর অস্থাবর সমস্ত সম্পত্তি আমাকে দান ক'রেছেন, আর এই দলিলে বিক্রি করেছেন ; এখন আমি যে দলিলটা স্মবিধা বুঝবো সেইটে দিয়ে সম্পত্তি দখল করবো । কিন্তু বাড়ী দুটো ছেড়ে দিতে হ'লো, লোকটার অনেক খেয়েছি, একেবারে মূলে হাভাত করতে পারলাম না । একবার মনে ক'রেছিলাম বোকা মাড়োয়ারীটাকে দিয়ে বাড়ী দুখানা কেনাই, তার পর আমার স্বয় দাবী ক'রে বেটাকে দি কলা খাইয়ে । কিন্তু শেষে ভেবে দেখলাম, তাতে আমার দুর্নাম হ'য়ে যেতে পারে । তাই বাড়ী দুখানার লোভ সামলাতে হ'লো । এখন কেওটের পো পটল তুললে হয়, তার পর কালপেঁচী মেয়েটাকে যৎকিঞ্চিৎ দিয়ে বিয়ে দিয়ে দূর ক'রে দিলেই রামঘাটর রামরাজহি রে পাগলী রামঘাটর রামরাজহি ! আপিসের বড়ো-বাবুও হবে এই রামঘাট ! সাহেব বাঁদর দুটোও রামঘাটর মুঠোর মধ্যে এসে পড়েছে ! এখন কেওটের বাচ্চাকে

চটপট ভবযন্ত্রণা থেকে সরানো যায় কি ক'রে। বুড়ো মেরে তো খুনের দায়ে পড়া যায় না !

মনমোহিনী ভীত হ'য়ে ব'লে উঠলো—না গো না, ও-সব সর্বনেশে মৎলব মনের কোণেও ঠাই দিয়ো না। যা অন্নপূর্ণো এম্নই মনোবাঞ্ছা পূর্ণো করবেন—আমরা এতো কায়মনোবাক্যে তাঁর সেবা করছি।

রামযাদু বিরক্ত স্বরে বললে—দেবতার হাতে কাজের ভার দিয়ে রাখলে বুড়ো দেরী হয় রে ক্ষেপী ! নিজের হাতে চটপট কাজ সারা যায় !

মনমোহিনী শঙ্কাকুল কণ্ঠে বললে—না গো না, তোমার নিজের হাতে আর কোনো কাজ সেরে কাজ নেই। আর দুটো দিন সবুই করো না ; বুড়ো যে শোগ পেয়েছে, তাতে আর ক'দিনই বা বাঁচবে ?

রামযাদু বললে—তোমার মুখে পুরুষের এই প্রশস্তিটা শুন্তে আমার কানে মন্দ লাগলো না। কিন্তু অনেক বুড়ো যে আবার কেঁচে ছুঁড়ি বিয়ে ক'রে ঘরকন্না পাতে ! সহমরণে যাওয়া যে ইংরেজ গভমেন্ট বন্ধ ক'রে দিয়েছে।

মনমোহিনী বললে—তা করুক। তুমি নিজে অনেক কীর্তি করেছো, এখন এই শেষ কাজটা দেবতার হাতেই দিয়ে রাখো।

রামযাদু দীর্ঘনিশ্বাস ফেলে বললে—নাচার হ'য়ে দিতেই হবে। কিন্তু মোনো, তুমি রোজ ছবেলা হরির লুট.....না না, হরি আবার বোষ্টম মানুষ, প্রাণীবধে তাঁর আপত্তি হ'তে পারে...আর

আপত্তিই বা কোথায় ?.....দৈত্য দানব তো কম সাবাড় করেন নি !.....তা যাই হোক, তাঁকেও ডেকো, আর মা-কালীর কাছে পাঁঠা মোষ মানত কোরো যেনো পরাণের প্রাণটা চট্ ক'রে চম্পট দেয় !

মনমোহিনী বিরক্তির ভাণ ক'রে বললে—না ; ও-সব অমঙ্গল কামনা আমি করতে পারবো না ।

রামযাদু বললে—আহা ! আমার সময়ের অত্যন্ত অভাব ব'লেই তো সহধর্মিণীর উপর বরাত দিচ্ছি । পরের অমঙ্গল না হ'লে নিজের মঙ্গল হয় কৈ ?.....

মনমোহিনীকে আবার কিছু আপত্তি তুলতে উত্ততা দেখেই রামযাদু তাকে বাধা দিয়ে তাড়াতাড়ি বললে—আচ্ছা, এখন তর্ক থাক্, আমাকে এখনই আপিস যেতে হবে । ঝাঁ ক'রে মাথায় দু-ঘটা জল ঢেলে আসি, তুমি বামুনঠাকুরকে ভাত দিতে বলো.....

রামযাদু ও মনমোহিনী ঘরের দু-দিকের দরজা দিয়ে দু-দিকে নিষ্ক্রান্ত হ'য়ে গেলো ।

পরাণ-বারু বেলা দ্বিপ্রহরে আপিসে গিয়েই দেখলেন দুজন অভিটর আপিসের সমস্ত হিসাবের খাতা নিয়ে অভিট করতে লেগে

গেছে। এই ব্যাপার দেখেই তাঁর মুখ শুকিয়ে গেলো। থাকো-
 হরির চুরি ধরা পড়া অনিবার্য; তাঁরও অপমান হওয়া
 অনিবার্য। তাঁর মনে হ'লো সমস্ত আপিস যেনো থমথম করছে,
 সকলে যেনো তাঁর দিকে বার বার আড় চোখে তাকাচ্ছে।
 পরাণ-বাবু সঙ্কোচে কুণ্ঠায় অপ্রতিভ ভাবে চোরের মতন নিজের
 জায়গায় বসতে যাচ্ছিলেন, এমন সময় রামযাদু তাড়াতাড়ি
 তাঁর কাছে এসে মুখ খুব কাচুমাচু ক'রে বললে—সাহেবরা
 থাকোহরির চুরির খবর টের পেয়েছে কেমন ক'রে; তা'রা
 আপনাকে বলতে বলেছে যে, যে কদিন অডিট হবে সে কদিন
 আপনি আপিসে আসবেন না...

পরাণ-বাবুর মুখ কালো হ'য়ে উঠলো, তিনি নীরবে একবার
 রামযাদুর মুখের দিকে তাকিয়ে দরজার দিকে এগিয়ে চললেন;
 লজ্জায় অপমানে তাঁর উঁচু মাথা এমন হেঁট হ'য়ে গেলো যে, তিনি
 আর কারো দিকে চাইতে পারছিলেন না। যেখানে তিনি
 এতোদিন সিংহবিক্রমে প্রভুত্ব করেছেন, সেখান থেকে অপদস্থ
 হ'য়ে বেরিয়ে যেতে তাঁর পা যেনো ভেঙে পড়তে চাচ্ছিলো।
 তিনি কোনোমতে আপিস থেকে বেরিয়ে গিয়ে গাড়ীতে
 চড়লেন, এবং অপমানের আতিশয্যে মুহূর্তে অচেতনপ্রায় হ'য়ে
 ব'সে রইলেন।

রামযাদু পরাণ-বাবুকে চ'লে যেতে দেখেই সাহেবদের কামরায়
 গিয়ে ঢুকলো এবং সাহেবদের সেলাম ক'রে বললে—পরাণ-
 বাবু আপিসে এসেছিলেন, অডিট হচ্ছে দেখে তিনি চ'লে

গেলেন, বল্লেন, সাহেবদের বোলো যতোদিন অডিট হবে ততোদিন আমি আপিসে আসবো না।

সাহেবরা বল্লে—বেশ। তা হ'লে আজ থেকে আপনি আপিসের চার্জে থাকবেন ..

রামযাছু মাথা নত ক'রে হাত তুলে কপালে ঠেকিয়ে সেলাম করবার ছলে তার পরিতোষের হাসি ঢাকা দিয়ে সাহেবদের কাছ থেকে স'রে পড়লো এবং আপিসে ফিরে এসে পরাণ-বাবুর আসনে গিয়ে জেঁকে বসলো।

পরাণ-বাবু নিজের বাড়ীতে ফিরে গিয়েও যেনো অশ্রদ্ধ ধরা পড়ার ভয়ে সঙ্কচিত হয়ে তাড়াতাড়ি নিজের ঘরে গিয়ে ঢুকলেন, চাকর-বাকরদের দিকেও তাকিয়ে দেখতে তাঁর সাহসে কুলোচ্ছিলো না। ঘরে ঢুকে দেখলেন ক্রমকলি ঘুমিয়ে পড়েছে। কন্ঠার দিকে দৃষ্টি পড়তেই তাঁর বুক ঠেলে দীর্ঘনিশ্বাস পড়লো।

পরাণ-বাবু সেই ঘরে ব'সে একখানা চিঠি লিখলেন : নিজের উইলখানা বাহির ক'রে তাতে কিছু লিখলেন ; তার পর টেলিফোন ধ'রে আপিসে রামযাছুকে ডাকলেন।

রামযাছু টেলিফোনে সাড়া দিতেই তিনি বল্লেন—মুখুজ্জ মশায়, আপনি একবার দয়া ক'রে শীঘ্র আসুন ; আমি দীর্ঘকালের জন্ম খুব দূর দেশে চ'লে যাচ্ছি, আপনাকে আমার কিছু ভার দিয়ে যাবার আছে...

রামযাছু এই সংবাদ পেয়েই উৎফুল্ল হ'য়ে উঠলো,.....পরাণ-বাবু দীর্ঘকালের জন্ম আপিসে অনুপস্থিত থাকলে সে-ই আপিসের

বড়ো-বাবু হবে, এই কথা মনে হ'তেই সে আনন্দে উৎফুল্ল হ'য়ে বললে—আমি এখনই যাচ্ছি, আপনার সকল ভার আমি নেবো, আপনি নিশ্চিত হ'য়ে কিছুদিন ঘুরে আসুন ……

পরান-বাবু যে বিদেশে বেড়াতে যাচ্ছেন এ-কথা রামঘাট কাউকে বললে না ; তার মনে হ'লো সে যদি পরান-বাবুকে কিছুদিনের জন্য নিরুদ্দেশ যাত্রায় পাঠাতে পারে, তা হ'লে সে সাহেবদের সহজেই বুঝিয়ে দিতে পারবে যে, পরান-বাবু তহবিল ভেঙে ফেরার হয়েছে। রামঘাট তাড়াতাড়ি হাতের কাজ সেরে সাহেবদের কাছ থেকে ছুটি নিয়ে ট্যাক্সি ছুটিয়ে চললো পরান-বাবুর বাড়ীর দিকে।

পরান-বাবু রামঘাটকে টেলিফোনে ডেকেই বিছানার কাছে এসে ঘুমন্ত কৃষ্ণকলিকে একবার চুমু খেলেন ও তার মাথায় হাত রেখে অনেকক্ষণ ধ'রে তা'কে মনে মনে আশীর্বাদ করলেন। তার পর কৃষ্ণকলির বিছানার পাশে অপর একটি খাটের উপর গুয়ে তিনি একটা শিশি থেকে খানিকটা কিছু গলায় ঢেলে দিয়ে চোখ বুজলেন এবং সঙ্গে সঙ্গে তাঁর হাত নেতিয়ে বিছানার উপর ঢ'লে পড়লো।

রামঘাট যখন এসে সেই ঘরে ঢুকলো তখন দেখলে পরান-বাবু আড়ষ্ট হ'য়ে বিছানার উপর প'ড়ে আছেন, তাঁর হাতে একটা শিশি……

এই অবস্থা দেখেই প্রথমে রামঘাটর মনটা ছাঁৎ ক'রে উঠলো, মানুষের স্বাভাবিক পরার্থপরতা তা'কে উদ্বিগ্ন ক'রে

তুল্লো.....পরান-বাবু আত্মহত্যা করেছেন না কি? কী সর্বনাশ! এই জগ্গেই কি তিনি বলছিলেন যে তিনি দূর দেশে চ'লে যাবেন.....

রামযাদুর এই চিন্তার সঙ্গে সঙ্গে পরমুহূর্তেই তার মনে হ'লো যে সে একা আত্মহত্যার ঘরে রয়েছে, সে না খুনের দায়ে প'ড়ে যায়। সে অমনি চেষ্টা করে উঠলো—ওরে বোঁচা, ওরে কে কোথায় আছিস, ছুটে আয়.....

চাকরেরা দৌড়ে এলো, চেষ্টামেচিতে কৃষ্ণকলির ঘুম ভেঙে গেলো; সে-ঘরে লোক-সমাগম ও সকলের ব্যস্ততা দেখে সে ধড়মড় ক'রে উঠে বসলো এবং হঠাৎ ঘুম থেকে জেগে অবাক হ'য়ে সকলের মুখের দিকে ফেল-ফেল ক'রে তাকাতে লাগলো।

রামযাদু প্রথমেই একজন চাকরকে বললে—কৃষ্ণকলিকে এখান থেকে নিয়ে যাও...ওকে কোলে ক'রে নিয়ে বেড়াও গে...

কৃষ্ণকলিকে সরিয়ে নিয়ে যেতেই রামযাদু তাড়াতাড়ি পরান-বাবুর কাছে গিয়ে দেখলে যে, পরান-বাবুর হাতের শিশিতে লেবেলে লেখা রয়েছে পোর্টাশিয়াম সায়ানাইড!

সেই কথা ছুটো পড়বার সঙ্গে সঙ্গে রামযাদুর বুক কেঁপে উঠলো—তা হ'লে আর কোনো আশা নেই.....

তথাপি তখনই সে টেলিফোন ধ'রে পরান-বাবুর অল্পগ্রহ-ভাজন দু-তিন জন ডাক্তারকে ডাক দিলে এবং পুলিশেও খবর দিলে।

চাকরেরা জল পাখা নিয়ে এসেছিলো। রামযাদু তাদের

দিকে ফিরে স্নান মুখে বললে—আর ও-সব কি হবে, শেষ হ'য়ে গেছে.....

চাকরেরা সেইখানে ব'সে প'ড়ে হাউ হাউ ক'রে কাঁদতে লাগলো।

পরমুহূর্তেই রামঘাট্ট একটু প্রকৃতিস্থ হ'য়ে উঠলো, তার স্বার্থ-বুদ্ধি সচেতন হ'য়ে উঠলো। সে দেখলে পরাণ-বাবুর বালিশের পাশে একখানা খামের চিঠি আছে, তার উপরে তারই নাম লেখা এবং সেই চিঠির পাশে একখানা লেখা কাগজ খোলা প'ড়ে আছে। সে তাড়াতাড়ি নিজের নাম-লেখা চিঠিখানা তুলে পকেটে ফেললে এবং খোলা কাগজখানার উপর একটু ঝুঁকে পড়লে, তাতে পরাণ-বাবু লিখে রেখে গেছেন যে তিনি পত্নীশোক ও অপমানের হাত থেকে পরিত্রাণের জন্য আত্মহত্যা করেছেন।

এইবার রামঘাট্টর মুখের মলিনতা অনেকখানি কেটে গেলো। সে তাড়াতাড়ি পাশের ঘরে গেলো নিজের চিঠি পড়তে। চিঠি খুলেই রামঘাট্ট যেমন যেমন এক এক লাইন দ্রুত প'ড়ে যেতে লাগলো তেমন তেমন তার মুখ ক্রমশঃ উজ্জ্বল প্রফুল্ল উৎফুল্ল বিকশিত হ'য়ে উঠতে লাগলো। পরাণ-বাবু সেই চিঠিতে লিখে রেখে গেছেন—

শ্রীশ্রীচরণকমলেষু

প্রণামান্তে নিবেদনম্—

মুখুঞ্জ মশায়, আমি মহাযাত্রায় চলিলাম। পিতৃমাতৃহীনা বালিকা কৃষ্ণকলি রহিল, তাহাকে দেখিবেন। তাহার মাতার

অঙ্কের যে অলঙ্কার রহিল, তাহার মূল্য পাঁচ হাজার টাকা হইবে ; সমস্ত স্থাবর ও অস্থাবর সম্পত্তি বিক্রয় করিলে হাজার পঞ্চাশ টাকা পাওয়া যাইবে ; ইহা হইতে কৃষ্ণকলির গ্রাসাচ্ছাদনের ব্যয় হইয়া যাহা ~~উদ্বৃত্ত~~ থাকিবে তাহা তাহার বিবাহের সময় তাহার যৌতুক হইবে । একটি শিক্ষিত সৎপাত্র দেখিয়া তাহাকে সম্প্রদান করিবেন ।

আমার শেষ উইল আয়রন্-চেষ্টির মধ্যে রহিল । তাহাতে আমি আপনাকে কৃষ্ণকলির অভিভাবক ও অছি নিযুক্ত করিয়াছি । আপনি ব্যতীত আমার হিতাকাজী আত্মীয় বন্ধু আমার কেহ নাই । কৃষ্ণকলির মঙ্গলের জন্ত সম্পত্তি বিক্রয় বন্ধক দিবার ক্ষমতা ও অধিকার আপনার রহিল ।

আমার ঋণ কিছু নাই ; দোকানদারদের পাওনা সব চুকাইয়া চলিলাম । যদি কাহারো বাকী থাকে তবে আয়রন্-চেষ্টিতে যে নগদ দশ হাজার টাকা রহিল তাহা হইতে শোধ করিয়া দিবেন । ঐ টাকা হইতে আমার শ্রাদ্ধ করাইবেন—বেশী ঘটা করিবেন না, কেবল কাঙালী ভোজন করাইলেই আমার সন্তপ্ত আত্মা তৃপ্ত হইবে ।

আপিসের ঋণ শোধ করিবার জন্ত মূলজী মাড়োয়ারীর কাছে বাড়ী বেচার দেড় লক্ষ টাকার চেক সই করিয়া আপিসে লইয়া গিয়াছিলাম, সাহেবদের দিবার অবসর পাই নাই ; সেই চেক আপনার নামে এন্ডস্ করিয়া সই করিয়া রাখিয়া গেলাম ; আপনি তাহা আপিসের হিসাবে জমা করাইয়া দিবেন ।

আপনার উপর অনেক ভার চাপাইয়া গেলাম ; আপনি পরোপকারী ধাত্মিক মহাশয় ব্যক্তি ; আপনি আমার প্রতি অনুগ্রহ করিয়া এই ভার গ্রহণ ও সম্পাদন করিবেন এই আশা সঙ্গে লইয়া গেলাম । আপনাকে মুখে কিছু বলিয়া যাইতে পারিলাম না ; আপনি আমার মহাপ্রয়াণের আভাস পাইলে আমাকে বাধা দিতেন, এই আশঙ্কায় ।

যাহা মনে আসিল লিখিলাম । যাহা অনুক্ত রহিল তাহা আপনি নিজের বুদ্ধি বিবেচনা ও ধর্ম অনুসারে করিবেন, এই অনুরোধ ।

কৃষ্ণকলি রহিল, তাহাকে দেখিবেন ।

পরলোকের যাত্রী

প্রণত

শ্রীপরানন্দ বিশ্বাস ।

পত্র প'ড়েই রামযাদুর মুখ আনন্দিত হাশ্বে একেবারে বিকশিত হ'য়ে উঠলো । পত্র পড়া শেষ হ'তে না হ'তে সে স্নুতে পেলো বাড়ীর দরজায় মোটর-গাড়ী এসে থামলো । রামযাদু অমনি তাড়াতাড়ি পত্রখানা জামার পকেটে পূরে মুখ ম্লান ক'রে ঘর থেকে বেরিয়ে যে-ঘরে পরান-বাবুর দেহ প'ড়ে আছে সেই ঘরে গেলো । একটু পরেই ডাক্তার এসে ঘরে ঢুকলো এবং উৎকণ্ঠিত স্বরে জিজ্ঞাসা করলে—কী মুখুজে মশায় ! ব্যাপার কি ?

রামযাছু কপালে করাঘাত ক'রে বললে—আর ব্যাপার কি ?
সর্বনাশ হ'য়ে গেছে ! হাইড্রোসিয়ানিক অ্যাসিড !

ডাক্তার তাড়াতাড়ি গিয়ে পরাণ-বাবুর দেহ পরীক্ষা করতে
প্রবৃত্ত হ'লো। অল্পক্ষণ পরে ডাক্তার সোজা হ'য়ে দাঁড়িয়ে
দীর্ঘনিশ্বাস ফেলে বললে—হোপ্লেস্...ডেড্ অ্যাণ্ড্ গন্..

দেখতে দেখতে আরো তিন জন ডাক্তার এলো ; থানার
দারোগা, ডেপুটি কমিশনার অফ্ পুলিশ, ডেপুটি ম্যাজিস্ট্রেট,
করোনার প্রভৃতিতে ঘর ভ'রে গেলো। সবাই দেখে শুনে
দীর্ঘনিশ্বাস ফেলে বললে—এ ক্লিয়ার কেস্ অফ্ স্ফাইসাইড্ !

রামযাছু মুখ বিষন্ন ক'রে বললে—আপনারা একটা সার্টিফিকেট
দিয়ে যান...এত বড়ো মানো লোকটাকে মর্গে নিয়ে যেতে যেনো
না হয়.....

সকলে একবাক্যে ব'লে উঠলো—অফ্ কোর্স্.....অবশ্য...

রামযাছু সার্টিফিকেট সংগ্রহ ক'রে পরাণ-বাবুর শব শ্মশানে
নিয়ে যাবার ব্যবস্থা করতে ব্যস্ত হ'য়ে পড়লো। এতো সব লোক
বাড়ীতে অধিকক্ষণ থাকে এ তার পছন্দ হ'ছিলো না।

পরাণ-বাবুর সংকারের পর বাড়ী ফিরে গিয়ে রামযাছু
মনমোহিনীকে বললে—মনো, মা অল্পপূর্ণার কৃপাতে আমাদের
অম্মের ভাগ্য পূর্ণ হ'য়ে উঠেছে। পরাণ তো প্রাণত্যাগ করলেন,
এখন কালপেঁচী মেয়েটা সরলেই আমরা নিশ্চিন্ত হই।

মনমোহিনী বললে—আহা কচি মেয়ে, এসে অবধি কেবলই বাবা বাবা ব'লে কাঁদছে...ওর কি আপনার লোক কেউ নেই ?

রামঘাট্ট বললে—ওর মার কেউ কোথাও ছিলো না ; অনাথ মেয়ে দেখে পরাণের বাবা দয়া ক'রে ছেলের সঙ্গে বিয়ে দিয়েছিলেন ; পরাণের নিজের লোক কেউ থাকলেও থাকতে পারে...পয়সা থাকলে আপনার লোকের অভাব হয় না...পয়সার লোভে আত্মীয়তার দাবী করতে কেউ না কেউ আসবে ..কিন্তু পরাণের উইলে আমি কৃষ্ণকলির সম্পত্তির অছি নিযুক্ত হয়েছি... যদি কেউ আত্মীয়তা দাবী করতে আসেন, কৃষ্ণকলিকে স্বচ্ছন্দে নিয়ে যেতে পারেন, কিন্তু সম্পত্তি না...সম্পত্তি—ডবল-ব্যাংক বন্ধুক, বিক্রীর খত আর উইল, দিয়ে—আমি রক্ষা করবো...

মনমোহিনী গম্ভীর ভাবে বললে—তা বেশী লোভ করতে গিয়ে বিপদে প'ড়ো না যেনো . যা রয় সয় তাই ভালো.....

রামঘাট্ট বললে—কিছু ভয় নেই রে ক্ষেপী ! রামঘাট্ট সব আটঘাট বেঁধে কাজ করে...

রামঘাট্ট পরাণ-বাবুর বাড়ীর সমস্ত অস্থাবর সম্পত্তি তুলে নিজের বাড়ীতে নিয়ে এসেছে, একদিনও বিলম্ব করে নি। পাছে পুরাতন চাকরেরা থাকলে তারা পরাণ-বাবুর সম্পত্তির সাক্ষী হ'য়ে থাকে এবং কৃষ্ণকলিকে জানিয়ে দেয় যে তার বাবার কী ঐশ্বর্য ছিলো, তাই রামঘাট্ট পরাণ-বাবুর ভৃত্যদের বিদায় ক'রে দিয়েছে ; বিদায় দেবার সময় সে তাদের বলেছে—বাবু তো তো দেয়ায় ডুবে আত্মহত্যা করলেন ; বাবুর মেয়ে তো এখন আমার ঘাড়েই

পড়লো, আমি বাবুর নিমক খেয়েছি, আমি তো আর ওকে ফেলতে পারবো না, আমরা খেতে পরতে পেলে কৃষ্ণকলিও খেতে পরতে পাবে; তা ছাড়া মেয়ের বিয়েও তো আমাকেই দিয়ে দিতে হবে...বাবু তো এক পয়সাও রেখে যান নি...কিন্তু আমার তো এমন অবস্থা নয় যে, তোমাদের সকলকে আমি রাখি, তোমরা এখন এসো গে, পরে দরকার হ'লে তোমাদের খুঁজে ডেকে নেবো, তোমরা হ'লে পুরোনো বিশ্বাসী চাকর...তোমাদের আমি অমনি ছাড়িয়ে দিতে পারবো না, তোমাদের আমি এক বছরের মাইনে দিয়ে বিদায় দেবো...আমার যতোকর্ণ এক পয়সা আছে ততোকর্ণ কর্তার বদনাম হ'তে দেবো না.....

চাকরেরা চোখের জল মুছতে মুছতে ও রামযাছুর বদান্ত সদাশয়তার প্রশংসা শতমুখে প্রচার করতে করতে বিদায় হ'য়ে চ'লে গেছে।

তার পর রামযাছু মূলজী শেঠীর সঙ্গে সাক্ষাৎ ক'রে তাকে বললে—শেঠজী, পরাণ-বাবু তো তাঁর বাড়ী ঘর সব-কিছু আগেই আমাকে বিক্রী ক'রে চুকেছিলেন; আরও টাকার দরকার হওয়াতে আমাকে বললেন—দেখুন মুখুজে মশায়, আমার আরও পঞ্চাশ ষাট হাজার টাকার দরকার হয়েছে, আপনি যদি ধার দিতে পারেন... আমার কাছে অতো টাকা কোথায় যে আমি ধার দেবো? তখন আমি আমার নিজেরই কেনা বাড়ী আপনার কাছে বন্ধক রেখে পরাণ-বাবুকে টাকা জোগাড় ক'রে দিলাম। তা

পরান-বাবু তো আত্মহত্যা ক'রে আমার পঞ্চাশ হাজার টাকা
মেরে চ'লে গেলো। আমি যখন মধ্যস্থ হ'য়ে আপনার কাছ থেকে
টাকা দিইয়েছি, তখন ও-টাকার জন্মে আমিই দায়ী, যদিও আমি
ইচ্ছা করলে আপনাকে ফাঁকি দিতে পারতাম... আপনার টাকাটা
আপনি বুঝে নিন... কিন্তু কিছু কম নিতে হবে শেঠজী... কিছু
লোকসান আপনারও হোক, কিছু আমারও হোক

মূলজী মাড়োয়ারী রামঘাতুর কথা শুনে কিছু বলতে যাচ্ছিলো
—হামি.....

কিন্তু মূলজীর বাক্যের উপক্রমেই রামঘাতু বাধা দিয়ে বললে
—বেশী ছাড়তে বলছি না ..দশ হাজার...মকদমা মামলা
করতেও তো খরচ আছে.....

মূলজী ব'লে উঠলো—এ ক্যা বাত বাবুজী! আপকো
বিস্‌ওয়াম্ করুকে হামি রুপেয়া দিলো...

রামঘাতু অমনি বললে—আপনার আপত্তি থাকে আমি জেদ
করবো না, আমি যখন মধ্যস্থ হয়েছিলাম, তখন আমিই দায়ী,
আমার এক পয়সা থাকতে আমি কাউকে ফাঁকি দিতে পারবো
না...আচ্ছা আপনার টাকা নিন্, কেবল সুদটা ছেড়ে দিন্...

মূলজী সন্তুষ্ট হ'য়ে বললে—আচ্ছা সো হামি ছাড়িয়ে দেলো
...পান শও রুপেয়া তো.....

রামঘাতু পরান-বাবুর আপিসের ঋণ-শোধের জন্য সংগৃহীত টাকা
থেকে মূলজীর ঋণ শোধ ক'রে দিলে এবং পাঁচ শত টাকা সুদ
বাঁচিয়ে লাভ ক'রে যথালভের আনন্দ নিয়ে বাড়ী ফিরে এলো।

কিন্তু রামযাদুর লাভ পাঁচ শত টাকার চেয়ে ঢের বেশী হ'য়ে গেলো... রামযাদুর বরাত-জোর। রামযাদু যে নিজের টাকা দিয়ে পরাণ-বাবুর ঋণ শোধ ক'রে দিচ্ছে এট খোস্‌নাম শীঘ্রই শহরময় রাষ্ট্র হ'য়ে গেলো; বাজারে তার ক্রেডিট দ্বিগুণ বেড়ে গেলো। খবরের কাগজে রায় বাহাদুর রামযাদু মুখুজ্জের প্রশংসা বিঘোষিত হ'তে লাগলো।

পরদিন রামযাদু আপিসে গিয়ে সাহেবদের সঙ্গে দেখা করতে গেছে, সাহেবেরা বললে—পরাণ-বাবু আত্মহত্যা করলেন, বডোই দুঃখের কথা! তিনি যদি আমাদের বলতেন তা হ'লে আমরা তাঁকে ঋণ শোধ করবার দীর্ঘ সময় দিতাম, তিনি ক্রমে ক্রমে শোধ ক'রে দিতেন... তা ছাড়া বাস্তবিক এ ঋণ তো তাঁর নয়, যদিও তাঁর জামিনের জগু তিনি গায়তঃ ধর্মতঃ দায়ী ছিলেন...

রামযাদু মুখ বিষম মলিন ক'রে বললে—বডোই দুঃখের কথা। আমাকেও যদি ঘুণাকরে আগে জানাতেন, আমি আমার সর্বস্ব বেচে বন্ধক রেখে তাঁকে টাকা জোগাড় ক'রে দিতাম...

সাহেবেরা খুশী হ'য়ে বললে—আপনার মতন বিপদের বন্ধু পাওয়া বডো সৌভাগ্যের কথা রায় বাহাদুর! আমরা কাগজে দেখলাম, আপনি পরাণ-বাবুর অনেক ঋণ শোধ ক'রে দিয়েছেন, চাকরদের বকসিস দিয়ে বিদায় দিয়েছেন, অনাথা মেয়েটিকে আশ্রয় দিয়েছেন! ধন্য আপনি!

রামযাদু মুখ কাচুমাচু ক'রে বললে—আমি প্রশংসা পাবার

যোগ্য কিছুই করি নি ; আমার যা-কিছু সবই পরাগ বাবুর
...আপনারা যদি বলেন, তা হ'লে আপিসের ঋণটাও

সাহেবেরা উৎফুল্ল হ'য়ে ব'লে উঠলো—না না, সে আপনাকে
দিতে হবে না ; আমরা পরাগ-বাবুর কৰ্মকুশলতায় অনেক রকমে
অনেক লাভ করেছি, দেড় লাখ টাকা তাঁর নামে আমরা খরচ
লিখে দিয়েছি ..তা ছাড়া প্রভিডেন্ট ফাণ্ডে তাঁর কিছু টাকা
আছে.....থাকোহরিটাকে গেরেপ্তার করতে পারলে তার কাছ
থেকেও কিছু আদায় হবে..... সে যাই হোক, আপনার সদাশয়
প্রস্তাবের জন্য আপনাকে শত ধন্যবাদ রায় বাহাদুর...আজ থেকে
আপনিই আপিসের বড়ো-বাবু নিযুক্ত হলেন রায় বাহাদুর...

রামযাদু অবনত হ'য়ে সেলাম ক'রে প্রফুল্ল মুখে বললে—
আমার উপর আপনাদের অসীম অনুগ্রহের উপযুক্ত হ'তে আমি
চেষ্টা করবো.....

রামযাদুর মনোবাঞ্ছা সম্পূর্ণ হ'লো, তার জীবন-তরণী অনুকূল
পবনে লাভের বাণিজ্যে যে-বন্দরেই ভিড়ছে সেখানেই তার
ধূলা-মুঠা ধরতে সোনা-মুঠা হ'য়ে উঠছে ।

কয়েক দিন পরে এক ব্যক্তি এসে রামযাদুকে বললে—আমি
পরাগ-বাবুর ভাইপো...আমি তাঁর সম্পত্তির উত্তরাধিকারী.....

রামযাদু তীক্ষ্ণ-দৃষ্টিতে তার মুখের দিকে তাকিয়ে বললে—
সম্পত্তি রেখে ম'রে গেলে অনেক ভাইপো জোটে । বেশ,
ভাইপো মশায়, পরাগ-বাবুর সম্পত্তির মধ্যে আছে একটি খাঁদা
কালো-কুচ্ছিত মেয়ে, স্বচ্ছন্দে নিয়ে যেতে পারেন, আর কুলে

লাখ দুই টাকা ঋণ, যা আমি শোধ ক'রে দিয়েছি, সেটাও নিয়ে গেলে আমি স্থখী হবো, বুঝছেন তো আজকালকার দিনে অতোগুলো টাকা.....

সে-ব্যক্তি ক্রুদ্ধ স্বরে ব'লে উঠলো—আপনি প্রবঞ্চনা করছেন.....

রামঘাটু ক্রষ্ট না হ'য়ে হেসে বললে—বেশ, তা হ'লে আমার দারোয়ানকে ডাকুবার আগে আপনি রাস্তা দেখুন...আদালতের দরজা তো খোলা আছে...ষ্ট্যাম্পকাগজের দাম ট'য়াকে না থাকে, আমি দিয়ে দিচ্ছি.....

এই ব'লে রামঘাটু পকেট থেকে একমুঠো টাকা তুলে ভাইপোর দিকে ছড়িয়ে ফেলে দিলে।

পরান-বাবুর ভাইপো হ'তে অভিলাষী লোকটি একেবারে নরম হ'য়ে গিয়ে বললে—আপনি রাগছেন কেনো? আপনারা বড়ো লোক, আপনাদের সঙ্গে কি আমরা মামলা-মকদ্দমা করতে পারি? তবে আমার যেটা গ্ৰাঘ্য পাওনা...

রামঘাটু ঈষৎ হেসে বললে—আপনার গ্ৰাঘ্য পাওনা হচ্ছে, পরান-বাবুর ঋণ আর তাঁর মেয়েটি.....তা আপনি স্বছন্দে নিয়ে যেতে পারেন, আমার একটুও আপত্তি নেই...কিন্তু পরান-বাবুর উইল চিঠি দলিল সব আমার কাছে আছে, আপনি কৃষ্ণকলিকে অবলম্বন ক'রেও আমাকে কাবু করতে পারবেন না.....

তখন সেই লোকটি মুখ শুক ক'রে উঠে চ'লে যেতে যেতে ব'লে গেলো—আমি কাল আবার আসবো, আপনি একটু

ভেবে দেখবেন—ধর্মতঃ গ্ৰায়তঃ আমি কিছু পেতে পারি কি না.....

রামঘাট্ বল্লে—ধর্ম আর গ্ৰায় আপনার দিকে কিছুমাত্র অধুকুল থাকলে পরাণ-বাবু তাঁর উইলে আপনার নাম উল্লেখ করতে ভুলতেন না।

এর পরে আর কোনোদিন সেই লোকটি রামঘাট্কে দেখা দিয়ে বিরক্ত করতে আসে নি। রামঘাট্ও অতি শীঘ্র অনায়াসে পরাণ-বাবুর সমস্ত সম্পত্তি আত্মসাৎ ও আয়ত্ত ক'রে নিশ্চিত হ'য়ে বসলো।

কিন্তু এর অল্প পরেই আর-একটি ক্ষুদ্র উপদ্রব এসে রামঘাট্‌র স্বচ্ছন্দ জীবনযাত্রায় ব্যাঘাত ঘটাবার উপক্রম করলে। সত্যদাস রামঘাট্কে বল্লে—পরাণ-বাবুর কোন্ বিক্রী-কবালায় আমি নাকি সাক্ষী আছি ?

রামঘাট্ হেসে বল্লে—তোমার স্মৃতি-শক্তি এতো ক্ষীণ ! দলিলে সই ক'রেছিলে মনে নেই.....

সত্যদাস বল্লে—সে তো আপনি ব'লেছিলেন 'আমার পাবলিশারের সঙ্গে একখানা বইয়ের রয়াল্টির লেখাপড়া হবে, তাতে তুমি একটা সাক্ষীর স্বাক্ষর ক'বে দাও।' আমি আপনার কথায় বিশ্বাস ক'রে শাদা ষ্ট্যাম্পকাগজে সই ক'রে দিয়েছিলাম।

রামঘাট্ আশ্চর্য হ'য়ে চক্ষু বিস্ফারিত ক'রে বল্লে—তুমি কারো কাছে টাকা খেয়ে উৎপাত ভুলতে এসেছো নাকি ?

সত্যদাস বল্লে—টাকা আমি আপনারই খেয়েছি, কিন্তু



ধর্মের মাথা খেতে পারি নি.. যদি দরকার হয় তবে আমি সত্য কথা বলবো—তাই আপনাকে ব'লে রাখছি.....

রামযাদু চোখ পাকিয়ে ভয় দেখিয়ে বললে—আমার সঙ্গে শক্রতা করলে তোমার কি ভালো হবে ?

সত্যদাস নম্রস্বরেই বললে—শক্রতা আমি করছি না ; সত্য আমি গোপন করবো না ; তাতে আপনি রাগ করলে কি করবো ?

রামযাদু চোখ রাঙিয়ে বললে—তোমার চাকরী, কবিত্বের যশ কার হ'তে ?

সত্যদাস বিনীত ভাবে বললে—কিন্তু সে-সবের চেয়েও সত্য বড়ো...আমার বাবা আমার নাম রেখেছিলেন সত্যদাস.....

রামযাদু এ-কথার উত্তরে কেবল বললে—আচ্ছা !

সেইদিনেই রামযাদু আপিসে গিয়ে সত্যদাসকে এক মাসের নোটসের বদলে একমাসের মাইনে আগাম দিয়ে বললে—তোমাকে আর বিশ্বাস নেই, তুমি পথ দেখো ; আমার বাড়ীতেও আর তোমার থাকা হবে না.....

সত্যদাস নম্রভাবে নমস্কার ক'রে বললে—যে আজে.....

সত্যদাস যখন আপিস থেকে বেরিয়ে যায় তখন তার সহকর্মীরা চুপিচুপি তাকে জিজ্ঞাসা করলে—বড়ো-বাবু চটলোঁ কিসে ?

সত্যদাস হেসে ব'লে গেলো—আমাকে আর বিশ্বাস করতে পারছেন না.....

সকলে বলাবলি করতে লাগলো—একা থাকোহরি চুরি ক'রে সকলের উপরই অবিশ্বাস টেনে দিয়ে গেছে! ছোঁড়া কী সর্বনাশই না ক'রে গেলো।—

পরদিন রামঘাটু অনেক খবরের কাগজে বিজ্ঞাপন দিলে—

চুরি! চুরি! চুরি!

সত্যদাস দত্ত নামে এক ব্যক্তি আমার বাড়ীতে থাকিতো; তাহার অসংচরিত্র মিথ্যাবাদিতা ও বিশ্বাসঘাতকতার জন্য তাহাকে চাকরী হইতে বরখাস্ত করা হইয়াছে; সে ষাইবার সময় আমার লেখা বহু কবিতার খাতা চুরি করিয়া লইয়া গিয়াছে; সে হয় তো আমার ছদ্মনাম রামশর্মা ব্যবহার করিয়া অথবা নিজেরই নামে ঐসব কবিতা সাময়িক পত্রে অথবা পুস্তকাকারে প্রকাশ করিতে চেষ্টা করিবে; কিন্তু অভিজ্ঞ ব্যক্তি মাত্রেই আমার কবিতার ষ্টাইল দেখিয়াই চিনিতে পারিবেন যে, সেগুলি চোরাই মাল। ঐ ব্যক্তি আমার শত্রুতা সাধনের জন্য অণুবিধ চেষ্টাও করিতে পারে। সুতরাং পূর্বাঙ্কেই তাহার পরিচয় দিয়া রাখিলাম।

শ্রীরামঘাটু মুখোপাধ্যায়

সত্যদাস সেই বিজ্ঞাপন প'ড়ে হতাশার হাসি হেসে আপন মনে বললে—কবি ব'লে পরিচিত হবার সখ ছিলো; যা লিখে

প্রকাশ করেছি তাতে স্খ্যাতি পেয়েছে রামযাদু ; এখন তো
প্রকাশের পথও বন্ধ হ'লো ; নিজের জিনিস এখন আমার
চোরাই মাল ! ধন্য রামযাদুর মহিমা ! ধন্য তার কপাল !

“আমি শুনে হাসি আঁখিজলে ভাসি,
এই ছিল মোর ঘটে !
তুমি মহারাজ, সাধু হ'লে আজ,
আমি আজ চোর বটে !”

পরান-বাবুর মৃত্যুর বারো বৎসর পরে । রায়-বাহাদুর
রামযাদু নিরুপদ্রব প্রতিষ্ঠা-লাভ ক'রে সমাজে ও আপিসে
আধিপত্য করছে । তার সংসারে কিছু কিছু পরিবর্তন ঘটেছে
—তার মেয়েদের বিয়ে হ'য়ে তারা শ্বশুরবাড়ী চ'লে গেছে ; তার
ছেলে বনমালী কেবল মাত্র রামযাদুর ছেলে ব'লেই প্রত্যেক
পরীক্ষায় খুব সম্মানিত উচ্চ স্থান অধিকার ক'রে ক'রে এম-এ
পাস করেছে, এখন সে সিংহলে মহেন্দ্র কলেজের অধ্যাপক নিযুক্ত
হয়েছে । তার এই কৰ্ম সংগ্রহ ক'রে দিয়েছে রামযাদুরই প্রথমা
পত্নীর পুত্র প্রিয়তোষ—সে ঐ মহেন্দ্র কলেজের অধ্যক্ষ । রামযাদু
শ্বশুরের সঙ্গে ঝগড়া ক'রে তার স্ত্রীকে ত্যাগ করে এবং তাদের

জন্ম করবার জন্ম সে পুনরায় মনমোহিনীকে বিবাহ করে। কিন্তু তার পর তার শশুর বা স্ত্রী কেউ রামযাদুর কাছে অধনতি স্বীকার না করাতে রামযাদুও আর তাদের সঙ্গে কোনো সম্পর্ক রাখেনি। প্রিয়তোষ তার মাতামহের বাড়ীতে থেকেই মানুষ হয়েছে, কৃতবিদ্য হয়েছে, এবং রামযাদুর স্বার্থপরতার প্রভাব না পড়াতে তার চিত্ত উদার প্রশস্ত ও গ্ৰায়নিষ্ঠ হবার অবকাশ পেয়েছে। প্রিয়তোষের মাতামহের ও মাতার মৃত্যু হয়েছে; তথাপি রামযাদু তার কোনো খোঁজ-খবর কখনো নেয় নি, এবং প্রিয়তোষও কেবল পিতার নাম জনশ্রুতিতে জানা ছাড়া পিতার কোনো পরিচয়ই পায় নি। রামযাদুও তার সম্বন্ধে এমন উদাসীন ছিলো যে, কেউ জানতোই না যে রামযাদুর অপর এক স্ত্রী ছিলো বা তার গর্ভজাত এক পুত্র কুত্রাপি বর্তমান আছে। পূরা সিকি শতাব্দী পরে রামযাদুর পুত্রস্মৃতি সঞ্জীবিত ও পুত্রস্নেহ উদ্বেলিত হ'য়ে উঠলো হঠাৎ যেদিন সে কাগজে বিজ্ঞাপন দেখলে সিংহলের মহেন্দ্র কলেজে ইতিহাসের অধ্যাপক চাই এবং সেই পদপ্রার্থীদের আবেদন করতে হবে কলেজের অধ্যক্ষ প্রিয়তোষ মুখোপাধ্যায়ের কাছে। রামযাদু বনমালীকে ডেকে সেই বিজ্ঞাপনটি দেখিয়ে বললে—“বুনো, তুই দরখাস্ত কর—আমি অন্য জোগাড় দেখবো।” বাবার জোগাড় যে কী রকম অমোঘ, তার ধারণা বনমালীর বিলক্ষণই ছিলো; সে প্রফুল্ল অন্তরের উৎসাহের সঙ্গেই আবেদন করলে, এবং সেই সঙ্গে সঙ্গে রামযাদুরও একখানি বাৎসল্য-রসসিক্ত পত্র প্রিয়তোষের নামে রওনা হ'য়ে গেলো।

পিতার প্রথম পত্র পেয়ে প্রিয়তোষ এতো আনন্দিত হলো যে, সে শূন্য অধ্যাপকের পদে বনমালীকেই নিযুক্ত করলে এবং মনে মনে তার আশা জেগে উঠলো যে, হয় তো তার কনিষ্ঠ ভ্রাতার সহিত পরিচয়ের সূত্র ধরে তার পিতৃপরিচয়ও একদিন ঘটে উঠবে; অন্ততঃ সে ভাইয়ের মুখে তাদের পিতার পরিচয় তো কিছুও জানতে পারবে! পিতৃপরিচয় না জানার লজ্জা ও ক্ষোভ প্রিয়তোষকে পীড়া দিতো; সেই পীড়া থেকে অব্যাহতি পাবার সম্ভাবনায় তার লোভ প্রবল হ'য়ে উঠলো। এই অবস্থায় বনমালীকে কাছে পেয়ে তাকে যত্ন করতে পারবে ব'লে সে যেনো কৃতার্থ হ'য়ে উঠলো।

বনমালী সিংহল যাত্রা করেছে। রামঘাট্ তাকে হাবড়া ষ্টেশনে গাড়ীতে তুলে দিতে গেছে। গাড়ী ছাড়বে। তৃতীয় ঘণ্টা পড়লো। তখন রামঘাট্ বনমালীকে বললে—বুনো, প্রিয়তোষ তোমার জ্যেষ্ঠ বৈমাত্রেয় ভাই; তার মা নেই; তুমি তাকে দাদা ব'লে ডেকো।

এতোদিন পরে বনমালী সিংহল-যাত্রার দিনে ট্রেনে উঠে ট্রেন ছাড়বার মুহূর্তে বাবার মুখ থেকে যখন শুনলে—প্রিয়তোষ তোমার জ্যেষ্ঠ বৈমাত্রেয় ভাই—তখন সে আশ্চর্য হ'য়ে গেলো এবং পরক্ষণেই বুঝতে পারলে কেনো অতো সহজে সে ঐ চাকরীটি পেয়ে গেছে। পিতার রহস্যজটিল জীবনের সম্বন্ধে তার কৌতূহল জেগে উঠলো, কিন্তু আর কিছু জানবার আগেই ট্রেন ছেড়ে দিলে। বনমালী ক্ষীণ আশা নিয়ে চললো অচেনা

দাদার কাছ থেকে তার পরিচয় হয় তো কিছু জানতে পারবে।

রামঘাটুর পরিবারের লোক যেমন স্থানান্তরিত হ'য়ে ক'মে গেছে, তেমনি একজন লোক তাদের পরিবারভুক্ত হয়েছে,— সে কৃষ্ণকলি। কৃষ্ণকলির বয়স এখন উনিশ বছর হয়েছে, কিন্তু এখনো তার বিবাহ হয়নি; তার বিবাহ দেবার জগ্গে রামঘাটু বিশেষ কোনো চেষ্টাও করে নি। কৃষ্ণকলি অকস্মাৎ বাপ-মাকে হারিয়ে পরের আশ্রিত হ'য়ে এমন লজ্জায় সঙ্কচিত ও ধীর শাস্ত হ'য়ে প'ড়েছে যে, সে যে বাড়ীতে আছে তা রামঘাটুরা অনেক সময় অনুভবই করে না; তার উপর কৃষ্ণকলি একটু বড়ো হ'য়ে উঠে জ্ঞানলাভ করতেই আশ্রয়দাতার সংসারে যে-রকম কাজ করতে নিজেকে নিযুক্ত ক'রে দিয়েছিলো তা'তে তাকে বিয়ে দিয়ে বাড়ী থেকে সরিয়ে ফেলতেও রামঘাটুর মন চাইছিলো না।

রামঘাটুর অনাথ-আশ্রমের ছেলেমেয়েরা রামঘাটুর গোকুর গোয়াল সাফ্ করে, জাব দেয়; বাগান নিড়ায়, ফল পাড়ে, তরী-তরকারীর ক্ষেতে জল দেয়; গাড়ী ধোয়; ঘর ঝাঁটা দেয়, ঝুল ঝাড়ে; এমন ক'রে তারা সবাই স্বাবলম্বন ও হাতে-কলমে কাজ শেখে। এইসব দেখে কৃষ্ণকলিও তাদের সঙ্গে কাজ করতে যায়। কিন্তু মনমোহিনী বলে—আহা, তুমি কি ও-সব পারো? তোমার বাবার বাড়ীতে কতো গণ্ডা চাকর-দাসী খাটতো! তুমি রেখে দাও, রেখে দাও.....

মনমোহিনী আর রামযাছু কৃষ্ণকলিকে ঘেনো আহা দিয়ে ঘিরে রেখেছে—সে চলতে শোনে আহা ! ফিরতে শোনে আহা ! এতে সে লজ্জার সঙ্কোচ কাটিয়ে এদের বাড়ীটাকে নিজের বাড়ী ক'রে নিতে কিছুতেই পারছিলো না , সে একটি সহজ স্থান এ পরিবারের মধ্যে ক'রে নিতে পারছিলো না ; পরানুগ্রহের কুণ্ডা ও পরগলগ্রহ হওয়ার অপ্রতিভ ভাব কৃষ্ণকলির দেহ মন ও আচরণকে জড়িয়ে তাকে ভারি নম্র ধীর স্নিগ্ধ ক'রে তুলেছিলো ; তার এই মৃদুতা তার দেহের কুৎসিততাকে ঢেকে তাকে একটি মাধুর্য ও শ্রী দান করেছে । মনমোহিনী আর রামযাছু যতোই কৃষ্ণকলিকে কাজ করতে বারণ করে, ততোই সে অধিক লজ্জিত হ'য়ে অধিক কাজের মধ্যে নিজেকে লিপ্ত ক'রে দেয় ; অনেক সময় সে তার আশ্রয়দাতাদের লুকিয়ে লুকিয়ে কাজ করে । এতে তার কাজের নিপুণতা ক্ষিপ্ৰকারিতা এবং সৌন্দর্য্যবোধ অসামান্য রকমে বেড়ে চলছিলো । মনমোহিনী আর রামযাছু ঘুম থেকে ওঠবার আগেই কৃষ্ণকলি শয্যা ত্যাগ করে, এবং তৎপরতার সহিত সমস্ত গৃহকর্ম সম্পন্ন ক'রে রাখে । মনমোহিনী স্নান করতে গিয়েই দেখে তার কাপড় শেমিজ স্নানের ঘরের আনুলায় সাজানো আছে ; রামযাছু ঘর থেকে বেরিয়ে অল্পক্ষণ পরে ফিরে এসেই দেখে, ঘরখানি সূশৃঙ্খলার শ্রী ধারণ ক'রে ধূলিলেশশূন্য হ'য়ে আছে ; রামযাছু বাহির থেকে বেড়িয়ে এসে জুতো ছেড়ে রেখে যায়, ফিরে এসে আবার পায়ে দেবার সময় দেখে জুতো ধূলিমুক্ত হ'য়ে আয়নার মতন চক্চক্

করছে। রামযাদু স্নান ক'রে এসে দেখে তার পূজার জো প্রস্তুত; পূজা সেরে উঠে দেখে তার জলখাবার তার জগ্গে অপেক্ষা করছে। রামযাদু আপিসে যাবার সময় এককোঁটা পান নিয়ে যায়; আপিসের চাপকান গায়ে দিতে গিয়ে দেখে— সগু-সাজা সিক্ত পানের খিলি চুন আর পানের বোঁটা দিয়ে কোঁটার উদর পরিপূর্ণ হ'য়ে আছে। মনমোহিনী আর রামযাদুর কিছু চেয়ে পেতে হয় না; এবং কামধেনুর মতন তাদের সকল কামনা কে যে অলক্ষ্যে পূরণ করছে তা তারা বিলক্ষণ জানে।

একদিন রাত্রে খেতে ব'সে রামযাদু বললে—আজকে আমার কঁসের পোকা-খাওয়া দাঁতটা একটু কনকন করছে।

মনমোহিনী কোনো কথা বললে না।

রামযাদু খেয়ে উঠে আঁচাতে গিয়ে দেখলে তার ঘটাতে গরম জল রয়েছে।

মনমোহিনী কথায় আদর মাথিয়ে বলে—গাখ্ মা কলি, তুই আমাদের মাথা খেলি; তুই যদি কখনো পরের বাড়ী চ'লে যাস, তা হ'লে আমরা মা-ছোড় হবো; তখন আমাদের দুর্দশার অন্ত থাকবে না।

কৃষ্ণকলি লজ্জায় সূখে অপ্রতিভ ও সঙ্কচিত হ'য়ে সেখান থেকে পালিয়ে যায়।

একদিন দুপুর বেলা কৃষ্ণকলি মনমোহিনীকে ঘুমিয়ে থাকতে দেখে চুপিচুপি আলোর চিমনিগুলো নিয়ে সাবানজল দিয়ে ধুতে

বসেছে। সে আপন মনে কাজ ক'রে যাচ্ছে; একটু অন্তমনস্ক হ'য়ে পড়েছে। হঠাৎ সে তার পিছনে মনমোহিনীর কোমল কর্ণের আদরমাথা ভৎসনা শুনে চম্কে উঠলো—তুমি চাকর-দাসীগুলোকে একেবারে কুড়ে বানিয়ে দিলে। সব কাজ যদি তুমিই করবে তো ওরা কি শুধু ব'সে ব'সে মাইনে নিয়ে ভাতের কাঁড়ি গিলবে?

কৃষ্ণকলি মনমোহিনীর অপ্রত্যাশিত আগমনে ও হঠাৎ পিছন থেকে তার কথা শুনে চম্কে উঠেছিলো এবং গোপন অপরাধ ধরা প'ড়ে গেছে এইরূপ ভাবে একটু ব্যস্ত হ'য়ে পড়াতে সাবানে পিছল হাত থেকে একটা চিম্নি স্থলিত হ'য়ে শানের উপর প'ড়ে গেলো এবং চূর্ণ বিচূর্ণ হ'য়ে গেলো।

কৃষ্ণকলি আরো অপ্রস্তুত হ'য়ে তাড়াতাড়ি সেইসব ভাঙা কাঁচ কুড়াতে লাগলো।

মনমোহিনী ব্যস্ত হ'য়ে বললে—ভাঙা কাঁচে হাত দিয়ে না, হাত কেটে যাবে; রেখে দিয়ে উঠে এসো.....ধীরাকে ডেকে দিচ্ছি কাঁচগুলো ঝাঁটিয়ে ফেলে দিক্...

মনমোহিনীর নিষেধ শোনবার আগেই কৃষ্ণকলির আঙুল কাঁচে কেটে গেলো। সে মনমোহিনীর আদেশ মান্য ক'রে যখন উঠে দাঁড়ালো তখন তার আঙুল দিয়ে টস্টস্ ক'রে রক্ত পড়ছে। সে তাড়াতাড়ি সেই হাত কাপড়ের তলায় লুকালে, কিন্তু মাটিতে পড়া রক্তের ফোঁটা মনমোহিনীর দৃষ্টিতে পড়লো।

মনমোহিনী ব'লে উঠলো—হাত কাটলে বুঝি? দেখি দেখি...

মনমোহিনী জোর ক'রে কৃষ্ণকলির হাত কাপড়ের তলা থেকে বা'র ক'রেই চেষ্টা করে উঠলো—ওমা ! কাঁচেকাটা হাত লুকিয়ে পালাবার চেষ্টা ! চলো চলো, টিংচার আয়োডিন দিয়ে বেঁধে দি গে ।

মনমোহিনী কৃষ্ণকলিকে হাত ধ'রে নিজের ঘরে নিয়ে গিয়ে আঙুলে টিংচার আয়োডিন লাগিয়ে দিলে ; এবং নিজের পরণের কাপড়ের আঁচল ছিঁড়ে কৃষ্ণকলির আঙুলে পটি বেঁধে দিলে ।

কৃষ্ণকলি আঙুলের আঘাতের চেয়ে মনমোহিনীর মমতার আঘাতে বেশী অভিভূত হ'য়ে পড়লো ; মনমোহিনীর পরণের কাপড়খানা যে জীর্ণ ছিন্ন পুরাতন ছিলো সেদিকে তার লক্ষ্যই গেলো না, তার মনটা জুড়ে এই কথাই কেবল ঘুরে বেড়াতে লাগলো যে, কাকীমা নিজের পরণের কাপড় ছিঁড়ে আমার আঙুল বেঁধে দিলেন !

রামঘাতুর ছোটো ছোটো ছেলেমেয়েগুলির যত্ন সেবা করার ভারও কৃষ্ণকলি স্বেচ্ছায় গ্রহণ করেছে। তারাও ছোড়দি ছাড়া আর কারো কাছে আব্দার উপদ্রব করতে যায় না ।

কৃষ্ণকলির অসাধারণ তীক্ষ্ণ বুদ্ধি ও স্মরণশক্তি । রামঘাতুর বাড়ীতে আসার পর সে লেখাপড়া করবার অবকাশ পায় নি ; কিন্তু সে রামঘাতুর ছেলেমেয়েদের পড়া শুনে আর অল্প কষা দেখে পড়তে লিখতে শিখেছে ; সে নিজে লুকিয়ে লুকিয়ে যে বই হাতের কাছে পায় বাছ বিচার না ক'রে পড়ে, এবং যা একবার পড়ে তা তার মনে মুদ্রিত হ'য়ে যায় । এই রকম ক'রে সে ইতিহাস

ভূগোল স্বাস্থ্যরক্ষা বস্তুপরিচয় এবং বাংলা ইংরেজী সংস্কৃত ভাষা প্রভৃতি সম্বন্ধে যে জ্ঞান লাভ ক'রেছে সে রকম জ্ঞান এ বাড়ীতে আর কারো নেই ; কিন্তু সে এই জ্ঞানও গোপন ক'রেই রাখে ; তার সকল-তাতেই লজ্জা ও সঙ্কোচ । রামযাদুর কাছে ভারত-বর্ষের প্রায় সকল সাময়িক পত্রই অম্নি আসে ; সেগুলি খোলবার সময়ও রামযাদুর হয় না ; ডাক এলেই কৃষ্ণকলিই কাগজগুলির মোড়ক খুলে রামযাদুর টেবিলের উপর সাজিয়ে রাখে ; এবং রামযাদু আপিসে গেলে ও মনমোহিনী দিবানিদ্রায় অভিভূত হ'লে কৃষ্ণকলি সেইসব কাগজ নিয়ে পড়ে । অল্প সময়ের মধ্যে বেশী প'ড়ে নেবার ইচ্ছায় আগ্রহে ও চেষ্টায় কৃষ্ণকলি দ্রুত পাঠের শক্তি অর্জন করেছে । মাসিক-পত্রের গল্প উপন্যাস থেকে আরম্ভ ক'রে ভূতত্ব জীবতত্ত্ব বা বৈজ্ঞানিক রাসায়নিক কোনো প্রবন্ধই সে বাদ দেয় না । এবং কোন্ বছরের কোন্ কাগজের কোন্ সংখ্যায় কোন্ প্রবন্ধ বা গল্প আছে তা তার মনে থেকে যায় ; সে যেনো জীবন্ত স্মৃচীপত্র ।

রামযাদু অতি পুরাতন কাগজে প্রকাশিত নানা লেখকের লেখা একই বিষয়ের কতকগুলি প্রবন্ধ একত্র সংগ্রহ ক'রে সবগুলির তথ্য মিলিয়ে একটি একটি প্রবন্ধ লেখে, এবং তাতে তার বিদ্যা ও জ্ঞানের খ্যাতি চারিদিকে বিঘোষিত হ'তে থাকে । রামযাদু এই রকম একটা অরিজিণ্যাল রিসার্চ বা মৌলিক গবেষণার কার্যে নিযুক্ত ছিলো ; প্রাচীন ভারতে নারীর সামাজিক অধিকার সম্বন্ধে সে প্রবন্ধ লিখবে এবং এ সম্বন্ধে প্রাচীন কোন্

মাসিক পত্রে কি প্রবন্ধ আছে তার সন্ধানে বিব্রত হ'য়ে উঠেছে ; অথচ এই চুরিবিচ্যায় সে অপরের সাহায্যও নিতে পারে না, তা হ'লে তার চাতুরী ফাঁস হ'য়ে যাবে যে ।

রামঘাতুর স্মরণ হচ্ছে 'বৌদ্ধযুগে নারীর অবস্থা' সম্বন্ধে একটা প্রবন্ধ সে কোথায় পড়েছে : কিন্তু কোন্ কাগজের কোন্ বছরে তা সে মনে আনতে পারছে না : সে যতো রাজ্যের কাগজ পেড়ে হাঁটকে গলদঘর্ষ হ'য়ে উঠেছে ।

এমন সময় সদাসঙ্কচিতা ব্রীড়াবনতা স্বল্পভাষিণী কৃষ্ণকলি এসে সেখানে দাঁড়ালো । রামঘাতুকে বিব্রত দেখেই কৃষ্ণকলির চোখে একটি কাতর প্রশ্নসূচক দৃষ্টি ফুটে উঠলো ।

রামঘাতু কৃষ্ণকলিকে এসে দাঁড়াতে দেখেই তার দিকে ফিরে তাকিয়ে হেসে বললে—তুমি তো আমার বিপত্তারিণী, এই লেখাপড়ার কাজেও যদি তুমি আমাকে সাহায্য করতে পারতে !

কৃষ্ণকলি নিজের অক্ষমতার লজ্জায় লজ্জাবতী-লতার মতো সঙ্কচিত হ'য়ে গেলো ; তার মনে হ'লো—“হায় হায় নির্ঝুন্ধি আমি ! আমি কেনো ভালো ক'রে লেখাপড়া শিখি নি ?” তার একবারও মনে হলো না যে তার এই অজ্ঞানের জন্ত দায়ী রামঘাতুই, সে তাকে লেখাপড়া শেখাতে নিতাস্তই অবহেলা করেছে ।

কৃষ্ণকলিকে লেখাপড়া না শেখানোর মধ্যেও রামঘাতুর স্বার্থবুদ্ধি খেলা করেছে ; লেখাপড়া শিখে চালাক চতুর হ'য়ে কৃষ্ণকলি পাছে রামঘাতুর প্রবন্ধনা ধ'রে ফেলে, তার পৈতৃক অধিকার

দাবী করে, এই ভয়েই রামযাদু কৃষ্ণকলিকে লেখাপড়া শেখানোর কোনো ব্যবস্থাই কবে নি। আর এই ভয়েই সে কৃষ্ণকলির বিবাহ দেবারও চেষ্টা করছিলেন না, পাছে তার স্বশুরবাড়ীর লোকেরা তার পিতৃধন পুনরুদ্ধারের জন্য কোনো রকম চেষ্টা ক'রে রামযাদুর উদ্বেগ উৎপন্ন করে। এবং পাছে লোকে ঘৃণাক্ষরেও বলে যে, ওর বাপের টাকায় বড়লোক হ'য়ে ওকে অবহেলা অনাদর করছে, এই ভয়েই রামযাদু ও মনমোহিনী দুজনে মিলে কৃষ্ণকলিকে সমাদর দিয়ে ঘিরে তাকে অভিবৃত্ত সম্মোহিত ক'রে রাখতে সতত সচেষ্ট।

কৃষ্ণকলি রামযাদুকে তার আশ্রয়দাতা উপকর্তা ব'লেই জানে; সে তো নিঃস্ব নিরাশ্রয়া অনাথা; সে তো রামযাদুর অনাথ-আশ্রমেই স্থান পেতে পারতো; কিন্তু রামযাদু যে তাকে নিজের পরিবারভুক্ত ক'রে রেখে তাকে কন্যার অধিক যত্ন করে এই কৃতজ্ঞতার বোঝার চাপে কৃষ্ণকলির মন নিতান্ত সঙ্কচিত কুণ্ঠিত লজ্জিত হ'য়ে থাকে। সে রামযাদুর মুখে স্নেহবিদ্ধ যত্ন ভৎসনা শুনে অত্যন্ত অপ্রতিভ হ'লো, কিন্তু তার দুই চোখে ভ'রে উঠলো ব্যাকুল, জিজ্ঞাসা যে তোমার কোথায় কি অসুবিধায় তোমার স্বচ্ছন্দতা আটকে বাধাগ্রস্ত হয়েছে আমায় যদি বলো তো আমি একবার চেষ্টা ক'রে দেখতে পারি।

রামযাদু কৃষ্ণকলির দৃষ্টিতে প্রশ্নের ব্যাকুলতা দেখতে পেয়ে বললে—আমি প্রাচীন ভারতে নারীর সামাজিক অবস্থা সম্বন্ধে কিছু উপকরণ সংগ্রহ করতে চাচ্ছি !

কৃষ্ণকলির ব্যাকুল মুখ প্রসন্ন হ'য়ে উঠলো, সে লজ্জাস্থিত মুখে রামঘাটুর বইয়ের তাক থেকে ১৮২৭ সালের প্রবাসী ও ১৩২৯ সালের নব্যভারত এনে রামঘাটুর সামনে রেখে দিলে এবং আবার বইয়ের শেল্ফের কাছে চ'লে গেলো। রামঘাটু পরাণ-বাবুর প্রকাণ্ড লাইব্রেরী নিজের বাড়ীতে উঠিয়ে এনেছিলো।

রামঘাটু অবাক হ'য়ে একবার বই দুখানার দিকে ও একবার কৃষ্ণকলির দিকে দেখলে, তার পর বললে—এতে আছে ?

কৃষ্ণকলি শেল্ফ থেকে Sir Ashutosh Mukherjee Silver Jubilee Commemoration Volume III, Dr Dwarkanath Mitter's The Position of Women in Hindu Law, শ্রীমতী Clarisse Bader প্রণীত Women in Ancient India, মহাভারত শাস্তিপর্ক ও অনুশাসন পর্ক, স্কন্দপুরাণ নাগরখণ্ড এনে রামঘাটুর সামনে রাখলে। রামঘাটুর চোখে যে বিষয় ও প্রশংসা ফুটে উঠেছিলো তার আঘাতে কৃষ্ণকলির মাথা লজ্জাতে অবনত হ'য়ে পড়েছিলো ; কোন্ পৃষ্ঠায় কোন্ প্রবন্ধে যে নারী সম্বন্ধে আলোচনা আছে তা সে ইচ্ছা সত্ত্বেও বই খুলে বাহির ক'রে দিতে পারলে না।

রামঘাটু বললে—এইসব বইয়ে ঐ সম্বন্ধে লেখা আছে ?

কৃষ্ণকলির লজ্জিত দৃষ্টি একবার রামঘাটুর দিকে উঠেই আবার অবনত হ'য়ে পড়লো। সে মুখ নত ক'রে একটু মৃদু হাসলে।

রামঘাটু বইগুলি খুলে তাদের সূচীর উপর চোখ বুলাতে বুলাতেই হেসে বললে—তুই আমার ঘরের শুধু লক্ষ্মীই নোস, সরস্বতীও ! তোর দাম লাখ টাকা !

রামঘাতুর এই কথা যে কতো বড়ো সত্য, বা সত্যকেও খর্ব করা, তা বুঝতে না পেরে, কৃষ্ণকলি এই কথাতে স্নেহের অত্যাঙ্কি মনে করলে এবং অত্যন্ত লজ্জা পেয়ে ধীর নিঃশব্দ পদে সে-ঘর থেকে পলায়ন করলে। তার মনের মধ্যে কেবলই এই কথা গুঞ্জন করতে লাগলো—কাকাবাবু আর কাকীমা আমাকে কী ভালোই বাসেন! আমার মতন লক্ষ্মীছাড়াকে বলেন কিনা লক্ষ্মী, আর আমার দাম লাখ টাকা!

কৃষ্ণকলি যদি জানতো যে তার বাস্তবিক দাম রামঘাতুর কাছে চার লাখের কাছাকাছি, এবং রামঘাতু সত্যের অপলাপ ক'রে তার দাম কমিয়ে বলেছে, তা হ'লে তার মনের ভাব ঠিক এই রকম শ্রদ্ধান্বিত কৃতজ্ঞতায় ভ'রে থাকতো কি না তা বলা শক্ত।

কৃষ্ণকলি রামঘাতুর লাইব্রেরী-ঘর থেকে বেরিয়ে যেতেই রামঘাতু আগন মনে অক্ষুট স্বরে ব'লে উঠলো—এ কালপেচীটা তো দেখি কালসাপ! আমি যা লিখবো তাতেই হয়তো টের পাবে আমি কোথা থেকে উপকরণ সংগ্রহ ক'রে লিখেছি! এ আবার এক অস্বস্তি হ'লো! ও যেনো হয়েছে আমার পক্ষে সাপের ছুঁচো গেলা...না পারি গিলতে আর না পারি ওগ্লাতে, না পারি বাড়ীতে রাখতে, আর না পারি পরের বাড়ীতে পাঠাতে...

কৃষ্ণকলি বাড়ীর মধ্যে গিয়ে দেখলে মনমোহিনী সজ ঘুম থেকে উঠে হাই তুলছে। কৃষ্ণকলি অমনি তাড়াতাড়ি একটা

ডাবর একঘটা জল আর একখানা গাম্ছা নিয়ে গিয়ে তার পাশে দাঁড়ালো।

মনমোহিনী নিদ্রালশ-জড়িত চোখে কৃষ্ণকলির দিকে তাকিয়ে হেসে বললে—তুই কি আমাকে ন'ড়ে বসতে দিবি নে? ব'সে ব'সে থেকে দেখ তো কী মোটাই হ'য়ে উঠ'ছি!

কৃষ্ণকলি স্মিতমুখে নীরবে মনমোহিনীর সামনে ডাবর পেতে দিলে এবং তার হাতে জল ঢেলে দেবার জন্ত ঘটা ধ'রে নত হ'লো।

মনমোহিনী মুখ ধুয়ে গাম্ছা দিয়ে মুখ মুছতে লাগলো, কৃষ্ণকলি সেই অবসরে ডাবর আর ঘটা বাইরে রেখে এক ডিবে পান ও পিকদান এনে মনমোহিনীর সামনে রাখলে।

মনমোহিনীর মুখ মোছা শেষ হ'তেই কৃষ্ণকলি গাম্ছা নেবার জন্ত হাত বাড়ালে। কিন্তু মনমোহিনী গাম্ছা কৃষ্ণকলির হাতে না দিয়ে মাটিতে রাখলে এবং দুটো পান একসঙ্গে মুখে পূরতে পূরতে শূন্যহীন ভরাট মুখবিবর থেকে অস্পষ্ট গস্তীর শব্দ কণ্ঠে বাহির ক'রে বললে—গাম্ছা থাক, চুলের দড়ি নিয়ে আয়, চুল বেঁধে দি—মাথাটা যে একেবারে ডোকলা কাগের বাসা হ'য়ে রয়েছে ..আজকে আমাদের পাশের বাড়ীর নূতন ভাড়াটে ঝিকড়কোটার রাণী বেড়াতে আসবে।

কৃষ্ণকলির কালো মুখ লজ্জায় বেগুনে হ'য়ে উঠলো। সে বিশেষ ক'রেই জানে সে কালো কুৎসিত; তাই সে নিজেকে লোকলোচন থেকে লুপ্ত গুপ্ত ক'রে রাখতে চায়, এমন কি সে

কোনো দিন নিজে আয়নায় মুখ দেখে না। সে অতি সাধারণ সামান্য বেশে থাকে, পাছে বিশেষ বেশ-বিন্যাস দেখে কেউ বলে—আহা ঐ তো রূপের ছিরি! তার আবার অতো ভাবন কেনো!

মনমোহিনীর আদেশ শুনে কৃষ্ণকলি শঙ্কাসঙ্কোচে কাতর হয়ে বললে—খোকার জামাটা আধখানা সেলাই হ'য়ে আছে...

মনমোহিনী বললে—সে কাল হবে। আজ বাইরের লোক আসবে; এমন হ'য়ে কি থাকে? তারা দেখে কি বলবে? ভাববে, আমরা তোকে অযত্ন করি।

এর পরে আর কৃষ্ণকলি আপত্তি করতে পারলে না। কৃষ্ণকলির মনে হ'লো শরৎচন্দ্রের অরক্ষণীয় যেমন নিজেকে সাজিয়ে তুলতে চেষ্টা ক'রে অধিকতর কুৎসিত ক'রে তুলেছিলো, তেমনি দুর্দশা হয়তো তারও হবে; কিন্তু সে মরণাধিক লজ্জার আঘাত পেলেও এ কথা লোককে ভাববার অবসর দিতে পারবে না যে সে এ বাড়ীতে অনাদরে আছে। কৃষ্ণকলি চুল বাঁধবার দড়ি নিয়ে এসে মনমোহিনীর সামনে বসলো। লজ্জার সঙ্কোচে সে অত্যন্ত পীড়িত হ'লেও মনমোহিনীর প্রসাধন-আয়োজন নীরবে সহ করতে লাগলো।

কৃষ্ণকলির সুদীর্ঘ চুলের বিহুনী তখনও শেষ হয় নি, এমন সময় একটি গৌরাঙ্গী সুন্দরী প্রোঢ়া বিধবা ও একটি রূপসী কিশোরী বালিকা সেইখানে এসে উপস্থিত হলো।

তাদের আসতে দেখেই মনমোহিনী কৃষ্ণকলির বিহুনী

ছেড়ে দিয়ে ধড়মড়িয়ে উঠে দাঁড়ালো এবং মোটা শরীর নিয়ে উঠে দাঁড়াবার বিলম্বিত সময়ের মধ্যে বললে—আসুন রাণীদিদি আসুন, আজ আমার কি সৌভাগ্য, গরীবের দরজায় হাতীর পাড়া, আপনার পায়ের ধুলো যে আমার বাড়ীতে পড়বে...

রাণী বললে—এসে অবধি অন্নপূর্ণা দর্শন করতে আসবো মনে করি, হ'য়ে ওঠে না, আজ এলুম...

মনমোহিনী চীৎকার ক'রে ডাকলে—লছিয়া, এই লছিয়া, শীগ্গির ক'রে কার্পেটখানা এনে এইখানে পেতে দে...

রাণী বাড়ীতে এসেছেন, এই সংবাদ বাড়ীময় ছড়িয়ে প'ড়েছিলো ; চাকর দাসী ছেলেমেয়ে সবাই উৎসুক হ'য়ে রাণী দেখতে ছুটে এসেছিলো ; মনমোহিনীর আদেশ শোন্বামাত্র একজন দাসী দৌড়ে গিয়ে কার্পেট এনে রাণীর সামনে বিছিয়ে দিলে ।

কৃষ্ণকলির ইচ্ছা হ'ছিলো সে ছুটে পালিয়ে গিয়ে লোকচক্ষুর অন্তরালে কোথাও লুকায় ; কিন্তু অসমাপ্ত বেণী নিয়ে সে উঠে যেতেও লজ্জায় বাধা পাচ্ছিলো ।

রাণী আসনে বসতে বসতে বললে—এ মেয়েটি ? আপনার ?

এই প্রশ্নের ধাক্কায় কৃষ্ণকলির মাথা তার কোলের দিকে ঝুঁকে পড়লো ।

মনমোহিনী কৃষ্ণকলির পিঠের কাছে ব'সে তার অসমাপ্ত বেণী

হাতে তুলে নিয়ে দীর্ঘনিঃশ্বাস ফেলে বললে—হ্যা, আমার মেয়েই বটে, যদিও পেটে ধরি নি। এতোটুকু বেলা থেকে মানুষ ক'রে এতোবড়োটি করেছি। ওর বাপ-মা কেউ কোথাও নেই, আমরাই এখন ওর বাপ-মা।

রাণী জিজ্ঞাসা করলে—আপনাদের অনাথ-আশ্রমে এসেছিলো বুঝি ?

মনমোহিনী ব্যস্তভাবে বললে—না, না, ও মন বড়লোকের মেয়ে, কিন্তু বাপ এক পয়সাও রেখে যেতে পারেন নি। এর বাপই ওঁর চাকরী ক'রে দিয়েছিলেন ; আমাদের যা-কিছু তা সব এর বাপ হ'তেই ; তাই অমন বন্ধুর মেয়েকে তো আমরা ফেলতে পারি নি ..

রাণী আবার জিজ্ঞাসা করলে—এর বিয়ে হয়েছে কোথায় ?

মনমোহিনী বললে—বিয়ে হয় নি এখনও ! বাপ তো এক পয়সাও রেখে যেতে পারে নি ; তা উনি খরচ ক'রে বিয়ে দিতে প্রস্তুত আছেন, কিন্তু ভালো পাত্র তো পাওয়া যায় না, আর যার-তার হাতেও তো দেওয়া যায় না...

মনমোহিনীর কথার মধ্যে কিন্তুটার যে কি মানে তা ক্লঞ্চকলি বেশ বুঝতে পারলে ; তার কুরূপের জন্যই যে ভালো পাত্র ভয় পেয়ে পালায় তা তো সে অনেক বার শুনেছে। লজ্জাতে তার মাথা কাটা যাচ্ছিলো ; অথচ তার পালাবার পথ বন্ধ ; মনমোহিনীর হাতে তার বেণী আটকে আছে ; তার মনে হচ্ছিলো যে বলাবদ্ধ ঘোড়া এগ্নি ক'রেই চাবুকের আঘাত সহ করে।

মনমোহিনীর কথার উত্তরে রাণী বললে—আমার এই মেয়ের জন্মে একটি পাত্র খুঁজতেই আমার কল্কাতায় এসে থাকা। তা দিদি, তোমার কর্তাকে একটু বোলো না, যদি কোনো সংপাত্রে সন্ধান দিতে পারেন। সংচরিত্র আর লেখাপড়াজানা ছেলে হ'লেই হবে।

মনমোহিনী বললে—তা আমি ব'লে দেখবো.. একটি খুব ভালো পাত্র আমাদের সন্ধান আছে, তবে তার বাপ-মা তেমন বড়োলোক নয়, তাই বলতে সাহস হয় না, বামন হ'য়ে চাঁদে হাত দেবার চেষ্টার মতন সে যে হাসির কথা হবে।

রাণী হাসিমুখে বললে—সেটি তবে আপনারই ছেলে বেয়ান! আমার মেয়ের কি অমন ভাগ্য হবে যে এমন উঁচু ঘরে পড়বে? আপনাদের নাম যশ যে বাংলা-জোড়া।

মনমোহিনী বললে—আপনি বখন বেয়ান ব'লে স্বীকার ক'রে নিলেন, তখন বলি সেটি আমারই ছেলে, বেয়ান। তা আমি গুঁকে আজই ব'লে ছেলেকে আসতে তার করাবো।

রাণী জিজ্ঞাসা করলে—ছেলে কোথায় আছে?

মনমোহিনী বললে—সে লঙ্কায় না সিলোনে কোথাকার কলেজের পফেচার,...

এতোক্ষণে কৃষ্ণকলি ছাড়া পেয়ে উঠে আস্তে আস্তে সেখান থেকে চ'লে গেলো। যাবার সময় দেখে গেলো কিশোরী মেয়েটির মুখ বিবাহের কথায় গোলাপ-ফুলের আভায় সুন্দর দেখাচ্ছে।

রাণী রামঘাটুর বাড়ীর ঐশ্বর্য্য, অন্নপূর্ণা ঠাকুর, আর অনাথ-আশ্রম দেখে চ'লে গেলো। যাবার সময় অনাথ-আশ্রমে পাঁচ শো টাকা এবং অন্নপূর্ণাকে প্রণামী একখানি গিনি দিলে।

রাণী চ'লে গেলো এই টাকাগুলি নিয়ে মনমোহিনী স্বামী-সন্দর্শনে গেলো।

রামঘাটু মনমোহিনীর হাতে টাকা দেখে জিজ্ঞাসা করলে—ও টাকা কিসের ?

মনমোহিনী বললে—এই পাণের বাড়ীতে ভাড়াটে কোথাকার যে রাণী এসেছে, সেই আজ বেড়াতে এসেছিলো ; অন্নপূর্ণাকে গিনি দিয়ে পেরাম ক'রে গেছে, আর অনাথ-আশ্রমে পাঁচ শো টাকা দিয়েছে।

রামঘাটু হেসে বললে—ভালোই হ'লো, আমাকে আর ব্যাক্ থেকে টাকা তুলতে হ'লো না। তুমি ব্রেস্লেট গড়াবে ব'লে টাকা চেয়েছিলে। ঐ টাকাটা তোমার কাছেই রেখে দাও।

মনমোহিনী খুশী হ'লো। কিন্তু গহনার সন্ধকে কোনো কথা না ব'লে বললে—আর দেখো, রাণীর একটি খাসা সুন্দরী ডাগর মেয়ে আছে ; তার জন্তে পাত্র দেখতে বল্ছিলো। আমাদের বনমালীর যদি বিয়ে হ'য়ে না যেতো, তা হ'লে রাণীর এই মেয়ের সন্ধে বিয়ে দিতে পারলে ওর সমস্ত বিষয়-সম্পত্তি আমাদের হ'তো...

রামঘাটু ঈষৎ দীর্ঘনিশ্বাস ফেলে বললে—দেশ থেকে

কুলীনের বিয়ের ব্যবসা উঠে গেলো, এখন আর এ-স্বন্ধে ভেবে কি হবে বলা ?

মনমোহিনী বললে—আমি রাণীকে প্রিয়তোষের কথা ব'লেছি ; সে তো খুশী হ'য়ে আমার সঙ্গে বেয়ান সম্পর্ক পাতিয়ে গেছে ; তা তুমি প্রিয়তোষকে আস্তে টেলিগ্রাম করো ; তার সঙ্গে বিয়ে হ'লেও বিষয়-সম্পত্তিটা আমাদেরই বংশের একজনের হবে ।

রামঘাটু লাফিয়ে উঠে আট ছেলের মা প্রোটা পত্নীর মুখচুষন ক'রে বললে—মনমোহিনী, কে বলে তোমার বুদ্ধি নেই ? তুমি আমার সহধর্মিণী প্রেয়সী !

মনমোহিনী খুশী হ'য়ে হাসিমুখে বললে—রাখো তোমার নেকুরা রাখো, বুড়া ষয়সে আর থিয়েটারী ঢং করতে হবে না । প্রিয়তোষকে আস্তে লেখো ।

রামঘাটু টেলিগ্রামের ফর্ম্ টেনে নিয়ে বললে—এখনই লিখছি ।

প্রিয়তোষ পিতার কাছ থেকে এই প্রথম আহ্বান পেয়ে পুলকিত হ'য়ে উঠেছে । বনমালী তার কাছে আসা অবধি সে বারম্বার প্রশ্ন ক'রে ক'রে পিতা মাতা ভাই ভগিনী প্রভৃতির সম্বন্ধে সমস্ত খুঁটিনাটি খবর জেনে নিয়েছে ; তার পিতার বাড়ীতে ক'জন দাস-দাসী আছে, তাদের নাম কি, তাদের প্রকৃতি কি-রকম, তাও

জানতে তার বাকী নেই, এবং কৃষ্ণকলির সমস্ত ইতিহাসও সে জানে। বনমালীর কাছে তাদের পরিবারের যে সম্বন্ধিত ফটোগ্রাফ আছে তাই দেখে দেখে প্রিয়তোষ পিতৃপরিবারের সকলকে বেশ ক'রে চিনেও রেখেছে, যদি কখনো তাদের সঙ্গে চাক্ষুষ সাক্ষাৎ হয়, তবে যেনো পরিচয়ে কোনো বাধা না ঘটে।

প্রিয়তোষ যখন পিতার টেলিগ্রাম পেলে, তার অল্পদিন পরেই কবিগুরু রবীন্দ্রনাথের বিলাতযাত্রার পথে কলম্বোতে আসার কথা ; রবীন্দ্রনাথের পরম ভক্ত সে ; তাঁকে প্রণাম করবার সুযোগ আসছে বলে সে অত্যন্ত আনন্দিত হ'য়ে মুগ্ধ প্রাণের শ্রদ্ধাঞ্জলি সাজিয়ে শুভক্ষণের অপেক্ষায় দিন গুণ্ছিলো। এমন সময় পিতার টেলিগ্রামে আহ্বান পেয়ে সে একটু বিধাঙ্কিত হ'লো, কিন্তু পিতার প্রথম আহ্বান সে অবহেলা করতে পারলে না। সে কলেজ থেকে ছুটি নিয়ে কলকাতায় রওনা হ'লো।

রামযাদু ষ্টেশনে পুত্রকে প্রত্যুদগমন ক'রে আনতে গিয়েছে। সে তো পুত্রকে চেনে না ; পুত্রের জননীর আদল হয় তো পুত্রের মুখে কিছু থাকতে পারে ; কিন্তু পরিত্যক্তা পত্নীর মূর্তি তো রামযাদুর মনে মুদ্রিত হ'য়ে নেই। কোন্ ক্লাসের গাড়ীতে প্রিয়তোষ আসছে তাও সে জানে না। তাই ট্রেন যখন প্ল্যাটফর্মে এসে লাগলো তখন রামযাদু চারিদিকে উদ্ভ্রাস্তের মতন তাকাচ্ছে। একটু পরেই একটি প্রিয়দর্শন গৌরবর্ণ দীর্ঘ

ঝাজুকায় যুবক এসে রামঘাটুর পায়ের গোড়ায় ভূমিষ্ঠ হ'য়ে প্রণাম ক'রে পায়ের ধুলো নিয়ে দাঁড়ালো।

রামঘাটু যুবকের ঈষৎ লজ্জিত স্মিত মুখের দিকে ক্ষণকাল তাকিয়ে থেকে জিজ্ঞাসা করলে—তুমি প্রিয়তোষ ?

প্রিয়তোষ কুণ্ঠিত দৃষ্টি অবনত ক'রে বললে—আজ্ঞে হ্যাঁ।

রামঘাটু ব'লে উঠলো—এসো বাবা এসো। তোমার জিনিসপত্র কোথায় ?

প্রিয়তোষ বললে—সঙ্গে বেশী কিছু জিনিসপত্র আনি নি, এই মুটের মাথাতেই আছে।

রামঘাটু একবার মুটের মাথায় স্ট্রট্-কেস ও হাতে একটা ব্যাগের প্রতি দৃষ্টিপাত ক'রেই বললে—চলো বাবা চলো, ঐদিকে আমার মোটরগাড়ী আছে।

প্রিয়তোষ পিত্রালয়ে এসে সকলের সঙ্গে পরিচয় করলে। কিন্তু সব চেয়ে তার দৃষ্টি আর মনোযোগ আকর্ষণ করলে কৃষ্ণকলি। কৃষ্ণকলির কদর্যা কুৎসিত কুশ্রীতাই দৃষ্টি ও মনোযোগ আকর্ষণ করবার পক্ষে যথেষ্ট ; তার উপর আবার তার ছুরদৃষ্টের ইতিহাস শুনে অবধি তার প্রতি অনুকম্পার উদ্রেক হয়েছিলো ; এখন এখানে এসে কৃষ্ণকলির সেবা-নিপুণতা ও কন্মতৎপরতার সঙ্গে তার সলজ্জ মৃদুতা প্রিয়তোষকে পুনঃপুনঃ তার সম্বন্ধে সচেতন ক'রে তুলতে লাগলো।

কৃষ্ণকলিও যুবতী স্ত্রীলোকের অনুভবন-শক্তির দ্বারা বুঝতে পারতে লাগলো যে, সে সর্বদা একটি তরুণ স্কুয়ার পুরুষের

লক্ষ্যের বিষয় হ'য়ে উঠেছে। এতে তার স্বাভাবিক লজ্জা চতুর্গুণ বর্ধিত হ'য়ে তার কদর্যতা ঢেকে তাকে ব্রীড়ার মাধুর্য মাখিয়ে দিতে লাগলো।

একদিন রাণী তার কণ্ঠা নিয়ে বেড়াতে এলো। মনমোহিনী প্রিয়তোষকে ডেকে পাঠালে।

প্রিয়তোষ সেই ঘরে এসেই অপরিচিতা মহিলাদের দেখে খম্কে দাঁড়ালো।

মনমোহিনী প্রিয়তোষের দিকে তাকিয়ে হেসে রাণীকে বললে—এইটি আমার বড়ো ছেলে, প্রিয়তোষ।—প্রিয়, আমার ইনি রাণী বেয়ান, পেন্নাম করো—

প্রিয়তোষ মনে করলে, এই মহিলা হয়তো বা তার মাতার কোনো আত্মীয়া হবে; তাই সে মাতৃ-আদেশ পেয়ে রাণীকে প্রণাম করলে।

রাণী বললে—বেঁচে থাকো বাবা, রাজ-রাজেশ্বর হও—
তার পর মনমোহিনীর দিকে ফিরে রাণী বললে—খাসা ছেলে, রাজপুত্রের মতন ছেলে!

মনমোহিনী হেসে প্রিয়তোষকে বললে—আচ্ছা বাবা, তুমি এখন এসো—

প্রিয়তোষ চ'লে গেলো। যাবার সময় একবার কিশোরী রাজকন্যাকে অপাঙ্গে দেখে নিয়ে গেলো।

রাণী প্রিয়তোষকে দেখে সন্তোষ প্রকাশ ক'রে বললে—
আমার মাধুরীকে তোমরা নিয়ে আমাকে নিশ্চিন্ত করো বেয়ান।

মনমোহিনী বললে—আচ্ছা একটু বোসো বেয়ান, এখনই ছেলের মত জেনে আসি।

মনমোহিনী প্রিয়তোষের ঘরে যেতেই প্রিয়তোষ চেয়ার ছেড়ে উঠে দাঁড়ালো।

মনমোহিনী হেসে বললে—রাণীর মেয়েটিকে তো দেখলে বাবা, পছন্দ হয় ?

হঠাৎ এই প্রশ্নে প্রিয়তোষ লজ্জিত হ'য়ে কোনো উত্তর দিতে পারলে না ; লজ্জিত মুখ নত করলে।

মনমোহিনী বলতে লাগলো—আমাদের বড়ো ইচ্ছে, তোমার সঙ্গে ঐ মেয়েটির বিয়ে দি ; খাসা মেয়েটি, নম্র ধীর, দেখতে যে কেমন তা তো নিজেই দেখলে ; আর ও মায়ের এক মেয়ে, সব সম্পত্তি মেয়ে-জামাইয়েরই হবে ; রাণীর খুব ইচ্ছে যে, মেয়ের বিয়ে তোমার সঙ্গে দেন, তোমাকে তাঁর খুব পছন্দ হয়েছে ; আমাদেরও মেয়েটিকে খুব পছন্দ হয়েছে ; এখন তোমার মত হ'লে আমরা এই শুভ কার্যের আয়োজন করি। এই জন্মেই তোমাকে অতো তাড়াতাড়ি তার ক'রে আনানো হয়েছে।

প্রিয়তোষ বললে—আপনারা আমাকে যা আদেশ করবেন আমি তাই করবো।

মনমোহিনী খুশী হ'য়ে বললে—বেশ বাবা বেশ, বেঁচে ব'র্ত্তে থেকে রাজরাজেশ্বর হও। আমি বেয়ানকে সুখবর দিই গিয়ে...

মনমোহিনী প্রিয়তোষের কাছ থেকে রাণীর কাছে ফিরে আসতে আসতে উলু দিয়ে উঠলো এবং রাণী যে-ঘরে ব'সে

ছিলো সেই ঘরে ঢুকেই হাস্তে হাস্তে বললে—বেয়ান-রাণী, ছেলের আমার বোঁমাকে পছন্দ হয়েছে.....অমন প্রতিমার মতন মেয়েকে পছন্দ হবে না আবার! এইবার নিকটেই যে শুভদিন আছে সেই দিনেই দু-হাত এক ক'রে দিতে হবে.....

রাজকন্য়ার স্ত্রী সুন্দর মুখখানি লজ্জার অরুণরাগে সুন্দরতর হ'য়ে উঠলো।

সেই ঘরের পাশের ঘরে কাজ করছিলো কৃষ্ণকলি। মনমোহিনীর কথা শুনে তার কালো মুখ আরো কালো মলিন হ'য়ে গেলো; কি জানি কেনো ঐ সুন্দরী মেয়েটির প্রতি ঈর্ষায় তার মন ভ'রে উঠলো আর অবারণ কান্না তার বুকের মধ্যে ঠেলে ঠেলে উঠতে লাগলো। সে তাড়াতাড়ি লাইব্রেরীর দিকে চললো; সেই ঘরগুলাই নির্জন, বইয়ের আল্‌মারীর অরণ্যের মধ্যে নিজেকে লুকিয়ে সে হৃদয়বেদনা গোপন করতে চায়।

লাইব্রেরীর দিকে যেতে যেতে কৃষ্ণকলির সামনে পড়লো প্রিয়তোষ। তাকে দেখেই তার লজ্জা ও দুঃখ প্রবল হ'য়ে উঠলো, সে তাড়াতাড়ি মুখ ফিরিয়ে চ'লে গেলো।

বাড়ীতে দাসীরা জোড়া শাঁখ বাজিয়ে আসন্ন বিবাহ-উৎসবের আনন্দ ঘোষণা করছে, থেকে থেকে উলুধ্বনি হচ্ছে। এই-সব শুনে ও ম্লানমুখী কৃষ্ণকলিকে দেখে প্রিয়তোষের মনে হ'লো—আমি বাবাকে ব'লে কাগজে কাগজে বিজ্ঞাপন দেবো, আর একটি সংপাত্রে পেলো কৃষ্ণকলিরও বিবাহ দেবার চেষ্টা করবো।

মেয়েটি কালো বটে, কিন্তু খাসা স্বভাব ! আমি ওকে যতোই দেখছি, ততোই ভালো লাগছে ।

কৃষ্ণকলি লাইব্রেরীর বিজনতায় গিয়ে ধরা পড়বার সম্ভাবনা থেকে অপমৃত হ'তেই তার চোখ দিয়ে টম্ টম্ ক'রে জল পড়তে লাগলো । সে এক-গাদা বইয়ের উপর ব'সে চোখে আঁচল চাপা দিলে ।

খানিকক্ষণ চোখের জল ফেলে কৃষ্ণকলির মনটা যখন কথঞ্চিৎ হালকা হ'লো, সে তখন সমস্ত অবস্থাটা ভেবে দেখবার অবকাশ পেলো । বিয়ে হবে প্রিয়তোষের, তাতে সে কঁাদে কেনো ? রাজকন্যার রূপ আর ঐশ্বর্য তো তার নেই, তবে তার সৌভাগ্যে সে ঈর্ষা অনুভব করে কেনো ? কৃষ্ণকলি নিজের এই স্বার্থপর ক্ষুদ্রচিত্ততায় অত্যন্ত ব্যথিত ও লজ্জিত হ'লো ; তার মনে হ'লো, সে দু-দিনের-দেখা প্রিয়তোষের প্রতি অহুরাগিণী হ'য়ে অপরাধিনী হয়েছে ; সে নিজেকে ব্যভিচারিণী মনে ক'রে অত্যন্ত সন্তপ্ত হ'লো... ..যাকে পাবার লেশ মাত্র আশা নেই তার প্রতি আকৃষ্ট হওয়া ব্যভিচার নয় তো কি ? কিন্তু কৃষ্ণকলির লজ্জা-সস্তাপ-পীড়িত অন্তরে নিরন্তর গুঞ্জন ক'রে ফিরতে লাগলো এই কথা—

“তবে পরাণে ভালোবাসা কেনো গো দিলে

রূপ না দিলে যদি বিধি হে !

পূজার তরে হিয়া উঠে যে ব্যাকুলিয়া,

পূজিব তারে গিয়া কি দিয়ে ?”

অলক্ষণ পরেই কৃষ্ণকলি শুন্তে পেলেন মনমোহিনী কোন্ দাসীকে জিজ্ঞাসা করছে—ই্যা রে ক্ষেমা, কলি গেলো কোথায় ? তাকে ডেকে দে তো...প্রিয়র গায়ে-হলুদের জোগাড় করতে হবে...আর তো বেশী দিন নেই...মাঝে আর দুটি দিন মাত্র...

কৃষ্ণকলি মনমোহিনীর এই কথা শুনেই চকিত হ'য়ে উঠলো, —এর আগে তো কোনোদিন তাকে খুঁজে কাজ করতে বলতে হয় নি ; এমন কর্তব্যের ক্রটি তার ঘটেছে কেনো ? তার যে- কারণই থাকুক, এই ক্রটির জন্ম সে লজ্জিত ও সন্তপ্ত হ'লো । সে তাড়াতাড়ি আঁচল দিয়ে চোখ-মুখ মুছে উঠে পড়লো । কিন্তু প্রিয়র গায়ে-হলুদের জোগাড় ক'রে দিতে যেতে তার পা চলতে চাইছিলো না ।

কৃষ্ণকলি ব্যস্ত হ'য়ে চ'লে গেলো । এইজন্মই সে দেখতে পেলেন না তার পিছনে বইয়ের আলমারীর পাশে দাঁড়িয়ে প্রিয়তোষ তার কান্না দেখছিলো ।

প্রিয়তোষ কৃষ্ণকলিকে কাঁদতে দেখে অবাক ও স্তম্ভিত হ'য়ে গিয়েছিলো । সে চিন্তা করতে লাগলো কৃষ্ণকলি কাঁদে কেনো ? এ বাড়ীতে সে সর্বজনসমাদৃত ; প্রিয়তোষ তো এতো দিনের মধ্যে কোনো দিন কাউকে কর্কশ কটু কথা ব'লে কৃষ্ণকলিকে সঙ্ঘোষন করতে শোনেই নি, বরং সকলের অত্যাচার তাকে আশ্চর্য্য করলেও প্রীত করেছে । তবে কৃষ্ণকলির দুঃখ কোথায় ? পিতা-মাতাকে সে হারিয়েছে শৈশবে ; তাঁদের স্মৃতি বা অভাব এতোদিন পরে তাকে পীড়া দিচ্ছে এও সম্ভব মনে হয় না ।

তবে ? এ কি নিঃসঙ্গ যৌবনের বেদনা ? প্রিয়তোষ চিন্তিত মনে ঘুরতে ঘুরতে বাড়ীর বাইরে রাস্তার ধারে গিয়ে দাঁড়ালো ।

কিছুক্ষণ পরে একজন পথিক পথ দিয়ে যেতে যেতে রামঘাটর বাড়ীর দিকে দৃষ্টি ফিরিয়েই ব'লে উঠলো—আরে প্রিয়তোষ যে ?

সেই সঙ্গে সঙ্গে প্রিয়তোষও সহাস্রবদনে ব'লে উঠলো—
আরে সত্য-দা যে ! অনেক কাল পরে দেখা ! কি করছো তুমি ?

সত্যদাস বললে—ভেরেণ্ডা ভাঙছি । তুমি তো কলস্বোত্তে ছিলে শুনেছিলাম ; এখানে দেখছি যে ?

প্রিয়তোষ হেসে বললে—বাপের বাড়ী এসেছি ।

সত্যদাস আশ্চর্য্য হ'য়ে জিজ্ঞাসা করলে—রামঘাট-বাবু তোমার পিতা ?

প্রিয়তোষ ঘাড় নেড়ে স্বীকৃতি জানালে ।

তখন সত্যদাস বললে—ভাই, তুমি যদি আমার সঙ্গে একটু আসো, তা হ'লে তোমায় একটা কথা বলি । এখানে তোমার বাবার বাড়ীর দরজায় দাঁড়িয়ে কথা বলতে আমার সাহস হয় না ।

প্রিয়তোষ আশ্চর্য্য হ'য়ে বললে—চলো, আমি তোমার সঙ্গে যাচ্ছি ।

প্রিয়তোষ সত্যদাসের সঙ্গে সঙ্গে চললো । সত্যদাস ও প্রিয়তোষ পূর্বপরিচিত ; প্রিয়তোষের মাতামহ যখন কৃষ্ণনগরে প্রফেসার ছিলেন, তখন সত্যদাস ছিলো তাঁর প্রিয় ছাত্র ;

প্রিয়তোষ তখন বালক। বয়সের অসমতা সত্ত্বেও সত্যদাসের সঙ্গে প্রিয়তোষের বন্ধুত্ব জ'মে উঠেছিলো। তার পর প্রিয়তোষের মাতামহ বদলী হ'য়ে রাজসাহী যান, তখন সত্যদাস ও প্রিয়তোষ ছাড়াছাড়ি হ'য়ে যায়। বহুকাল পরে আজ দুই অসমবয়সী বন্ধুর সাক্ষাৎ ঘটেছে।

খানিক দূর অগ্রসর হ'য়ে গিয়ে প্রিয়তোষ আর ঔৎসুক্য দমন করতে না পেরে জিজ্ঞাসা করলে—কি বলবে সত্য-দা ?

সত্যদাস প্রিয়তোষের দিকে ফিরে গস্তীর মুখে বললে—তোমার কাছে আমার একটা নালিশ আছে ভাই ; তোমার কাছে আমি বিচার প্রার্থনা করি।

প্রিয়তোষ অধিকতর আশ্চর্য্য হ'য়ে জিজ্ঞাসা করলে—আমার কাছে নালিশ ? কিসের বিচার ?

সত্যদাস গস্তীর ভাবে বললে—শোনো সব বলছি।..... আমি কিছুদিন তোমার পিতার আশ্রয়ে তাঁর প্রাইভেট-সেক্রেটারী, অনুলেখক, বাজার-সরকার, ছেলে-মেয়েদের মাষ্টার ইত্যাদি বহুরূপী ভাবে ছিলাম। ছেলেবেলা থেকে আমি কবিতা লিখতাম, জানো। বই ছাপাবার সুখ ছিলো, কিন্তু পয়সার সঙ্গতি ছিলো না। তোমার বাবা কাগজে বিজ্ঞাপন দিয়েছিলেন ছুঃস্থ লেখকের লেখা তিনি প্রকাশ ক'রে দেবেন, যদি সে-লেখার বাস্তবিক সাহিত্যিক মূল্য থাকে। প্রলোভনে প'ড়ে আবেদন ক'রেছিলাম ; আর আমার লেখাই বোধ হয় সর্বোৎকৃষ্ট মনে হওয়াতে তোমার বাবা আমাকে ডেকে

বাড়ীতে থাকতে বলেন। তার পর বই ছাপা হ'লো রাম শর্মা নামে; মাসিক-পত্রে লেখা বেরুতে লাগলো রাম শর্মা নামে; সবাই মনে করলে প্রসিদ্ধ লেখক রামযাছু মুখুজ্জেরই রচনা। আমার যশ অপহরণ আমি সহ ক'রেই ছিলাম। কিন্তু পরম পুণ্যবানু আর হিতৈষী বন্ধু পরাণ-বাবুকে ঠকিয়ে জাল উইল আর জাল দলিল তৈরী ক'রে যখন পরাণ-বাবুর কন্যা কৃষ্ণকলিকে বঞ্চিত করলেন, তখন সে অধর্ম আমি আর সহ করতে পারিনি। আমি প্রতিবাদ করলাম। তার ফল হ'লো—আমার চাকরী গেলো, আর বিজ্ঞাপন দিয়ে প্রচার করা হ'লো, আমি তাঁর কবিতার খাতা চুরি ক'রে নিয়ে পালিয়েছি, আমার লেখা কোনো কাগজে যেনো আর ছাপা না হয়! আমার নিজের লেখায় আমি চোর হ'য়ে রইলাম।...কৃষ্ণকলিকে তুমি দেখে থাকবে...পাছে তার বিয়ে হ'লে তার শুরুরবাড়ীর লোকে তার পিতৃসম্পত্তি উদ্ধার করে, তাই তার বিয়ের চেষ্টা পর্যন্ত করা হয় না, লোককে ও তাকে বোঝানো হয় যে, তার কুরূপ দেখে নিঃস্ব তাকে কেউ বিয়ে করতে চায় না। কৃষ্ণকলিকে বঞ্চিত করার কথা এক কেবল আমি জানি; কিন্তু প্রকাশ করতে পারি না, লোকে বলবে আমার চাকরী থেকে জবাব দিয়েছিলেন বলে আমি শত্রুতা ক'রে অতবড়ো প্রতিষ্ঠাবানু লোকের নামে অপবাদ ঘোষণা করছি। যেখানেই অগ্রায় অধর্ম হোক, তার প্রতিবাদ ও প্রতিকার করা প্রত্যেক সং ব্যক্তির কর্তব্য; কিন্তু আমার কর্তব্য তার চেয়েও বেশী। সেই জাল উইলে আর জাল দলিলে

আমাকে সাক্ষী ক'রে আমাকেও অধর্মের ভাগী ক'রে রাখা হয়েছে। এরই আমি স্মবিচার আর প্রতিকার প্রার্থনা করি।

প্রিয়তোষও চিন্তান্বিত ও গস্তীর হ'য়ে বললে—তুমি আমাকে সব কথা আর-একটু খুলে পরিষ্কার ক'রে বুঝিয়ে বলো সত্য-দা।

সত্যদাস যা জানতো, যা সন্দেহ করতো, সব কথাই একে একে খুলে বিস্তারিত ক'রে প্রিয়তোষকে বললে। প্রিয়তোষের মুখ বড়ো ম্লান ও কাতর হ'য়ে উঠলো। সে সত্যদাসকে বললে—তুমি নিশ্চিত হ'য়ে যাও সত্য-দা। পিতৃপাপের প্রায়শ্চিত্ত আমি নিশ্চয় করবো।

সত্যদাস খুশী হ'য়ে চ'লে গেলো। প্রিয়তোষ চিন্তিত হ'য়ে গৃহে ফিরলো।

কৃষ্ণকলি দূরে আড়ালে থেকে যতোবার পারে প্রিয়তোষকে দেখে দেখে ফেরে। সে প্রিয়তোষের পায়ের শব্দ শুনেই চঞ্চল হ'য়ে একবার তাকে দেখতে পাওয়া যায় এমন পথ দিয়ে চ'লে গেলো; এবং এক নিমিষের দৃষ্টিতেই সে বুঝতে পারলে প্রিয়তোষের প্রিয়দর্শন প্রফুল্ল মুখশ্রী চিন্তাক্রিষ্ট ম্লান হ'য়ে উঠেছে।

প্রিয়তোষ কি ক'রে যে প্রকৃত তত্ত্ব নির্ণয় করবে সেই চিন্তায় অভিভূত হ'য়ে বেড়ায়; সে যেনো ডিটেক্টিভ, রহস্য উদ্ঘাটনে নিযুক্ত হয়েছে। একবার সে ভাবে, কৃষ্ণকলিকে জিজ্ঞাসা করবে সে কিছু জানে কি না; আবার ভাবে, যদি সে কিছু না জানে তবে তার এই নিশ্চিত শাস্তি ভঙ্গ ক'রে কি লাভ হবে। কখনো কখনো সে ভাবে, একেবারে গিয়ে পিতাকেই প্রশ্ন ক'রে বসে;

কিন্তু তিনি পুত্রের কাছে এতোবড়ো লজ্জার কথা প্রকাশ করবেন না, এ তো নিশ্চয়। তবে সে কি চুরি করে পিতার বাক্স তল্লাস করবে? তারই বা স্বযোগ কোথায়? সে যে কি করবে, কিছুই স্থির করতে পারছিলো না ব'লেই সে দিন দিন বেশী চিন্তিত ও গম্ভীর হ'য়ে উঠছিলো।

প্রিয়তোষের মলিন মুখ দেখলেই কৃষ্ণকলির কেমন কান্না পায়। সে পালিয়ে একলা নির্জন স্থানে লুকায়। বাড়ীর মধ্যে বিজন স্থান লাইব্রেরীর ঘরগুলি। সে মাঝে মাঝে পালিয়ে বইয়ের আলমারীর সারির ফাঁকে লুকিয়ে ব'সে থাকে, উদ্গত অশ্রু দমন করতে চেষ্টা করে।

একদিন কৃষ্ণকলি দুপুরবেলা লাইব্রেরীতে গিয়ে একান্তে ব'সে আছে; এমন সময় প্রিয়তোষের অতি-পরিচিত চটি-জুতার শব্দ শুনে কৃষ্ণকলি চমকে উঠলো। সে সন্তর্পণে উঠে আলমারীর পাশ ঘেঁসে দাঁড়ালো। প্রিয়তোষ তার সামনে দিয়ে চ'লে গেলো। কৃষ্ণকলি নিষ্কৃতির নিশ্বাস ফেলে বাঁচলো—যাক, উনি দেখতে পান নি। কিন্তু প্রিয়তোষ দেখতে পেয়েও দেখতে পায় নি এমনি ভাবে চ'লে গিয়েছিলো; কৃষ্ণকলি যে তার কাছ থেকে লুকাতে চেষ্টা করছে এটা জানতে পেরে প্রিয়তোষ আর তার লজ্জা বাড়াতে ইচ্ছা করে নি।

প্রিয়তোষ চ'লে যাচ্ছে এমন সময় দেখলে খানকতক চিঠি ফরফর করে উড়তে উড়তে তার সামনে দিয়ে চ'লে যাচ্ছে; এবং পাশের ঘর থেকে তার পিতার ব্যস্ত কণ্ঠস্বর শুনে পেলো—ওরে,

ওরে পচা, খেঁদি, কে কোথায় আছিস্...ছুটে আয়...সব কাগজ-পত্ৰ উড়ে গেলো।

প্রিয়তোষ পত্রগুলো তুলে নিলে। এবং হাতে তুলতেই একখানা চিঠিতে তার চোখে পড়লো কৃষ্ণকলির নাম। তাড়াতাড়ি উল্টে সহি দেখলে পরাণ-বাবুর। তার পর তারিখ দেখলে তাঁর মৃত্যুর দিনের। অমনি চকিতে প্রিয়তোষের মনে হ'লো এই পত্র পরাণ-বাবুর মৃত্যুর পূর্বে লিখিত শেষ পত্র হওয়া সম্ভব। অমনি সেখানাকে পকেটে ফেলে সে পিতার ঘরে গিয়ে ঢুকলো এবং দম্কা বাতাসে ঘরময় ছড়ানো কাগজ কুড়িয়ে তুলতে ব্যাপৃত পিতাকে সাহায্য করতে প্রবৃত্ত হ'লো।

সমস্ত কাগজপত্র কুড়িয়ে দিয়ে প্রিয়তোষ নিজের ঘরে গিয়ে ঢুকলো এবং দরজায় খিল দিয়ে অপহৃত পত্র পড়তে আরম্ভ করলে।

পত্রখানা তিনবার পড়লে। তার পর দীর্ঘনিশ্বাস ফেলে সেখানা বাক্সের মধ্যে বন্ধ ক'রে রেখে বিছানায় ব'সে পড়লো। এই তার পিতার চরিত্র! তার মাতার প্রতি অবিচারী, তার প্রতি উদাসীন, পরপ্রবঞ্চক এই পিতার প্রতি অশ্রদ্ধায় তার মন ভ'রে উঠলো। সে দেবীচৌধুরাণীর ব্রজেশ্বরের মতন পিতা স্বর্গঃ পিতা ধর্মঃ ব'লে নিজের মনকে সংযত করতে চেষ্টা করতে লাগলো। এই পিতৃপাপের প্রায়শ্চিত্ত কি—এই ভাবনায় সে ডুবে রইলো।

পরদিন প্রত্যুষে প্রিয়তোষ নিত্যকার নিয়মিত অভ্যাসবশে

বেড়াতে বাহির হ'য়ে গেছে। সেই অবকাশে কৃষ্ণকলি এসেছে প্রিয়তোষের ঘরখানিকে গুছিয়ে রেখে যেতে। কৃষ্ণকলি সব ঝাড়পোছ ক'রে প্রিয়তোষের চটিজুতা জোড়ার উপর মাথা ঠেকিয়ে প্রণাম ক'রে যেই মুখ তুলেছে অমনি দেখলে দরজার কাছে দাঁড়িয়ে আছে প্রিয়তোষ এবং তার চোখ থেকে স্নেহার্দ্ৰ বেদনা ঝ'রে পড়ছে। আর তখন তাদের বাড়ীর পাশে রাণীর বাড়ীতে নহবতের শানাই বিনিয়ে বিনিয়ে বাজছে—কাল রাজকন্ঠা মাধুরীর অধিবাস ও গায়ে-হলুদ হবে। কালই বিয়েও।

প্রিয়তোষকে এতো শীঘ্র প্রত্যাবৃত্ত দেখে লজ্জা পেয়ে কৃষ্ণকলি ঘর থেকে চ'লে যাচ্ছিলো; কিন্তু প্রিয়তোষ দরজা জুড়ে দাঁড়িয়ে থেকে স্নিগ্ধ মৃদু স্বরে বললে—তুমি যেয়ো না কৃষ্ণকলি, তোমার সঙ্গে আমার কথা আছে।

কৃষ্ণকলি মাথা নত ক'রে এক পাশে স'রে দাঁড়ালো।

প্রিয়তোষ বলতে লাগলো—বেশী কথা বলবার সময় নেই। তোমাকে আমার বিশেষ দরকার...আমার জন্তে এক রাজকন্ঠা ও অর্ধেক রাজত্ব স্থির হয়েছে, জানো; কিন্তু তার চেয়েও আমার কাছে তুমি বেশী আবশ্যিক। তুমি আমার সঙ্গে যাবে? এই বাড়ীর সঙ্গে সম্পর্ক একেবারেই চুকিয়ে যেতে হবে বোধ হয়; তোমার সে ক্ষতি আমি যত্ন দিয়ে পূরণ করবো, হয় তো কালে ভালবাসাও দিতে পারবো। তুমি আজকের দিনটা ভেবে দেখো...কালকে গায়ে-হলুদ, কালই বিয়ে, তার আগে তোমার অভিমত আমাকে জানিয়ে.....

প্রিয়তোষ দরজা ছেড়ে স'রে দাঁড়ালো। কৃষ্ণকলি ধীর কল্পিত পদে ঘর থেকে বেরিয়ে অন্ধকার লাইব্রেরীর পুস্তকারণে গিয়ে লুকালো। এ কী অসম্ভাবিত অভাব্য অঘটন-ঘটনা? এ যে ছুরাশারও ছুরাশা! এতো বড়ো সৌভাগ্য তার জন্ম বিধাতা নির্দেশ ক'রে রেখেছিলেন! কিন্তু কাকাবাবু আর কাকীমা যে রাগ করবেন; বিশ্বাসঘাতক নিমকহারাম মনে করবেন! সে যে অসহ, সে যে অতি গর্হিত অণ্ডায় অরুতজ্ঞতা হবে। কিন্তু উনি যে আমাকে চাচ্ছেন; আমাকে তিনি তো মিথ্যা ব'লে প্রলোভন দেখান নি, তিনি যে আমাকে ভালো বাসেন না, কুরূপাকে ভালোবাসা যে শক্ত, সে-কথা তো তিনি গোপন করেন নি, তবু তাঁর আমাকে আবশ্যক আছে বলছেন, এ আদেশই বা আমি অমান্য করবো কি ক'রে?

বিরুদ্ধ চিন্তায় উদ্বেজিত হ'য়ে কৃষ্ণকলি কেঁদে ফেললে। সেদিনটা সমস্তই সে একলা হ'তে পারলেই চোখের জল ফেলে ফেলেই কাটালে।

আজ প্রিয়তোষের গায়ে-হলুদ। ভোর বেলা থেকে দুই বাড়ীতেই নহবৎ বাজছে।

মনমোহিনী প্রত্যাষে উঠে দেখলে আজ কৃষ্ণকলি তার নিয়মিত সেবায় উপস্থিত নেই। সে মনে করলে, আজ সে

অসময়ে আগে জেগেছে তাই কৃষ্ণকলি এখনো এখানে আসে নি।
মনমোহিনী উঠে কৃষ্ণকলির ঘরে গিয়ে দেখলে, সেখানেও কৃষ্ণকলি
নেই। মনমোহিনী স্নানের ঘরে গিয়ে দেখলে সেখানেও
কৃষ্ণকলি নেই। সে দাসীদের ডেকে তুলে বললে—দেখ্ তো
কলি কোথায়? তাকে ডেকে দে, সব জোগাড় করতে হবে।
আমি চট্ ক'রে মাথায় জল ঢেলে আসি।

দাসীরা সমস্ত বাড়ী খুঁজেও কৃষ্ণকলিকে দেখতে পেলো না।

মনমোহিনী ফিরে এলে দাসীরা বললে—দিদিমণিকে তো
কোথাও দেখতে পেলু নি।

মনমোহিনী অল্পক্ষণ অবাক হ'য়ে থেকে বললে—দেখ্ দেখি
অনাথ-আশ্রমে গেছে কি?

দাসীরা বললে—সেখানেও দেখা হয়েছে, সেখানে নেই।

—অন্নপূর্ণার মন্দিরে?

—না, সেখানেও নেই।

মনমোহিনী চিন্তিত হ'য়ে বললে—দেখ্ তো তাদের বড়ো
দাদা-বাবু বেড়িয়ে ফিরেছে কি না।

একজন দাসী দেখে এসে বললে—দাদাবাবু এখনো ফেরে নি।

কৃষ্ণকলির অনুসন্ধানে সমস্ত বাড়ী ব্যস্ত চঞ্চল হ'য়ে উঠলো।

প্রিয়তোষের সম্বন্ধে কারো কোনো উদ্বেগ বোধ হয় নি, সে
বেড়াতে গেছে, এখনই ফিরবে।

বেলা বেড়ে উঠছে। কৃষ্ণকলি আর প্রিয়তোষ কারোই
দেখা নেই। তখন অল্প অল্প ক'রে উভয়ের অদর্শন সকলের

মনে একই সূত্রে গ্রথিত হ'য়ে উঠতে লাগলো। প্রথমে সন্দেহ, ও বেলা বৃদ্ধির সঙ্গে সঙ্গে সন্দেহ প্রত্যয়ে পরিণত হ'লো।

মনমোহিনী নাক সিঁটকে রামযাদুকে বললে—আরে ছ্যাঃ! প্রবৃত্তিকে যাই বলিহারি! শেষকালে ঐ কলে পেত্নীতে মন মজলো! আমরা মনে কর্তাম ছুঁড়িতে বুঝি ভালো!

রামযাদু নিফল ক্রোধে গর্জন ক'রে উঠলো—আরে ঝাড়ু মারো ছোটো জাতের মাথায়! ছোটো লোক আর কতো ভালো হবে! আর এ বেটা তো কুলাঙ্গার! যেমন মাতৃবংশে জন্ম!

কিন্তু রামযাদুর তখনই মনে হ'লো কাশীর জ্যোতিষী পরাণ-বাবুকে ব'লেছিলো কৃষ্ণকলির সঙ্গে থাকোহরির চেয়েও সূপাত্রেয় বিবাহ হবে। সেই সূপাত্র কি তারই পুত্র এই প্রিয়তোষ!

মনমোহিনী নিজের মাতৃগর্বে স্ফীত হ'য়ে বললে—আমার বনমালী, পচা, নেদো এরা তো সোনার টুকরো ছেলে! কিন্তু রাণী বেয়ানকে আমরা যে মুখ দেখাতে পারবো না।

রামযাদু বললে—গায়ে-হলুদের আগে গেছে এই এক রক্ষে!

শীঘ্রই প্রিয়তোষ ও কৃষ্ণকলির পলায়ন-ব্যাপারের সংবাদ শহরময় ছড়িয়ে পড়লো। দু'বাড়ীর লজ্জায় অপমানে নহবতের বাকুরোধ হ'য়ে গেলো।

পরদিন প্রভাতে কাগজে কাগজে সংবাদ প্রকাশিত হ'লো, রায়বাহাদুর রামযাদু মুখোপাধ্যায় জ্যেষ্ঠ পুত্রের সঙ্গে অসবর্ণ বিবাহ দিয়েছেন; উপকারক পরাণ-বিশ্বাসের ঋণ এই মহৎ

উপায়ে পরিশোধ করেছেন। সমাজসংস্কারক কাগজগুলোতে রামঘাতুর জয়জয়কার ও রক্ষণশীল কাগজে নিন্দা বিঘোষিত হ'তে লাগলো।

রামঘাতু আপিসে যেতেই আপিসের সাহেবেরা রামঘাতুর করস্পর্শ ক'রে অভিনন্দন করলে—We congratulate you, Rai Bahadur, for your very bold and generous act. It's just like you. We wish the happy pair good luck and unhampered happiness.

রামঘাতু যেনো নিজের সংকর্ষের প্রশংসায় সুখী ও অপ্রতিভ হয়েছে এই রকম ভাব দেখিয়ে একটু শুধু হাসলে।

রামঘাতু বিকালে বাড়ী ফিরে গিয়েই দেখলে তার বাড়ী ব্রাহ্ম ক্রিষ্টান্ অগ্রসরমতাবলম্বী হিন্দু বহু লোকের সমাগমে ভ'রে উঠেছে, সকলে তাকে দেখ'বামাত্র প্রশংসার ধারা বর্ষণে অভিভূত ক'রে তুললে। একজন ব্রাহ্ম বললে—আপনি অসামান্য সাহস ও গ্ৰায়পরতা দেখিয়েছেন, রায়-বাহাদুর। তবে বিবাহটা সমাজকে দেখিয়ে বাড়ীতে দিতে পারলেই আপনার যোগ্য কাজ হ'তো।

একজন দো-মনা না-ব্রাহ্ম না-হিন্দু গোছের লোক বললে—তা এই বেশ হয়েছে...সাপও মরলো, লাঠিও ভাঙলো না...বিয়েও হ'লো অথচ হিন্দু গোঁড়াদের একটি কথা বলবার জো রইলো না...রায়-বাহাদুরের বাড়ীতেও বিয়ে হয়নি, আর রায়-বাহাদুর তাদের নিয়ে ~~স্বাহার~~ ব্যবহারও করছেন না...

একজন ব্রাহ্মণ বললে—তা তো সবই ভালো হ'লো, কেবল আমরাই মিষ্টান্নে বঞ্চিত হলাম।

উড়ে। ঠে গোবিন্দায় নমঃ বলতে ওস্তাদ রামযাছু হেসে বললে—বঞ্চিত হবেন কেনো, অনুগ্রহ ক'রে একটু বসুন, আমি জোগাড় দেখছি...ওরে জগা, শীগগির সরকার মশায়কে বল, ভীম নাগের দোকান থেকে পঞ্চাশ টাকার সন্দেশ আর ঞাংড়া বোম্বাই আম এক হাজার মোটরে ক'রে গিয়ে এখনই কিনে নিয়ে আসে...

একজন আগন্তুক হেসে বললে—শুধু আম-সন্দেশেই সারুলে চলবে না, রায়-বাহাদুর! একদিন পাত পেতে ভূরি-ভোজনের নিমন্ত্রণ রইলো। জ্যেষ্ঠ পুত্রের শুভ বিবাহ! কাঁকিতে কাজ সারতে দেবো না আমরা।

রামযাছু হেসে বললে—সে তো আমার সৌভাগ্য। আসছে শনিবারই হবে।

সেদিন ইংলণ্ডের রাজার জন্মদিন। সেদিন রাজভক্তি দেখাবার জন্তে রামযাছু অনাথ-আশ্রমে উৎসব ক'রে থাকে ও সেই উপলক্ষ্যে লোকও খাওয়ায়। চালাক রামযাছু এক টিলে দুই পাখী মারবার ব্যবস্থা ক'রে রাখলে।

ছাতের উপর সমস্ত লোক খেতে বসেছে। রামযাছু সকলের পাতের কাছে কাছে খাওয়া দেখে তদারক ক'রে বেড়াচ্ছিলো। চাকর এসে খবর দিলে—এটর্নীবারু এসেছে।

রামযাছু অভ্যাগতদের বললে—আপনারা ব'সে ব'সে খান, আমি এখুনিই ফিরে আসছি, আমাকে একটু মাপ করবেন...

স্বয়ং-যাচক নিমন্ত্রিতেরা আমের উপর কামড় বসাতে বসাতে বললে—বিলক্ষণ! পেট না ভরলে উঠবো এমন আশঙ্কা আপনি করবেন না...আঃ, আজ কী আনন্দের দিন!

রামযাদু নীচে নেমে গিয়ে এটর্নীকে দেখেই বললে—দেখুন অকৈতব বাবু, আমি আপনাকে ডেকে পাঠিয়েছিলাম একটা উইল করবো বলে; আমার জ্যেষ্ঠপুত্র প্রিয়তোষ আমার ত্যাজ্য পুত্র, সে আমার বিষয়ের এক পয়সাও পাবে না। এই মর্মে একটা উইল ক'রে আনবেন। আজ আমি এখন একটু ব্যস্ত আছি, কাল আপনার আপিসে না হয় যাবো। এখন আপনি আসুন, একটু জল খেয়ে যাবেন।

সেই সময় প্রিয়তোষ আর কৃষ্ণকলি জাহাজে সমুদ্রের অকুল জলরাশির উপর দিয়ে সিংহলের দিকে চলেছে। কালো জলের দিকে চেয়ে চেয়ে প্রিয়তোষ একবার কৃষ্ণকলির দিকে চেয়ে হাসলে।

কৃষ্ণকলি লজ্জিত মুখ নত ক'রে মৃদু-মধুর স্বরে বললে—তুমি হাসছো যে?

প্রিয়তোষ বললে—শরৎ-বাবুর শ্রীকান্ত ঠিক বলেছিলো যে, কালোর বুকো আলো আছে। কালো সমুদ্রের বুক থেকেই লক্ষ্মী আর অমৃত উঠেছিলো।

কৃষ্ণকলি কৃতার্থ হ'য়ে বললে—কিন্তু বিষও তো উঠেছিলো। সে-কথাটা ভুলো না।

প্রিয়তোষ বললে—হ্যাঁ, যিনি শিব শঙ্কর তিনি সেই বিষ জীর্ণ ক'রে জগৎকে সর্বদা রক্ষা করেন।

কৃষ্ণকলি সঙ্কোচ ও ব্রীড়ার সহিত বল্লে—তুমি আমাকে
এতো আদর করো, আমি লঙ্কায় মরে' যাই। আমি অনাথা
দরিদ্রা...

প্রিয়তোষ কৃষ্ণকলির হাত চেপে ধ'রে গাঢ় স্বরে বল্লে—
ইয়ং গেহে লক্ষ্মীর অমৃতবর্তির নয়নয়োঃ ।

কৃষ্ণকলি সুখের লঙ্কায় অভিভূত হ'য়ে বল্লে—আমি কুৎসিত
কালো...

প্রিয়তোষ কৃষ্ণকলির হাতে একটু চাপ দিয়ে বল্লে—

“কৃষ্ণকলি আমি তারেই বলি,

কালো বলে যারে গাঁয়ের লোক ।

কালো ? তা সে যতোই কালো হোক,

দেখেছি তার কালো হরিণ-চোখ !”

সমাপ্ত



